

PETRI GASSENDI
DISQVISITIO
METAPHYSICA.

Seu
DVBITATIONES,
ET INSTANTIÆ:

Adversus
RENATI CARTESII
Metaphysicam, & Responsa.



AMSTERDAMI,
Apud IOHANNEM BLAEV,
CIC IDC XLIV.

Series , ac Summa Meditationum , adversum quas heic
scribitur , habetur infra , Dubitatione prima in Me-
ditationem Secundam, Articulo i v. seu pag. 34.

AMVELI SORBERIO
P. GASSENDVS

S.

RAcio tandem satis, Sorbe-
ri;mitto scilicet quem jam-
dudum efflagitasti codicem
mearum adversus Cartesii
Metaphysicam Instantia-
rum. Nisi prius feci, caus-
n ad te scripsit præclarus ille juvenis,
ique amans Thomas Martellus, qui
consciis illum abiisse, exulasseque
ocul à me, & vix nunc per varias am-
ges rediisse in meas manus. Nempe
nici variè habuerunt, invicemque, ac
iam longè extra urbem, communicâ-
nt; neque te id latuit, qui significasti
xisse tibi Cartesium se, cùm est publi-
conquestus de scriptis adversum se li-
is, qui non in lucem emitterentur,
d privatim lectitarentur, meum sub-
tare præsertim voluisse. Quod tu ve-
ipsum non legendi modò sed & evul-
ndi licentiam deposcis, ut tibi sanè,
qui

qui sic me amas , qui sic deposcis , videbitur ; tametsi res mihi non videtur tanti. Quippe opus quidem conscripsi , ut amicis gratificarer , cùm non ferrent virum eo solùm fine habere voluisse ex me, aliisque privatas censuras, ut jactare publicè posset non carere se adversariis , qui reverâ habuerat nullos (me saltem non habuerat.) Sed cùm ipsis tamen amicis satisfecisse visus sim , mihi ipse non satisfeci. Cùm illi enim censuerint, ut quemadmodum priùs fueram contextus seriem insequutus , & Cartesius suas Responsiones singulis Epistolæ meæ articulis accommodârat , sic ordine eodem instarem in Responsiones singulas ; mihi tamen ipsi opus videbatur esse futurum longè concinnius , si proposito causæ statu , quæ dicenda haberem omnia speciali quadam cohærentéque dispositione contexerentur. Et excepere illi quidem , id demùm præstandum , si fortè Cartesius quidpiam deinceps reponeret , quod novam manum sollicitaret ; sed interim tamen est quamobrem

bre[m] verear, ne, qua res est compagine,
edendam censueris, non sit satis lectu-
tura jucunda. Tu tamen, ubi res legen-
o fuerit perspectior, id videris; nisi
uòd sum author, ut, si velle pergas,
uotquot fuerant articuli in mea Epi-
ola distincti, distinguantur jam, atque
scribantur Dubitationes totidem, ac
tituli fiant, qui & tædium levent, & ar-
umentis appositis, quid in unaquaque
contineatur, doceant. Nam tametsi Epi-
ola (alio fine scripta, quàm ut funda-
mentum disputationis sterneretur) non
c digesta fuerit, ut quilibet articulus
specialis quædam objectio, seu Dubita-
tio fieret, (aliàs siquidem unamquàm-
ue sua conclusione, suisque probatio-
ibus, tanquam numeris absolvissem)
ihilominùs quia sic res tulit, & Carte-
us me privatim monentem traduxit in
publicum jurgium, enitendum est, quan-
tum licet, ne res indecorè procedat. Cer-
è & quamvis urgeam nunc multa circa
Meditationem primam, non idè ta-
men distinguendas plureis Dubitatio-

nes cenſeo ; quandò initio circa ipſam non-niſi caput unicum fuit ; idque cùm vix dicere plura circa cæteras cogitarem , qui ſenſim tamen abreptus ſum ad commemorandum tam multa. Satis erit articulos Inſtantiæ facere diſcretos , ſummulis ſeu ad marginem , ſeu ad frontem appoſitis ; cùm & poſſit idem circa cæteras , ac etiam circa Præfationem , ſive Occaſionem ſcribendi præſtari. Nimirum ex hac diſcretione , appoſitioneque lux eſt affuſura : ac præmiſſo potiffimùm Elencho , ſive indice , quem ſi lectores percurrerint , poſſint ut ſummam operis noſſe , ſic deligere , ſi quid fortè ſit , quod cognoscere potiffimùm velint. Vale , & amicos optimos ſaluta. Parisiis v. Eid. Iun. M. DC. XLIII.

Candido & erudito lectori.



Enit in manus nostras, lector candide, summi viri Petri Gassendi Disquisitionis Metaphysica, cujus editionem tum ob subjectam materiam, tum ob Auctoris nec non Cartesii, in quem scripta est, famam summè fuisse expectitam scio. Obstitit tamen totum fere biennium viri optimi modestia, qui aliunde clarus postgenitis futurus, insuper habuit altercationis funem trahere; apud amicos tantum interioris notæ, quibus solis codicem suum manuscriptum communicarat, ostendens quàm facili negotio diluere posset adversarii ratiocinia, & acerbiora dicta videre. Sed tandem victus amici, ad quem misit codicem suum, importunâ efflagitatione, quippe qui nullum precibus finem faciebat, libertatem ipse fecit evulgandi. Spero, nec vana fides, magno eruditorum omnium plausu opus istud exceptum iri; ut pote quo nullû in isto scriptionis genere potuisset accuratius scribi. Quàm diligenter enim, doctissimus ille vir omnia rimatur adversarii dicta? quantâ solertiâ Cuniculos detegit? quanto acumine intricata solvit? quàm validè spicula in adversarium retorquet? quàm firma vestigia in lubrico & precipiti loco ponit? quanto judicio rem difficilem tractat? quàm doctè disserit? quàm modestè de se ipso loquitur? quàm lenis in adversarium, præ cæteris malè habentem virum, quem præ cæteris suspicere & revereri debebat? quantus nitor, quam-

quanta sermonis elegantia? Intererat sanè bonæ mentis stu-
 dioforum, ne tot numeris absolutus liber diutiùs premeretur,
 & natus in publica commoda privatis tantùm paucorum
 usibus inserviret. ἀγαθὴ γὰρ ἔστι καὶ βροτῶσι. Questio gravis
 est, digna proculdubio in quam ingenua & excelsa ingenia
 vires suas exerceant. Quì contendunt viri sunt omni exceptio-
 ne majores. Vnum doleo, Gassendum non fuisse satis notum
 Cartesio: unde vir bonus, ingeniosus, & cujus præclaris
 conatibus nemo non debet favere, cùm ex indole cæterorum
 philosophantium Gassendi indolem æstimaret, secus accepit
 verbulum unum & alterum atque ab illo fuerat benignè
 prolatum: Prehendens autem ἀφόρητον λάβω, factum est
 ut paulatim vehementissimè animo commoveretur, & sui
 oblitus, rationis quoque oblivisceretur; ad quam tamen erat
 in primis attendendum. Sed tu videbis, lector Candide, &
 judicabis. Non est quod te diutiùs morer. Hec enim in vesti-
 bulo præmittere volui ut te rogarem gratam habere operam
 nostram qualemcunque, & mihi extorquere ab auctore no-
 stro, quàm valebis apud illum gratiâ, Exercitationum Philo-
 sophicarum opus, quod ajunt immensa fruge refertum; cu-
 jus spes ante aliquot annos literatis est facta. Vale. E Typo-
 graphæio nostro.

Dubi-

Dubitationum, & Instantiarum.

I N D E X.

- S**cribendi Occasus, Pag. 1
 Responsio. 2
 Instantia 1. Instandi necessitas. 3
 2. Non agi heic de rerum Veritate, sed de ratiociniorum vi. 4
 3. Si Demonstrationes fuerunt, nihil fuisse necesse implorare Sorbonæ decretum. 6
 4. Non vituperandos, qui jactatas Demonstrationes non suspiciunt, aliiq; viis ad Dei, animæque naturam assurgunt. 8
 5. Demonstrationum vim non ex jactatione, neque ex aliorum ignorantia æstimandam esse. 10

In Meditationem I. quæ est, *De iis, quæ in dubium revocari possunt.*

- D**ubitatio Unica. De Methodo, qua omnis cognitio, seu vera, seu falsa, etiam adhibitis machinis, jubetur extrudi. 11
 Responsio. 12
 Instantia 1. Philosophum esse non jactatorem, sed studiosum sapientiæ. 13
 2. Falsè supponi omnia præjudicia posse exui, ac deinceps certissima evidentissimæque principia haberi. 14
 3. Itemque omnia præjudicia ita haberi aliquandiu dubia, ac falsa, ut deinceps prava consuetudo non detorqueat amplius mentem à recta rerum perceptione. 16
 4. In purganda ab opinionibus mente habendum delectum, ut in purgandis humoribus; nempe ut non omnes etiam laudabiles egerantur. 18
 5. Esse quidem omnem sensum fallacem; at non omnem sensationem falsam; neque eum, qui vigilat non certiorum esse, quod vigilet, quàm quod dormiat. 20
 6. Immeritò haberi Deum, quasi deceptorem, ut dubium faciamus, An non fortè in iis, quæ evidentissima, ac certissima nobis videntur decipiamur. 21
 7. Mentem perpetim in falsitatem conjici, ea spe, ut facilius ad veritatem assurgat. 23
 8. Injuriam recurri ad malum Genium, ut persuadeamur nos decipi, dum esse cælum, nos habere manus, cæteraque existimamus, aut plusquàm pro infaminiis habemus. 25
 9. Non concludi legitimè propositam Methodum legitimam esse. 26

In Meditationem II. quæ est, *De Natura Mentis humana: Quod ipsa sit notior, quàm Corpus.*

- D**ubitatio 1. De inutilitate superioris apparatus, ut quis inerat, se esse, quia cogitat; & ex isto, quasi principio omnia certò deducat; ac specialiter se non esse corpus. 26
 Responsio. 27
 Instantia 1. Fuisse omnia bona fide obiecta: etiam circa Ludificationem. 28
 2. Scepticos abs re saggillari, qui meliùs & actiones vitæ, & se quævisque reliquerunt: ac solùm de rebus verà obscuris, incertisque controversiam fecerunt. 30
 3. Ut quis inquirat, Quid ipse sit? Non esse necessarium, ut fictione, & opetosa molitione esse se, seu existere probet. 32
 4. Quæ summa, ac series istius, residuumque Meditationum. 34
 5. Frustrà desudari in stabiliendo, tanquam inconvulsam principium, illud Ego sum; ac illi præsertim, qui spe-

- Ipſolius ſit omni præjudicio.* 36
6. Vanitas apparatus ad illam confequutionem *Ego cogito, igitur exiſto.* 38
7. Ex hoc conſtituto principio cætera, quæ uoluntur omnia, connexionem neceſſaria deduci, falſum. 39
- Dubitatio 11.* De non demonſtrata anima incorporea, ex eo, quodd quiſpiam deceptus, & tamen advertens, affirmat ſe nihil corporeum in ſe reperire; & ne quidpiam quidem, quod ſit, quaſi ſpiritus, ventus, aut aliud corpus tenue. 41
- Reſponſio.* 42
- Instantia 1.* Eum, qui ſe nihil corporeum, ſed puram eſſe Mentem dicit, ſtomachari immeritò, ſi quis cum ipſo agens, alloquatur ut ſolam mentem. 42
2. Non probari Animam non eſſe corpus tenue, ſi nihil aliud, quàm ſupponatur nullum plauſe eſſe corpus in mundo. Et varia quidem, ſed vana eſſugia. 44
3. Demonſtrationem non eſſe, ſi quis, ut probet non habere ſe aliquid, quod ad corporis naturam pertineat, nihil aliud aſſerat, quam ſe à malo Genio deluſum, attendere tamen, & nihil tale poſſe affirmare. 46
- Dubitatio 111.* De non demonſtrata Anima incorporea, ex eo, quodd idem affirmet ſe pari modo deluſum non deprehendere, quodd uutriatur, incedat, ſentiat; ac deprehendat interim ſeſe cogitare. 47
- Reſponſio.* 48
- Instantia 1.* Nihil-ne impugnatum, ac propoſitum, quod fuerit reſponſione dignum. 50
2. Illum non demonſtrare, ſed quaſiſum petere, qui probaturus Animam non adoleſcere, debilitari, aut turbari cum corpore, nihil aliud dicat, quam uti Animam corpore, tanquam inſtrumento. 51
3. Poſtulari jure Demonſtrationes ab eo, qui ſe demonſtrare gloriatur; & malè remitti probandum in Meditationem VI, quod illic ſupponitur in iſta probatum, ubi tamen probatum non eſt. 52
4. Illum, qui dicit non habere ſe rationem, quare Animam dicat corpus tenue; non idcirco demonſtrare, quodd anima tenne corpus non ſit. 54
5. Non ex eo, quodd cogitationis, & corporeitatis diſtincti conceptus ſunt, probari res eſſe reiſpā diſtinctas; ac non debuiffe diſſimulari, quodd obiectum fuerat de Brutorum ratiocinio, deque cerebri ad ratiocinandum neceſſitate. 56
- Dubitatio 1 v.* De non probata confequutione illa, *Sum igitur præciſe res cogitans, id eſt Mens, Animus, intellectus, ratio.* 57
- Reſponſio.* 59
- Instantia 1.* De uſurpatione vocum Animæ, ac Mentis; deque cogitatione in utero, & per Lethargum. 60
2. Reſponſionem de ineptitudine cerebri in infante, aut lethargico ad rerum veſtigia recipiendā, nullam eſſe. 61
3. Iterum non præſtari heic, quodd in Meditatione ſexta ſupponitur præſtitum, ac vitioſam eſſe confequutionem, *Cognoſco me præciſe tantum rem cogitantem; Ergo ſum tantum res cogitans.* 62
- Dubitatio v.* De non probata Intellectus, & Imaginationis diſtinctione quaſi Intellectus ſine imaginatione ſit. 64
- Reſponſio.* 66
- Instantia 1.* Eum, qui cognofcit aliquid ſui non propterea ſe cognofcere totum. Et qui dicit ſe nihil agnoſcere in ſe, quodd in imaginationem cadat, non eum propterea ſuam naturam diſtinctiſſimè percipere. 66
2. Declinatam fuiſſe difficultatem de corporea imagine, ſine qua mens intelligere non poſſit. 67
3. Declinatam quoque illam de critério, quo diſcernatur, quando-nam imaginatione, quæ intellectus non ſit, aut intellectione, quæ non ſit imaginatio, quidpiam concipiamus. 69
- Dubitatio vi.* De Mente Brutis viſa aſſerenda, ſi Mens ſit res ſentiens, imaginans, &c. 71
- Reſponſio.* 73
- Instantia 1.* Difficultatem de Brutorum ratiocinatione declinatam immeritò fuiſſe. 73
2. Eſſe

2. Esse non criterium, sed petitionem principii circa distinctionem Mentis, & corporis, Quod illa dicatur *Res cogitans* istud *extensa*: saltemque esse, quod tota illius natura in *cogitatione*, huius in *extensione* consistat. 74

3. Iterum longe abesse, ut qui perspectum habet mentem cogitare, totam propterea, seu intimam mentis naturam perspectam habeat. 77

4. Non fuisse probatum intelligere mentem independentem à cerebro; etiam cum inter somnium se somnare advertit. 79

Dubitatio VII. De exemplo Ceræ: Quod detractis mente omnibus illius accidentibus, non propterea intima illius natura clare, distincteque, & intellectu quidem absque imaginatione noscatur. 81

Responsio. 81

Instantia I. Nihil non fuisse jure obiectum ex ipsa verborum commemoratione. 83

2. Dissimulatas interim difficultates præcipuas de substantia ceræ manente occulta; ac substantia Mentis similiter,

quantumcumque cognitis, detractisque nonnullis accidentibus spectentur. 84

Dubitatio VIII. De Natura mentis non declarata; tantum abest, ut probatum sit, eam esse notiozem, quam corpus. 86

Responsio. 89

Instantia I. Difficultates præcipuas dissimulatas fuisse. 89

2. Quicquid de rebus cognoscimus, non esse intimam illarum naturam; quam voluit Deus latere nos; ut ejus notitiâ non perinde nobis, ac accidentium necessaria. 90

3. Effugium esse lepidum; tot proprietates mentis agnosci, quot res singulares possunt ab ea cognosci; ut inde arguatur *plenior* illius, quam ullius alterius rei haberi notitiâ. 92

4. Tota Secunda Meditatio in Syllogismum cogitur, ut ratiocinationis imbecillitas magis pateat; ac varia notantur circa id quod *Mens* dicitur esse *notior, quam corpus*. 94

In Meditationem III. quæ est De Deo,

Quod existat.

D *Vbitatio I.* De habenda Regula, non qua statuatur id esse verum, quod clare, distincteque percipimus; sed qua cognoscamus nos ita clare, & distincte percipere, ut non fallamur. 95

Responsio. 97

Instantia I. De connexion Meditatorum, & quæ pugnancia consequantur ex Regula heic supposita, & non habitâ, quæ supponitur futura, de Deo notitia. 98

2. Declinatam fuisse, dissimulatamque difficultatem præcipuam quæ fuit adversus Regulam, applicationemque illius objecta. 100

3. Desiderari adhuc Regulam, sive Methodum, qua putantes nos aliquid clare, distincteque percipere, certi simus omnia esse circumspicienda, ut nihil pos-

sit suboriri, unde errasse deprehendamus. 102

Dubitatio II. De adventitia omnium Idearum origine, etiam Chimærarum; etiam Rei, Veritatis, cogitationis. 103

Responsio. 105

Instantia I. Declinatam fuisse difficultates præcipuas, quibus efficiunt non esse ideas, nisi adventitias; & quo artificio aliarum idearum in exemplum assumptarum, aliarum prætermisissarum. 105

2. Declinatam specialiter quod obiectum fuerat circa Ideam Rei non formatam, nisi ex perspectis singularibus, præhabitisque illorum ideis: Et, Eum, qui postquam affectavit exuere omnia præjudicia, deprehendit in se aliquas ideas, dicere non posse eas esse innatas. 107

* * *

Dubi-

- Dubitatio* 111. De adventitia Idearum origine, ex iis, quæ cæco & furdo defunt comprobata: Et de Idea unica Solis, quæ sensu, habita, ratione ampliatur. 109
- Responsio.* 110
- Instantia* 1. Objectionem factam de cæco, & furdo esse insolutam. Neque ex quibusdam solum propositis, id quod intenditur, legitime concludi. 111
2. Difficultatem præcipuam de Idea Solis dissimulatam. Ideam propriè imaginem esse. Aliqua per veram ideam percipi, aliqua vi consequutionis. 113
- Dubitatio* IV. De Idea substantiæ non propria, & per accidentia, ac instar ipsorum: Deque idea Dei desumpta ex rebus, earumve perfectionibus. 115
- Responsio.* 118
- Instantia* 1. Videri intellectionem non posse ab imaginatione sejungis; & eandem esse, sive observari in utraque imaginem. 119
2. Falsum videri substantiam non imaginatione, sed intellectu solo percipi; & quam habemus illius ideam, non pendere ab iis, quas habemus accidentium. 121
3. Qua ratione videantur primi homines Dei Ideam habere potuisse, si non habuerunt ingenitum; & ut ratiocinetur, qui habere se ingenitam putat. 123
4. Dei, cum insuitus sit, non haberi veram ideam. Infinitum negatione sola cognosci. Vnde sit ideæ ampliatio. Injuriam negari forè perpusillum Deum, si major non sit, quam à nobis intelligatur. 126
- Dubitatio* v. De illo effato, *Nihil est in effectu, quod non sit in causa*, intelligendo de causa materiali. Et, quatenus verum esse possit, tantum saltem esse debere realitatis formales in causa Idea, quantum objectiva in idea est. 128
- Responsio.* 130
- Instantia* 1. Haud jure relinqui regiam viam, qua Dei existentia probatur ex effectibus in universo manifestis; ut per vocatam objectivam ideæ realitatem probetur. Realitatis vocem improprie usurpari. 130
2. Videri Ideam cum sua realitate objectiva sese habere ut figuram ceræ impressam cum sua sigilli representatione; aded ut, quemadmodum figura representativa est, sigillum representabile; sic idea habeat realitatem objectivam, seu representationem causæ; ipsa causæ realitatem formalem, seu representabilitatem. 132
3. Dissimulatas difficultates fuisse: Et quatenus verum, aut non verum sit præexistere effectum in causa, ut de objectiva ideæ realitate concludatur. 134
- Dubitatio* VI. De non habente ex se sui ipsius ideam mente (quæ non videatur posse seipsam magis intelligere, quam oculus seipsum videre) & neque Dei, neque Angelorum, neque corporearum possibilibus rerum. 137
- Responsio.* 136
- Instantia* 1. Non ineptiendum. Difficultates declinatas fuisse. Omnem ideam esse imaginem: quare in intellectu, non minds, quàm in imaginatrice imaginem esse. 140
2. Probatum non fuisse, *idem non agere in seipsum*, suggillari immerito, & retorqueri in doctorem culpam. In circumductione turbis non agere idem in seipsum. 141
3. Nihil confectum fuisse, cum objectum est, dictam esse mentem posse deducere ex se ideas rerum corporearum: neque responsum fuisse ad difficultatem, quæ proposita fuerat ea de re. 142
- Dubitatio* VII. De Capitali Demonstratione pro Dei existentia ex præcedente apparatu; ad cujus imitationem conficiatur existere reipsa infinitos Mundos, quorum habita est idea ab antiquis Philosophis. 144
- Responsio.* 147
- Instantia* 1. Capitalis illa Demonstratio proponitur formâ Syllogistica; ejusque imbecillitas universè primùm, & variè monstratur. 147
2. Monstratur deinde speciatim, ac variè in majore Prosyllogismi propositione. 149
3. Similiterque in Minore, sive Assumptione. 151
4. Ac

4. Ac rursus in Sub-assumptione; ubi & de Consequutione pro existentia infinitorum Mundorum. 153
5. Falsum, quam habemus ideam Entis infiniti repræsentare reverâ non partem, sed totum infinitum. Et qui differat idea, quam Deus habet sui, ab ea, quam homo habet de Deo. 156
- Dubitatio VIII.* De subsidiaria Demonstratione, ex eo, quod, Qui sibi deesse sentit aliquid, inferre debeat dati Ens, quod sit infinitè perfectius. 158
- Responsio.* 160
- Instantia 1.* Dissimulatam difficultatem fuisse circa illam consequutionem, Si unum alio perfectius est, igitur illud est infinitum. 161
2. Committi semper Paralogismos, quibus, Ex esse actuali ideæ colligitur esse actuale rei; ex similitudine cognitionis, quæ possit adhuc crescere, infinitudo cogniti, ex eo, quod aliquid in idea est, existentia illius, ut causæ, 162
- Dubitatio IX.* De alia subsidiaria Demonstratione, ex eo, quod aliquid fieri, aut existere non posset, si Ens infinitum non existeret; quodque partes temporis sint inter se independentes. 165
- Responsio.* 168
- Instantia 1.* Non fuisse demonstratum in antecedentibus esse Deum creatorem; ut neque, esse Deum causam rerum, eo modo, quo Sol lucis causæ est. 169
2. Remanere Paralogismum ex assumpta Temporis conditione, seu natura alia, quam sit. 170
3. Variè peccare demonstrationem, ex independentia partium temporis inter se, deductam. 173
4. Non agi heic de veritate Rei ipsius, sed de vi Ratiocinii, adversus quam quæ objecta præfixim fuerant, aut insoluta sunt, aut intacta. 176
5. Prave detortum, quod objectum fuerat de progressu infinito in causis essentialiter, & accidentialiter subordinatis. 177
6. Non ex eo, quod perfectio aliqua mente ampliatur, illam ampliata reipsa dari. 178
- Dubitatio X.* De modo impressionis ideæ Dei in mente, ut notæ impressæ ab Artifice, cujus similitudinem meus gerit. 179
- Responsio.* 181
- Instantia 1.* Quæ conclusa ad calcem Meditationis III, Syllogistica formâ exhibentur, ut quid virum habeant, uno prospectu pateat. 182
2. Falsum, ideis, quas de rebus habemus, nihil posse addi, aut adimi. 185
3. Falsum, nihil addi posse ideæ, quam de Deo semel habemus. Quo sensu rerum essentia sint indivisibiles, etiam divina: Et de divinis attributis. 187
4. Declaratur variè, ut habita semel de Deo idea ampliatur. 189
5. Difficultatem lepidè elusam; quasi agatur de idea, quæ sit non similitudo artificis, sed nota peritæ illius. 192
6. Debere in imagine non omnimodam quidem, sed saltem tamen aliquam esse similitudinem cum eo, cujus est imago. 193
7. Prætextu comparationis Trianguli non appositæ, declinatam difficultatem de iis, qui ideam Dei vel nullam habent, vel eandem non habent. 195

In Meditationem IV. quæ est, De vero & falso.

D *Vbitatio 1.* De creata à Deo facultate judicandi erroris non immuni; deque rejecta à Physica causarum finalium consideratione. 198

Responsio. 200

Instantia 1. Difficultatem pro more dissimulatam circa creationem facultatis errori obnoxia. Id statim tanquam

principium, quod inferius probandum sit: ac supponi demonstratum, quod demonstratum tamen non fuit. 201

2. Necessariam maxime finem considerationem in Physica, ut Deus tum Rector, tum Author Vniuersi agnoscat. 203

3. Non esse incompettos hominibus om-

- neis finis Dei; idque vel ex variarum partium corporis humani finibus constare. 205
4. Inexplicabileis esse difficultates propositas de causa efficiente valvularum cordis; cum tamen finis, siue usus videatur perfectissimus. 206
5. Falsum, Si quis ab utero absque omni sensuum usu maneret, habiturum easdem (ac etiam puriores) rerum ideas, quam habeat usus sensibus. 208
- Dubitatio* 11. De iudicandi facultate errori obnoxia homini tributa à Deo, qui tamen immunem tribuere illi poterit. 209
- Responsio.* 211
- Instantia* 1. Difficultatem declinatam fuisse. Comparationem Mundi cum Republica, in qua præstet neminem esse civem malum, fuisse appositam; non item illam cum homine, cuius nulla pars oculus non sit. 212
2. Difficultatem iterum dissimulatam adversus imbecillitatem Ratiocinii, quo facultas iudicandi, quæ est in homine, concluditur esse perfecta. 213
- Dubitatio* 111. De Causa erroris, vel falsitatis: Si-ne ex eo, quodd voluntas, aut iudicandi facultas latius pateat, quam intellectus. 215
- Responsio.* 217
- Instantia* 1. Vitandæ confusionis gratiâ debere intellectum, & voluntatem ita distingui, ut quicquid cognitionis, & iudicii est, ad intellectum pertineat, quicquid appetitionis, electionisque, ad Voluntatem. 218
2. Progressus Intellectus à prima operatione in secundam, & ab hac in tertiam, eamque multiplicem; absque ulla actionum voluntatis intermissione. 219
3. Omnem actionem voluntatis supponere intellectus de re expetenda, aut non expetenda iudicium; etiam cum ipsi intellectui imperat, ut diiudicet aliquid. 220
4. Non parere latius voluntatem, quam Intellectum (imò nec tam late) & obiectum-ne meritis propriæ sententiæ amor fuerit. 222
5. Non nasci errores ex eo, quodd voluntas, aut etiam iudicium, latius pateat, quam intellectus, aut simplex apprehensio. 224
6. Indifferentiam intellectus videri radicem indifferentiæ voluntatis, in qua est libertas; & hanc ab illo determinari; ac non tamen libertatem; quam libertatem esse, cum voluntas hæret summo bono clarè respecto. 226
7. Ut voluntas corrigatur, corrigendum prius intellectus iudicium, ex correctæ apprehensione rerum: Et Voluntatem non imperare intellectui, nisi ipsomet prælucente. 228
8. Quatenus falsitas in rebus sit; cum non sit propriè, nisi in intellectu. 230
- Dubitatio* 1V. De Desiderata adhuc Methodo, qua agnoscamus nos ita clarè, distinctèque aliquid percipere, ut periculum ne erremus, non subsistat. 231
- Responsio.* 232
- Instantia* 1. Ut agnosci posset, an promissa Methodus foret tradita, fuisse præcipuas Meditationum particulas sigillatim expendendas. 232
2. Circulum commissum, probando, esse Deum, ipsamque veracem, quia clara, distinctaque est ejus notitia; Et, Notitiam Dei esse claram, distinctamque, quia Deus est, ipseque verax. Desideratam denique Methodum adhuc desiderari. 233

In Meditationem V. quæ est, *De essentiis rerum Materialium;*
& iterum de Deo, quod existat.

- D**ubitatio 1. De cognita ex sola quantitate, figura, &c. rerum Materialium essentia, de quæ attributa ideis, ac Universalibus æterna, immutabilique natura. 236
- Responsio.* 238
- Instantia* 1. Visam hand immeritò fuisse tractationem de essentia rerum materialium admodum jejunam. 240
2. Naturas rerum æternas, ac reales nullas

nullas esse; & quas, ut ideas, habemus in mente, ab ipsa mente ex inspectis rebus singularibus fieri. 242

3. Falsum, ideas figurarum Geometricarum non esse hausas à sensibus: ac dari in mundo taleis posse, quales à Geometris considerantur, h. e. indivisibiles. 244

4. Falsum, experiri perum habere se Trianguli ideam, priusquam triangulum, aliamve figuram, ex cujus analogia ratiocinetur, viderit. 245

5. Animalis, aut alterius rei, quæ sensu percepta non fuerit, nullam esse in Mente ideam, experientiâ ipsâ convinci. 246

Dubitatio 11. De probata Dei existentia ex eo, quod Ens summe perfectum existentiam sic exigit, ut Triangulus æqualitatem trium angulorum cum duobus rectis. 247

Responsio. 250

Instantia 1. Existentiam non esse proprie-

tatem, neque esse ullius determinati generis rerum. 251

2. Paralogismum fuisse, ac perseverare, ob mutatam suppositionem ex statu ideali in statum realem. 252

3. Non alia ratione fuisse probatum Deum existere, quàm quia Deus existit. 254

Dubitatio IV. De Certitudine, ac veritate omnis cognitionis, quatenus asseritur pendere à clara, evidentique notitia, quod Deus sit, & quod sit verax. 256

Responsio. 258

Instantia 1. Scepticos non disputasse adversus apparentia (in quibus habuere propositiones Geometricas) sed adversus hypotheses, & Arrogantiam dogmaticorum. 258

2. Res divinas esse magis necessarias, ac non magis notas, quàm Geometricas; neque proinde harum evidentiam ab illarum evidentia pendere. 259

In Meditationem VI. quæ est, De rerum Materialism existentia, & reali Mentis à corpore distinctione.

D *Vbatio* 1. De Distinctione Intellectionis, & Imaginationis, 261

Responsio. 263

Instantia 1. Difficultates dissimularas. Falsum esse Chiliagonum clarè, distinctèque sine imaginatione intelligi, & Trigonum non clarius, distinctèque intelligi cum imaginatione. 264

2. Nullam intellectionem sine imagine corporea esse. Difficultatem dissimulatam. Intelligi etiam Deum, Angelum Mentem sub aliqua specie corporea. 266

Dubitatio 11. De sensu non semper fallere. 268

Responsio. 269

Instantia 1. Quis à præjudiciis cavere præsertim dicendus. 270

2. Etsi fallamur aliquando, dum turrimus eminens spectatam judicamus teretem; posse tamen non falli nos, dum eam cominus exploramus. 271

Dubitatio 111. De Capitali demonstra-

tione pro *Mentis existentia separatim à corpore*, Ex eo, quod ipsa sit Res cogitans, & corpus res extensa. 273

Responsio. 275

Instantia 1. Sponte revelari dissimulatam Paralogismum de separatione rerum ex separatione conceptuum. Falsè assumi ut demonstrarum, posse Deum quicquid à quoquam clarè, distinctèque intelligitur. 275

2. Verè objectum fuisse demonstrationis verba intelligi de corpore crasso, & ex membris constante; non de corpore tenni, aut quolibet. 277

3. Etsi ex 11 Meditatione colligatur Mentem *concipi*, ut substantiam, seu rem existentem per se; non colligitamen, esse propterea substantiam, sive rem per se existentem. 279

4. Demonstratio perturbare proposita, reducitur in Syllogisticam formam. 281

5. Vitiosus demonstrandi modus, ex eo, quod quis dicit se in seipso experiri. Paralogismum heic repeti, qui fuit inculca-

- culcatus in Meditatione 11. de separabilitate rerum ex separabilitate conceptuum. 282
6. Ex Responsis ad alios, colligi quid ad objectum de duabus Trianguli proprietatibus, quæ concipi quidem, sed existeret tamen separatim non possint, responderi potuerit. 284
7. Quaestionem malè iacturam. Non quæri, *an dua complexa substantia sint separabiles*; sed, *an duo quædam separatim intellecta sint dua complexa substantia*. 286
8. Frustrà recurri ad distinctionem adæquatæ, & inadæquatæ cognitionis; cum nulla adæquata sit, aut cognosci adæquata possit. 287
9. Quaestionem esse de speciali cogitatione, & extensione; ac probatum adhuc non esse, repugnare rei extensæ, corporeæve, ut cogitet. 289
10. Licet esse extensione sine cogitatione, & cogitatio sine extensione possit; nondum tamen esse probatum non posse simul utrumque esse in eodem tenui corpore, quale esse possit anima; idque etiam ex retortis exemplis. 291
11. Ex præcisione conceptuum proposita tam inferri mentem esse corpoream, imò confici potius inseparabilem, quam separabilem esse. 293
- Dubitatio 1v. De specie rei corporeæ, quæ non videatur recipi posse, n. mente incorporeæ; Et de Mente, quæ si coexistat corpori, seu rei extensæ, non videatur esse posse inextensæ.* 294
- Responsio.* 298
- Instantia 1. Artificiosa evasio. Ad intellectionem quoque requiri speciem, seu imaginem; & imaginem rei extensæ sine extensione non esse.* 299
2. Non infirmari comparationem ejus, qui dicit, *se clarè nosse naturam Mentis*, quia dicere potest, *Est res cogitans*, cum Cæco, qui dicit *se clarè nosse naturam Solis*, quia dicere potest, *Est res calefaciens*. 301
3. Ex eo, quodd quis dicere non possit, quid aliud sit Mens, quàm res cogitans, colligi non posse illam igitur nihil esse præterea. 303
4. Remanere difficultatem, quodd dicere Mentem rem non extensam, sit dicere non quid sit, sed quid non sit: ut si dicatur de Bucephalo, quodd non sit musca. Peti Principium. Autoritatem propriam assumi pro demonstratione. Difficultates præcipuas dissimulari. 305
- Dubitatio v. De commistione Mentis cum corpore, deque doloris sensu: Quodd scilicet fieri posse non videatur, si Mens inextensæ, & incorporeæ sit.* 307
- Responsio.* 308
- Instantia 1. Difficultates, quæ videntur in conclusiones objici, impetere ipsas rationes, seu principia, quæ debitas firmitatis non sunt.* 309
2. Petitum fuisse principium, & declinatitas difficultates circa objecta adversus commistionem Mentis, & sensum doloris, si mens quidem sit inextensæ. 310
3. Et si species extensæ sit, non sequi propterea eam esse tantam, quantum objectum, quod repræsentat. 311
4. Qua ratione imago rei visibilis magna in parva oculi capacitate imprimitur, eadem videri imprimi in longè minore cerebri, aut mentis. 313
- Præteritio. De quibusdam capitibus superstitibus ex postrema meditatione.* 315
- Responsio.* 315
- Instantia. Fuisse occasionem insultandi abs re, & præposterè (sed de industria tamen) captatam.* 315
- Conclusio.* 317
- Responsio.* 317
- Instantia. Fuisse objectiones absque duplicitate. Actum non de rerum Veritate, sed de Ratiociniorum vi. Benevolentia testatio gratè excipitur, ac refertur.* 318

I

DISQVVISITIO
METAPHYSICA.

Seu

Dubitationes, & Instantiæ,

Adversus

R E N. C A R T E S I I

Metaphysicam, & Responsa.

SCRIBENDI OCCASIO.

Eximio viro

R E N A T O C A R T E S I O

P E T R V S G A S S E N D V S S.



IR EXIMIE;

Beavit me Merfennus noster, cùm tuarum illarum sublimium de prima Philosophia Meditationum participem fecit. Quippe argumenti præstantia, ingenii perspicacia, nitorque dictionis mirificè placuit. Quare & lubens gratulor, quòd animo adeo excelso ac fœlici aggredieris scientiarum fineis provehere, & res omnibus retrò sæculis abstrusissimas enucleare. Id mihi fuit durum, quod ille præterea amicitiae jure exegit, ut ad te perscriberem, si quis fortassis scrupulus ingereretur, superessetve. Si quidem præsenſi nihil aliud me, quàm hebetudinem testaturum, si rationibus tuis non acquiescerem; vel potius quàm temeritatem, si tantillum etiam in oppositum, quasi repugnando, hiscere aude-rem. Annui tamen viro amico, ratus aliunde te non tam meum quàm illius consilium, æqui bonique consulturum; cùm eo nempe candore sis, ut faciliè putes nihil aliud me, quàm nudas tibi propo-

A

nere

nere meas dubitandi rationes voluisse. Testor sanè abundè fore, si illas vel ad calcem usque legere sustinueris: nam quòd te permovere debeant, ut vel de tuis ratiociniis minimum diffidas, vel ad respondendum tempus deteras, melioribus curis destinatum, ipse profectò Author non sum. Quin etiam non audeo, nisi cum rubore, illas coram te propalare, qui certo sum certior nullam esse earum, quæ non tibi pluries inter meditandum occurrerit, & quam tamen, certo consilio, vel contempseris, vel censueris dissimulandam. Profero ergo, sed ea mente, ut prolatas duntaxat velim; prolatas, inquam, non de rebus ipsis quas demonstrandas suscipis, sed de methodo ac vi demonstrandi. Profectò enim & ter-maximi Dei existentiam, & animorum nostrorum immortalitatem profiteor; ac hæreo duntaxat circa energiam illius ratiocinii, quo tu tam ista, quam alia Metaphysica cohærentia, probas.

R E S P O N S I O.

VIR PRÆSTANTISSIME,

Tam eleganti & accurata dissertatione Meditationes meas impugnasti, quæque ad earum veritatem illustrandam adeò profutura esse mihi videtur, ut multum me tibi debere existimem quòd ipsam perscripseris, multumque etiam R. P. Mersenno, quòd te ad scribendum incitavit. Quippe optimè novit vir ille rerum omnium studiosissimus indagator, & eorum præcipuè quæ spectant ad gloriam Dei promotor indefessus, nulla via melius cognosci posse an meæ rationes pro veris demonstrationibus habendæ sint, quam si aliquot ex iis qui doctrina & ingenio reliquos antecedunt, ipsas examinarent ac totis viribus impugnarent; ut deinde fieret periculum, an ego satis commodè ad omnia quæ ab iis propozita essent responderem. Idcirco quamplurimos ad hoc provocavi, à nonnullis impetravi, & gaudeo quòd etiam a te. Quamvis enim non tam Philosophicis rationibus usus fueris ad opiniones meas refutandas, quam oratoriis quibusdam artibus ad illas eludendas, hoc tamen ipsum idèò mihi gratum est, quòd inde conijciam non facile in me rationes afferri potuisse diversas ab iis quæ in præcedentibus aliorum objectionibus, quas legisti, continentur. Neque enim si quæ essent, ingenium & diligentiam tuam effugissent, & iudico te hic non aliud habuisse institutum, quam ut eorum me admoneres quibus meæ rationes, ab iis quorum ingenia sensibus ita immersa sunt ut à Metaphysicis cogitationibus prorsus

ab-

abhorreant, eludi possent, atque ita mihi dares occasionem iis occurrendi. Quamobrem ego hic non tanquam tibi Philosopho acutissimo, sed tanquam alicui ex hominibus istis carnis respondebo.

I N S T A N T I A.

P Rodiere è prælo superiore autumnò tuæ illæ Meditationes, quarum exemplum MS. Mersennus mecum communicarat. Adjuncta iis fuit Objectionum. Responsonumque congeries, quas me, cùm ad te scriberem, legisse, haud verè supponis: quippe oblatas à Mersenno videre prorsus nolueram; ne præoccupatus accederem ad Meditationum examen. Cætera inter tibi Objecta, meam quoque Epistolam satis prolixam editam vidi. Responsonem postquàm perlegi, mirari satis non potui, quo erga me genio fueris animatus. Nam quod conscripta quidem à me floccifacienda censueris, etiam mihi pro votis fuit; qui nihil meum tanti æstimo, ut habendum pretii alicujus putem. At non potui majorem quendam non desiderare candorem, quo, si nihil tibi videbatur alicujus esse momenti, debebas potius silentio, tenebrisque involvere, quàm propalando sic insultare. Ego certè ad te non ultrò, sed rogatus perscripseram; & dissentiendo à te, difficultates non publicè, sed privatim significàram. Ea scilicet mihi mens fuerat, ut tibi ingenuè, amiceque proponerem, quos observàram inter legendum mihi subnasci scrupulos; quòd, si res videretur tanti, posses lectionem facere aliquantò explanatiorem; nisi videretur, tum esset in te, ut rem planè suppresseres. Putabam enim velle te id exemplum mihi, aliisque legi, ut judicia varia expertus, providere posses, autographum—ne, priusquàm edi procurares, aliqua ratione foret emendandum. At verò, tu plenum benevolentiae consilium ita excepisti, quasi hostiliter provocassem; & nihil privatim rescribens, pugnam publicè instituisti; declarans reipsa, exemplum fuisse monstratum à te; non quasi ratum non haberes quicquid à te scriptum semel fuerat; sed quòd excitari velles aliquos, adversum quos posses vireis experiri. Annon proinde mihi fecisti propugnationem necessariam, qui visus es velle facere nihil aliud, quàm ex amico adversarium, & nihil tale cogitantem, in arenam compellere? Quod enim bona quædam verba præmiseris, subjunxerisque, illa, qua consentaneum est, excipio gratitudine (quantumvis tu me, ut puerum habueris, cui poculum circum contingitur melle, ut tetrum ab-

*I.
Instans
necessitas.*

finthii laticem perpotet.) Quod superest verò, sic gessisti te, ut periculum fecisse videaris, num me probares degenerem, cumque, qui tibi porrigerem herbam. Conditiones ergo accipio; qui in recessu non invidebo, si, prout cœpisti tibi plausum dare; ita ovationem, & triumphum captes. Hoc unum cavebo; ne, quia te agnosco offensum, quoddam te Meditationibus totis sub nomine Mentis loquentem nomine Mentis interpellarim, ut si fecissem ironicè, quod factum fuit prorsus ingenuè, quemadmodum postea memorandum est; ne, inquam, te amplius Mentem vocitem; sed te, tametsi non loquentem, nisi ut partem hominis, alloquar ut hominem totum. Tu me, ut voles; nam, per me quidem, integrum tibi est affari non modò ut Carnem, quæ vox solertiae tuæ occurrit, ut esset menti *ἀντίθετος*: sed etiam, ut saxum, ut plumbum, &, si quid putes esse obtusius. Quippe quoddam te heic respondere dicis, *Non tanquam mihi Philosopho acutissimo, sed tanquam uni ex hominibus carnis*; gratias primùm habeo, qualeis debeo; tibi que tanquam meliùs merenti *ακρίβειαν* *Πηγήν* reddo: ac deinde me, qui scripsi ad te, illum non inficior, cui ipse respondes. Nimirum ago longè simplicius, quàm ut distinctionem hanc nòrim; &, qui dissimulare nescio, duplicem personam mihi non assumo. Illam proinde ingenuè respuo, quam tu facis sepositam, aliamque sustineo, quam reliquam facis. Ac si ageretur quidem de ipsa rei veritate, ut putà de Dei existentia, animorumque immortalis natura; eo sanè casu abnegarem; quoddam videri posset ex Literarum Sacrarum sensu adversari caro spiritui; sed quia non amplius agitur, quàm de vi tui Ratiocinii, sicque privata tua causà est, ac tibi soli est repugnandum, non apparet cur mihi potius detrectanda persona sit, quàm ipsi Aristoteli, cum est adversatus Anaxagoræ, qui Meus vulgò appellabatur. Tametsi enim carneum me dicas, non idèò facis exanimem; ut neque tametsi te mentalem geras, te idcirco facis excarnem. Quare & permittendum tibi, ut pro genio loquaris tuo; sufficitque, ut Deo propitio, neque ego sim planè caro sine mente, neque tu planè mens sine carne; & neque tu supra, neque ego infra conditionem hominis simus; quamvis tu, quod est humanum recuses; ego id à me alienum non putem.

II.

*Non agi
heic de Re-
rum veri-
tate; sed
de Ratio-
ciniorum
vi.*

Quod præfaris porrò, *me non tam Philosophicis rationibus usum ad opiniones tuas refutandas, quàm oratoriis quibusdam artibus ad eas eludendas*, Repeto primum non agi heic de ipsis opinionibus, quæ tam meæ, quàm tuæ sunt, imò quæ sunt omnium piorum, rectèque sen-

sentientium communes. Quare neque animus fuit ullis seu Philosophicis, seu aliis rationibus uti ad eas refutandas, quas effusione sanguinis defendere paratus sum. Quæstio igitur est de energia tuarum rationum, quatenus illas deprædicas, ac pro demonstrationibus jactas; cum ex iis tamen omnibus, quas doctores proponere in hujusmodi argumento solent, illas duntaxat delegeris, quæ videntur omnium maximè infirmæ. Hinc objectiones non conjeci, quæ fieri præterea numerosæ potuerant, ut neque ipse adhibuisti tot rationes alias præclaras, quibus res potuerat fieri evidentior; sed ut persuasus ipse fuisti te demonstrasse speciali modo; ita opposui solum ea, ob quæ visus est inefficax modus. Deinde, quod vocas *Oratorias artes*, mihi nimium tribuis, qui artibus ignoro, ac oratorias potissimum; nisi artem voces id naturæ donum, quo sensa mentis exprimere dicendo quisque possumus. Solam certè naturam sequor, & ut lingua adfaret te, ita calamo ad te scribo. Si nunc enuncio, nunc interrôgo, nunc paucis, nunc pluribus urgeo; id non ex arte, sed sponte fit: & utcumq; in me acumen non sit, est tamen perpetua, constansque voluntas efferendi omnia quàm possum perspicuè. Vnde & quemadmodum nolim mihi fucum fieri in nocinio ullo verborum; ita longè absûm, ut facere velim; neque tu ullum ostendes locum, in quo non bona, ingenua, candida fide egerim, artemque oratoriam præhabuerim simplicitati. Ad *Rationes* quod attinet, nescio quas *Philosophicas* dicas; nisi non omnes Philosophicæ sunt, quæ germanæ, legitimæ, ad verum eruendum institutæ sunt, alicuique problematis, ut loquuntur, parti probandæ deserviunt. An nullas porrò nisi alienas, institutoque confirmando nihil conferentes usurpârim, lectores æqui dijudicent; ego certè is nunquam fui, qui me eas adeptum gloriarer, unde res planè conficeretur. Etsi enim facilius est falsi quidpiam convincere, quàm veri quidpiam demonstrare; novi tamen quanta caligo humanas mentes occupet; quanta sit ubique humanæ rationis fluctuatio, & incertitudo. Quamobrem, ut nihil statuo, quod haberi velim quasi inconcussum; ita nihil adior, quod me eversurum contendam; ac solum, ut me nihil demonstraturum confido, aut profiteor; ita caveo ne cuilibet dogmata tradenti temerè assentiar. Sic tecum egi: Nam & cum rationes tibi proponendas assumpsi, dubitandi rationes dixi; neque esse potui ea securitate, qua tu, dum divendidisti pro demonstrationibus, quas te asserendi habere es ratus. Neque verò est quorsum putes pellegisse me tuas Meditationes contradicendi

studio, aut concessisse postea ludicras solum dubitationes. Testor Deum ter Max. si me comparare ad legendum potui puriore affectu cognoscendarum, complectendarum, commendandarum demonstrationum, si non simpliciter exposui residuos in me scrupulos. Res, in qua versamur, magis seria est, magisque nostrâ interest, quàm ut arbitrer esse colludendum. De veritate agitur, quæ demonstratione paratur; Equis verò illam, si videat, non amet, vel potius non depercat? quis illi vel resistere, vel contradicere, si homo sit, possit? Quin-etiam, cum me nullius tuarum jactatarum demonstrationum vim experiri agnoscerem, quæsi ab aliquot viris magni nominis, & impensè doctis, qui Meditationes tuas legerant, ecquid-nam ipsis videretur; deprehendi autem illos, perinde ac me demonstrationis vim non sensisse. Quam-putas verò condoluimus, cum à te, tanto viro, & tanta in re, tantum expectantes, spe excidimus? Communis sanè hæc vox fuit, Fieri-ne potest, ut ille vir Mathematicis studiis innutritus, & quæ res demonstratio sit tantoperè sciens, eas rationes habeat, evulgetque pro demonstrationibus germanis, quæ à nobis tamen adedò attentis, adedò benè animatis elicere assensum nō valeant? An fortè elatus applausu, quo aliqua nova in Geometricis excogitavit, demonstravitque, ed adductus fuit, ut consideret posse se circa cætera, ac metaphysica præsertim, paris esse felicitatis? An nihili, ut cæteros, sic Ptolemæum quoque fecit, qui Mathematicen prosequutus, dixit se intactam Theologiam, Physicamque relinquere; istam ob materiæ conditionem instabilem, illam ob rerum divinarum incomprehensibilem naturam? An postquam in sua Synopsi tantam promissit segetem, putavit Lectores fore spe contentos, neque studiose requisituros utrum plenæ essent, an inanes spicæ?

III.

Si Demonstrationes fuerint, nihil fuisse necesse implorare Sorbonæ decretum.

Subiit postea quoque mirari, quàm securè Doctores summos summæ facultatis compellans, prædicaveris apud illos te fuisse rationes ita prosequutum, ut jam pro certissimis, & evidentissimis demonstrationibus illas ausus fueris proponere: addiderisque etiam taleis esse, ut non putes ullam viam humano ingenio patere, per quam meliores inveniri unquam possint; ac denique sollicitaris, ut ipsas pro demonstrationibus habentes hoc ipsum declarare, & publicè testari velint. Cum enim ea sacra Facultas extulerit hætenus, efferatque etiam-num tot viros tam magnos, ac in his rebus adedò sublimis, putasti-ne nullum hætenus exortum, qui tale quidpiam viderit: imò & nullum exortitum, qui videre quidpiam quàm tu meliùs, possit? Crediti-ne

disti-ne quotquot sunt, ac erunt, mutuari debere ex te, unde solemnia dogmata probent? Es-ne arbitratus totam Facultatem ignorasse, quousque rem ipsi demonstraveris, quemadmodum essent Christiani suadendi? Nam proferre te quidem quæ potueris hisce de rebus comminisci, nemo improbet, sed potius collaudet. Veritas quasi bravium est, & ut nemini non fas est ad assequutionem ejus adspirare, sic quisquis illam assequatur, ipsa operæ pretium est. At verò quæ commentus fueris existimare statim digna, quæ augustissima Facultas sic à te addiscat, quasi sine te Doctore cæca fuerit; & decreto suo ita approbet, ut dubitare de iis sit nefas; id denique mirum, ac stupendum est. Sanè, aut hoc est nimium de tuarum rationum vigore diffidere; aut potius illas pretio pretiosissimo æstimare, cum dignas ducis, quæ imperentur mortalibus omnibus, ipsisque aded conciliare majestatem adniteris, ut tibi viam sternere ad ingeniorum tyrannidem possis. Sed mihi crede, aut ratiocinium demonstratio non est, aut ex seipso elucescit; neque emendicanda autoritas est, qua persuaderi valeat; cum & vi propria assensum extorqueat, & nisi extorqueat, demonstratio non sit; neque autoritas faciat, ut pro demonstratione habeatur, sed ut conclusio, quæ ex vi præmissarum persuasionem non obtinet, ex autoritate dicentis obtineat. Quàm-proinde absuit sublimis Facultas, ut votis tuis annueret, quæ decretis non argumenta, sed conclusiones sancire solet! Novit quàm sit humana ratio inconstans, atque imbecilla, quare & ex ea decretorum firmitudinem non exquirat. Momentum ex Sacra Scriptura, aliisque fidei canonibus quærit; ipsas rationes (si aliquæ sint) cum suis momentis (si aliqua habeant) intactas penitus relinquit. Et non ignorat quidem nonnullas esse præclaras præ cæteris: sed cum illæ sint tamen quasi fumosæ faculæ ad fidei jubar, & quasi Solem comparatæ, ided cum fidei splendore, atque majestate ipsas non commiscet. Habet illas, ut quoddam genus probationis heterogeneum; existimatque Sacram fidem esse debere sibi ipsi solidissimum fundamentum. Plærumque etiam adhibere rationes existimat nefas; tum ne excellentia rerum credendarum imminuatur, si putetur humana ratio posse ad illam pertingere; tum ne impii arbitrentur nos iis induci ad credendum ea, quæ cur ipsi quoque ob rationum imbecillitatem, non credant, sibi ipsis videri excusabiles possint. In cæteris, non respuit quidem; sed eæne sint, annon sint demonstrationes, non præstituit. Novit alios aliis rationi-

rationibus capi; & cum aliquæ his, non illis; aliquæ verò non his, sed illis pro demonstrationibus habeantur; omnes, quantum valere possunt, finit, & columnâ fidei, tanquam inconcussa semel posita, illas circumexstrui, quales sunt, permittit. Hoc censu potuerunt tuæ quoque haberi; at dum haberi ipsas voluisti, quasi dogmata fidei, tantum abest, ut id feratur, quin interest potius, ut eæ refellantur. Nempe ne sint impii, qui existiment nos illarum vi potius, quàm fidei merito ad credendum induci; aut firmiores saltem rationes ex ipsismet Doctoribus repetere negligant, quos decrevisse putarunt, *Nullam viam humano ingenio patere, per quam meliores inveniri unquam possint.* Quo loco verba illa prætereo, quæ ad ipsorum unum es scribere ausus: *Quapropter, si verum hic sine invidia scribere licet, ausim sperare venturum tempus aliquando, quo illa opinio, quæ ponit accidentia realia, ut à ratione aliena, & incomprehensibilis, & parùm intra in fide à Theologis explodetur, & mea in ejus locum ut certa, & indubitata recipietur. Quod hic dissimulandum esse non putavi, ut &c.*

IV.

*Non vituperandos
qui iactant
sæ demonstrationes
non suspiciunt,
aliquæ viis
ad Dei animæque
notitiam
assurgunt.*

Adhæc mirari etiam subit, cur tuum ingenium ita evectum habeas supra conditionem cæterorum, ut si qui dissentiant abs te, dicas eorum ingenia ita immersa sensibus, & à Metaphysicis cogitationibus prorsus abhorrentia, &c. Nam quod supra sensus nihil sapiant, & metaphysicè nihil cogitè; quomodo potes dicere, nisi quia nō sapiunt, neq; cogitât tuo modo. Quæso te enim ecquæ-nam est Metaphysica cogitatio? De vi vocis nō disputo, quam Aristotelis Sectatores imposuere illi Philosophiæ parti, cujus membrū fuit Theologia ab auctore dicta. Theologia, inquam, naturalis, quæ ratione nititur, ut discernatur à supernaturali, quæ sola DEI revelantis auctoritate fulcitur. Dico solùm, cùm ea seu Metaphysica, seu Theologia, sit Platoni Dialectica, quasi quæ ratione utatur; ex quo factum est, ut nonnulli ex ejus Sectatoribus eandem Rationalem, ac Intellectualem appellaverint, putantes nempe res divinas non-nisi ratione intellectuque intelligi; idèd tuam illam cogitationem esse non posse aliam, quam Dialecticam, sive rationalem, ac intellectualem. Cùm tua ergo ratio, ac intelligentia occupetur heic circa Dei existentiam, ac mentis humanæ separabilitatem; idèd non potest tibi esse alia Metaphysica cogitatio, quàm ea, qua ratiocinaris, ac intelligis tum Deum existere, tum mentem separabilem esse. Igitur & cùm existimas alios à cogitationibus Metaphysicis abhorre, existimas illos nec ratiocinari, nec intelligere,

ligere, quòd Deus existat, aut Mens separabilis sit. Ecquonam verò argumento ductus id existimas, nisi quia ferre non potes opponi ab ipsis gloriari te nimium de tua ratione, ac intelligentia, quasi ea sit omnium perfectissima, nihilque opponi aut possit, aut debeat? Ac de cæterorum quidem ratione, & intelligentia, quatenus perfecta, imperfectave sit, non assumpsi heic disquirendum: hoc tamen dico, dum ratiocinantur, ac intelligunt existere Deum, mentemque humanam esse separabilem, sapere illos supra sensus, ipsorumque cogitationem non posse non Metaphysicam esse. Nam sensuum est quidem, quod sensibilia percipiant; sed quòd à sensibilibus ad intelligibilia progrediantur, & invisibilia Dei, ex iis quæ fecit, visibilibus intellecta conspiciant, hoc rationis est, atque intellectus. In eo differunt à te, quòd tu putas te absque præviis sensibus ad intelligibilia ferri, ac Dei, Mentisque non modò existentiam, separabilitatemque; sed etiam utriusque intimam naturam clarè, distinctèque intelligere; illi & habeant sensibilia pro gradu ad intelligentiam; & cum intelligant de Deo, Mentèq; separabili quòd sint; nò proinde profitentur intelligere se quid sint. Quandoquidem verò tibi non subscribunt, & circa tuum ratiocinandi, ac intelligendi modum difficultates quasdam proponunt, nec satis applaudunt, atque adulantur, tu id non fers, sed excandesces, sensibusque immerfos, & à cogitationibus Metaphysicis abhorrenteis, carnosque pronuncias. Quasi nimirum ipse solus Metaphysicus, sive Theologus naturalis sis, ac præter te unum nemo adnitatur evehere se supra sensus, & quam - maximè per naturam licet, abstracta intelligere; quasi tibi uni veritas sit cordi, nemoque illam assequi præter te aut curet, aut possit. Certè hac de re hæc tua sunt verba; *Quia nullas antehac Ideas eorum, quæ ad mentem pertinent, habuimus, nisi planè confusas, & cum verum sensibilem Ideis permixtas; hæcque prima, & præcipua ratio fuit, cur nulla ex iis, quæ de Anima, & Deo dicebantur, satis clarè potuerint intelligi, magnum me operæ - pretium facturum esse putavi, si docerem, quo pacto proprietates, seu qualitates mentis à qualitatibus corporis sint discernendæ. Quamvis enim jam antè dictum sit à multis, ad res Metaphysicas intelligendas mentem à sensibus esse abducendam; nemo tamen adhuc, quod sciam, qua ratione id fieri posset ostenderat; vera autem via, & meo iudicio unica ad id præstandum in secunda mea meditatione continetur: Sed quæ talis est, ut non sit satis ipsam semel perspexisse; diu terenda est, & repetenda, ut totius vitæ consuetudo res intellectualem cum corporeis*

confundendi contraria, paucorum saltem dierum consuetudine easdem distinguendi deleatur.

V.

Demonstrationum vim, non ex sui justificatione, neque ex aliorum ignorantia asseverandam esse.

Hac itaque tui de te opinione fretus alios despicias, comparasq; te, aut si quis tecum sentiat, cum illo, qui navigatione in Americam peracta referat esse Antipodas, ac majorcm mereatur fidem, quam mille, qui negent, ex eo solum, quod ignorēt. Et si posses quidē pari evidentia facere aperta quæ de tua illa ingenii navigatione ad nos refers, ac ille redire potest, (si modò qui negāt Antipodas esse, navigare cum ipso in Americam velint) quā passis velis iremus omnes, concederemusque in tuam sententiam? Nam fac nos, quod ais (tamen si secūs nobis videtur) nulla adjuncta ratione negare illam rationum tuarum vim: at saltem, cum non reculemus tecum navigare, imò ratiocinantem te κατὰ νόδον prosequamur, cur nusquam tamen hanc tuam vim Antipoda detegimus? An-ne pro Antipodibus expectandi nobis fuere Sciopodes, Enotocœtæ, Astomi, Pygmæi, & quæcumque Megasthenes, Daimachusque olim somniarunt. Dices nos non satis attentē, ac seriō tecum meditari, non abducere à sensibus mentem, non exuere præjudicia, atque idcirco te nostra iudicia prorsus recusare, & tanquam nullius momenti contemnere. Sed recusa tamen, & contemne, ut voles; Liceret nobis pari jure idem facere; sed hoc satis est, ubi quicquid potest à veritatis amantibus exigi præstiterimus, nullam tamen à nobis vim, qualis esse debet demonstrationis, sentiri. Dices tuas demonstrationes longiusculas esse Geometricarum quarundam instar, ac fieri solum evidentes, cum perceptæ integræ fuerint. Sed sunt, quales esse voluisti, longiusculæ, implicitæque; quæ sit nihilominus, ut nullæ Geometricæ sint, quæ se, ubi totam seriem perceperimus, evidentiā suā non prodant, & velimus, nolimus ad assentiendum mentem compellant; istæ autem tuæ, tametsi tota serie fuerint perspectæ, neque tamen nobis evidentes fiant, neque nos ad assensum trahant? An jure eas dicis non modo æquare, sed superare etiam Geometricas certitudine, atque evidentia? Et cum Evidentissimas dicas, ecquid demū erit per te evidens, si quod evidentissimum à te dicitur, sit adedò obscurum? Dices denique posse te meritò concludere non tam ea, quæ scripsisti, infirmari auctoritate doctissimorum virorum, qui ipsi sæpe perceptis nondum possunt assentiri, quàm e contra eorundem auctoritate confirmari, ex eo, quod nullos errores, sive paralogismos post tot accurata examina in demonstrationibus tuis annotarint. At, si, quia tibi verba non defuerunt, quibus, ut Scholarum mos est, circa argumenta disputabilia responderes, non es confessus ullos errores, paralo-

paralogismosve admissos; non propterea tamen authoritas illa confirmavit potius quàm suspecta aliquorum paralogismorum scripta reddidit; quatenus viri doctissimi non potuere illis toties perfectis assentiri. Quippe & illi existimârunt se annotasse varios; & quoties ratio aliqua sæpius perfecta, intellectaque (nisi te semper aquilam, cæteros omnes reputas noctuas) ad assensum non pertrahit; argumentum profectò est, eam demonstrationem non esse, ac paralogismum aliquem latere, quo, nisi vitium formæ sit, præmissæ saltem secus se, quàm supponantur, habeant. Et fac nondum fuisse paralogismum detectum; an quicquam repugnat, quin vel ipsi met, vel acutiores alii in posterum detegant, constante præsertim ea inevidentia, quæ sola obstat, ne hæcenus viri doctissimi assentiantur? Simile est certè, ac si defosso thesauro in loco, quem tu, & ego ignoremus, tu ex viso quodam terræ aggere inferas illeic thesaurû esse; neq; enim potuisse alia occasione illeic effodi, & aggeri terram. Si enim ego nõ assentiar, quoddam tamen nesciam, qua alia occasione terra illeic effodi, aggerique potuerit, non videã tamen cur nõ potuerit aliqua alia præter hanc esse: quonam jure tu ex mea ignorantia argumentabere occasionem tibi creditam veram esse, ac te incidisse in thesauri locum? Quasi verò non alius supervenire valeat, qui veram occasionem adrit, ac te, tibi nimium fidentem, hallucinatum fuisse ostendat? Verùm ex dicendis cognoscendum est, permittendumque Lectoribus, ut dijudicent, nulli-ne errores, aut paralogismi, non dico à viris doctissimis, in quorum censu me non habeo, sed à me, caligante licèt, fuerint in propositis tibi dubitationibus adnotati.

IN MEDITATIONEM I,

Quæ est .

De iis, quæ in dubium revocari possunt.

DUBITATIO VNICA.

De Methodo, qua omnis cognitio, seu vera, seu falsa, etiam adhibitis machinis, jubetur extrudi.

AC circa primâ quidem Meditationem, non est quoddam multum immorer; comprobo enim institutum, quo mentem tuam exuere omni præjudicio voluisti. Id unum non satis percipio,

pio, Quamobrem satiùs non duxeris, simpliciter ac paucis verbis incerta habere quæ prænoveras, ut ea deinde seligeres quæ vera deprehenderentur, quàm habendo omnia pro falsis, non tam vetus exuere, quam induere novum præjudiciũ. Et vide, ut necesse fuerit, quòd tibi ipsi faceres fidem, fingere Deum deceptorem, aut nescio quem malum Genium delusorem; cùm visum fuisset sufficere, humanæ mentis caliginem, solamve naturæ imbecillitatem causari. Fingis præterea te somniare, ut in dubium omnia revoces, & quidquid rerum agitur pro ludificatione ducas. Sed an propterea à te extorques, ut non vigilare te credas, & incerta falsa que habeas, quæ coram te sunt aut geruntur? Quicquid dixeris, nemo erit qui persuadeatur, te esse persuasum nihil esse verum ex iis omnibus, quæ cognoveris; ac tibi perpetuò vel sensum, vel somnium, vel Deum, vel cacodæmonem imposuisse. An non futurum fuisset magis & philosophico candore, & veritatis amore dignum, res, ut se habent, & bona fide ac simpliciter enunciare, quàm, quod obijcere quispiam posset, recurrere ad Machinam, captare præstigias, sectari ambages? Quanquam, quia tibi ita est visum, nolim amplius contendere.

R E S P O N S I O.

A Is te comprobare institutum quo mentem præjudiciis exuere conatus sum, utpote quod nemo fingere potest esse improbandum. Sed velles ut simpliciter ac paucis verbis, hoc est, perfunctoriè tantum id effecissem. Quasi scilicet tam facile sit omnibus se erroribus liberare quibus ab infantia imbuti sumus? & quasi nimis accuratè id fieri possit quod nemo negat esse faciendum? Sed nempe indicare voluisti, plerosque homines fateri quidem verbo tenuis præjudicia esse vitanda, sed tamen nunquam illa vitare; quia nullum studium aut laborem in hoc impendunt, nulla que ex iis quæ semel ut vera admiserrunt pro præjudiciis habenda esse arbitrantur. Tu certe hic illorum personam egregiè agis, & nihil eorum quæ ab ipsis dici possent omititis; sed interim nihil affers quod Philosophum redolere videatur. Vbi enim ais opus non esse Deum fingere deceptorem, neque nos somniare, nec talia, Philosophus putasset sibi addendam esse rationem cur illa non possint in dubium revocari; vel si nullam habuisset, ut revera nulla est, id non dixisset: neque addidisset, sufficere hoc in loco humanæ mentis caliginem, aut naturæ nostræ imbecillitatem causari; nihil enim prodest ad errores nostros emendandos quòd dicatur nos errare, quia nostra

nostra mens caligat, vel natura est imbecilla; idem enim est ac si tantum diceretur nos errare quia sumus erroribus obnoxii; & manifeste utilis est attendere, ut feci, ad omnia in quibus contingere potest ut erremus, ne ipsis temerè assentiamur. Non etiam dixisset Philosophus me, habendo dubia omnia pro falsis, non tam vetus exuere quàm induere novum præjudicium; vel prius probare conatus fuisset ex tali suppositione oriri periculum alicujus deceptionis. Sed tu è contra paulò post affirmas me non posse à me extorquere ut illa pro incertis, falsisque habeam quæ falsa supposui, hoc est ut novum illud induam præjudicium quod ne induerem verebaris. Nec magis miraretur Philosophus istiusmodi suppositionem, quàm quòd aliquando ut baculum qui curvus est rectum reddamus, illum in contrariam partem recurvemus; novit enim sæpe falsa pro veris utiliter sic assumi ad veritatem illustrandam; ut cum Astronomi Equatorem, Zodiacum, aliosque circulos in cælo imaginantur; cum Geometræ novas lineas datis figuris adiungunt, & sæpe Philosophi multis in locis. Qui autem hoc vocat recurrere ad machinam, captare præstigias, sectari ambages, atque, Philosophico candore, ac veritatis amore esse indignum, non certè ipse Philosophico candore, nec ulla ratione, sed Rhetorico tantum fuco uti se velle testatur.

I N S T A N T I A.

QUAM infensè, quàmque acerbè pauca mea verba exceperis, subnotare nihil attinet. Id initio statim observo; nisi satis erat meam probationem tam fastidiosè admittere; videri saltem te non debuisse meam illam vocem, *pauca verbis*, interpretari *perfunctoriè*; cum scilicet constet quantum differant *pauca verbis*, quod est *concise*, & *perfunctoriè*, quod est *oscitanter* enunciare aliquid. Sperabam vocem quoque illam, *Simpliciter*, interpretareris *stulte*; sed fuisti nempe humanior, contentus id diffimulare, quod dixeram me non satis percipere (quasi scilicet nihil condemnans, ac erudiri solum cupiens) ut inde unum statueres caput, ex quo me probares non-Philosophum. Porro si vox quidem Philosophi pro Sapiente usurpetur, ipsam tibi ultrò concedo, qui tantà sapis fiducia; at si nihil sonet aliud, quàm quod nominis Author voluit, dum, ut cæterorum jactantiam coargueret, dixit esse se non Sapientem, sed studiosum sapientiæ; non est cur mihi illam invidas, qui tametsi nihil sapiam, ex eo tamen solo affectu, quo sapere desidero, possum sapientiæ studiosus dici. Quare & cum dicis *me nihil asferre,*

I. Philosophum esse non jactantorem, sed studiosum Sapientia.

quod Philosophum redolere videntur; Esto id tuo sensu, quo credere me Philosophum absit; at dubitationes proponere, erudiri que peroptare, aliorum fortè sensu redolebit. Suggestis id ea occasione, qua dicis me egregie agere illorum personam, qui fatentur verbo tenus vitanda præjudicia, sed illa tamen nunquam vitant, quia nullum studium, aut laborem in hoc impendunt, nullaque ex iis, quæ semel ut vera admiserint, pro præjudiciis habenda esse arbitrantur. Ego verò, ut sum præfatus, nullius personam assumpsi, tantum abest, ut illorum sustinere voluerim, quibus me fingis patrocinari; addens me nihil eorum, quæ ab ipsis dici possunt, omittere; Cùm & tam pauca tamen dixerim, & de illis, quicumque, aut ubicumque vel sint, vel non sint, ne cogitaverim quidem. Mea ipsius est persona, quam egi, & si quæ mea fuit sententia, pleno candore illam exposui. Sed fuit hæc tibi ansa captanda, tum ut bilem exonerares, tum ut te unum esse probares, qui philosophum ageres; solus utpote eruditus vitare præjudicia, solus falsitatem exhorrens, solus veritatem requirens. Eapropter sanè eam ipse tibi de te opinionem fecisti, ut ex hac tua methodo nihil jam falsi tibi subrepat, nihil non verum excidat, sicque Oracula abs te, de quibus non sit dubitandum, fundantur. Siquidem non modò jactasti in capite ipso nullam viam patere humano ingenio, per quam rationes tuis meliores inveniri unquam possint; sed deinceps quoque passim commendasti illarum excellentiam, & ad calcem tandem pronunciaisti, nullam posse esse causam, cur nihil in ipsis reprehensum hætenus sit, nisi quia sunt omnino veræ, ac certæ; cum præsertim ipse ex nullis obscuris, ignotisve principiis, sed primum à summa verum omnium dubitatione, ac deinde ex iis, quæ menti præjudiciis liberæ, omnium evidentissima, & certissima esse apparent, gradatim deductæ sint, &c.

II.

Falso supponi omnia præjudicia posse exui; ac deinceps evidentissima, certissimaque principia haberi.

Cæterum quia hæc Meditatio de præjudiciis devitandis, demonstrationum tuarum arx est, ac veluti Equus Trojanus, è quo illæ prodcentes nullum non præsidium, quantumvis munitum expugnent: age exploremus quid id rei sit, hoc est retexamus initio primariâ rationationem. Illâ redigi in hanc formam posse minimè diffiteberis,

Qui mentem fecit liberam à præjudiciis omnibus, is non ex obscuris, incertisve principiis, sed ex evidentissimis, ac certissimis conclusionibus deducit.

Atqui ego mentem feci liberam à præjudiciis omnibus.

Igitur ego conclusiones, non ex obscuris, incertisve; sed ex evidentissimis, ac certissimis principiis deduco.

Cum ergo sic argumenteris, dicendū est quidem hoc loco de tua præ-

præsertim Assumptione; sed ut plenius constet, sit-ne aliquis paralogismus an-non, de Propositione est quoq; dicendum. Primùm itaq; in ipsa supponis *posse mentem liberam fieri a præjudiciis omnibus*: At impossibilis res videtur. In primis, quia memoria iudiciorum prius factorum, penesque ipsam depositorum thesaurus cùm sit, excuti à nobis pro votis non potest. Id in se quisque experitur, & ille nòrat optimè, qui artem non tam memorandi, quàm obliviscendi optabat. Videlicet facta iudicia ita habitu perseverant, & sigillòrum instar impressa sic hærent, ut illa ad placitum eluere, aut eradere in potestate nostra non sit. Deinde, sunt quidem præjudicia quædam, quæ mutari possunt; at sunt etiam quædam, quæ mutari non possunt; & ea, quæ mutantur, nò idcirco mentē à præjudiciis liberam faciunt. Nam cum omne iudicium feratur de re, quatenus ea menti apparet; efficitur, ut si res quidem eodem semper modo appareat, veluti Sol rotundus, ac lucidus, aut creatio duorum angulorū rectorum, duobusve rectis æqualiū, ex incidente recta in rectam: tum fiat semper idem iudicium. Sin res nunc uno modo appareat, nunc alio; ut turris procul quidē rotunda, propè verò quadrata visa; aut baculus media parte in aëre, media intra aquam conspectus recurvus, ac in aëre totus rectus; tum non idē fit, sed varium iudicium. Vnde & dico priora illa mutari non posse (quia id quod apparet in re non mutatur) sicq; non posse mentem ab illis liberam evadere: posteriora verò hæc posse quidem mutari (quoniam quod apparet mutatur) at non fieri propterea mentem à præjudiciis liberam, quoniam cùm à veteribus deferitur, à recentibus occupatur. Secundò, ut mens concedatur fieri libera, esseque velut tabula rasa, in qua iudicium nullum sit veluti pictum; supponis *eam posse conclusiones quasdam ex principiis deducere*: Atqui & hoc quoq; impossibile videtur. Nam si nulla habet præjudicia, nulla ergo principia habet; quoniam principia, ut heic sumuntur, sunt enunciationes; Enunciationes verò sunt iudicia quædā, quibus aliquid vel affirmatur, vel negatur. Quare & principia illa erunt iudicia, & quia præhabentur, præjudicia. Igitur si mens nulla habeat præjudicia in se, ne principia quidē, ex quibus aliquid deducat, habebit. An dices mentē, dum præjudicia exuit, abjicere quidē enunciationum vincula, verba nempe *Est*, & *Non est*, quibus termini, ut vocāt, nectuntur; at non abjicere tamen ipsos terminos, sive terminorū simplices notiones; ex quibus mens nova principia, novaque adeò iudicia texat? Vt cumque sanè enunciationes illo modo dissolvi putes; quia deinceps tamen nihil novi apparet,

quod suadeat nexum alium, quàm qui præfuerit adhibendum; idcirco non aliæ, aut oppositæ, sed eadem, quæ prius enunciationes de rebus fient; quare & redibunt eadem præjudicia. Heinc considera quantum voles Solem, ac Lucem seorsum; itemque incidentiam rectæ in rectam, & duorum angulorum rectitudinem; aut cum duobus æqualitatem; ubi oportuerit tamen iterum terminos sive attributa, cum subjectis connectere, non aliam connexionem adhibebis, quam ejusdem verbi *Est*, nullòque modo dices, Sol *non est* lucidus; aut recta incidens in rectam, *non est* creans duos angulos qui vel recti sint; vel duobus rectis æquales. Tertiò ut demus superesse menti aliqua principia, ex quibus conclusiones deducat: supponis illa esse *non obscura, & incerta, sed evidentissima, & certissima*. Sed hoc denique impossibile est, ut nempe sint alia principia, quàm quæ prius fuerint, hoc est ut nonnulla evidentia, ac certa; ita plura obscura, & incerta. Plura, inquam, ob caliginem, imbecillitatemque humanam; quoniam quantumcunque mens pura, ac sublimis suâ naturâ sit; est tamē demersa in molem corpoream, à cujus functionibus pendet, à qua obfuscatur, à qua præpeditur. Saltem ex ipsa à præjudiciis liberatione indifferens manet ad assentiendum tam falsis, quàm veris principiis, quatenus prima occurrerint, ac prout apparuerint: neque ex indifferentia colligere potes, quamobrem illa occurrere, apparereque potius debeant obscurè, esseque incerta, quàm evidenter, esseque certa. Erit enim mens veluti in bivio, ac fortunæ erit, quòd ista, potius quàm illa sese offerant, quòdque istis, potius quàm illis eo, quod esse apparebunt, moventibus fortius, ad ipsa feratur.

III.

Itemque omnia præjudicia ita haberi aliquandiu dubia, ac falsa, ut deinceps prava consuetudo non detorqueat amplius mentem à veritatis perceptione.

Nunc ad Assumptionem, *Ego, inquis, me, aut mentem meam liberam feci à præjudiciis omnibus*: At hoc est, quod non persuademur. Non sanè quod te non habeamus veracem, hoc est dicentem id, quod sentis; sed quòd cum persuasi simus te dicere quod de te sentis, persuademur nihilominus alium esse te, quàm ipse te sentias. Tu scilicet te liberum ab omni præjudicio putas; nos putamus non liberum, estque argumento, tum id, quod mox antè circa propositionem est dictum, tum ea præoccupatio, qua videmus te istas opinioniones, quas accipiendas semel duxisti tam acriter defendere. Verùm res uberius dispicienda est ex assumptionis probatione, cujus totum robur in hac argumentatione consistit:

Qui facit sibi omnia sua præjudicia non modo dubia, sed etiam aliquandiu falsa, donec veluti æquatis utrimque præjudici-

orum ponderibus, prava consuetudo non amplius iudicium à recta rerum perceptione detorqueat, ille mentem liberam fecit à præiudiciis omnibus:

Atqui ego feci mihi mea omnia præiudicia non modò dubia, sed etiam aliquandiu falsa, donec veluti æquatis utrimque præiudiciorum ponderibus prava consuetudo non amplius iudicium à recta rerum perceptione detorqueat:

Igitur mentem liberam feci à præiudiciis omnibus.

Est quidem heic etiam præsertim de assumptione nova dicendum; quatenus præcipua illius probatio meditationis primæ argumentum est; sed ut rursus appareat videaris-ne ἀλογίζην, an-non, necesse est ut pauca prius de propositione nova attingantur. Primum itaque in illa supponis præiudicia omnia posse fieri dubia; At hoc ut impossibile, ita falsum est, ex jam dictis; tam certa enim quædam sunt, ut dubitare de iis non liceat. Nam & quamvisingas Solem quadratum, aut obscurum, & quocumque demum argumento nitaris tibi facere fidem; non propterea tamen verè dubitabis; quin Sol & rotundus, & lucidus sit; ut neque licètingas rectam incidentem in rectam facere duos angulos duobus rectis pareis, idque menti imprimere quacumque ratione coneris, dubitare unquam poteris reipsà, quin creentur duo anguli aut recti, aut duobus rectis pares. Secundò supponis posse eadem non modò fieri dubia, verum etiam haberi falsa; At hoc ipsum videtur adhuc tantò magis esse impossibile, quantò magis falsa, quàm dubia opinio, in qua est probabilitas, ab ipsa veritate, ac certitudine distat. Et certè, quod possis à te extorquere, ut falsum esse credas Solem rotundum, ac lucidum esse; rectam incidentem in rectam, duos angulos rectos, aut rectis pareis facere, ne juranti quidem videtur credendum. Tertiò supponis haberi posse falsa ad aliquod tempus: Sed vel supponis haberi falsa seriò, ac reipsà; vel verbo tenus, & quasi joco. Si seriò, ac reipsà; tam est impossibile, ut falsa habeantur per horam, quàm per annum, aut sæculum; si verbo tenus, & per jocum; tum id te ad rectam rerum perceptionem nihil promovet; quia seu id agas, seu non agas, mens ipsa nihil afficitur, neque aut ad percipiendum, aut ad rectius percipiendum iuvatur. Quartò supponis præiudicium habitum ut verum, ac certum, ita haberi posse falsum ad aliquod tempus, ut exinde fiat præiudicium novum, priorique oppositum, quod in altera lance collocatum æquilibrum faciat, ac pondere par cum priore sit. Verùm tametsi non per annum, aut per sæculum, sed etiam per plureis an-

norum myriadas coneris falsum reputare, Solem non esse rotundum, ac lucidum; rectam incidentem, &c. non idcirco tamen præjudicium unquam priori oppositum menti imprimes; quoniam ut nunquam assentietur, ita nunquam judicabit, neque proinde præjudicium faciet; tantum aberit, ut ejus momenti unquam sit, quo priori illi æquiponderare possit. Quinto supponis *non posse mentem in isto quasi æquilibrio consistere, ut à recta rerum perceptione detorqueri*. Sed imprimis, sequitur potius ex hac ipsa indifferentia, quod ante dicebam, ut mens tam ad pravam perceptionem detorqueri, quam ad rectam converti possit. Sequitur deinde, ut tantò facilius detorqueatur ad pravam, quantò longius abest à perceptione veri, & recentior est à perceptione falsi. Adde, existimare mentem capaciore fieri veræ perceptionis ex deflexione ad falsitatem, perinde videri, ac existimare, debere quempiam, ut dealbetur, fieri prius Æthiopem.

IV.

In purganda ab opinionibus mente habendum delectum, ut in purgandis corporis humoribus; nempe ut non omnes, etiam laudabiles agerantur.

Iam de Assumptione, quoniam in prima meditatione totus es illi comprobandæ, idè quæ sunt ejus capita præcipua percurrenda sunt. Primùm tibi ipsi indixisti diem, quo solutus omnibus curis vacares totus evertendis præjudiciis omnibus, & quæ superexstruxeras ipsis. Atqui ut laudabile fuit quærere secessum, & otium ad evertendum aliqua, ac præsertim dubia, atque falsitatis suspecta præjudicia; ita attentando evertere omnia, etiam si quæ certa, ac vera habebas, rem aggressus es neque necessariam, neque tuarum virium. Nam credo sanè voluisse te infixam menti à puero dogmata pietatis, atque Religionis manere prorsus inconcussa, cum cætera everteres; ut dicam verò solùm de aliis, Ecquæ-nam primùm necessitas fuit evertendi illa præjudicia, Solem esse rotundum, rectam incidentem in rectam facere duos angulos, te hominem esse, habere te manus, atque oculos, esse cælum, esse terram, esse urbeis, esse animalia, esse plantas, ac hujusmodi innumera alia? An-non post ambages, ac circuitus, eò denique redeundum fuit, ut eadem omnia persuadereris? An verò propterea fortior est persuasio, quòd Sol sit rotundus, quòd ex recta incidente in rectam duo anguli fiant, quòd tu homo sis, & cætera omnia? Deinde fuit-ne virium tuarum sic evertere omnia præjudicia, ut illa haberes, non incerta modò, verùm etiam falsa? An vel dubitare seriò potuisti non esse revera Mundum aliquem, homines habere corpora, aliaque id genus? Dixisti sanè versibus paucis ante Meditationem primam, *neminem unquam summe mentis seriò de istis dubitasse*. An-non vis ergo ut credamus

damus non potuisse te dubitare seriò? An-non ergo joco, & verbo duntaxat? Porro si non seriò, sed verbo duntaxat dubitare potuisti de his, similibusque præjudiciis, putaſti-ne poſſe te omnia præjudicia evertere? Sanè ut qui fumo ædeis obtegit; eas inſiſas quidem, at non idcirco everſas facit; ita tu fictionem præjudiciis obducens, verba quidem pro illis das, at non idcirco ipſa evertis. Addo te videri perinde feciſſe; ac ſi delegiſſes diem, quo humores ponitùs omneis exigeres à corpore. Nam ut humores quidem omnes abjici, niſi cum vitæ profuſione non poſſunt, ita neque opinioniones omnes quæ in mente ſunt, niſi cum totius memoriæ jaſtura. Heinc, ne exiſtimes me nolle præjudicia ulla eſſe evertenda; eum habeo hac in re delectum, quem in purgatione humorum. Vt enim ſatis ſimus ſœlices, ſi humores pravaſ excernere potuerimus, ſi non etiam laudabileis, probosque ejecerimus; ita ſœlices nimium ſumus, ſi habitis quibuſdam ſanis veriſque opinionibus; intemeratis, ac ſalviſ illis, deponere potuerimus quas inaneis, noxias, incertas, falſitatis ſuſpectas habemus. Et ſatis ſanè eſt in nobis opinionum hujusmodi, ut in ipſis extirpandis non unum diem decernamus, ſed totam penè vitam deſtinemus, & non perinde in convellendis ſanioribus collaboremus. Ac tu mihi quidem ita reſpondiſti, *quafi ego conſuiſſem facile eſſe omnibus ſe erroribus liberare, quibus ab infantia imbuti ſumus, & quafi id nimis accuratè poſſet fieri*: Ego verò neque id cenſeo eſſe facile, qui impoſſibile penè duco; neque judico poſſe nimis accuratè fieri, qui plenum ſtudio, ac totos annos vix ſufficere arbitror; ſed me duntaxat ita habeo, ut exiſtimem ſatis eſſe, inſœlix lolium è mentis agro evellere; non item frumentum convellere ſimul, aut eradicare. Vnde & cum dixi *ſatim mihi viſum, ſi paucis verbis incerta habuiſſes, quæ prænoveras, ut ea deinde ſeligeres, quæ vera deprehenderentur, quàm habendo omnia pro falſis, &c.* nihil aliud feci, quàm ſi quis ſuadeat agricolæ, ut conſideret potius lolium eſſe frumento intermiſtum, quo ſelectum frumentum faciat, lolium ſolum eradice; quàm ut ſegetem totam pro lolio habeat, unaque manu utrumque extirpet. Tu tamen eam vocem *paucis verbis* ita accepiſti, quafi non ad ſuppoſitionem, ſuaſionemve ſpectaret; & quafi non ſupereſſet deinde & tempus, & labor *ut ea ſeligeres, quæ vera deprehenderentur*. Sed immorandum in hoc non eſt.

V.

*Esse quidē
omnem
sensum
fallacem;
at non o-
mnem sen-
sionem fal-
sam; ne-
que eum,
qui vigilat
non certio-
rem esse,
quod vigi-
let, quā
quod dor-
miat.*

Deinde rem aggressus, & quasi fundamentum succutiens, cau-
fatus es sensuum fallaciam, ex qua omnia tibi dubia redderentur.
Quia nempe quicquid eatenus admiseras, ut maxime verum, id à sensu
aut per sensus acceperas, ac illos interdum fallere deprehenderas; ideo pru-
denter esse censuisti, nunquam illis planè confidere, qui te vel semel decep-
serunt. Attamen tu heic perinde fecisti, ac si quia cibus semel nocue-
rat, sumendum nunquam cibum censuisses; dictante prudentia al-
eo abstinendum, quod vel semel nocuerit. Sed nempe neque pru-
dentia dicat ideo nulli cibo fidendum, quoniam interdum aliqui
nocuit, verum cavendum esse à noxio, ac cum usurpandum, qui
constanter profuit; Neque dicat omnem sensationem idcirco esse
dubiam, falsamve habendam, quoniam aliqua interdum sefellit:
verum dubiam quidem meritò non habendam ut certam, falsam
meritò respui; illam verò esse admittendam ut veram, quæ vere
constanter deprehensa est, & quam falsam esse nihil sit, quod de-
monstret. Heinc si de turri procùl visa quærat, illa-ne rotunda,
an quadrata sit; meritò quidem cohibetur assensus quantumcumq;
illa rotunda appareat, quoniam est alias deprehensum turrim pro-
cùl visam rotuadam, fuisse cominùs spectanti quadratam. At si
turris propè spectata visa fuerit angulis carens, ac omninò te-
res; tum cohibere assensum velle, aut dubitare quadrata-ne, poti-
usquam rotunda, siue teres sit, nescio cur referri ad illos non debe-
at, quos tu dicis *non sanæ mentis*. Sic quamvis fuerit visus deceptus,
cum iudicavit baculum partim in aëre, partim in aqua existentem
esse recurvum; attamen, quia postquàm is fuit ex aqua eductus,
totusque in aëre fuit, rectus esse apparuit; non subest profectò cur
ea quoque sensio deceptionis suspecta fiat. Dices te habuisse o-
mnia suspecta ad tempus duntaxat, & quousque posses certa ab in-
certis separare: Verum circuitus inutilis, & in cuius reditu nihil
amplius fructus, quàm in exitu reportetur: cum toto decursu me-
ditationum peracto, nemo certius nôrit turrim propè spectatam
esse tēretem, aut baculum visum in aëre rectum; quàm si consistat in
limine. Objicis ipse quoque tibi tam perspicuum esse te isthæc sedere,
tenere chartam, præ manibus habere has manus, hoc corpus, & cætera, ut de
eo dubitare tam videatur demens, quam sunt illi insani, qui pauperissimi
cùm sint, videntur sibi reges, habere caput fœtile, totos esse cucurbitas, aut
ex vitro conflatos: Respondes autem, te de illis ideo dubitare, quòd for-
tassis dormias; cum eadem soleas in somnis pati, ac etiam interdum non
minùs verisimilia, quàm quæ isti vigilantes patiuntur. Quid porro
heic

heic aliud dicendum, quàm quod insinuatum jam est; nos ergo de te veriora sentire, quam tu ipse sentias. Quippe nos certi omninò sumus te hæc differentem, conscribentemque vigilare: alioquin enim ad nos usq; si dormires, non pervenirent. Addo subtilitatem hanc (tamen ipsam Socrates frequentem esse dixerit *πίπτον ἐν τῷ περὶ νῦν καθόδου, καὶ πάνθ᾽, ἃ διανοομένη ἀνερῶπιον, ἢ ἐξηγούμεν τε, καὶ ὑπὲρ αἰσθητοῖς διγχεύμεθα*) videri planè supervacaneam (neque enim dico, quod quidam dixerunt esse merè cavillatoriam, aut sophisticam.) Nam quantumcumq; inter somniandum non possumus discernere dormiamus-ne, an vigilemus; haud dubiè tamen cùm vigilamus, sumus, efficiamurque certi vigilare nos, non dormire; & quærere ad hoc probandum argumentum aliud, quam ipsam evidentiam, hominis videtur otio abutentis, ac similis illi, qui meridiano Sole relicto, faculam requirit, ut quidpiam conspiciat. Quodcumque profectò argumentumingas, id neque dormienti quicquam proderit; neque vigilantem efficiet de sua vigilia securiorem. Vno verbo istud effugium non efficit tibi proptereà res dubias, quas certas esse sensu constabat.

Ad-hæc, Age, somniemus, inquis, nec particularia ista vera sint, nos aperire oculos, caput movere, &c. ac tum instas adversum te, ista, quæ in somnis apparent, esse saltem quasdam imagines, quæ sint ex veris rebus depromptæ, ac saltem naturam corpoream magis simplicem, ac universalem, unde deducuntur, esse veram, veræque communia ejus attributa, tensionem, figuram, locum. Quare & disciplinas quidem de rebus compositis, singularibusque, ut Physicam aut Astronomiam, esse posse dubias; at non quæ de rebus simplicissimis, generalissimisque, ut Arithmeticam, aut Geometriam: cùm seu dormias, seu vigiles, duo & tria sint quinque, & quadratum plura latera, quàm quatuor non habeat. Respondes autem, cùm sit menti infixæ quædam verus opinio, Deum esse qui possit omnia, nescire te cur non fecerit, ut nullum esset cælum, nulla terra, nulla cætera, & viderentur tamen ut nunc tibi videntur exsistere. Unde & tam fallere arbitratus duo, & tria esse quinque, aut quadrati latera esse solum quatuor, quàm sæpè falluntur, qui se aliquid perfectissimè scire arbitrantur. Nam & quamvis Dei bonitatem dedecere videatur, ut te talem fecerit, qui posses falli; dedecuisse quoque talem facere, qui aliquando falleris: Et quantumcumque aliqui malint Deum tam potentem negare, quàm hæc omnia incerta; quamcumque tamen tui causam assignaverint, quanto illa fueris imbecillior, tanto fore probabilis te esse adeo imperfectum, ut semper fallere. Ita, inquam, instas, ac respondes ipse. Veruntamen,

VI.

Immeritò haberi Deum, quasi deceptorè; ut dubium an-non forè in iis, quæ evidentissima nobis videntur, decipiamur.

quid fuit necesse, ut te somniare supponeres, quò te conjiceres in hos labyrinthos? An-non, si reverà somnialles optanda erat vigilia, ut labyrinthi evanescerent? Cedò verò, dormienti-ne, an vigilantì quæsiisti fructum? Dormienti non dices; quoniam vel ista nunquam somniabis, vel si aliquando somnies, non erit in tua potestate ut hæc remedia applices; vel si applicatio possibilis foret, longè faciliior, promptiorque esset ex proxima statim evigilatione curatio. Sed neque etiam vigilantì; quia nimis præposterum est sensiones in vigilia peractas corrigere velle ex iis, quæ per insomnia imaginamur; & promptius erit disquirere physicas fallaciarum causas, quam percipere cur aut quomodo, Deus nos decipere aut possit, aut velit. Hæc cum insinuassem, succensuisti ipse, quasi audacter nimis dixissem, *nihil fuisse opus fingere Deum deceptorem*. Attamen & dixi, & iterum diço; tum quia mens horret hominem, ut ignorantia prætextum quærat, deceptorem fingere Deum, quem aliunde quàm certum est esse, tam certum est deceptorem non esse; tum quia sine ista fictione, investigari, ac reperiri possunt naturales, veræque causæ earum deceptionum, quæ in sensionibus contingunt; tum quia nisi tales causæ reperiri à nobis possint, frustra fingetur Deus causa, cujus neque fallendi vim, neque actionem, neque modum, neque finem, liceat vobis cognoscere, impedire, deflectere, ut à fallacia nobis caveamus: tum demum, quia ista, ob quæ finxisti Deum deceptorem, *te isteic esse, foco assidere, hiemali toga esse indutum, chartam istam manibus contrectare, manus has ipsas, totumque hoc corpus tuum esse, & similia*, non sunt deceptiones, aut fallaciæ; aded ut omninò abs re deceptorem DEUM finxeris, quem ne ob causam quidem gravissimam nec fingere licet, nec dicere talem. Succensuisti etiam quòd dixerim *nihil opus fuisse, ut te hæc dicentem, scribentemve fingeres somniare*. Sed feci nempe, quia credidi te esse magis compotem tui, quàm ut ista persuadereris; quia existimavi præjudicia dormientium quidem non disputatione, sed evigilatione sola excutienda; vigilantium verò, absque insomniorum fictione tollenda. At Philosophus, inquis, *putasset sibi addendam rationem, vel id non dixisset*. Quasi verò (absit interea Philosophi nomen, tuo saltem sensu mihi adrogem) quasi, inquam, cum fuisset præfatus non immoraturum me circa primam meditationem, debuerim ita esse effusus, ut in cæteris, in quibus mihi visus fueras non perinde somniasse? Quasi vel sola reverentia, qua de Deo sentire, ac loqui debemus; & ipsa evidentia, qua

qua tu illa scribens, qua ego hæc scribens certi fuimus nos scribere; non debuerit causa perspicua videri; ut nihil interim repetam ex iis, quæ dicta jam sunt? At decuit potius Deum deceptorem, quam naturæ nostræ imbecillitatem causari? Te id decuerit; me certe non decuit; qui neque ullo modo capio posse Deum decipere; neq; possum non bona fide agnoscere meæ naturæ imbecillitatem. Verum nihil prodest ad emendandos errores dicere nos esse errori obnoxios? Dicere nihil profit; agnoscere prodest, ut in medicina agnoscere morbum; & cum difficultas superfit de causa, ut eam amoveamus, Quid tu propterea profeceris, cum Deum deceptorem supposueris? Nonne tibi adhuc, perinde ac mihi imbecilla erit natura? Nonne perinde utrique nostrum id supererit, ut malo remedium quæramus? Nonne ego in hac inquisitione tam ero promotus, quam tu; tametsi in ipsa naturæ imbecillitate constiterim; tu laboriosè erraveris per confictam illam à Deo deceptionem? Nam quod ais attendendum esse ad omnia, in quibus contingere potest, ut erremus, ne ipsis temerè assentiamur; verè quidem ais; sed id nimirum, de quo nos, non minùs quam tu, solliciti sumus; & quod præstari posse putamus, tametsi non præcaverimus, ne Deus decipiat.

VIL.

Postmodum, quoniam experiebaris non posse te ita assensum cohibere in rebus dubiis, quin sæpe priores opiniones recurrerent, præstare censuisti, ut te planè falleres, illasque aliquandiu omnino falsas, imaginariasque esse fingeres, donec tandem velut æquatis utrimque præjudiciorum ponderibus, nulla amplius prava consuetudo iudicium tuum à recta rerum perceptione detorqueret. Sed hac de re abunde est circa propositionem dictum. Addo solùm te perinde fecisse, acis, qui lignum jam incallescens subducit ex igne, conjicitque in gelidam, ut faciliùs flammam concipiat; aut qui hominem sursum nitentem è medio ascensu detrudit in imum, ut citius in summum emergat; aut qui effodit cocliti superstitem oculum, ut exinde clariùs conspiciat. Addo etiam, ac repeto, quod in dubitatione objeci, te habendo omnia præjudicia pro falsis, non tam vetus exuere, quam inducere novum præjudicium: Scilicet vera, ac dubia non alia ratione voluisti exuere, quàm illis substituendo opposita, ac falsa. Id Philosophus, inquis, non dixisset? Sed si dixisset Philosophus, verum-ne, an falsum dixisset? Probasset, inquis, deceptionis periculum ex suppositione oriturum. Quid tamen, si non tam periculum, quam inutilitas molitionis? Nam quod ais me paullò post affirmare non posse te extorquere à te ipso, ut illa pro incertis falsisque habeas, quæ esse incerta, ac falsa supponis;

id

Mentem
perperam
in falsita-
tem con-
jici, ea spe,
ut facili-
us ad ve-
ritatem
assurgat.

id affirmo sanè, quod sentio; Sed quia tu interim aliud affirmas; idcirco in suppositam tuam affirmationem argumentor. Heinc supposito, quoddam reverà te, quemadmodum vis, ex opinione dubia in falsam conjicias; idem te subire periculum dico, ac illum, qui ex flamma decidit in prunam, aut submersionis metu contendit ex fluvio in mare. Certè & cum probabilitas propius à veritate distet, idem tibi est errandi periculum, dum veritatem quærens à probabilitate intermedia ad falsitatem deflecteris, ac illi, qui Parisiis iturus in Hollandiam, Massiliam versus iter instituat. Dicis te *facere, quod illi, qui baculum curvum reddiduri rectum, in contrariam partem incurvant.* Sed dum baculus ita incurvatur, per rectitudinem transit, sicque assuescit sese paulatim ad illam componere; Tu verò menti dubiæ non per veritatem facis transitum, sed flexæ in falsitatem impulsus versus eandem præbes, & ex curvitate parva, aut mediocri, curvitatem maximam facis. Sic mentem proinde, non ut ex luce crepera auroræ, in diurnum splendorem effers; sed ut ex dubia vesperti luce, in tenebras nocturnas demergis. Ac non latet profectò me supponi multa utiliter; non latet me *suppositionum tam Geometricarum, quam Astronomicarum* fructus: At quisquam fructus concipi potest tuæ istius suppositionis, qui non longè uberior, sperari sine illa possit? Nisi fortè putas illi fructum quæri, qui titubans non continetur, aut in præcipitium propendens non reducitur, sed istu impacto prosternitur, ac dejicitur, ut erigatur, atque assurgat. At fortassis ista, quæ supponis falsa, ut te habere manus, te habere corpus, non putas reverà, atque seriò falsa? Verum si non putas, corrui tota tuarum meditationum machina, quæ ex hoc cardine dependet, utpote cum is scopus sit, ut falsitatem, quæ à te esse putatur, corrigas. Si putas, tunc iterum corrui meditationum machina, tanquam innixa fundamento, non supposito modò, verum etiam credito falso. Heinc discrimen profectò magnum inter tuam, & Astronomicam (v. c.) suppositionem. Nam Astronomicum quoddam habent, observata nempe Planetarum loca; ac tunc, ut illorum causam explicent, circulos supponunt, non quos falsos putent, sed quos nisi veros, saltè verisimileis habeant, cum fieri possit, ut Planetæ per illos incedant, argumentoque est, quoddam si putarent esse alias probabiliores Hypotheses, illas haud dubiè sequerentur. At tu nihil certum tibi relinquis, ad quod supponendo collinees; & pro suppositionis objecto non aliquid verum, aut verisimile; sed ipsam-met falsitatem habes. Neque dicas te ex falsa suppo-

suppositione elicere aliquid verum , quale est illud , *ego cogito* , &c. Nam ut heic omittam , quæ postea dicentur , perinde hoc est , ac si Astronomi , nullis observationibus præhabitis hypothèses statuerent , ex quibus vera aliqua observatio deduceretur.

Denique , ut te vehementius in fallitate confirmares recurristi , non amplius ad Deum , sed ad Genium aliquem malignum , eundemque summè potentem , & callidum , qui omnem suam industriam in eo posueris , ut te falleret ; adjecistisque putaurum te cælum , terram , colores , cætera externa nihile esse aliud ; quàm ludificationes somniorum , quibus illæ tuæ credulitati insidias tendideris ; consideraturum te ipsum , tanquam manus non habentem , non oculos , non alia , sed hæc omnia habere falsò opinantem : Manserum in hac meditatione obstinatè defixum ; atque ita quidem , ut si non sit quidem in tua potestate aliquid veri cognoscere , at certè hoc , quod in potestate tua sit , obfirmata mente caveas , ne falsis assentire , nec tibi quicquam iste deceptor , quantumvis callidus , possit imponere . Hoc verò loco , ut paucis dicam , nihil fecisti aliud , quàm ille , qui aliquem invocet , à quo dejiciatur in puteum , ac deinde dicat , velle se ibi obstinatè demersum manere , & interim tamen obfirmata mente cavere , ne , si in potestate quidem sua non sit , ut sursum ascendat , saltem , quod in sua potestate sit , ne demergatur , nec ille dejector , quantumvis validus dejicere valeat . Quæso , quàm hoc sit ingeniosum ? Nisi satius longè non fuit malignum Genium non advocare , & libertatè plenam tueri , quàm velle ab ipso sponte opprimi ; & oppressum , perinde minitari , ac si illum ex edito , & securo loco despiceres , veluti hædus è tecto , lupum . Quanquam permirum sanè est , cum ista , quæ sensibus parent , ut habere te manus , habere te corpus ; res adeò manifestæ sint , non posse te tamen illa persuaderi ; & persuaderi interea esse rem adeò immanifestam , qualis est hujusmodi tuus malignus , & impostor Genius : & non credentem sensibus , credere rei adeò invisæ ? Et stomacharis , quod quæsierim , An non futurum fuisset magis & Philosophico candore , & veritatis amore dignum res , ut se habent , & bona fide , ac simpliciter enunciare , quàm recurrere ad machinam , captare præstigias , sectari ambages ; aisque illum , qui hæc dicat , testari velle uti se non Philosophico candore , sed Rhetorico tantum fūco . Quasi verò appetat fucum , qui candorem , qui bonam fidem , qui simplicitatè requirit ; & non ille : potiùs declamationem instituat , non Rhetoricam modò , sed Poeticam etiam , ac Romanticam , qui tua illa arte perorat ; qui , quasi actus exhiberi familiari modo non posset , inducit in theatrum Morpheæ , Deum , malignum Ge-

D

nium -

VIII.
Injuriam re-
curri ad
malum
Genium ,
ut persua-
deamur
nos decipi .
dum esse
cælum , nos
habere
manus , ce-
teraque
existima-
mus , aut
plusquàm
pro infor-
mis ha-
beremus .

nium : qui denique ut Hercules laboribus aliquot functus , & apud Omphalen dormiens concludat , *Sed laboriosum est hoc institutum , & desidia quædam ad consuetudinem vitæ me reducit ; nec aliter , quàm captivus , qui fortè imaginaria libertate fruebatur in somnis , cum postea suscipari incipit se dormire , timet excitari , blandisque illusionibus lentè conivert* : hic sponte relabor in veteres opiniones , vereorque expergisci , ne placida quieti laboriosa vigilia succedens , non in aliqua luce , sed inter inextricabiles jam motuum difficultatum tenebras in posterum sit degenda .

IX.

Non con-
cludi legi-
simè pro-
positum
methodum
legitimam
esse.

Et hætenus quidem de tua Assumptione . Iam , cum Propositio tot vitis laboret , Assumptioque ipsa cumulum adaugeat ; atque adeo neutra concedenda sit ; vides ecquid de conclusionem , quæ in priore argumento fuerat Assumptio , sit pronunciantum . Certè , ut nihil aliud evicerimus , hoc saltem videtur constare , non esse hucusque aliqua principia assumpta abs te , ejus evidentia , ac certitudinis , quæ exigitur ad demonstrationem . Vnde & dico , tametsi gratis conclusionem tuam admiserimus , non admissum tamen iri ex vi , ac necessitate materiae , ut vocant , sed formæ duntaxat , & ut illa admittitur , quæ conficitur hocce ratiocinio ; *Omnis lapis est animal ; Sed omnis homo est lapis : Igitur omnis homo est animal* . Verum pergendum est ad alia .

IN MEDITATIONEM II,

Quæ est

De Natura Mentis humanæ , Quod ipsa
sit notior , quàm Corpus ,

D. V. B. I. T. A. T. I. O. I.

De inutilitate superioris apparatus , ut quis inferat se esse , quia cogitat ; & ex isto quasi principio omnia certò deducat ; ac specialiter se non esse corpus .

Circa secundam video te adhuc in ludificatione perstare ; & nihilominus animadvertere , saltem TE ESSE , qui ludificaris ; atque idcirco statuerè , illud pronunciatum , Ego sum , Ego existo , quousque a te profertur vel mente concipitur , esse verum . Attamen non video ,

video tibi opus fuisse tanto apparatu ; quando aliunde certus eras , & verum erat te esse ; poteratque idem vel ex quavis alia tua actione colligere : cùm lumine naturali notum sit , quicquid agit , esse. Subdis , *te non propterea satis intelligere quid sis* : hoc autem seriò accipitur , & ultrò conceditur , id ipsumque opus ac labor. Nempe id absque ambagibus , totaque illa suppositione , videtur fuisse requirendum. Meditari vis consequenter , *qualem te esse credideris* ; ut , *subrabilis dubiis* , id solum remaneat , quod *censum sit* & *inconcussum*. Hoc verò nemine non probante facies. Rem aggressus , & cùm te putaris esse hominem , quæris *Quid sit homo* , & dimissa consultò definitione vulgari , feligis ea , quæ primâ fronte tibi occurrebant , ut , *habere te vultum ; manus , & cætera membra* , quæ nomine corporis designabas ; itemque , *te nutrire , incedere , sentire , cogitare* , quæ referebas ad animam. Hoc porrò esto , modò caveamus distinctionem tuam inter animam , & corpus. Dicis *te tunc non advertisse quid esset anima , sed imaginatum solum aliquid instar ventis , ignis , vel ætheris , quod crassioribus tui corporis partibus esset infusum*. Istud memorabile est. De corpore , non dubitasse naturam ejus. in eo esse , ut sit quid aptum figurari , circumscripti , spatium replere , & ex eo omne aliud corpus excludere ; tactu , visu , auditu , odoratu , gustu percipi , & pluribus modis moveri. Potes verò hæc etiam hodie attribuere corporibus , dummodo non omnibus omnia ; siquidem ventus corpus est , & nō percipitur tamen visu : neque excludas adjuncta alia : nam ventus , ignis , & plura movent. Quod subjicis autem , *negasse te corpori vim seipsum movendi* , non apparet quā tueri jam possis ; quasi corpus omne esse debeat suapte natura immobile , omnisque ejus motus à principio incorporeo procedere : & neque aqua fluere , neque animal incedere , sine incorporeo motore censeatur.

R E S P O N S I O .

P Ergis hic Rhetoricam simulationem loco rationis usurpare ; fingi enim me ludificari , ubi seriò ago ; & seriò accipis , tanquam verè dictum & affirmatum , quod tantum interrogando , & ex vulgari aliorum sententia , proposui , ut de eo ulterius inquirerem. Quod enim dixi , omnia sensuum testimonia pro incertis , imò etiam pro falsis esse habenda , omnino serinum est ; & ad meas Meditationes intelligendas adeò necessarium , ut quisquis illud admittere non vult , aut non potest , nihil in ipsas responsione dignum objicendi sit capax. Sed advertenda est distinctio

variis in locis à me inculcata, inter actiones vitæ, & inquisitionem veritatis. Cum enim de regenda vita quæstio est, ineptum sane esset sensibus non credere, planeque ridendi fuerunt illi Sceptici qui res humanas eò usque negligebant, ut ne se in præcipitia conjicerent ab amicis deberent asservari. Atque idcirco alicubi admonui, neminem sanæ mentis de talibus serio dubitare. Cum autem quidnam certissime ab humano ingenio cognosci possit inquiratur, planè a ratione alienum est eadem nolle ut dubia, imò etiam ut falsa, serio rejicere, ad animadvertendum alia quædam, quæ sic rejici non possunt, hoc ipso esse certiora, nobisque reuera notiora. Quod autem dixi me nondum satis intelligere quis sit ille qui cogitat, non bona fide ut serio dictum accipis, cum id ipsum explicuerim: nec etiam quod dixerim me non dubitasse de eo in qua natura corporis consisteret, nullamque vim seipsum movendi illi tribuisse, meque imaginatum esse animam instar venti, vel ignis, & talia, quæ ibi tantum ex vulgi opinione retuli, ut suis locis falsa esse ostenderem. Quæ autem fide ais nutriri, incedere, sentire, &c. à me referri ad animam, ut statim subjungas, esto, modò caveamus distinctionem tuam inter animam & corpus; ego enim paulò post expressis verbis nutritionem retuli ad solum corpus, incessum vero & sensum maxima ex parte refero etiam ad corpus, nihilque quod ad illos pertineat animæ tribuo, præter id solum quod est cogitatio. Quam deinde habes rationem ut dicas, non opus fuisse tanto apparatu ad probandum me existere; certè ego ex his ipsismet tuis verbis optimam mihi videor habere rationem judicandi, nondum me ibi satis magno apparatu usum fuisse, quandoquidem efficere nondum potui ut rem rectè intelligas. Cum enim ais me idem potuisse ex quavis aliâ mea actione colligere, multum à vero aberras; quia nullius meæ actionis omnino certus sum, (nempe certitudine illa Metaphysica, de qua sola hic quæstio est) præterquam solius cogitationis. Nec licet inferre, exempli causa, ego ambulo, ergo sum, nisi quatenus ambulandi conscientia cogitatio est; de qua sola hæc illusio est certa, non de motu corporis, qui aliquando nullus est in somnis, cum tamen etiam mihi videor ambulare; adeo ut ex hoc quod putem me ambulare, optimè inferam existentiam mentis quæ hoc putat, non autem corporis quod ambulat. Atque idem est de cæteris.

I.

Fuisse omninò bona fide obiecta; etiam circa ludificationem.

I N S T A N T I A .

VTer nostrum simulationem, aut declamationem, qualis est ad calcem superioris Instantiæ descripta, usurpet, si qui tanti putent, ut velint cognoscere, ii dijudicabunt. Dicis me fingere

*fingere te ludificari, ubi serio agis, & serio accipere, quod ex vulgari sententia dicis. Ego verò testor Deum immortalem, me nihil fingere, sed simpliciter dicere, quod sentio. Si tu ita loquaris, ut cum posses clarè, & perspicuè, ænigmata fundere malis, quæ mea potest esse culpa, nisi tuos recessus omneis introspiciam? Quis negat re adèd solertem, ut profundere atramentum nôris, sub quo evadere hamum tentes, aut ita commutare formas, ut non modò mihi tuis artibus non asueto, sed heroum quoque fortissimis, ac exercitatissimis ludum facias? Hac certè de causa tam variè commiscuisti omnia, ut ad aliquid expiscandum Delio sit opus urinator; ac tam variè, varias, heic, illeic respersisti particulas, ut sint quasi triarii, aut potiùs præsidia, in quæ te recipias. Verum tamen quicquid sis repoliturus, & cum non propterea tuam artem reverear, age pervideamus, in quo ludificari te fingam, ubi serio agis; & serio accipere, quod non ex tua sententia dicis. De ludificatione nulla mihi verba, præter illa pauca initio statim dubitationis, *Circa secundam video te adhuc in ludificatione perstare, & nihilominus advertere, saltè Te esse, qui ludificaris. Quidnam verò in illis finxi? Dixeras tu sub ipsum finem superioris meditationis, putaturum te celum, ærem, terram, &c. nihil aliud esse, quàm ludificationes, quibus malignus Genius insidias credulitati tuæ tetendisset; ac te in ea meditatione esse obstinare mansurum. En hujus secundæ initium, In tantis dubitationes hesternæ meditatione conjectus sum, ut nequeam amplius earum oblivisci, nec videri tamen, quæ ratione solvendæ sint, sed tanquam in profundum gurgitem ex improvviso delapsus, ita turbatus sum, ut nec possim in imo pedem figere, nec enatare ad summum. Enitar tamen, &c. & postea, suppono igitur omnia quæ video falsa esse; credo. nihil unquam existisse eorum, quæ mendax memoriâ repræsentat; nullos planè habeo sensus; corpus, figura, extensio, motus, locusque sunt chimæ; quid igitur erit verum? Ac deinde, Nunquid ergo saltè ego aliquid sum? sed jam negavi me habere ullos sensus, ullum corpus, &c. Nonne igitur etiam me non esse? Imò certè ego eram, si quid mihi persuasi: Sed est deceptor nescio quis summè potens, summè callidus, qui de industria me semper fallit? haud dubiè igitur ego etiam sum, si me fallit. Et fallat, quantum potest, &c. Hæc ipsissima tua verba sunt; An aliquid igitur finxi? Atqui tu ibi serio agebas. Sed serio ageres, an joco, ipse non defini; ecquidnam verò ageres simpliciter commemoravi. Quod ais te serio omnino dixisse omnia sensuum testimonia pro incertis, imò etiam pro falsis esse habenda; Esto ut volueris; hac enim de re est jam antè dictum. Quod**

verò dicis, *Quisquis illud admittere non vult, aut non potest, nihil in ipsius responsione dignum obijciendi esse capacem*; Profeitor non curare me fieri obijciendi capacem, sed evadere quapiam solida demonstratione eruditum. An evasurus autem sim ex tuis responsionibus, quàm ex Meditationibus eruditior; & an circa difficultates tibi à me propositas, tuaque responsione indignas, lectores, factum per te satis, sint existimaturi, an non, ipse eventus comprobabit. Sed nimirum se continere indoles tua non potuit, quin hanc referret gratiam pro factis à me objectionibus, quas eo solam sine, ut tibi gratificàrer, & Merfeno quidem stipulante proposui; non verò quod deessent gratiores, utilioreque occupationes. Nunc etiam divertor tantisper à jucundioribus studiis, partim quidem quia tu me lacessitum ultrò voluisti; partim verò imò præsertim ut viris amicis, & magnis, quibus tu es visus nihil aliud, quàm fundere verba, rem pergratam faciam.

II. *Distinctio illa inter actiones vitæ, & inquisitionem veritatis, meo*

Scepticos abs re saggillari, qui melius & actiones vitæ & τὰ φαινόμενα reliquerunt, ac solum de rebus re- verâ ob- scuris, in- certisque controversiam fecerunt.

quidem iudicio per-optima est; sed & nequicquam heic repetita; & tradita abs te (ut mihi videtur) quàm à Scepticis, imperfectius. Ipse profectò occasionem ejus referendæ non feci, qui de vitæ actionibus ne verbum quidem consultò movi. Verùm decebat, ut provideres, ne quisquam tibi obijceret, quod ipsemet dixerat; *Neminem sanæ mentis de talibus seriò dubitasse unquam*: veritus nempe ne vox unquam, quàm latè patet, extenderetur. De Scepticis, illud omitto, non vixisse ipsos ridiculè aded, ac tu obijcis; ecquis enim talium virorum sustinuisse esse amicus? Verùm captatam fuisse an- sam subsannandi Pyrrhonem ex deprædicata ab illo opinionum in- differentia. Quàm certè ille, cæterique, qui ipsum imitati sunt, philosophati generosè de retinendo assensu fuerint, quamque longè ab exigenda imprudenter vita abfuerint, qui vitas ipsorum scripsere, testantur. Hoc proinde solum attingo, ipsos inter actiones vitæ, & inquisitionem veritatis ita distinxisse, ut quod ad vitæ quidem actiones spectaret, non esse habendam indifferentiam censuerint, sed obtemperandum patriis legibus, necessitatibus consulendum, exhibenda officia, unòque verbo omnia agenda, quæ seu privatim, seu publicè, boni & viri, & cives agunt. Quod ad inquisitionem autem veritatis, ita subdistinxerint, ut discrimen statueretur inter τὰ φαινόμενα, *ea, quæ sensibus apparent*, cujusmodi sunt calor ignis, dulcedo mellis, univèrseque cætera; & τὰ νοούμενα, *ea, quæ mente intelliguntur*, ut sunt quæ dicuntur naturæ, causæque internæ,

internæ, atque proximæ, & proprietates earundem rerum. Denique, cum incerta haberent quæ posterioris sunt generis: admitterint tamen quæ prioris sunt, nisi si quando animi gratiâ, facere libuit dogmaticis insolescentibus negotium. Heinc suborta quæstione v. c. de dulcedine mellis, respondebat Pyrho, aut quilibet alius, sibi quidem mel apparere dulce, & ea de re se esse securum; an autem mel esset suâ naturâ dulce, potius quam amarum, saporisve alterius, hoc est, quod dicebat se ignorare, & dubii causam sibi esse, quod si mel tale foret in se, & secundum suam naturam, tale etiam appareret omnibus, quæ degustandi mellis vim habent, cum non appareret tamen tot animalium generibus, quæ gustatu pollent eximio; imò ne omnibus hominibus quidem, aut uni etiam homini secundum varia tempora. Sic non negasset quidem ignem apparere sibi calidum, aut sese ab illo comburi; sed non pronunciasset propterea illum esse ex sua natura huiusmodi, quod non appareret perinde pyraustis, seu pennatis illis animalculis, quæ in mediis fornacibus nascuntur, & vivunt. Ita censuisset de cæteris; nempe dici posse unamquamque rem esse, aut apparere talem, quatenus talem habet molem, figuram, motum, situm; ac simul analogiam respectu istorum, aut illorum organorum; respectu hujus, aut illius animalis, vel hominis; respectu hujus, aut illius temperamenti, vel affectionis; respectu hujus, aut illius temporis, loci, situs, distantie, habitus, similium; non autem esse propterea talem secundum se, seu ex natura intima, ob jam dictam causam; qua etiam constat Aristotelem alicubi usum, dum expendens, an lex aliqua sit iuxta secundum naturam, eam talem dixit quæ ubique gentium talis creditur, eo modo, quo ignis calidus suâ naturâ est, quia tam apud Græcos, quàm apud Persas urit. Hæc porro attingo, ut innuam dubitationes Scepticorum fuisse solum de rebus reverâ incertis, & quas disquirere esset operæ pretium; non verò de rebus apparentibus, & de quibus facere controversiam nihil prodest. An porro tu melius, alii viderint. Sceptici certe admittentes ea, quæ apparent, quatenus apparent, & quomodo-cumque appareant; nihil interea pronunciantes de interiore cuiusque naturâ, veritate, causis, effectis, proprietatibus, modis, disquisière omnia constanter, & congruè interim sentientes ipsis vitæ actionibus, remansere omni exuti præjudicio, retinuerèque integram dijudicandi libertatem. Tu secus agis, dum ea, quæ apparent sensibus non admittis, verum pro incertis, atque falsis habes;

bes, & cùm hoc modo accommodari necessariis vitæ usibus non possint, habes aliunde tanquam certa, quæ ad naturam intimam spectant, & vel non exuis præjudiciū, vel in præjudiciū incidis, ut constare vel ex eo potest, quodd dogmaticum tam ardentè agis.

III.

*Ita quis in-
quirat
quid ipse
sit, non
esse ne-
cessarium,
ut fictio-
is operosa
illa mo-
dione esse
se, seu ex-
sistere pro-
bet.*

Et ne longum eam, dicis heic, *me non bona fide ut seriò dictum ac-
cipere, quod tu dixeras, Te non intelligere quid esses*: id enim erat alte-
rum meimbrum attributæ mihi initio fictionis. Sed ut appareat, an
finxerim, an non bona fide acceperim, Tuus ille locus sic habet:
*Statuendum est hoc pronuntiatum, Ego sum, ego existo, quæries à me
proferitur, vel concipitur, esse verum. Nondum verò, satis intelligo quis-
nam sim ego ille, qui jam necessario sum, deincepsque cavendum est, ne
forte quid aliud imprudenter assumam in locum nisi, sicque aberrem etiam
in eâ cognitione, quam omnium certissimam, evidentissimamque esse con-
tendo. Locus autem meus in hunc modum habet, Subdis, Te non pro-
pterea satis intelligere quid sis: hoc autem seriò accipitur, & ultrò concedi-
tur, idipsumque opus, ac labor. Nempe id absque ambagibus, totaque
illa suppositione videtur fuisse requirendum. An igitur aliquid finxi, aut
non bona fide accepi? Atqui tu ibi loquebaris non ex tua, sed ex
vulgari aliorum sententia. Et quis credidisset? Quis etiam jam cre-
dat, qui ad seriem tuorum verborum attendat? Et quid nocuisset
igitur verbulum interponere, quo significasses te ex aliorum qui-
dem sententia nondum cognoscere quid esses, sed ex tua ipsius cog-
noscere quam-optimè. Sane si ita elabi liceat in manifestissima phra-
si, in apertissima consequutione, qua testimoniis omnibus sensuum
manentibus adhuc (te id dicente seriò) incertis; assumis te, post-
quam attendisti ad tui existentiam, attendendum esse ad tui essen-
tiam; fatendum sanè nullum Protea esse posse versatiliorem. Esto
verò loquutus fueris ex aliorum sententia; uter nostrum personam
finxist? uter tua verba non bona fide, hoc est alio sensu, quam sen-
sus esset verborum accepit? At proposuisti, ut de eo ulterius inquireret?
Igitur dixisti, non quod non satis intelligeres quid esses; sed ut ani-
mi gratiâ inquireret ulterius, quid esses. Ad paulò post; sed inte-
rim, haud abs re dixi non longè eundem, ut quàm ardentè dog-
maticum ageres, manifestaretur. Scilicet contendis te satis intel-
ligere quis-nam sis, & longissimè abes, ut alijs de te, plusquam tibi
credere velis. Quin-etiam propterea in me exaristi, quodd ego ig-
narus versatilitatis, irritaverim te imprudens, cùm seriò accepi
quod tu dixeras, *non intelligere te quis-nam esses*, id ipsumque opus,
*ac laborem**

ac Laborem dixi, ut disquireretur; neque ad hoc suppositionem, ambagesque illas fuisse necessarias; quas solas seriò accepisses. Quæ sequuntur, non video, quæ causari possis non accepta esse eo modo, quo accepta volueras: Nam & quod quæris qua fide dicam nutriri, incedere, sentire, à te referri ad animam, ut statim subiungam, esto, &c. quoniam tu postea expressis verbis nutritionem retulisti ad solum corpus, incessum verò, &c. quæro ipse potiùs, qua fide id objicias, cum dicam, non referri, quasi esset quæstio de tuo præsentè judicio, quod suspensum eo loco facis; sed, retulisse; quasi eodem spectans, quò tu, nempe ad iudiciu à te latum, priusquàm ad meditandum te accingeres. Nimirum consequutus te, hoc est verborum seriem, sum; & tu-ne heic fidem jure exigas, ipsam legentium fidem imploro. Instas, quam rationem habuerim, ut dicerem non opus fuisse tanto apparatu ad probandum te existere, pergisque te ne satis quidem magno usum quando efficere non potuisti, ut rem rectè intelligerem. Ego verò haudquaquam invideo hujuscemodi thrasonismum: tamen mihi conscius sum non latuisse me tuam subtilitatem. Quippe illam præoccupandam, tanquam inutilem non censui; cum ex ipsis verbis solutio constaret. Postquàm enim dixi potuisse te vel ex quavis tua alia actione Te esse colligere; cum lumine naturali notum sit, quicquid agit, esse; providi omninò te posse id objicere quod jam facis, multum me aberrare à vero, quòd nullius actionis tuæ posses omninò esse certus, præterquàm solius cogitationis aut alterius, cujus esses conscius, seu cujus conscientiam, quæ est cogitatio, haberes: sed putavi te cordatiorem, quàm ut vitilitigare velles, animadversurum præsertim meam illam vocem colligere facultatis cogitantis esse propriam, atque idcirco te per illam esse seu ambulationis, seu alterius actionis consciu. Quid, quod etiam ex abundanti visus sum adtexere notam lumine naturæ rationem? Ut quid enim fuit conquirenda ratio, qua te probares existere? Tu ipse eras, qui cogitabas, qui videbas, qui scribebas, qui loquebaris, qui manducabas, qui bibebas, qui agebas cætera: Et poterat-ne dubitare quin esses? & supervacaneu non erat te sollicitè rationem venari, qua te esse probares? Et si erudire cæteros volebas, putabas-ne quenquam inficias iturum? Et, si jam quispiam alius hæreret, an esset; ac præter ipsissimam rei evidentiam, peteret id sibi ratione probari, tu ipse non illum amandares Anticyram? Non perinde cum illo agendum censes, ac vulgò dicunt agendum cum eo, qui ignem esse calidum, aut neget aut dubitet? Quod subdis de mente somniantè,

& de corpore viso ambulare, id intelligendum ex dicendis est.

IV. Nunc, cum aggrediaris reipsa præstare, quod Archimedi fuit
Qua sum- solū in votis, (Nam nihil, inquis, nisi punctum petebat Archimedes,
ma, ac se- quod esset firmum, & immobile, ut integram terram loco dimoveret; magna
ries istius, quoque speranda sunt, si vel minimum quid invenero, quod certum sit, &
residua inconcussum) idē cognoscendum universē est, tum quod immobi-
rumque le punctum repereris, tum quibus machinis moveas tantam molem.
Meditati- Et quia dicis alicubi te illū scribendū modum elegisse quo putasti posse cor-
onum. ciliari quam-maximē lectorum tuorum attentionem, (de labore certē ad
attendendum necessario nemo non testimonium dicet) quoque tibi
persuades lectores plus utilitatis esse percepturos, quā ipsimet sint ani-
madversuri : Age totam seriem per capita summa, atque præcipua
pervideamus; sic enim uno quasi prospectu non unius solū de-
monstrationis (sic enim appellas) sed totius etiā Systematis omni-
um analysis melius patebit. hujusmodi ergo progressus est tuus.

Med. 1. Primō, Cum sen somnians, sen à Deo deceptus, sen à maligno Genio
declusus in eo statu sim, ut omnia, quæ video, & quæcumque memini, esse
falsa supponam; Animadverto saltem me Esse, qui ita suppono, si ve co-
gito; nam & quamvis fallar, non fallerem tamen, nisi essem.

Med. 2. Secundō, Subit consequenter cogitatio, quid sim: deprehendo autem
me esse non extensionem, non figuram, non alia, quæ spectant ad naturam
corpoream; sed esse præcisē rem cogitantem, hoc est intelligentem, imagi-
nantem, sentientem, volentem, nolentem, dubitantem. Quare & hanc pro-
nuncio esse naturam meam, ut sim Res cogitans, quæ appeller Mens, ani-
mus, Intellectus, ratio; & mea proinde natura non modo est nota, verum
etiam notior, quā sit natura corporis.

Med. 3. Tertiō, Cum certus sim me esse rem cogitantem, animadverto hanc cer-
titudinem aliunde non esse, quā ex eo, quod clara est, & distincta perce-
ptio: Igitur possum pro Regula generali statuere, Illud omne esse verum,
quod valdē clarē, & distinctē percipio. Et quia tamen memini me a-
lias deceptum, cum certa, ac vera haberem, quæ videbar mihi clarē, & di-
stinctē percipere: An-non & deinceps hæc regula faller, cum, ut alia re-
ticeam, Deus fortē sit, qui talem me fecerit, ut errarem? Itaque disqui-
rendum est, utrum Deus sit, & possit-ne esse deceptor.

Quartō, Esse porrō Deum manifestē agnosco ex Idea, quam in me habeo
substantiæ infinitæ, æternæ, omnipotentis, omniscientiæ, &c. Cum realitas enim
objectiva hujusce Ideæ sit perfectior, quā ut vel à me, vel à quacumque
re finita produci potuerit (repugnat enim perfectionem esse in effectu, quā
in causa majorem,) Sequitur ut illa fuerit producta in me à causa infini-
ta.

ta, æterna, &c. qualem Deum esse dicimus; Quocirca & necesse est talem causam, seu Deum esse, qui & Ideam, & me (qui ab illa non distinguor) produxerit.

Quintò, Cum nulla sit in Deo mei authore imperfectio, sequitur, ut non lit me falli. Quare tamen fallor? Nempe quia omnino perfectus non sum. ut taceam me habere voluntatem latius patentem, quam intellectum. Annon possum cavere, ne fallar? Possum, si nihil quidem ut verum admittam, nisi quod clarè, & distinctè percipiam. Cæterum quia ista clara, distinctaque perceptio est aliquid: Igitur Deum habet Authorem: Et quia Deus fallax non est (hoc enim repugnat summæ bonitati) sequitur, ut nunquam fallar, quotiescumque aliquid clarè, & distinctè percipio. Et quare tamè aliàs fallebar? videlicet quoniam res clarè, atque distinctè non percipiebam.

Med. 4.

Sextò, Quoniam ex Idea Dei sequitur Deum esse, Annon ex Idis rerum materialium sequitur quoque res materiales, de quibus initio dubitabam, esse? Hoc postea; interea agnosco me clarè, & distinctè imaginari quantitatem, figuram, motum, & alia, quæ sunt de essentia rerum materialium. Agnosco etiam esse in me Ideas rerum, quæ tametsi nusquam sint, habeant tamen suas veras, æternas, immutabilesque naturas; qualis est Idea Trianguli, de quo varias proprietates demonstro.

Med. 5.

Septimò, Si ex eo solo, quod possum alicujus rei Ideam ex cogitatione mea depromere, sequitur ea omnia, quæ ad ullam rem pertinere clarè & distinctè percipio, revera ad illam pertinere; Nunquid inde quoque haberi potest argumentum, quo existentia Dei probetur? Cerrè. Nam Idea Dei repræsentat Ens summè perfectum, Tam autem repugnat Ens summè perfectum esse sine aliqua perfectione, ut purè existentia, quam repugnat tri-angulum non habere tres angulos pares duobus rectis.

Octavò, Quin etiam, cum nōrim Deum esse causam, cur aliquid clarè, & distinctè percipiam, non modo cognosco Deum esse, sed ex hac etiam cognitione certus reddor aliarum rerum, etiam demonstrationum Geometricarum; quas subdubitare posse non esse certas (licet clarè, & evidenter prius cognitas) nisi in me defixum esset clarum, & distinctam perceptionem non esse fallacem, quoniam à Deo est, qui non potest esse deceptor.

Nondò, Ad res materiales ut redeam, quia illas clarè, & distinctè (saltem ut puræ Mathematicæ objectum) percipio: hoc primum novi, quod possint existere. Quippe Deus est capax efficiendi quicquid ego sum capax percipiendi, nihilque unquam ab illo fieri non posse judicavi, nisi propter hoc, quod illud à me distinctè percipi repugnat; ne interim possibilitatem arguam ex imaginandi facultate, quæ cum imagine corporca, & attentione ad corpus est, secus quam facultas intelligendi.

Med. 6.

Decimò, *Quoniam scio omnia, quæ clarè, & distinctè intelligo talia à Deo fieri posse, qualia intelligo; satis est, quod possim unam rem absque altera clarè, & distinctè intelligere, ut certus sim unam ab altera esse diversim, quia potest saltem à Deo seorsim poni. Ac proinde ex hoc ipso, quod sciam me existere, quodque interim nihil planè aliud ad naturam, sive essentiam meam pertinere animadvertam, præter hoc solum, quod sim res cogitans; rectè concludo meam essentiam in hoc uno consistere, quod sim res cogitans. Et quamvis habeam corpus, quod mihi valde arte conjunctum est; quia tamen ex una parte claram, & distinctam habeo Ideam mei ipsius, quatenus sum tantum res cogitans, non extensa; & ex alia parte distinctam Ideam corporis, quatenus est tantum res extensa, non cogitans; certum est me à corpore meo reverà esse distinctum, & absque illo posse existere.*

Denique cum Deus mihi dederit magnam propensionem; ut credam Ideas rerum corporearum ab ipsis emitti, esset Deus fallax, si aliunde emitterentur; ac proinde res corporeæ existunt. Docet me aliunde natura, quæ quia Deus mihi illam dedit, fallere non potest, habere me corpus, cui male est, cum dolorem sentio, esurio, sitio; Igitur existit etià corpus meum, & quæ ad ipsum pertinent. Quod si interdum videor in aliquibus falli; non sum illa tamen à natura edoctus, sed ex consuetudine quadam inconsideratè judicandi accepi, possumque omnem errorem corrigere, si ad ea, quæ sunt naturæ attendam.

V.

*Frustrà
desudari
in stabili-
endo tan-
quam in-
concussum
principium
illud Ego
sum; ac
illi præfer-
tim, qui
stoliatius
sint omni
præjudicio.*

Atque ista quidem est series, ac summa tui ratiocinii. Nihil est verò opus ut illud heic quoque retexamus syntheticè, quo paralogismi clariùs detegantur; siquidem scopo, in quem singula dirigantur, semel perspecto, res commodiùs, compendiosiùsque sigillatim præstabitur. Hoc loco, dicendum est solum de puncto illo Archimedeo, quod à te inventum gloriaris, argumentatus in hunc modum;

Si quis constituat unum certum, inconcussumque principium, ex quo cetera omnia, quæ certò noscuntur, necessaria quadam connexionè deducantur, ille magna speranda facit;

Atqui ego constituo unum certum, inconcussumque principium, ex quo cetera omnia, quæ certò noscuntur necessaria quadam connexionè deducantur;

Igitur ego magna speranda facio.

Ac esse quidem hujusmodi argumentationem tuam negare non potes, quin te, seu opus totum neges. De propositione porrò nihil dico; quoniam seu hypothesis illa possibilis, seu impossibilis sit, conse-

consequentio est planè admittenda. Assumptio duas habet partes. Prior est, *constituere te in unum certum, inconsummumque principium*; Posterior, *ex isto principio cetera omnia, quæ certo noscuntur necessaria quadam connexionione deduci*. Priorem probas afferendo ipsummet principium, seu pronunciatum, *Ego sum*: & firmitatem simul addendo ex illa ratione, *Cogito enim*. Enimverò, quod ad me spectat, cum in prima tuarum meditationum lectione ad istum locum pervenissem, in quo sperabam veritatem ad hoc usque tempus inauditam, & quæ esset omnium veritatum, seu propositionum verarum fons: Deus bone, inquam, hoc-ne novum est, quod tanto apparatu, ac molimine fuerit requirendum, *Te esse*? Scilicet istud pronunciatum in plusquam Cimmeriis delitescibat tenebris, tibi ignotum, tibi incertum, aded, ut, si quispiam ante illum diem quæsiisset ex te, *Es-ne Cartesi*? haud habuisses quid responderes; quoniam res foret mira, inexplorata, incomperta, & de qua ut certum aliquid statueres, posceres (quod poscis in lectoribus) aliquot mensis, hebdomadasve? Scilicet ipsius defectu, omnis te ante eundem diem veritas latebat; aded ut si quis te interrogasset, *Nosti-ne, Cartesi*, duo & tria esse quinque; aut *Quadratum* non habere plura, pauciorave latera, quam quatuor; poposcessisses quoque aut mensis, aut hebdomadas aliquot; donec constaret certò, *Te esse*? Dicis *non fuisse certum te certitudine ulla Metaphysica, hoc est per cogitationem*. At certitudo res firma est; & si addi illi quid possit, unde reddatur firmior, hoc ipso arguitur infirma. Quamobrem vel nova ista certitudo nihil adjicit, vel si adjicit, argumento est, non fuisse certitudinem, quam fuisse certitudinem dicis. Neque dicas fuisse te quidem prius certum, sed jam tamen agnoscere, potuisse te tunc decipi; siquidem uti jam agnoscis te sequutum illa principia non potuisse decipi; ita & agnovisti tunc sequentem te illa decipi non posse. Sed ne heic hæreamus, Assumis ecce rem demonstrandam, de qua nemo quidem fuit tibi factururus controversiam; verùm quam non putaris firmam, nisi tuo modo confirmares. Age ergo animi gratiâ ratiocinationem tuam exploremus. *Ego cogito*; *Igitur ego sum*. Optimè res habet, Sed meministi-ne te esse in eo statu, in quo quicquid hætenus nosti, falsum reputes, & in quo (utcumque jam concedamus reputare omnia falsa non esse præjudicium) omnia præjudicia exueris; aded ut judiciorum nudus, ab hoc ipso, quod jam constituis, sis totam seriem sequutorum judiciorum derivaturus? Meministi haud dubiè: largiorque ultrò memoriam, seu

recordationem præjudicium non esse; neque requiro, quid voces, aut quomodo intelligas, quid sit cogitare, quid esse, &c. Dicis itaque, *Ego cogito; Igitur ego sum.*

V I.

Vanitas
approbatur
ad illam
consequen-
tiam, E-
go cogito;
Igitur ex-
sisto.

At primum casus merus est, quod hæc cogitatio, *Ego cogito*, potius quam alia in mentem subeat; certè enim illam habere ex electione non potes; quoniam electio iudicium est, iudicio verò spoliasti te, istudque *ego cogito*; primum in serie locum tenet. Itaque omnia, quæ deinceps super-extruentur iudicia, non necessitate erunt aliqua, sed ab eodem casu, quo istud pendebunt. Deinde, *Ego cogito*, inquis; sed quid cogitas? siquidem omnis cogitatio alicujus rei cogitatio est. An cælum? an terram? an quidvis aliud? an teipsum? Omnia jam reputasti falsa, neque mutasti sententiam; quamobrem quicquid cogites, falsum cogitas; ac proinde est tua cogitatio falsa. Igitur & omnes, quas consequenter elicies cogitationes, falsæ erunt. Rursus, *Ego cogito*, inquis: At cum dicis *Ego*, Nosti-ne teipsum, an non? nosti dubio procul, nam te alioquin non nominares. Nosti-ne verò te esse, an-non? Si nosti te esse; igitur præjudicium habes, quod adversatur suppositioni; Si non nosti te esse, ergo neque nosti te agere, quoniam agere, ut loquuntur præsupponit esse. Igitur neque nosti te cogitare, quoniam cogitare est agere; Igitur cum dicis *Ego cogito*, ignoras quod dicis; atque aded quicquid exinde cognoscēs, atque inferes, ignorato planè principio nitetur. Ad-hæc cum dicis *Ego cogito*, enuncias aliquid de te, ac in præsentī tempore quidem; Igitur idem est, ac si dicerēs, *Ego sum cogitans*, tu nimirum subiectum es, & cogitatio attributum; Atqui non potes dicere te esse cogitantem, quin dicas *Te esse*; idque declarant Dialectici, cum docent Verbum adsignificare tempus, quod est τὸ νῦν παύσασθαι nunc esse: Igitur cum dicis *Ego cogito*, dicis *ego sum*; & dicens deinde in consequente *igitur Ego sum*, nihil aliud infers quam quod præsupposuisti; sicque idem per idem probas. Præterea quoniam quando dicis *Ego cogito*, *Igitur ego sum*, enthymema est, neque probationis vim habet, nisi vigore consequutionis firmitudinem habentis ex illo principio, quod te alicubi non latuit, *Qui cogitat est*; ided contextendus necessarid syllogismus est, aut in forma primæ, perfectæq; ut volūt figuræ hoc modo,

Qui cogitat est; Ego cogito; Igitur Ego sum.

Aut in forma quartæ vulgò improbatæ, & quam dicunt Galenicam, hoc modo,

Ego cogito; Qui cogitat est; Igitur ego sum.

At

At utrovis modo perspicua ruina. Nam si priore forma concludas, propositio illa, *Qui cogitat est*, præjudicium est, antecedens illud, quod tu vis statuere judiciorum primum. Si posteriore, tum Assumptio illa *Qui cogitat est*, judicium est, quod neque dependet à tua propositione *Ego cogito*, neque sequitur tuam conclusionem *Ego sum*, ex qua, vis omnia judicia, præter illud, *Ego cogito*, pendere. Ex quo sequitur, ut utrovis modo accipias, veritas, notitia, certitudo illius effati, *Qui cogitat est*, nullo modo deducatur ex veritate, notitia, certitudine neque tui puncti Archimedis *Ego sum*, neque stabilimenti illius *Ego cogito*. An putas verò deducuntur, quæ illo adhuc priora sunt? Nempe & ipsum ex prioribus sic deducitur, *Qui agit est*; *Qui cogitat, agit*; Igitur *Qui cogitat est*. An etiam quæ istis sunt adhuc priora? Nam illud quidem, *Qui agit est*, deducitur ex ipsis, *Posterius non est sine priori*, & esse est prius, *agere posterius*: Istud verò ex illis, *Motio est actio*, & *Cogitatio est motio*: atque ita de cæteris. Denique ex his omnibus manifestum efficitur, quàm fallaci ratiocinatione usus fueris, ad probandum rem alioquin veram, perspicuam, certam; nimirum *Te esse*; non quòd principium illud *Ego cogito* ad eam comprobandam valere non possit; sed quòd non possit, usurpatum cum tua illa suppositione. Ut pateat verò qua necessitate ipsum cum illa nexueris, res est exhibenda isto syllogismo.

Si quis somnians, à Deo deceptus, à maligno Genio delusus, omnia quæ prænovit, falsa reputet, judicioque omni præhabito spoliatus sit, ille colligit se existere, quia cogitat:

Atqui ego somnians, à Deo deceptus, à maligno Genio delusus, omnia quæ prænovi, falsa reputo, judicioque omni præhabito spoliatus sum:

Igitur ego colligo me existere, quia cogito.

Agnoscat certè qui poterit necessitatem consequutionis in propositione; quasi colligere non possit, se existere, quia cogitat, sine illa hypothesi; aut ex eadem proposita non possit non colligere: Et quid porrò de Assumptione judicandum sit, agnoscat ex iis, quæ institimus in superiore Meditationem.

Posterior pars ex assumptione superioris argumenti restat, quæ tibi non conceditur, ut nempe ex eo, quod nòris *Te esse*, quia cogitas, cætera omnia, quæ certò noscuntur, necessaria quadam connexionē deducantur. Faciunt ad hoc mox antè dicta, cum ostensum est saltem illud effatum, *Quod cogitat est*, & quæ illo priora sunt non pendere ex sum.

VII.
Ex hoc
constituitur
principio,
cætera, quæ
noscuntur
omnino con-
nexionē
necessaria
deduci sal-
tem.

ex isto tuo , cùm ipsum potius ab illis pendeat. Facit etiam , quòd tamen si nihil cognosci possit à te siue certum sit , siue incertum , nisi sis , & nisi cogites ; attamen nihil necesse est , ut cogites te esse ; ut cogites te certò , & non dubiè scire te esse ; ut cogites te idèò certò , ac non dubiè scire te esse , ex eo quòd cogites ; ad hoc ut possis certus fieri , esse diem , quando sol lucet ; calefieri te , cùm accedis ad ignem ; & id genus cætera omnia. Faciet denique quicquid toto meditationum decursu observabitur , cùm illas institueris huiusmodi parti confirmandæ. Cùm initium porrò heinc facias ; postquam præmisisti , *statuendum esse hoc pronunciatum , Ego sum , Ego existo ; quoties à me profertur , vel mente concipitur , esse verum ; pergis , Nondum verò satis intelligo , quisnam sim ego ille , qui jam necessariò sum , deincepsque cavendum est , ne foriè quid aliud imprudenter assumam in locum mei , sicque aberrem , etiam in ea cognitione , quam omnium certissimam , evidentissimamque esse contendo. Quare jam demùm meditabor , quidnam me olim esse crediderim , &c.* Adnoto primùm transitionem , non necessariam ex necessaria connexionem deductionem esse. Postquam enim conclusisti te esse , quia cogitas ; tam potest quidvis aliud , quàm natura tua inquirenda , certoque noscenda , venire in mentem : ac tantò magis , quantò id , quod cogitas , Sol , Luna , Terra , quidvis aliud , potest te ad aliam deducere cogitationem. Deinde cognitio existentie rei nullam necessariam connexionem habet cum cognitione essentie , siue nature intimæ ; alioquin enim quæcumque patent sensibus , aut quocumque modo existere cognoscimus , etiam secundum essentiam , naturam ; recessus quosque cognosceremus. Quare & ex eo , quod nôris te esse , non potest inferri te nosse , aut posse nosse naturam tuam. Præterea , cùm quicquid existere cognoscitur ; sua seu actione , seu qualitate , aliòve adjuncto existere cognoscatur , non potest talis actio , qualitas , adjunctumve dici esse tota rei natura , nisi admittatur quicquid de re qualibet cognoscitur , unde existere probetur , quantumcumque illud sit , ipsam esse ejus , ac totam naturam. Quare cùm hoc absurdum sit , non modò cavendū est tibi , *ut te satis intelligas* , ne quid imprudenter in locum tui assumas ; sed etiam ne non satis assumas , & ipsam v. c. cogitandi actionem , ex qua cognoscis te existere , tuam esse totam naturam putes. Adhæc , quia circulum committit , neque novi quidpiam addiscit , qui nihil aliud probat , nisi quod supponit ; idcirco ut satis te nôris (quando te nondum satis nosti , ubi nosti te cogitare , ac eapropter existere) non modò cavendum videtur , ne quid-

quidquam alienum assumas ; sed etiam ne tibi id solum , quod jam de te nosti , attribuas ; Nam si exempli gratiâ cum nôris jam te cogitare , sive esse rem cogitantem , hoc ipsum pro principio usurpes , & nihil aliud probes , quàm te cogitare , sive esse rem cogitantem ; provides fore circulum , ac nihil novi cognitum iri. Verùm hæc ad ea , quæ sequuntur , spectant.

D V B I T A T I O I I .

*De non demonstrata anima incorporea , ex eo , quòd quis deceptus ,
& tamen advertens , affirmat se nihil corporeum in se reperire ;
& ne quidpiam quidem , quod sit quasi spiritus ,
ventus , aut aliud corpus tenne.*

EXploras deinde , num , suppositâ adhuc deceptione , affirmare possis esse in te aliquid ex iis , quæ pertinere censuisti ad naturam corporis ; & attentissimo examine factò dicis te nihil tale in te reperire. Hoc jam loco non spectas te , quasi hominem integrum , sed quasi interiorē , occultioreve partē , qualem cogitaras esse animam. Quæso te ergo , ô Anima , seu quocumque velis nomine censeris , emendasti ne hætenus eam cogitationem , qua prius imaginabaris te esse quidpiam instar venti , similisve rei his membris infusæ ? Non fecisti sanè. Cur non possis igitur esse adhuc ventus , vel potius tenuissimus spiritus , qui calore cordis ex purissimo sanguine , aliundeve , aut ab alia causa exciteris , serveris , & fusus per membra vitam illis tribuas , & cum oculo videas , cum aure audias , cum cerebro cogites , ceteraque , quæ vulgò tibi tribuuntur munia , exsequaris ? Id si ita sit , cur non habeas eandem figuram , quam totum hoc corpus , uti aer eandem , quam vas continens ? Cur non censearis circumscribi ab eodem ambiente , quo corpus , aut à corporis epidermide ? Cur non replere spatium , sive parteis spatii , quas crassum corpus , seu partes ipsius non replent ? Quippe corpus crassum habet porulos , per quos ipsa diffundaris ; adeò ut ubi partes tuæ fuerint , partes illius non sint : eodem modo , quo in vino & aqua mistis , ubi sunt partes unius , non sunt partes alterius ; quantumcumque visus discernere nequeat. Cur non excludere corpus aliud ab eodem spatio , cum in quibuscunque spatiolis fueris , partes corporis crassioris esse simul nequeant ? Cur non moveri pluribus motibus ? Cum tu eam plureis ipsis membris tribuas , quomodo id

F

possis ,

possis, quin movearis ipsa? Certè neque moves immota, cùm opus contentione sit: neque potes non moveri ad ipsius corporis motum. Si hæc igitur ita sint, cur dicas in te nihil esse, eorum, quæ ad naturam corporis spectant?

RESPONSIO.

Incipis deinde non injucunda prosopopœia me non amplius, ut hominem integrum, sed ut animam separatam interrogare; quo me videris admonere, hæc objectiones non a mente subtilis Philosophi, sed à sola carne factas fuisse. Quæso te igitur, o caro, seu quocunque velis nomine censeris, habesne tam parum cum mente consortii, ut advertere non poteris quandonam emendavi illum vulgi imaginationem, per quam fingitur id quod cogitat esse instar venti, similisve corporis? Emendavi enim illam profectò, cùm ostendi supponi posse nullum ventum, nec aliud corpus in mundo esse, ac nihilominus illa omnia, ex quibus me ut rem cogitantem agnosco, remanere. Ac proinde quæcunque postea interrogas, cur non possim igitur esse adhuc ventus, cur non replere spatium, cur non moveri pluribus motibus, & talia, tam inania sunt ut responsione non egeant.

INSTANTIA.

I. *Eum, qui se nihil corporeum, sed puram esse mentem dicit. stomachari immerito, si quis cum ipso agens, alioquatur ut solam mentem.*

Hic jam animadverto causam quæ bilem fecit, ac te commovit, ut ab ipso usque initio censeris esse agendum mecum tanquam cum carneo homine. Nempe res tibi visa subtilis, & tuo acumine digna, si cum ego te Animam, seu etiam deinceps toto decursu Mentem dicerem, tu me appellitares carnem. Cùm id porrò ipse inoffensus, jucundeque excipiam, qui plura dicere in me, quàm quivis alius possit soleo, adscribere placet, quemadmodum ego, dum te animam, atque mentem dixi, non prosopopœia, fictioneve ulla usus fuerim; non ironicè, aut simulatè quidpiam dixerim; ut tu propterea præter candoris, & amicitiae jura deberes causari, & in convitia prorumpere. Dixeras tu te attendentem, cogitantem, revolventem, frustra fatigatum nihil reperire in te, quod ad corporis naturam spectaret. Id ego bona fide accipiens, agnovi rem mihi non esse aut cum corpore, aut cum toto homine ex corpore, animaque constante; & quia nondum vocem determinâras, & videbaris mihi tamen esse id, quod animat corpus, affatus sum te tanquam animam. An verò potui id facere præter tuum institutum, præter

præter verborum tuorum sensum; te nos veluti invitante; ac penè dicam compellente? Dixisti etiam paullò post, *Sum præcisè tantum res cogitans, id est Mens, sive animus, sive intellectus, sive Ratio.* Ego quia vidi te declarasse, quo nomine haberi velles, sum te deinceps pari fide tanquam Mentem alloquutus. An-non tu mihi occasionem ut ita facerem dedisti, nomenquè ipsum præscripsisti? Est-ne quisquam, qui putet me potuisse agere simplicius? Feci certè aliunde, ut præscinderem ansam compluribus verbis inutilibus, quando tu potuisses sapiùs respondere, debere me agere tecum, aut potius te considerare tanquam Mentem, seu rem cogitantem præcisè, non verò tanquam hominem totum; & ego propterea debuissèm sapiùs inculcare, non intelligere me totum hominem, quamvis dicerem te videre, te imaginari, & similia. Tu verò es candorem meum ironicè interpretatus, & usus ipse prosopopœià, indutus scilicet personà, quam jam abnegas, prosopopœià me usum dicis, qui tamen ipsammet personam quæ loquebatur, aut se loqui asserbat, alloquutus sum. Inde est nempe, cur cùm ego initio dixissem, *Quæso te ergo, ô Anima, seu quocumque velis nomine censei* (nondum scilicet te dixeras Mentem) tu indignatione tumens, excandescensque exceperis; *Quæso te igitur ô Caro, seu quocumque velis nomine censei.* Et quia deinceps seu abductus tua loquendi ratione, seu non advertendo, aut etiam bis, terve certo consilio, te interpellavi hac voce, *Vix eximie*, ac deinde ne discessisse ab instituto viderer, solœcismosque repetere, tanquam ad mentem rediî, dixique aliquoties, *O Mens*, toties tu, ac sapiùs quoque, quoties efferbuit stomachus, reposueris, *O Caro.* Cæterùm ut tibi id licuit, ita æternùm per me licebit; quando præsertim satis agnosco, licèt ex D E I gratia constem ex mente, sive anima, & carne, sive corpore; corpus tamen quod corrumpitur, aggravare animam, ut Scripturæ verbis id dicam. Quod te attinet, absit ut deinceps te Mentem vel habeam, vel dicam, quando ipse te declaras non esse, dicens *me usum prosopopœià*, seu fictam, non veram personam alloquutum fuisse: Et debueram sanè subvereri ne insimulares; Sed quis te esse eum credidisset, ut hosce laqueos instrueres? Nunc culpam agnosco (si tamen fuit culpa, ut inter bonos bene agier) agnosco, inquam, ex eo quòd non verbo modò, sed factò quoque declaras te Mentem non puram; quippe Mens pura libera est à corporis affectibus, quibus ipse te, non minus, quàm nos, qui carne sumus præditi, obnoxium esse manifestas.

II.

Non probari Animam non esse corpus tenue, si nihil aliud, quam supponatur nullum plane esse corpus in Mundo; Et varia quidem, sed vana effugia.

Ad rem ut veniam, postquam dixisti *admoneri te hæc objectiones non à mente subtilis philosophi* (qualem absit me gloriari) *sed à sola carne factas fuisse*, subiecisti quæ citata verba, *Quæso te igitur, ô Caro, sèu quocumque velis nomine cense*ri, tum pergis, *Habes-ne tam parum cum mente consortii, ut advertere non potueris, quandònam emendavi illam vulgi imaginationem, per quam fingitur, id quod cogitat, esse instar venti, similisve corporis?* Verum tu, ô bone, es ne satis æquus, (nam satis acutum nolo dicere) dum exigis ut sola caro id advertat, quod ne mens quidem sola advertere possit? Quippe nec te quidem tua illa mente adeo sublimi, & nihil consortii cum carne habente percipere valeas illud quod non est. Quid igitur, inquires, non est emendatio? Lentè quæso; siquidem caro non magna viget mobilitate. Verba tua fuerant: *Quid-nam igitur antehac me esse putavi? hominem scilicet, &c.* Et postea, attendam quid sponte, & natura duce cogitationi meæ antehac occurrebat, quoties quid essem, considerabam. Et statim, Occurrebat præterea me nutrire, incedere, sentire, & cogitare, quas quidem actiones ad animam referebam; sed quid esset hæc anima vel non advertebam, vel exiguum nescio quid imaginabar instar venti, ignis, vel ætheris, quod crassioribus mei partibus esset infusum. Et quia paullo post dixeras tibi attendenti, cogitanti, revolvendi, &c. ne minimum quid occurrere, si ve reperiri in te ex iis, quæ ad naturam corporis pertinent, recepi ipse, *Emendasti-ne hætenus eam cogitationem, qua prius imaginabar te esse quidpiam instar venti, similisve rei his membris infusæ? Non fecisti sanè. Cur non possis igitur adhuc esse ventus, &c.* Iam tu obstupescis cur advertere non potuerim, quando-nam emendaveris illam vulgi imaginationem. *Vulgi?* Nihil mihi fuit cum vulgo: res fuit tecum, qui fueras loquutus de te, qui ne minimum quidem insinuâras fuisse te loquutum ex vulgi sententia. Fuerit sententia, in qua non steteris, in qua vulgus reliqueris; Fuerat tamen tua, & tu non ut vulgi, sed ut tuam retuleras; ne igitur quære ex vulgo effugium. Sequitur, *Per quam fingitur id quod cogitat esse instar venti. Fingitur?* Tu nihil finxeras: retuleras id, quod natura duce occurrebat antea tuæ cogitationi. Quid igitur etiam effugium heinc quæris? *Id quod cogitat?* Quæstio fuerat non de eo solum, quod cogitat, sed etiam de eo, quo nutritis, incedis, æ sentis. Quorsum tot quæritas effugia? Subjungis, *Emendavi enim illam, profectò, cum ostendi supponi posse nullum ventum, nec aliud corpus in Mundo esse; ac nihilominus illa omnia, ex quibus me, ut rem cogitantem agnosco, remanere.* Video quò spectàrint effugia; Nimirum avebas te restringere ad rem cogitantem, & sepositam facere

cere nutrientem, incedentem, &c. quòd posses faciliùs canere receptui. Sed disquiramus quòd caput est. *Emendari*, inquis, *cùm ostendi supponi posse nullum ventum, nec aliud corpus in Mundo esse.* Et obstupescis, si ego heic non advertam emendationem. Imaginatio fuit, *Animam esse ventum, aut corpus aliud simile.* Hæc imaginatio emendanda fuit; nempe demonstrando ipsam falsam, ostendendoq; animam non esse ventum aut simile corpus. Dicis tú te id præstitisse, *cùm ostendisti supponi posse nullum ventum, nec aliud corpus in Mundo esse.* Sed amabò, *Ostendisti supponi posse?* Primò nusquam id ostendisti, qui de ostendendo ne cogitasti quidem; sed nude solum, historicèque enarrasti te somnare, à Deo decipi, à maligno Genio deludi, ut falsa esse crederes quæ prænoveras omnia: sed demonstrationem adhibuisti nullam. Et quomodo certè adhibuisses, probandis seu rebus, seu suppositionibus non modò incertis, verum etiam falsis? Esto deinde, ostenderis supponi posse, imò reipsa supposueris; Quæstio agitur, non an supposueris ventum nullum, v. c. in Mundo esse, sed nullus-ne reipsa sit, demonstrandumque tibi iucubuit ventum nullum reipsa esse; ut posses inde colligere, ne Animam quidem ventum esse. Quoniam verò non demonstraisti, sed supposuisti solummodo; idèd non demonstraisti quoque, sed supposuisti solummodò animam ipsam ventum non esse. Quare & quæstio remanet, sit-ne anima reipsa ventus, an non, tuaque illa imaginatio, qua ventum esse credideras, non est adepta emendationem. *Ostendisti quoque*, ut ais, *supponi posse remanere nihilominus illa omnia, ex quibus te, ut rem cogitantem agnoscis.* Sed pari modo, neque id ostendisti, qui abiecasti potiùs omnia omninò præjudicia; & neque te, neq; aliquid ad te pertinens excepisti. Ostenderis verò; Quæstio est, non an supposueris, supponereve potueris, nullo penitus existente vento, similive corpore, remanere rem cogitantem, aut ea, ex quibus agnoscitur; sed an reverà ista remaneant. Et quia tu solum ostendisti supponi posse remanere, non autem remanere reverà; eam ob rem quæstio superest; tuâque illa imaginatio superest adhuc inemendata. Itaque sic argumentaris:

Qui ostendit (vel potiùs dicit se ostendisse) Supponi posse nullum ventum, nec aliud corpus in Mundo esse, & remanere tamen illa omnia, ex quibus se ut rem cogitantem agnoscit, ille demonstrat animam (sive malis Mentem) non esse ventum, neque aliud corpus:

Atqui ego ostendi, vel potiùs dico me ostendisse supponi posse, &c.

Igitur ego demonstravi Animam (scu Mentem) neque esse ventum, neque aliud corpus.

III.
Demonstrationem non esse, si quis ut probet non habere se aliquid, quod ad corporis naturam pertineat, nihil aliud asserat, quam se à malo Genio delusum attendere, & tamen nihil tale posse affirmare.

Cum porrò vitia hujus tuæ argumentationis ex jam dictis pateant, & perspicuum exinde fiat, illa-ne, quæ interrogo, tam inania sint, ut responsione non egeant; Refero ecce integrum locum, qui & meæ dubitationi, & tuæ responsioni, seu argumentationi locum fecit. Quid autem, inquis, ubi suppono deceptorem aliquem potentissimum, & si fas est dicere, malignum, datâ operâ in omnibus, quantum potuit, me delusisse, possum-ne affirmare me habere vel minimum quid ex iis omnibus, quæ jam dixi ad naturam corporis pertinere? (nimirum posse figurari, loco circumscribi, spatium replere, aliud excludere, sensu percipi, moveri.) Attendo, cogito, revolvō, fatigor eadem frustra repetere. Integrum, inquam, refero locum, quoniam non alia est demonstratio, qua ostendas Animam, Mentemve esse incorpoream. Eatenus certè non demonstrâras, deinceps quoque non demonstrâras, sed statim, ut mox demonstratum supponis: sequitur enim, Quid verò ex iis, quæ animæ tribuebam, nutrirî, vel incedere? Quamdoquidem jam corpus non habeo, hæc quoque nihil sunt, nisi figmenta. Neque dicas te demonstrationem reservare in Meditationem sextam, id enim illeic videbimus; Nunc, quia assumis te, sive Mentem tuam non habere corpus, seu esse incorpoream, & ex eo quoddam attenderis, cogitâris, revolveris, affirmare non potes te habere aliquid eorum, quæ ad naturam corporis pertinent, inferis deinde te esse solùm, ac præcisè rem cogitantem: Aut demonstrasse debes te nihil habere ex iis, quæ ad naturam corporis pertinent; aut ista, quæ assumis, ac inferis, quæque deinde sunt tibi ut principia in Meditatione sexta, nullius planè sunt firmitatis. Cæterum quomodo demonstras nihil te habere illorum, quæ ad naturam corporis spectant, extensionem, figuram, circumscriptionem localem, alia? Ecce vim tui ratiocinii.

Si quis à maligno Genio delusus, & nihilominus attendens, cogitans, revolvens, frustra fatigatus eadem repetere, affirmare non potest habere se vel minimum quid ex iis omnibus, quæ ad naturam corporis pertinent, ille non habet vel minimum quid ex iis omnibus, quæ ad corporis pertinent naturam:

Atqui ego à maligno Genio delusus, & nihilominus attendens, cogitans, revolvens, frustra fatigatus eadem repetere, affirmare non possum habere me vel minimum quid ex iis omnibus, quæ ad naturam corporis pertinent:

Igitur

Igitur ego non habeo vel minimum quid ex iis , quæ ad corporis pertinent naturam.

Cedò jam , si hæc demonstratio sit , ecquæ delusio , ecquæ deceptio , ecquod insomnium , ecquæ simplex affirmatiò , aut non affirmatio , ecquæ cuiusvis authoritas , referentis se attendisse , & se interim aliquid vel vidisse , vel non vidisse ; pro demonstratione haberi non possit ? Piget profectò retexere , juvatque potiùs observare , quorsum tu delusus putes nos quoque delusum iri. Tu quidem imprimis , cùm requireres quid esses ; & tibi illa definitio , Animal rationale , occurreret , declinare illam voluisti ; ne , si admisisses te animal esse , inferri potuisset esse te & corpus ; at tametsi tu delusus declinaveris , non fraus propterea fuit nobis facta , qui te arbitràmur esse animal , seu , quod idem est , animatum corpus. Deinde cùm priùs novisses te aut esse corpus , aut non minùs corpus habere , quàm animam ; voluisti tamen sponte deludi , & reputare falsum , quòd aut esses , aut haberes corpus ; Atqui non propterea nobis imposuisti , qui te esse corpus , aut saltem habere corpus opinamur ; ipseque tu in Meditatione sexta fidem habebis , ac manus dabis. Cùm tu denique te hoc loco , ut solam Mentem consideres , & ut consideras , sic reverà te sine corpore esse putes , atque idcirco deludaris ; non ided tamen uti tu das , ita nos accipimus verba : Nam & quamvis nos non admoncas qualem te esse consideres , sed perinde loquaris , ac si totum te , non tui partem reputares ; nihilominus te non alium habemus , quàm integrum , & similem nobis hominem , & considerantem quidem te ut lubet , sed non propterea te reipsa abducentem à corpore ; cùm aliud sit longè reipsa , quàm consideratione secerni : Verum hac de re in sequentibus.

D V B I T A T I O I I I.

De non demonstrata anima incorporea ex eo , quòd idem affirmet , se pari modo delusum non deprehendere , quòd nutriatur , incedat , sentiat ; ac deprehendat interim se cogitare.

P Ergis , neque esse in te ex iis , quæ animæ tribuuntur , nutriri , vel incedere. At primùm , potest aliquid esse corpus , nec tamen nutriri. Deinde , si tale sis corpus , qualem spiritum diximus , cur , cùm crassiora illa membra crassiore substantia nutriuntur , non possis

possis ipsa tenuior tenuiore quoque nutriri? Et, nonne illo corpore, cujus ex sunt partes, adolescente, ipsa adolescis; & dum illud debilitatur, debilitaris quoque ipsa? Ad incessum quod attinet, cum membra incedant per te, & in locum nullum contendant, nisi agente, & ferente te, quomodo id fiat sine tuo incesu? *quandoquidem*, inquis, *jam corpus non habeo*, hæc nihil sunt, nisi figmenta. Verum, seu nos ludis, seu ipsa deluderis, nihil nobis morandum. Sin loqueris serio, probandum est tibi, neque te habere ullum corpus, quod informes; neque te esse ejusmodi, quod unà nutriri, incedereque valeat. Pergis adhuc, *neque te sentire*. At ipsa profecto es, quæ vides colores, audis sonos, &c. *Hoc*, inquis, *non fit sine corpore*. Credo equidem, sed primum adest tibi corpus, ipsaque: es intra oculum, qui non videt sanè absque te: ac potes deinde esse tenue corpus, quod per organum sensus opereris. *Permulta*, inquis, *visa sum sentire insomnis, quæ me non sensisse postea animadverti*. Enimvero tamen fallaris, quod non utens oculo videaris sentire, quod sine oculo non sentitur, non es tamen semper experta eandem falsitatem, neque non usa es oculo, per quem senseris, imaginesque hauseris, quibus jam sine oculo uti possis. Deprehendis tandem *te cogitare*. Id verò abnuendum non est: sed probandum superest tibi, vim cogitandi ita esse supra naturam corpoream, ut neque spiritus, neq; aliud corpus agile, purum, tenue, ulla dispositione parabile sit, quod cogitationis efficiatur capax. Probandum simul animas Brutorum esse incorporeas, videlicet quæ cogitent, seu præter functiones sensuum externorum, aliquid internè, non vigilando modò, sed somniando etiam cognoscant. Probandum rursus crassum hoc corpus ad cogitationem tuam nihil prorsus conferre, (cùm absque illo tamen nunquam fueris, neque ab illo sejuncta aliquid huc-usque cogitaveris) ac te idcirco independentem ab eo cogitare: adeò ut neque impediri, neque turbari valeas à vaporibus, sive fumis tetrìs, crassisque, qui tam malè cerebrum interdum afficiunt.

R E S P O N S I O.

NEc magis urgent, quæ subjungis, Si sim tenue quoddam corpus, cur non possim nutriri, & reliqua; nego enim me esse corpus. Atque, ut semel absolvam, quia ferè semper eodem stilo utor, nec meas rationes impugnas, sed ipsas, tanquam si nullæ essent, dissimulando, vel imperfectas tantùm & truncatas referendo, colligis varias difficultates,

ficillitates quæ vulgò ab imperitiis in meas conclusiones, aliasve iis affines, aut etiam dissimiles moveri solent, quæque vel ad rem non pertinent, vel jam à me suis locis sublatae sunt aut solutæ, non operæ pretium est, ut ad singula quæ interrogas respondeam; centies enim eadem quæ jam ante scripsi essent repetenda. Sed breviter tantum de iis agam, quæ lectores non planè ineptos morari posse videbuntur. Et quantum ad illos qui non tam ad vim rationum, quam ad verborum multitudinem attendunt, eorum approbationem tanti non facio, ut ejus promerendæ gratiâ verbosior fieri velim. Primum itaque hic notabo, tibi non credi, cum ais mentem adolescere; ac debilitari cum corpore, nullaque ratione id probas; nam ex eo, quòd non tam perfectè agat in corpore infantis, quàm adulti, ac sæpe à vino, aliisque rebus corporeis ejus actiones possint impediri, sequitur tantum illam, quando in corpori est adjuncta, ipso uti ut instrumento ad eas operationes, quibus ut plurimum occupatur, non autem perfectiorem vel imperfectiorem reddi à corpore: nec melius hoc inde inferi, quàm si ex eo quòd artifex non rectè operetur, quoties malo nititur instrumento, inferres ipsum artis suæ peritiam ab instrumenti bonitate nancisci. Notandum etiam te planè non videri intelligere, ò caro, quidnam sit ratione uti; quandoquidem ut probes sensum fidem mihi non debere esse suspectam, dicis etli aliquando non utens oculo visus sum ea sentire quæ sine oculo non sentiuntur, me tamen non esse semper expertum eandem fallitatem: tanquam si non sufficiat ad dubitandum, quòd errorem aliquando deprehenderimus; & tanquam si fieri posset, ut semper quoties fallimur adverteremus nos falli; cum è contra in hoc ipso error consistat, quòd à nobis sub specie erroris non advertatur. Denique quia sæpe à me petis rationes, cum ipsa, ò caro, nullas habes, & tibi probandi onus incumbit, advertendum est ad rectè philosophandum non opus esse ut ea omnia quæ non admittimus, quia ignoramus an sint vera, probemus falsa esse, sed tantummodo esse summo opere cavendum nequid ut verum admittamus, quod non possimus probare verum esse. Ita cum deprehendo me esse substantiam cogitantem, formoque clarum & distinctum istius substantiæ cogitantis conceptum, in quo nihil eorum quæ ad conceptum substantiæ corporeæ pertinent, continetur, hoc planè sufficit ut affirmem me, quatenus me ipsum novi, nihil aliud esse quàm rem cogitantem, quod solum in 2. Meditatione de qua jam agitur affirmavi. Nec debui admittere istam substantiam cogitantem esse quoddam corpus agile, purum, tenue, &c. quandoquidem nullam habui rationem quæ id mihi persuaderet; in siquam habes, tuum est ipsam docere, non autem exigere à me ut probem id falsum esse, quod non aliam ob causam admittere recusavi, quàm quia mihi erat ignotum. Idem

enim facis ac si dicenti me jam in Hollandia versari, negares esse credendum nisi probarem me non esse etiam in China, nec in ulla alia mundi parte; quia forte fieri potest ut idem corpus per divinam potentiam duobus in locis diversis existat. Cum vero addis, mihi etiam probandum animas brutorum esse incorporeas, & crassum corpus nihil conferre ad cogitationes, testaris te non modò ignorare cujus sint partes probandi, sed etiam quid à quoque sit probandum: nam ego neque animas brutorum putò esse incorporeas, nec crassum corpus nihil conferre ad cogitationem; sed tantum, istarum rerum considerationem nullo modo esse hujus loci.

I N S T A N T I A.

I.
Nihil me
impugna-
tum, ac
proposi-
tum, quod
responsione
fuerit di-
gnum.

Incipis cum eorum fastidio, quæ de nutritione sunt dicta; sed hoc nihil mirum, quia cum non sis corpus, aut nullis, aut certè humanis his nostris non pascereis cibis. Dicis *me rationes tuas non impugnare*; Sed tua culpa est, qui nō corpus cum sis, parturisti adedò jejunas, ut adversus eas dimicans tenuis umbras diverberàrim. Quod *disimulare me eas dicis*; beabis, si ostenderis quampiam à me dissimulatam. Nempe nihil aliud expetii, quam agnoscere aliquam; veritatē quippe requirens, & non impugnaturus sanè, sed avidissimè complexurus, exosculaturus, & ut sic dicam, adoraturus. Non sui verò, meo dolore, adedò foelix, ut voti compos evaserim; qui esse non potui adedò levis, ut insomnia, deceptiones, delusiones, dicentis vocem, auctoritatem, supercilium, pro rationibus duxerim. Dicis *me referre imperfectas, & truncatas*; sed hoc debuisti ostendere; siquidem quòd omnia tua verba aliquando non referam, non obstat quin illorum sensum in pauciora contraham, ne nimio cum tædio singula recenseam. Dicis *me colligere difficultates varias, quæ ab imperitis in tuas conclusiones, affinesve moveri solent*. Scilicet me censu adedò tenui putas, ut micæ, & ex mensis quidem mendicantium, colligam; te in mensa regia interim sedente. Sed qualescumq; meæ sunt micæ, testari tamen possum illas ex mea unius mensa deciduas. neque enim, favente Deo, opus est ut hæc ad te scribens viros, aut libros consulam; & cum superiora conscripsi, quid seu periti, seu imperiti in tuas conclusiones dicerent, non novi. Ea excidere calamo permisi quæ mens sponte suggereret; Tu nisi credis, crede ut voles. Dicis *me quædam colligere, quæ ad rem non pertinent*. Sed vel unum exemplum afferre debuisti, non hac ratione eludere. Dicis *te sustulisse, soluisseve alia suis locis*; at ego loca prorsus non vidi, &

di, & me valdè obstringeres, si germanam quandam solutionem subindicares. Dicis *non opus esse ad omnia, quæ interrogo respondere*; sed an opus fuerit, alii judicabunt; & maximè ubi expenderint, appositè-ne, non *centies*, ut ais, sed vel semel quicquam responderis. Gratificaris postea, cum eò te demittis, ut *agere digneris de iis, quæ remorari posse videbuntur Lectores non planè ineptos*. Nempe Lectores præmones, forò, ut habeantur planè inepti, si plana omnia in te non videant, & putent in me esse aliquid, quod attentionem mereri possit: Vnde & subjicis *te eos non curare, quasi in me non rationum vim, sed verborum solum observare multitudinem valeant*. Ego verò Lectoribus quibuscumque liberrimum facio, ut judicium de te, ac de me, quodcumque tandem voluerint, ferant. Sed tanta esto præfatio de tua illa præfatione.

Notas consequenter mihi non credi, dum ajo *Mentem* (dixeram ego *Animam*) *adolescere, ac debilitari cum corpore, nullaque ratione id probo*. Ego verò id non ajo, ut mihi credatur, qui refutare paratus sum: sed propono solum, ut à te solvatur, qui dicis illam non nutriri, cum ea tamen, quæ propono ad nutritionem sint confectanea. Ratione porrò alia, quàm evidentia, opus non fuit, ut dum esse diem dicenti alia ratione opus non est, quàm Solis, aut lucis solaris præsentia. Scilicet manifestum est *adolescere, constare, debilitari hominem non modo secundum corporis functiones, sed etiam secundum functiones animi*; aded ut, cum ex operationibus ad principia operantia ducere argumentum liceat, videri possit non modò corpus, sed animus etiam *adolescere, constare, & debilitari*. Dicis *ex eo, quod Mens non tam perfectè agat in corpore infantis, quàm adulti*; ac sæpe vino, aliisque rebus corporeis ejus actiones possint impediri, sequi tamen illam, quandiu corpori est adjuncta, ipso uti, ut instrumento ad eas operationes, quibus ut plurimum occupatur; non autem perfectiorem, aut imperfectiorem reddi à corpore. Sed cur to non pari modo, ac jure adnotem heic tibi non credi, cum id ais, neque ulla ratione probas? Animam comparas artifice, corpus instrumento, ac trita illa similitudine usus, addis *non melius inferre me, quàm si ex eo, quod artifex non rectè operetur, quoties malo utitur instrumento, inferrem ipsum artis suæ peritiā ab instrumenti bonitate nancisci*. O! Si afferre similitudinem, eamque non appositam, esset rationem proponere; quàm bene tecum ageretur! Sed nimirum ratio non est, & ne apposita quidem est similitudo. Etenim neq; Anima artifex est, qui comparari possit cum fabro, cum scriba,

I I.
illum
non de-
monstrare,
sed ques-
tum pete-
re, qui
probatum
Animam
non ado-
lescere, de-
bilitari,
aut turba-
ri cum cor-
pore; nihil
aliud di-
cat, quàm
ut ani-
mam cor-
pore tan-
quam in-
strumen-

cum quovis alio artifice: neque corpus est instrumentum, quod comparari possit cum serra, calamo, aut quovis alio instrumento: efficiturque, ut si quid probes, nihil aliud, quàm quæsitum petas. Hoc nempe in quæstione est, sit-ne Anima tam erudita, atque perfecta in arte intelligendi, ac ratiocinandi, dum in corpus ingreditur, illudque per infantiam usurpat, quàm est scriba eruditus, atque perfectus in arte scribendi, dum exigente occasione, aut necessitate usurpat calamum. Objeci porrò ipse non esse, fretus experienciâ, quâ constat animam initio ineruditam, & imperfectam, erudiri sensim, atque perfici adolescente corpore. Respondes tu esse; & cum experientia opposita sit, ideò probas esse, quodd anima tam sit quàm scriba, in arte sua est, erudita, atque perfecta. Et repetè, ut vitium non scribæ, sed calami est, quodd per-versè scribatur; ita imperfectionem esse non animæ, sed corporis, quodd imperfectè intelligatur, eadem semper erit petitio principii. Notas deinde *me, qui caro sim, non videri intelligere quid sit ratio- uti, cum dixi te non semper fuisse falsitatem sensuum expertum.* Igitur ego nò intellexi, quid esset ratio, cum te rationalem putavi? cum censui tibi esse credendum, asserenti te deprehendisse sensus interdum fallere, ut dum spectata prope turri, & quadrata deprehensa, deprehendistiensione vera falsitatem ejus, qua procul existimâras teretem. Igitur debui te eum habere, qui quousque cogitâris te fortè à Deo decipi, & cætera ista, mente revolvisi, nihil planè veri, ac certi habueris, aut semel delusus credideris, dubitaverisve te semper deludi? Esto, ut voles, cæterum enim nihil aliud, quàm pugnas adversus tuam umbram.

III.

Postulari

jure demonstrati-
ones ab eo,
qui se de-
monstrare
gloriat: & male
remitti
proban-
dum in Me-
ditatio-
nem VI,
quod illic
supponitur
in ista pro-
batum, ubi
tamen pro-
batum non
est.

Pergis deinde hisce verbis, *Denique, quia sepe à me petis rationes, cum ipsa, ô caro, nullas habes, & tibi probandi munus incumbit, adven- tendum est ad rectè philosophandum non opus esse, &c.* Heic nempe jam Magistrum agis, vel Dictatorem potiùs, quando tam severè quasi è suggestu, vel ex arce potiùs Philosophiæ quemadmodum sit agendum, præscribis. Porrò quodd petam sæpe rationes, agnosco id quidem tibi permolestum; sed jure tamen facio, cum tu jactas te demonstrare, hoc est exquisitissimis rationibus probare quod dicis; ipseque interea ejuscemodi rationes nullas video. Tu te, ut Scholæ arbitrum geris; patere ut quos erudire vis, auditores ingenuos agant, ne si ducantur pecorum instar, hoc est si tibi solum credant, quoniam *ipse dixeris*, non hominum ductor, sed pecudum existimeris. Et dicito, ô caro, caro; ac magis, magisque adhuc.

adhuc incandescens, dic quicquid venerit in buccam, quousque præcordia detumuerint; saltem agnoscemus quid latuerit intus. Nam cur debeamus dicere, quod Diogenes Antistheni, nondum profecto ansam facis, qui nos pari modo rationibus non pellicis. Quod dicis *me id facere*, tum cum nullas rationes habeo, probandique munus incumbit; videris profecto, Moderator licet, nondum adverteisse quod tuum, quod meum munus sit. Nam tibi, qui dogmata tradis, munus incumbit ea probandi, rationesque afferendi, quibus illa stabilias; mihi, qui nihil doceo, qui erudiri solum volo, qui experior rationes tuas mihi non satisfacere, mihi, inquam, non aliud incumbit munus, quam ut dictata minus percipiens, proponam tibi dubia, rogem te illa eximas, postulem te explices clarior, & ea, quæ proponis probes evidentiùs. Ex quo fit, ut tamen si alias rationes non habuero (qua de re alii viderint) ea saltem semper suppetat ratio, quod agente Doctorem te, possim jure te, quæ dicta abs te non percipio, interrogare. Fit rursus, ut tu adverteas præscriptæ à te regulæ, dum mihi ea, quæ dicis, non admittenti (quia ignoro, an vera sint) probanda esse falsa contendis. Quod subdis autem *summopere cavendum, ne quid ut verum admittamus*, quod non possimus probare verum esse, id sanè peroptimè dicis; sed requiro qui applices, quamque constanter facto declares? Sequitur enim, Ita cum deprehendo me esse substantiam cogitantem, formoque clarum, & distinctum istius substantiæ conceptum, in quo nihil eorum, quæ ad conceptum substantiæ corporeæ pertinent, continetur, hoc planè sufficit, ut affirmem me, quatenus me ipsum novi, nihil aliud esse, quam rem cogitantem, quod solum in secunda Meditatione, de qua jam agitur, affirmavi. Cedò verò, caves-ne heic, seu in exemplo ipsissimo, ne ut verum admittas, quod verum non probes? Ecquis non sperasset probaturum te aliqua ratione quod admissurus eras, ut verum? Et ecce tamen, Sufficit inquis, ut affirmem. Quàm bellè probas, quod jam innui, exigere te ut de te dicatur illud, αὐτὸς ἴσα. Accipio interim te tota Meditatione secunda nihil aliud, quam affirmare, non verò ratione probare: cum probaturus-ne sis in alia, suo loco videndum sit. Quod si dicas te probare in ista esse se solum rem cogitantem; Detur id gratis, sed quænam interea tua ista subtilitas est, ut & speres te eliciturum conclusionem hanc, Ergo res corporea non sum; & id ipsum reserves in Meditationem aliam, quasi non in ista jam assumpseris, tanquam principium. Quæso te enim, quomodo potes probare, seu ostendere esse se solum Rem cogitantem?

Profectò non-nisi inductione rerum omnium; in quibus corporeæ cum sint, oportet in ipsa enumeratione, refectioneque earum, quæ ipse non es, præmittas hoc quoque, *Non sum etiam res ulla corporea*; aut certè si velis syllogistice, breviterque concludere, oportet ita ratiocineris,

Aut ego sum res corporea solum, aut cogitans solum, aut corporea, & cogitans simul.

Atqui non sum res corporea solum, neque corporea, & cogitans simul.

Igitur sum Res cogitans solum.

An-non igitur, si semel probasti in secunda Meditatione *Te esse solum rem cogitantem*, probaturus es deinde ineptè te non esse corpoream rem, ex eo principio quòd sis solum Res cogitans; cum hoc ex illo probaveris, ac in paralogismum, seu vitium argumentationis intidas Diallelum vocatum? Et nonne rem nequicquam differs in Meditationem aliam, quæ prima omnium præstita sit; ut præstare sanè es conatus, cum attendisti, cogitasti, revolvisti, & omnibus rebus corporeis refectionis dixisti, *Iam corpus non habeo*, conclusisti que, *Sum igitur præcisè tantum res cogitans*.

IV.

illum qui dicit non habere sensationem, quare Animam dicat corpus tenue, non idcirco demonstrare, quòd Anima tenue corpus non sit.

Dicis te non debuisti admittere istam substantiam cogitantem esse quoddam corpus agile, purum, tenue, &c. quandoquidem nullam habuisti rationem, quæ id tibi persuaderet. Prætereo te heic attribuire nimium. Contentus fueras dicere, te esse solum rem cogitantem; nunc sic rem explicas, quasi dixisses te esse solum Substantiam cogitantem; sicque subiectum mutas, & in terminis, ut loquuntur, non manes. An quia putas Rem, & Substantiam synonyma esse, & ea, quæ vocant accidentia, esse tantum modos? At cum Res, & Nihil opponantur, & modi non sint nihil, sed aliquid ampliùs, quàm merum nihil; sunt igitur res aliquæ, non substantiales quidem, sed tamen modales; quare & vox Res non Substantiæ synonyma, sed communis ipsi, ac modo, atque aded transcendens, synonymaque cum Ente erit. An quia lucrari exinde vis, ne tibi possit objici, posse te esse solum modum, qualitatem nempe, sive facultatem, quæ cogitare perinde censearis, ac albedo vulgò dicitur disgregare visum? At quousque ex tuo principio *Ego sum*, deduxeris, ostenderisque quid substantia, quid modus sit, & quomodo modus esse, agereve sine substantia non valeat, id supererit tibi objiciendum. An quia me sæpe reponente non nosse te clarè, & distinctè, qualis-nam res sis, quæ es cogitans, devitari scopulum credis, cum te jam dicis substantiam?

stantiam? At difficultas eadem; quoniam pari modo non nosti qualis sis substantia, quæ es cogitans. Verùm hæc ut dixi, prætereo, & considero solum, quod ais, *te non debere sine ratione admittere substantiam cogitantem esse corpus tenue*. Nam præclare id fieri agnosco; at non agnosco cur sine ratione non esse corpus tenue admittas. Vt enim, si quis, postquam considerarit ventum vt substantiam volantem per ærem, & attenderit ipsam non esse Aquilam, telum, nubem, aut quicquid est aliud rerum transvolantium; dicat non debere se admittere istam substantiam esse corpus tenue, quòd rationem non habeat, qua id persuadeatur; rectè quidem faciat, quatenus rationem non habens continet assensum; at si quia rationem non videt, nullam esse existimet, atque idcirco sine alia ratione pronunciet volantem substantiam, quæ est ventus, non esse corpus tenue, tum non rectè faciat; quoniam seu alii sciapt, seu nesciant, potest tamen esse ratio aliqua, quæ conficiat ventum esse tenue corpus: Vt ille, inquam, ita se habeat; ita videris tu te habere circa cogitantem substantiam. Quippe tametsi rationem non habeas, cur esse tenue corpus admittas, non habes tamen aliunde, quare non admittas, præter ignorantiam rationis, quæ si loco rationis habenda sit, ecquid denique non sit admittendum? Dices posse illum facile advertete ventum volantem suscitare pulveres, commovere arbores, prosternere homines, turbare æquora, & id genus cætera, quæ corpoream arguunt substantiam; At cum tu vides mentem cogitantem excitare spiritus, agitare membra, commovere affectus, turbare totum intus hominem, immittere sanguinem in faciem, retrahere in pectus, extaticum facere, exanimare, & similia; annon ista quoque corporeæ substantiæ argumenta sunt? Non quòd ego rationes dicam, sed quòd videri rationes possint, quas te oporteat solvere, & ubi solveris, non sequatur, non esse alias, quoniam tu ignores. Vno verbo, licet quidē tibi affirmare de re, quod de illa nosti; at affirmare ipsam nihil esse, nisi quod noveris, non licet. Et dum ita ratiocinaris,

Substantia cogitans non est id, cuius admittendi rationem non habeo:

Atqui admittendi illam esse corpus tenue, rationem non habeo:

Igitur corpus tenue non est.

Vides te à tua cognitione argumentari ad id quod res est; & loco demonstrationis, tuam auctoritatem ex præsumpta notitia omnimoda, ingerere. Addo aliud fallaciæ caput ex tua hac ratiocinatione:

Illā

Illa sunt reipsa distincta, quæ ego distinctis conceptibus considero:

Atqui substantiam cogitantem, & substantiam corpoream distinctis conceptibus considero:

Igitur substantia cogitans, & substantia corporea, sunt inter se reipsa distincta.

Verum quia hæc est rejecta abs te in Meditationem sextam, ided videndum ille loci quid objecerim, quid responderis, quam bellè satisfeceris.

v.

Iam, cum dicis *me debere docere, non exigere à te, ut probes falsum esse,*

Non ex eo, quod cogitationis, & corporeitatis distincti conceptus sint, probari res esse reipsa distinctas; Ac non debuisse dissimulari quod obiectum fuerat de Animam non esse corpoream; Vides me, qui non profiteor Animam esse reipsa corpoream, non debere id docere; posse verò interea exigere jure abs te, ut probes non esse corpoream, qui esse non corpoream doces. Ac lepidè quidem elaberis, cum ais, *non alia ob causam recusasse te admittere animam esse corpoream, quam quia id tibi erat ignotum.* Nam non exigo quidem, ut probes quod ignorare te dicis, animam nempe esse corpoream; sed, exigo solum ut probes quod te pernosse profiteris, nempe animam esse non corpoream. Lepidius est, quod dicis *me idem facere, ac si dicenti te jam in Hollandia versari, negarem credendum, nisi probares te non esse etiam in Sinna, nec in alia ulla Mundi parte, quia forte fieri potest, ut idem corpus per divinam potentiam duobus in locis diversis existat.* O! si tam apertam faceres animæ substantiam, quàm aperta est tui existentia in Hollandia, dum in ea versaris, quàm rescinderes, imò quàm non faceres anam postulandi ista à te? Querebaris non multò antè, quòd viderer nimium attribuere sensibus; Ego verò sanctè affirmo non quæsiturum me ineptè, sis-ne in Sinna, an alibi, (& ne ob illam quidem rationem, quam heic nequicquam, & intempestivè intermiscis, ut provoces me ad Theologiam, qui id cavi sollicitè, ne conqueri posses te philosophicè agentem traduci ad Theologica) non inquam id requisiturum, ut probes te esse in Hollandia; Etenim satis, superque erit ipsa oculorum meorum attestatio. At facere-ne idem debeo, cum ex eo, quòd cogitans sis, te esse incorporeum infero? Est-ne consequutio tam clara, quàm præsentia tui in Hollandia? Insinuavi jam hujus tuæ consequutionis fallaciam: ex eo enim, quòd in conceptu cogitationis, conceptus corporeitatis non includitur, infero eam rem quæ cogitat, non posse esse corpoream; quod perinde est, ac si quia in conceptu tuæ paternitatis respectu tui filii, non includitur conceptus tuæ filiationis respectu tui patris, inferas te filii tui patrem

trem , non posse esse tui patris filium. An non proinde , quemadmodum ista conceptuum distinctio non obstat , quin , cum sis Pater , sis etiam filius ; sic neque illa obstat , quin res cogitans , sis etiam corporea. An non jure quoque objeci superesse tibi , quod dissimulas , ut ostendas vim cogitandi supra naturam corpoream esse ? Denique dicis *me ignorare cujus sint partes probandi* , & *quid à quoque probandum sit* , cum addo tibi probandum esse animas Brutorum esse incorporeas , & corpus hoc crassum nihil ad cogitationem conferre ; Quia scilicet tu non putas animas Brutorum esse incorporeas , nec crassum corpus nihil conferre ad cogitationem ; concludisque harum rerum considerationem nullo modo esse hujus loci. Næ tu verò heic lepidissimus es , qui adeò solerter dissimulas , quorsum id dixi tibi probandum. Etenim tua quidem positio diserta non fuit , *Animas Brutorum esse incorporeas* ; sed cum illa tamen sequatur ex eo quod Bruta cogitent , quodque tu ex cogitatione Naturam arguas incorpoream ; idèd providendum tibi censui , quò defendere ipsam possis. Nam aut negare debes , ex eo , quod res aliqua sit cogitans , inferri legitimè eam esse incorpoream ; aut negare Animam Bruti non esse rem cogitantem , hoc est , ut postea interpretaris , imaginantem , sentientem , dubitantem , nolentem , volentem , &c. aut concedendum planè est animam Bruti esse incorpoream. Non fuit quidem etiam diserta positio *Nihil crassum corporis , seu cerebrum ad cogitationem conferre* ; Sed cum illa tamen sequatur ex eo , quod tu nihil contueris in re cogitante , quod ad naturam corpoream pertineat ; idèd censui quoque tibi providendum , qui ipsam tueri consequenter valeas ; Nam aut in re cogitante est dependentia à corpore crasso , puta cerebro ; aut cerebrum nihil juvat , officitve ad cogitandum. Patet proinde , num jure putes harum rerum considerationem nullo modo esse hujus loci ; cum nihil potuisset esse magis , nisi tu voluisses datà opera declinare difficultates.

D V B I T A T I O I V . .

De non probata consequutione illa , Sum igitur præcisè res cogitans , id est Mens , animus , intellectus , ratio.

Concludis , Sum igitur præcisè Res cogitans , id est Mens , sive animus , intellectus , ratio. Heic ego agnosco me hallucinatum. Existimabam enim me alloqui animam humanam , seu

H

inter-

internum illud principium, quo homo vivit, sentit, loco movetur, intelligit: & alloquebar tamen solam mentem: quippe quæ non modo corpus exiit, sed exiit quoque animam ipsam. An-ne id facis, vir eximie; antiquorum illorum instar, qui cum putarent animam diffusam toto corpore: principem tamen partem τὴν ἡγεμονικὴν habere sedem opinabantur in determinata parte corporis, ut in cerebro, aut in corde. Non quod censerent animam quoque in ea parte non reperiri, sed quod crederent animæ illic exiit menti-tem veluti superaddi, coadunarique, & unâ cum illa partem informare. Et debebam sanè id commeminisse ex disputatis in illa tua dissertatione de Methodo. Visus enim es in ea velle munia hæc omnia, quæ animæ tam vegetativæ quàm sensitivæ tribuuntur, non dependere à rationali, posseque etiam exerceri antequam illa adveniat, ut exercentur quoque in Brutis, in quibus rationis nihil esse contendis. Sed nescio quo pacto oblitus id fueram, nisi quia dubius remanseram, illudne principium quo tam nos, quam Bruta, vegetamur atq; sentimus, non velles dici animam, sed animâ propriè esse nostram mentem: cùm tamen illud principium dicatur propriè animare; Mens nihil aliud præstet, quàm ut cogitemus; quod tu quidem fieri asseris. Vt cumque id fuerit, dicare jam Mens, atque esto Res cogitans præcisè. Subdis, *solam cogitationem non posse divelli à te.* Hoc verò non est, curtibi negetur: si præsertim sis sola Mens, & nolis tuam substantiam à substantia animæ plusquàm consideratione distinctam. Quanquam hæreo, an cum dicis *non posse cogitationem divelli à te*, intelligas te, quandiu es, indefinenter cogitare. Id sanè conforme effato Philosophorum celebrium, qui immortalitatem tuam probaturi, assumpserunt te perpetuò moveri, seu, ut ego quidem interpretor, cogitare perpetuò: verùm ii non persuadebuntur, qui non capient quo modo possis aut per soporem lethargicum, aut in utero etiam, cogitare. Quo loco hæreo præterea, an existimes te in corpus, illiusve partem intra uterum, aut ab exortu, esse infusam. Sed nolo molestius id inquirere, neque rogare, an reminiscaris quid in utero, primisve ab exortu diebus, mensibus, aut annis cogitaveris, neque, si id sis responsura, quamobrem oblita omnium fueris. Insinuo duntaxat, ut memineris, quàm obscura, quàm tenuis, quàm penè nulla esse potuerit temporibus illis tua cogitatio. Pergis, *te non esse compagem membrorum, quæ corpus humanum appellatur.* Id verò admittendum est, quia spectaris solum, ut res cogitans, & pars humani compositi ab hac exteriori, crassioreque:

fioreque distincta. *Non sum etiam*, inquis, *tennis aliquis aer istis membris infusus, non ventus, non ignis, non vapor, non halitus, non quicquid mihi fingo: suppositi enim ista nihil esse; manet positio.* Heic autem confiste, ô Mens, & positiones, seu potius fictiones illæ tandem facessant. *Non sum*, inquis, *aër, aut aliquid tale*: at si anima tota tale quidpiam est; quorsum tu, quæ censeris potes pars animæ nobilissima, non censearis quoque esse quasi flos, seu portio subtilissima, purissima, actuosissimaque illius? *Fortassis*, inquis, *hec, quæ suppono nihil esse, sunt aliquid, neque diversum ab eo me quem novi; nescio tamen, nec de hoc jam disputo.* Sed si nescis, si non disputas: cur te nihil esse istorum assumis. *Novi*, inquis, *me existere; hujus autem rei notitia præcise non potest pendere ab eo, quod non novi.* Hoc elto; sed memineris te nondum fidem fecisse, quod non sis aër, non vapor, non alia.

R E S P O N S I O.

QUæris hic obscuritatem ex equivocatione vocis anima; sed quam ego tam accurate sustuli suis locis, ut hic pigeat repetere. Itaque dicam tantum nomina ut plurimum imposita fuisse ab imperitis, ideòque non semper satis aptè rebus respondere; nostrum autem non esse illa mutare postquam usu recepta sunt, sed tantum licere ipsorum significationes emendare, cum advertimus illas ab aliis non rectè intelligi. Sic quia fortè primi homines non distinxerunt in nobis illud principium quo nutrimur, crescimus, & reliqua omnia nobiscum brutis communia sine ulla cogitatione peragimus, ab eo quo cogitamus; utrumque unico animæ nomine appellaverunt; ac deinde animadvertentes cogitationem à nutritione esse distinctam, id quod cogitat vocarunt mentem, hancque animæ præcipuam partem esse crediderunt. Ego verò animadvertens principium quo nutrimur toto genere distingui ab eo quo cogitamus, dixi animæ nomen, cum pro utroque sumitur, esse equivocum; atque ut specialiter sumatur pro actu primo, sive præcipua hominis forma, intelligendum tantum esse de principio quo cogitamus; hocque nomine mentis ut plurimum appellavi, ad vitandam equivocationem: Mentem enim non ut animæ partem, sed ut totam illam animam quæ cogitat considero. *Hæres verò*, inquis, *an ego existimem animam semper cogitare.* Sed quidni semper cogitares, cum sit substantia cogitans? & quid miri quod non recordemur cogitationum quas habuit in matris utero, vel in lethargico, &c. cum ne quidem recordemur plurimarum, quas tamen scimus nos habuisse dum essemus adulti, sani, &

vigilantes. Ad recordationem enim cogitationum quas mens habuit, quando corpori est conjuncta, requiritur ut quedam ipsarum vestigia in cerebro impressa sint, ad quæ se convertendo, sive se applicando recordatur. Quid autem miri si cerebrum infantis, vel lethargici vestigiis istis recipiendis sit ineptum? Denique ubi dixi, forsan fieri posse, ut id quod nondum novi (nempe mentem corpus) non sit diversum ab eo me quem novi (nempe à mea mente) nescio, de hac re non disputo, &c. objicis, si nescis, si non disputas, cur te nihil esse istorum assumis? Vbi falsum est me quicquam assumpsisse quod nescirem; nam plane è contra, quia nesciebam essetne corpus idem quod mens necne, nihil ea de re assumpsi, sed solam mentem consideravi; donec postea in 6 Meditatione illam realiter à corpore distingui, non assumpsi, sed demonstravi. Tu verò, ô caro, in hoc plurimum peccas, quod cum nullam, vel minimam habeas rationem ad probandum mentem à corpore non distingui, nihilominus tamen id assumis.

I N S T A N T I A.

I.
De usur-
patione
vorum A-
nimæ, ac
Mentis:
deque co-
gitatione
in utro,
& per Le-
thargium.

Falleris, cum dicis me obscuritatem ex æquivocatione vocis Animæ quæsisse; quando reperias neminem, qui seu cognoscendo, seu loquendo perspicuitatis amantior sit, qui agat candidius, qui minus de voce, aut nomine certet, qui minus contendat ex verbis obscuris, aut æquivocis venari famam subtilitatis. Prætulerim certè delirus videri, quàm eo modo loqui, ut laborem audienti, vel legenti faciam, & non quisque capiat quod dicere volo, experiaturque se sua mente illud consequi, quod habeo in mente: Quippe nisi id sit sublime, est tamen captu facile; & si quidquam sit, quod non capiam, ingenuè profiteor me non capere, ne, si alii non capiant, delusos se conqueri possint. Demiror proinde quid dicas me obscuritatem quæsisse, ubi claritatem solum quæsi, in iis quæ tu dixisti obscurè; quæque proinde ansam fecerunt, ut distingueres, explicaresque rem luculentius. Heinc cœpi te dicere Mentem, postquam cœpisti te potius Mentem, quàm Animam dicere, nihil moratus, quod cum velles te haberi ut mentem, non tamen ut mens loquereris, sed permistim atque confusè nunc ut mens, nunc ut totus homo. Sic nihil jam moneo, quod faceret alius, circa id, quod statuis illud principium, quo nutrimur, distingui toto genere ab eo, quo cogitamus; sed simpliciter accipio quod dicis, Animam, seu Mentem à te non ut partem, sed ut totam

totam illam Animam, quæ cogitat, considerari; neque insisto, fore igitur in homine, & quovis animali duas Animas, unam, à qua sit cogitatio; aliam, à qua nutritio, accretio, generatio; aut certè nutritionem, accretionem, generationem ad aliud principium, quàm ad Animam pertinere. Circa id porro, quod hæseram, an existimares Animam, seu Mentem semper cogitare; admittis ipse *cogitare etiam per Lethargum, ac in utero*: Et quia præmonueram nollem, si ita sentire, molestus esse in cogitando, earum-nerum recordarere, quas per ea tempora cogitasses, concedis te non recordari, ob non impressa in cerebro cogitationum vestigia. Hoc autem loco, si quæram ex te, Quod-nam igitur habes argumentum, quo fidem tibi facias te per ea tempora cogitasse? Non sanè ipsam experientiam in testimonium afferes, sed tuam illam definitionem, qua Mentem describis cogitantem substantiam. Et vide, si alius definiret cogitativam, cogitatricem, aut cogitationis capacem substantiam, quàm non cogeretur admittere etiam Lethargicum cogitare? Nempe tu non alia ratione, aut necessitate admittis, quàm quia per actionem potiùs, quàm per facultatem definis; id verò absque necessitate fit; neque probari potest sine petitione principii, non fieri absque necessitate. Nihil de cogitatione in utero dico, in quo si Embryo quid cogitat, non videtur sanè id esse neque cælum, neque terra, neque lux; neque proprium corpus, neque anima, neque quicquam aliud sive intra sive extra sua involucria; sed ad summum copia, aut penuria alimenti; situs commodus, aut incommodus, pauculaque huiusmodi, quæ ad tactum præsertim spectant, & de quibus ut continuò, continuòque, seu incessanter, & absque ulla intermissione cogitet, ipse non moror, tu qui es ocularior, quique perspicis, dicito, ut voles.

II.

In eo solùm hæreo, quod ais ad recordationem cogitationum, quas *mens habuit, quandiu corpori est conjuncta, requiri, ut quædam ipsarum vestigia in cerebro impressa sint, ad quæ se convertendo, sive applicando recordatur; neque esse mirum, si cerebrum infantis, vel Lethargici vestigiis istis recipiendus sit ineptum.* Imprimis enim, quia mens uti cerebro per lethargum non potest, & nihilominus cogitat, erunt sanè cogitationes, quas Lethargicus elicit, omnium perfectissimæ, purissimæ, clarissimæ, desiderabilissimæ; mensque ipsa tum se habebit quasi in statu separationis, ac sese ipsa beatè fruatur, eritque cur debeat huiusmodi statum alii cuilibet, quem per hanc vitam habet, præferre.

H 3

An ta-

*Responsi-
onem de
ineptitudi-
ne cerebri
in infan-
te, aut
Lethargico
ad rerum
vestigia
recipiendæ,
nullam ef-
fe.*

An tamen hæc ita se habeant, qui melius, quàm ego, perviderint, dicant. Deinde, cum Mens in se non habeat vim, qua recordetur eorum, quæ per se, & non adjuta corpore judicat, quàm imperfecta aliunde erit? Videlicet memoria caret, neque prodest ipsi aliquid novisse, cum nihil prorsus repetere ex antè cogitatis valeat. Quàm debet ergo expetere conjunctionem cum corpore! quàm exhorrere separationem! cum donec est cum corpore, meminisse possit; ubi corpus abest, omnia excidant; & cogitare quidem, sed nihil penitus meminisse possit. Ad-hæc, cum cogitatio sit actio incorporea (elicitæ videlicet ab incorporeo principio) potest-ne corporeum habere vestigium? Et, cum cerebrum sit corporeum, potest-ne vestigium incorporeum excipere? An explicare nobis potes, qualenam sit istud vestigium? quomodo imprimatur? quomodo remaneat? Nam esse quidem in cerebro vestigia specierum, quæ hauriuntur sensibus, aut sensationum ipsarummet, quæ à facultate imaginatrice in eo veluti defiguntur, minùs profectò mirum sit; at vestigia cogitationum, quæ sunt omninò incorporeæ, quæ extensione, figura, colore, cæterisque omnibus accidentibus, adjunctivæ corporeis carent, imprimi in cerebro, quod non nisi hujusmodi accidentium, adjunctorumve capax est, id dici stupore est dignum: nisi tu qui dicis, si quod dicis, capis, efficere potes ut ipsi capiamus. Requiere præterea possem, quonam modo intelligas mentem sese convertere, quomodo sese applicare ad cerebrum, speciemve in ea existentem, ipsa præsertim incorporea, immutabilis, inextensa? Sed quia requisivi affinia circa Meditationem sextam; idèd videndum in ea erit quid ad illa responderis, quemadmodum etiam circa id, quod heic subjecis te in ea meditatione non assumpsisse, sed demonstrasse.

III.

Iterum non præstari heic quod in Meditatione sexta supponitur præstitum: ac vitiosum esse consequentiam, cognosco me præcisè tantum rem cogitantem; Ergo sum tantum præcisè res cogitans.

Heic Loci, quia tu dixeras, fortassis hæc quæ suppono nihil esse, hujusmodi autem erant omnia corpora, ac nominatim tenuia, ut ventus, &c. Sunt aliquid, neque diversum ab eo me quem novi, (id est à cogitante substantia) nescio tamen, nec de hoc jam disputo; subjunxeram ego, Sed si nescis, si non disputas, cur te nihil esse istorum assumis? scilicet non ventum, non aliud ex tenuibus corporibus, quæ mox antè enumeraras? jam tu respondens quereris, quod dixerim te assumpsisse quicquam, quod nescires. Sed verbis coram positis non puto quicquam reponendum: & maximè cum ostensum sit te aut assumpsisse, aut nihil probasse, ubi ita conclusisti, Sum igitur præcisè tantum res cogitans. Placet potiùs ingenuam confessionem admittere, &

& , quod ad calcem Dubitationis feci, te iterum heic admonere, ut illius memineris, videlicet, postquam dixisti, *Sum igitur præcisè tantum Res cogitans* : dici à te nescire te, neque hoc loco disputare, *An sis compages membrorum, quæ corpus humanum appellatur; an tenuis aliquis aër istis membris infusus, an ignis, an vapor, an halitus, &c.* Exinde nempe sequuntur duo; Vnum est, fore, ut si cùm ad illam tuam demonstrationem, in Meditatione sexta pervenerimus, deprehendaris nusquam probasse te non esse compagem membrorum, aut tenuem aërem, vaporem, &c. non possis illud tanquam probatum, aut concessū assumere. Alterum, te inmeritò hisce verbis jam conclusisse, *Sum igitur præcisè tantum res cogitans.* Quid sibi enim vult illa vox *tantum*? An non restrictiva est, ut sic loquar, ad solam rem cogitantem; & exclusiva aliarum omnium, inter quas sunt compages membrorum, tenuis aër, ignis, vapor, halitus, & cætera corpora? An cùm sis Res cogitans, nosti te præterea harum nullam esse? Respondes perspicuè te id ignorare. *Nescio*, inquis, *jam non disputo*. Cur igitur dicis te esse tantum rem cogitantem? An non id dicis quod ignores? an-non infers id quod non probas? an-non destruis id, quod struxisse te arbitraris? En nempe tuum ratiocinium,

Qui scit se esse rem cogitantem, & nescit an sit præterea res alia, utpote compages membrorum, tenuis aër, &c. ille est præcisè tantum res cogitans :

Atqui ego scio me esse rem cogitantem, & nescio an præterea sim res alia, utpote compages membrorum, tenuis aër, &c.

Igitur sum præcisè tantum res cogitans.

Non retexo; quia sufficit rem, ut se habet, proposuisse. Adnoto solum, cùm propositio videatur esse aded absurda, non abs re superius admonuisse me cavendū tibi non modò esse ne quid imprudenter in locum tui assumeres, sed etiā ne non satis assumeres, & noscens aliquid de te, hoc esse tuam totam naturam putares. Vnde & jam dico te rectè ratiocinantē potuisse duntaxat in hunc modum arguere,

Qui scit se esse rem cogitantem, & nescit an sit præterea res alia, utpote compages membrorum, tenuis aër, &c. ille se novit præcisè tantum rem cogitantem :

Atqui ego scio me esse rem cogitantem, & nescio an præterea sim res alia, utpote compages membrorum, tenuis aër, &c.

Igitur ego novi me præcisè tantum rem cogitantem.

Hoc sanè modo legitime, ac verè conclusisses, nemoque tibi succensisset, sed attendisset solum ad ea, quæ potuisses deducere; Nunc autem:

autem cum tantum discriminis sit inter hæc duas conclusiones *Sum præcisè tantum res cogitans*, & *Novi me præcisè tantum rem cogitantem*, quis te procedente ab eo quod nosti, ad illud quod es, ferre paralogramum possit?

D V B I T A T I O V.

*De non probata Intellectus, Et Imaginationis distinctione;
quasi Intellectio sine imaginatione sit.*

D Escribis consequenter quid sit, quod imaginationem appellas. Dicis quippe, *imaginari nihil esse aliud, quam contemplari figuram, imaginemve rei corporeæ*. Videlicet, ut inferas te alia cogitationis specie, quam imaginatione cognoscere naturam tuam. Attamen, cum tibi pro tuo arbitratu imaginationem definire liceat; quæso te, si corporea sis, ut nondum probasti oppositum, cur non contemplari te possis sub figura, imagineve corporea: & quæso te, dum contemplaris, quid-nam experiris tibi obversari, præter substantiam quandam puram, perspicuam, tenuem, instar auræ universum corpus, vel cerebrum certè, illiusve partem pervadentis, animantis, functiones tuas illeic obeuntis? *Cognosco*, inquis, *nihil eorum, quæ possum imaginationis ope comprehendere, ad hanc, quam de me habeo, notitiam pertinere*. Verum quomodo cognoscas nondicis, & cum paulò ante statuisses, nescire te adhuc istane ad te pertinerent; unde-nam quæso id jam concludis? Pergis, *Mentem esse ab istis diligentissime evadendam, ut suam ipsa naturam quam distinctissime percipiat*. Id rectè mones; sed postquam ipsa te diligentissimè avocasti; renuncia, quæso, quàm distinctè naturam tuam perceperis. Nam dicere solùm te esse rem cogitantem, operationem memoras, quam omnes prius tenebamus, sed operantem substantiâ, qualis nempe sit, quomodo cohæreat, quomodo ad agendum tam varia tam variè sese comparet, ac huiusmodi cætera prius ignorata nobis non declaras. Dicis, *percipi intellectu, quod imaginatione (quam idem esse statuis cum sensu communi) non potest*. Sed, ô bona Mens, docere-nè potes plureis intus esse, & non unicam, simplicemve facultatem, qua quidvis demum cognoscamus? Cum ego Solem oculis apertis intueor, manifesta est sensio. Cum deinde oculis clausis Solem apud me cogito, manifesta est interna cognitio. At quomodo tandem discernere valeam me sensu communi, seu facul-
tate

tate imaginatrice, non verò mente, seu intellectu percipere Solem: aded ut possim pro libitu nunc intellectu, quæ non sit imaginatio; nunc imaginatione, quæ non sit intellectio, Solem comprehendere? Sanè, si cerebro turbato, & imaginatrice læsa, intellectus constaret, qui functiones proprias, purasque obiret, tum posset intellectio tam dici distingui ab imaginatione, quam imaginatio à sensatione externa: at quia secus esse contingit, faciliè profectò, non est appositum statuere discrimen. Dicere certè, ut tu facis, *imaginationem tunc esse, cum rei corporea contemplamur imaginem*: vides cum non alia ratione contemplari corpora liceat, fore igitur corpora imaginatione solùm cognoscenda; aut ita certè, ut facultas alia cognoscens discerni non valeat. Dicis fieri adhuc non posse, quin putes res corporeas, quarum imagines cogitatione formantur, exploranturque sensibus, distinctius agnosci, quam istud nescio quid tui, quod in imaginationem non cadit: ut mirum sit res dubias, & à te alienas distinctius cognosci, atque comprehendere. Sed primum per-optimè facis, cum dicis, *illud nescio quid tui*: revera enim nescis quid sit, seu quæ natura ejus sit: nec proinde potes certior fieri, id-ne hujusmodi sit, quod in imaginationem cadere non possit. Deinde omnis nostra notitia videtur planè ducere originem à sensibus: & quamvis tu neges quicquid est in intellectu, præesse debere in sensu: videtur id esse nihilominus verum, cum nisi sola incurfione, *ἡ ἐκείνου* ut loquuntur, fiat; perficiatur tamen analogiâ, compositione, divisione, ampliatione, extenuatione, aliisque similibus modis, quos commemorare nihil est necesse. Nihil proinde mirum, si ea, quæ per se incurrunt, & percellunt sensum, impressionem vehementiorem in animo faciant, quàm quæ animus accepta solùm occasione ex rebus in sensum incidentibus sibi ipsa figgit, atque comprehendit. Et vocas tu quidem dubias res corporeas, sed si verum fateri vis, non minus certa es existere corpus; intra quod versaris, & ista omnia, quæ te circumstant, quàm existere te ipsam. Et cum ipsa te tibi ipsi sola operatione, quæ cogitatio dicitur, manifestas; quid hoc est, respectu manifestationis hujusmodi rerum? Quippe non modò manifestantur variis operationibus, sed & aliis præterea multis evidentissimis accidentibus, magnitudine, figura, soliditate, colore, sapore, &c. aded ut quamvis extra te sint, nihil mirum, si ipsas distinctius, quàm te cognoscas, comprehendasque. At quonam modo fieri potest, ut rem alienam melius, quàm te ipsam intelligas? quo nempe modo oculus videt cætera, non videt se ipsū.

RESPONSIO.

QUæ de imaginatione scripsi satis clara sunt attendenti, sed nihil mirari forte iis qui non meditantur sint perobscura. Moneo autem ipsos, ea quæ ad hanc quam de me habeo notitiam non pertinere affirmavi, non pugnare cum iis quæ dixeram antea me nescire an ad me pertinerent; quia planè aliud est pertinere ad me ipsum, quam pertinere ad eam quam de me habeo notitiam. Quæcunque hic habes, ô Caro optima, non tam mihi videntur esse objectiones, quàm obmurmurationes quædam nulla responsione indigentes.

INSTANTIA.

I.
Eum, qui
cognoscit
aliquid sui,
non pro-
pterea se
cognoscere
totum; &
qui dicit se
nihil agnos-
cere in se,
quod in i-
maginati-
onem ca-
dat, non
eum pro-
pterea su-
am natu-
ram distin-
ctissime
percipere.

QUæ ego de Imaginatione in unum conduxeram, tu Episto-
lam meam dividens, cyphasque apponens in articulos di-
stinxisti duos; ego verò rursus compello in unum; sed
perinde est. Mones nos, (quibus non miraris obscura esse, quæ
scripsisti, quandoquidem non meditamur) Mones, inquam, nos,
planè aliud esse pertinere ad te ipsum, aliud pertinere ad eam, quam de te
habes notitiam. Proh! quàm præclare! Siquidem hoc mirè con-
firmat incidisse te in paralogsimum, quem ad calcem Dubita-
tionis superioris objecimus. Aliud est pertinere ad te ipsum, hoc est
reperiri in te, sive cogites, sive non cogites; aliud pertinere ad eam,
quam de te habes notitiam, hoc est terminare tuam notitiam, seu
fieri objectum tuæ cognitionis: nihil verius potuit abs te dici.
At quia potes ipse pertinere ad tui notitiam, seu fieri objectum tuæ
cognitionis, non secundum te totum, seu quicquid est, aut esse po-
test in te; sed secundum unam solùm tui partem, unam facultatem,
unam actionem, unam relationem, &c. quoniam jure inferre
possis pertinere ad teipsum unam solam partem, unam facultatem,
unam actionem, & alia? Sanè ut Aristoteles verè ait, non ab eo,
quod dicitur, sed ab eo, quod res est, propositionem esse veram,
aut falsam; ita peræquum est de te, non ex eo quod nosti de te,
sed ex eo quod es, quodque potes nondū nosse, pronunciare. Quod
præmittis autem non pugnare quod dixeras antea, te nescire an
compages membrorum, tenuis aer, &c. ad te pertinerent, cum eo,
quod postea dixisti ea non pertinere ad hanc, quam de te habes notitiam,
id quidem verum; sed vide tamen quàm sit totus locus ad conse-
quuti-

quotionem appositus. Verba tua sunt, *Itaque cognosco nihil eorum, quæ possum imaginationis ope comprehendere, ad hanc quam de me habeo notitiam pertinere; mentemque ab illis diligentissimè avocandam esse, ut suam ipsa naturam quàm-distinctissimè percipiat.* Quæso te enim, aliud-ne est pertinere ad te ipsum, seu naturam tuam, aliud pertinere ad eam, quam de te, seu tua natura habes notitiam, an-non? Admisisti mox aliud esse. An igitur ut tua natura distinctissimè percipiat, attendere oportet ad id quod ipsa est, seu quod ad ipsam pertinet, etiam notitiâ tuâ seclusâ; an attendere ad id solum, quod est objectum notitiæ, seu, quod ad notitiam, quam de te habes, pertinet? Si prius, ergo malè inferis avocandam mentem, ab iis, quæ cognoscis non pertinere ad tuam notitiam; debuisti enim potius sic argumentari, ut colligeres mentem avocandam ab iis, quæ ad tuam naturam, seu ad teipsum non pertinent. Si posterius, reddit paralogismus, ac petitio principii, qua contendis efficere nihil esse in te, aut sperandum esse, ut percipiat de te; nisi quod jam nosti, ac perceptum habes. Sed ratiocinatio melius patebit, si illam ad formam exegerimus.

Qui diligentissimè mentem avocat, & cognoscat nihil eorum, quæ potest imaginationis ope comprehendere, pertinere ad eam, quam de se habet notitiam, ille suam naturam distinctissimè percipit:

Atqui ego mentem diligentissimè avocaui, & cognosco nihil eorum, quæ possum imaginationis ope comprehendere, pertinere ad eam, quam de me habeo notitiam:

Igitur ego naturam meam distinctissimè percipio.

Monitione illa peracta nihil adieciisti aliud, quàm quæcumque habeo, non tam videri tibi objectiones, quàm obmurmurationes quasdam nulla responsione indigentes. Lepidissimè sanè! Si enim debitores ære alieno obstricti, & solvendo impares, possent pari modo eludere syngrapha, quàm malè ageretur cum creditoribus, quibus illi possent pari modo dicere, solutione opus non esse. Sed benè nobis vertitur, quod ut ille prætor, ita heic lector sit non iniquam sententiam interpositurus. Ago interim gratias, quòd non sine scènore optimatatem cum bonitate compensandam censueris, & si velis etiam; veniam deprecor, quòd dixerim aded ingenuè, te fecisse peroptimè, dicendo, *illud nescio quid tui.* Agnosco enim velle te nihil videri minùs, quàm ignorare aliquid, ac præsertim naturam tuam, opusque aded esse tibi illa admonitione, *Nosce te ipsum.* Sed

II.

*Dedina-
tam fuisse
difficulta-
tem de cor-
poris ima-
gine, sine
qua Mens
intelligere
non possit.*

age videamus, an ego nihil aliud, quàm obmurmuràrim, cùm tibi imprimis difficultatem proposui, qua sola explanata, nihil supererat, si modò non illam callidissimè præterisisses. Quia tu enim jactas, te habere claram, distinctamque tui, hoc est humanæ mentis, seu substantiæ cogitantis notitiam, quæsi ex te, an non hæc notitia esset imaginatio, hoc est contemplatio terminata ad speciem, imaginemve corpoream? Petii proinde, ut diceres, *quidnam tibi inter contemplandum experiretis obversari, præter substantiam quandam puram, perspicuam, tenuem, instar autæ universum corpus, vel cerebrum certè, illiusve partem pervadentis, animantis, functiones suas illic obvenis?* Nonne verò si id negasses, si consequenter dixisses, ac planum fecisses quid aliud tibi obversaretur, aliud, inquam, ab omni specie, imagineve corporea, nonne, inquam, fuisset negotium confectum? Nempe hoc solum quæritur, quænam sit, præter imaginationem illa notitiæ species, quæ versatur in contemplando objecto incorporeo, quæque illud clarè, & distinctè intueri licet; cùm sit omninò alia ab ea, quæ repræsentat quidvis corporeum. Nam notitia quidem illativa, seu quam habemus de aliqua re, inferentes illam aut esse, aut talem esse, aut talem non esse, quamvis illam non pervideamus, & nihilominus ex iis, quæ pervidemus, colligamus ipsam aut esse, aut talem esse, aut talem non esse; hujusmodi, inquam, notitia non clara, distincta, & sicut loquuntur, intuitiva est; sed obscura, confusa, & quemadmodum loquuntur, abstracta, tanquam habita de objecto terminante notitiam sub quadam specie corporea, confusa, indistincta, abstracta. Deinde quia dixeras *Mentem esse ab istis diligentissimè avocandam, ut suam ipsa naturam quam-distinctissimè percipiat*; Quæsieram, postquam *Tu tuam mentem diligentissimè avocasses, renunciaret nobis, quam-distinctè ejus naturam percepisses*; scilicet non sufficere, quòd diceres te esse rem cogitantem, hoc est operationem nemini ignotam memorares, non declarares autem substantiam, &c. Nonne enim id expectandum à te meritò videbatur, potiusquàm ab ullo Philosophorum, qui nihil unquam de se tam sublime, tam grande, tam magnificum pollicitus fuit? Tu me dieis obmurmurare, nihilq; responsione dignum dicere; sed esto: hoc non oberit, quin præter memoratum mox paralogismum, inculcem etiam hoc loco illum, quem Philosophi, qui tam altum, ac tu non sapiunt, ritè declinant. Tu enim in eo perstas ratiocinio, ut inferas ea, quæ distinctis conceptibus intelliguntur, esse reipsà distinctas res: aded ut quia gradus corporeus in conceptu cogitationis nò includitur, colligas id, quod cogi-

cogitat, non esse corporeum. At illi non patiuntur se eadem abduci fallaciâ, ut ex distinctione, quæ sola consideratione fit, esse inferant distinctionem in re ipsa. Quare & cum post considerationem mentis ut cogitantis, supersit consideratio Mentis, ut substantia est, & de hac substantia quæritur, sit-ne corporea, an-non? tu quidē putas rem jam confectam, cum ut cogitantem considerasti, & sufficere arbitraris, quodd excludens à tuo conceptu omne corpus, nihil corporeum intellexeris; at illi bona fide rem confectam non ducunt, sed post considerationem operationis, superesse existimant considerationem ipsius substantiæ, quæ fuit operata; Vnde & requirunt quidem, arguunt, inferunt esse non corpoream; verum pari fide profitentur notitiam suam esse abstractam, ac sese talem substantiam non nisi sub corporea quadam, eaque subobscura, confusaque specie intelligere. Quin etiam tu ipse, si fateri velis (ac tamen in eo perstes ut velis solum considerare cogitantem substantiam) nonne cum ipsam cogitationem separatam non videas, sed substantiam, quæ cogitat, simul veluti intuearis; nonne, inquam, pro objecto tuæ considerationis habes entitatem aliquam sub specie quadam corporea tibi obversantem, nimirum quasi tenuem quampiam, ac pellucidam auram, aut quid simile? Verum silere satius ducis, quam vel id asserere, vel negando facere ansam quærendi ex te, qualis-nam ergo obijciatur res, qualis obversetur? qualis sit seu species, seu forma incorporea, sub qua hanc substantiam, seu entitatem contueris?

Adhæc, quoniam tu dixeras Intellectu percipi, quæ Imaginatione non percipiuntur, Quæsiui ego, *an docere posses esse in ira nos duas facultates cognoscentes, & non unicam, cui duas, pluresque functiones tribuamus?* An-non ex solutione quoque difficultatis hujusmodi controversia tota exitum habuisset? Vt explicatius rem dicerem, subjunxi exemplum de Sole, quærendo nempe ex te Criterium, quo agnosci posset, quoties cogitamus rem corpoream, *Quando-nam sit Imago, quæ intellectui non sit; quando Intellectus, quæ non sit Imago?* An-non hoc ipsum rem decidisset? Concludi deinceps ex tua Imaginationis definitione fore ergo, ut corpora Imaginatione sola cognoscantur, aut discerni non posse, quæ facultas alia præterea cognoscat? An-non ex soluto hoc nodo, fuisset penitus conquirendum? Verum tu hæc, & cætera dissimulanda esse censuisti, dicere contentus nihil aliud me, quam obmurmurare. An hæc dicens, existimasti debuisse me intelligere, dum oculis clausis Solem cogito, aliud esse cogitare ipsum solem, ut pedalem, ut vicinum,

III
Declina-
sam quoq;
illam de
Criterio,
quo discer-
natur,
quando-
nam ima-
ginatione,
qua intel-
lectus non
sit, aut in-
tellectuone,
qua non sit
imagina-
tio, quid-
piam con-
cipiamus.

ut cætera, quemadmodum ad oculum patet; aliud, ut tot illis vicibus majorem, remotiorem, & alia; ac Imaginationem quidem esse circa priora, Intellectionem circa posteriora; sicque jure dixisse te, ea Intellectu percipi, quæ Imaginatione non percipiuntur; & me, qui adversus veritatem adedò perspectam obloquar, meras murmurare obmurmurationes? Sed utcumque existimâris, atq; hoc quidem potissimum, vide quam appositè parùm. Siquidem de Sole loquutus, cogitabam illum quantus, quàm prope, qualis oculo mox antè apparuerat; Et quia hæc non solùm Imaginatione, sed etiam Intellectu percipere poteram, alioquin enim Intellectus non potuisset comparationem instituere inter illam veram, & hanc apparentem magnitudinem, ac distantiam, adnitebar discernere quandònam Intellectu, quandònam Imaginatione cogitarem, perciperemque; & quia non potui discernere, id professus sum bona fide, & requisivi abs te Criterium. Tu verò nullum assignasti, quandoquidem nullum habuisti, & noluisti tamen pari fide tuam profiteri ignorantiam; sed facere solum, si tibi licuisset, pleno meridie tenebras, obmurmurationem prætendens. An verò debui reputare esse saltem Intellectionem, quæ Imaginatio non sit, ut cùm Intellectus illam Solis magnitudinem, atque distantiam percipit, quæ in Imaginationem non cadit? At perspicuum esse videtur Intellectum non percipere illam magnitudinem, aut distantiam, nisi quantum imaginatur; adedò ut quemadmodum est obscura, confusa, abstracta solùm imaginatio; ita sit obscura, confusa, abstracta solùm intellectio. Nam tamen si pronunciet magnitudinem, & distantiam esse majorem, quàm quæ in sensum cadit, non tamen propterea magis intelligit, quàm imaginatur majorem: & quamvis neque imaginetur, neque intelligat; arguit tamen esse debere ex consequutione, seu vi illationis deductæ ex manifestis principiis: Eo modo, quod dum videmus hominem larvatum, non intelligimus quidem, magis quàm imaginamur eum vultum, qui sub larva latet; sed pronunciamus tamen esse aliquem, arguentes ex eo, quòd ille sit homo. Heinc patet an obmurmuràrim, cùm excepi fuisse verius à te dictum, quàm volueras, *illud nescio quid tui*. Cùm sit enim certum cogitare te, sive mentem tuam; pronunciarì omninò potest esse te aliquid, seu rem aliquam, vel quandam substantiam; id arguendo nempe ea consequutione, quòd non sit actio sine agente: At quidnam sis, seu qualis res, vel substantia sis; hoc est quod omninò te latet, quod excepi nescire te, quod in intellectionem ma-

gis,

gis, quàm in imaginationem non cadere dixi. An sint porro etiam obmurmurationes, quæ in contextu meo sequuntur, lectores æqui viderint.

D V B I T A T I O V I.

De Mente Brutis visa asserenda, si Mens sit res sentiens, imaginans, &c.

SEd, inquis, *Quid sum igitur? Res cogitans. Quid est hoc? Nempe dubitans, intelligens, affirmans, negans, volens, nolens, imaginans quoq; & sentiens.* Multa heic dicis, in quibus singulis nō hæreo, in hoc uno hæreo, quod te rem sentientem dicis. Id nempe mirum, cū jam antè asserueris oppositū. An dicere fortè voluisti esse præter te facultatem corpoream residentem in oculo, aure, cæterisq; organis, quæ species rerum sensilium excipiens sensationem ita inchoet, ut tu deinde perficias, ipsaque sis, quæ revera videas, audias, & cætera sentias? Hac nempe de causa, ut puto, tam ipsam sensationem, quàm etiam imaginationem, cogitationis speciem facis. Id porro esto: sed vide tamen, an non quæ sensio in brutis est; cū non sit tuæ ab-
similis, cogitatio quoq; dici valeat; sicque in ipsis etiam Brutis Mens sit non dissimilis tui? Ego, inquires, arcem in cerebro tenens, excipio quicquid per spiritus nervis traductos renuntiatur; sicque apud me peragitur sensio, quæ dicitur fieri toto corpore. Esto: sed sunt in Brutis nervi, sunt spiritus, est cerebrum, est in cerebro principium cognoscens, quod renunciata per spiritus pari modo excipiat, sensationemque perficiat. Dices, *illud principium in Brutorum cerebro, non esse aliud, quàm l'hantasi-
 am, sive facultatē imaginatricem.* At tu ostende te aliud in cerebro esse, quàm Phantasiam, imaginatricemve humanam. Quærebam mox ante criterium, quo te probares aliam; at non es, opinor, illud allatura. Afferes sanè operationes longe præstantiores, quàm quæ eliciuntur à Brutis: At quemadmodum licet homo sit præstantissimum animalium, non eximitur tamen ex animalium numero; ita quamvis tu exinde proberis imaginari, cū sis Phantasiarum præstantissima, non eximere tamen ex numero earum. Nam & quod te mentem specialiter voces, nomen esse potest dignioris, sed non diversæ propterea naturæ. Sanè, ut te esse diversæ (hoc est, ut contendis, incorporæ) naturæ probares, deberes quandam operationem alia ratione exserere, quàm exserant Bruta: ac nisi extra cerebrum;
 semul

saltem independenter à cerebro : quod tamen non facis. Siquidem illo perturbato perturbaris ipsa, eodem oppresso opprimeris ; & si quæ rerum species ex eo excidant, non retines ipsa ullius vestigium. *Fiunt omnia*, inquis, *in Brutis impulsione cæca spirituum, cæterorumque organorum* ; eo modo, quo in horologio, machinave alia peraguntur motus. Sed utcumque id verum sit circa functiones cæteras, ut nutritionis, pulsationis arteriarum, & simileis, quæ ipsæ quoque pari ratione peraguntur in homine ; asseri ne potest vel actiones sensuum, vel quas passionis animæ dicunt, exseri in Brutis cæco impetu, non exseri verò in nobis ? Emitterit ossa in oculum canis sui speciem, quæ in cerebrum usque trajecta, quibusdam quasi hamulis hæret animæ : ipsaque anima proinde, & cohærens ipsi totum corpus quibusdam quasi catenulis subtilissimis rapitur ad ossam. Emitterit etiam lapis intentatus sui speciem, quæ vectis instar animam propellat, corpusque unà abigat, seu fugere cogat. Sed non-ne hæc eadem in homine fiunt ? Nisi fortassis alius est modus quo fieri ista concipis, quemque si doceas, valdè obstringas ? *Ego*, inquis, *libera sum, estque in mea potestate, ut hominem aequè a fuga, & prosecutione avertam*. Sed nempe facit idem in Bruto cognoscens illud principium, & licet canis nihil interdum minas ictusque reveritus, in ossam conspectam profiliat, quàm facit homo sæpe similia. *Latras*, inquis, *canis mero impetu, & non ex delectu, ut loquitur homo*. Sed & causæ homini sunt, ut loqui censeatur ex impetu : nam & quod tribuis delectui, ex majore impetu est, & suus quoque Bruto est delectus, ubi major est impetus. Vidi certè canem sic latratum suum attemperantem ad lituum, ut omneis soni acuti, gravis, lenti, ceteris mutationes imitaretur : quantumcumque illæ pro lubitu, & ex inopinato aut crebrescerent, aut producerentur. *Ratione*, inquis, *carent Bruta*. Sed nimirum carent humana, non sua : aded proinde ut non videantur ἀλογία dicenda, nisi comparata ad nos, seu ad nostram speciem, cum alioquin λόγος, seu Ratio tam videatur esse generalis, posseque illis attribui, quàm facultas cognoscens, sensusve internus. Dicis ea non ratiocinari. Verùm, cum non ratiocinantur tam perfectè, deque tot rebus, ac homines ; & ratiocinantur tamen, & nihil videtur discriminis, nisi secundum magis, & minus. Dicis ea non loqui. Sed cum non proferant voces humanas (scilicet homines non sunt) proferunt tamen proprias, iisque ut nos nostris perinde utuntur. *Potest*, inquis, *etiam delirus plureis voces comtexere ad aliquid significandum ; cum nihilominus id non possit Brutorum*

fin.

sapientissimum. Sed vide, an sis satis æquus, qui voces humanas exigis in Bruto, nec attendis ad proprias. Verùm hæc longioris sunt disquisitionis.

R E S P O N S I O .

Hic etiam multa obmurmuras, sed quæ, non magis quàm præcedentia, egent responsione. Nam quæ de Brutis inquiris non sunt hujus loci; quia mens meditataunda apud se ipsam potest experiri se cogitare, non autem an bruta etiam cogitent necne; sed hoc postea ex eorum operationibus à posteriori tantum investigat. Nec hæreo in iis quæ me ineptè loquentem introducis abnegandis, quia mihi satis est semel monuisse te non omnia mea fideliter referre. Sape verò attuli criterium, quo dignoscitur mentem aliam esse à corpore, nempe quod tota mentis natura consistat in eo quod cogitet, tota autem natura corporis in eo quod sit res extensa, nihilque prorsus commune sit inter cogitationem, & extensionem. Ostendi etiam sæpe distinctè mentem posse independentèr à cerebro operari; nam si nemo nullus cerebri usus esse potest ad purè intelligendum, sed tantum ad imaginandum vel sentiendum. Et quamvis fortis accedente imaginatione, vel sensu (ut sit cum cerebrum perturbatur) non facile mens aliis rebus intelligendis vacet, experimur tamen cum imaginatio est minus fortis, nos sæpe aliquid ab ipsa plane diversum intelligere, ut cum inter dormiendum advertimus nos somniare, opus quidem est imaginationis quod somniamus, sed quod nos somniare advertimus, opus est solius intellectus.

I N S T A N T I A .

Quod de obmurmuratione pergis dicere, pari modo est excipiendum. Subdis, quæ de Brutis inquiris, hujus loci non esse. Et quidnam tamen esse magis potuit, nisi elabi dissimulatione do voluisses? Tu definiendo *Rem cogitantem*, illam esse dixeras, quæ inter cætera est *sentiens*. Et cum proinde juxta te propositio foret, *Res sentiens est res cogitans*; Assumpsi ego rem manifestam, videlicet, *Brutum est res sentiens*, conclusi verò, *Igitur Brutum est res cogitans*. Tum quia tu volebas *Rem cogitantem* idem esse cum *Mente*, consequi dixi ut *Brutum foret Mens*, sive, ut *Mens esset in Bruto*. Denique quia tu videbaris posse variè distinguere inter *Sensum*, *Phantasmiam*, *Mentem*, ego præclusi aditus, ut cum tu nolles aliunde esse in Brutis *Mentem*, ac *Rationem*, cogereris remanere in contra-

K

dicto-

I.
Difficultatem de
Brutorum
ratiocinatione decli-
natam im-
merito su-

dictoria illa, & absurda positione, Esse Mentem, & Rationem in Brutis. An igitur quæ de Brutis inquisivi, non fuere hujus loci, & non tu potius fuisti heic loci dubius, experisque consilii; & non habens quid responderes, hoc præmittendum censueris, *ea non egeret responsione*? Haud illepidius est effugium, quo te conaris subducere, dum ais *Mentem meditabundam apud seipsam posse experiri se cogitare, non autem an Bruta etiam cogitent, nec-ne? sed hoc postea ex eorum operationibus à posteriori tantum investigare*. Quasi exigatur, ut humana Mens Brutorum subeat cerebrum, & non ex ipsis potius operationibus investiget? Quasi hic solum esset quæstio an id investigetur, non etiam, imò præcipue, ac solum, utrum agnoscat? Verum agere ita soles; id scilicet dissimulare, de quo quæritur, verbulumque interea interserere, quo ut cuniculo subterfugias. Quærebatur heic an Bruta cogitarent? Ego id vel ex te probavi. Dicis tu id Mentem à posteriori investigare; ibique consistis. At si investigat, reperit-ne? Quam cautus es, dum circa idipsum, quod res est, neque ais, neque negas! Vides enim, si post investigatas operationes dixeris *Bruta cogitare*, inferri ex tuis principiis esse ergo in illis Mentem; si *non cogitare*, inferri ex iisdem principiis non esse ergo in illis sensum. Quamobrem conspecto utrimque præcipitio, hære in angustiis, quam te dedere in alterutrum satius ducis. Aliud est effugium, quo dicis *non hære te in iis, quæ te ineptè loquentem introduco abnegandis, quia tibi satis est semel monuisse me non omnia tua fideliter referre*. Sed mitto imprimis, an-non obijcienti præoccupare responsionem liceat? Cum hæc sanè sit differentium, imò & omnium quacumque de re perorantium Lex, & consuetudo, cujus finis est, ut præcisa alternationis occasione, scrupuli citius eximantur; videndum solum superest, ineptè-ne, hoc est te aptius loquuturum quidpiam, loquentem inducam. Deinde, non potuisti saltem dissimulare, quin maxima pars eorum, quæ te loquentem introduxi, reverà tua sint, cum si quis aut Meditationes, aut eam Methodi partem, in qua ratiocinationem Brutis denegas, legerit, rem sic se habere sit observaturus; ex quo fit, ut si te ineptè loquentem induxi, accusare teipsum debeas, qui ita loquutus prior fueris. Nisi verò omnia tua retuli verba, sed in pauca sensum contraxi, quod antè etiam monui, ostendendum erat qua in re non fuerim circa sensum satis fidelis.

II.
Esse non
Criterium,
sed petisio-
nem prin-
cipii, circa
distinctio-
nem Men-
tis, & cor-
poris. quòd
illa dicatur
res cogi-
tans, istud
extensa:
falsumque
esse, quòd
sota illius
natura in
cogitatio-
ne, huius
in extensi-
one consi-
stat.

Subjicis te sæpe attulisse Criterium, quo dignoscitur Mentem aliud
esse à corpore, nempe, quòd tata Mensis natura consistat in eo, quòd cogi-
tet;

ter; tota autem Natura corporis in eo, quod sit res extensa; nihilque prorsus commune sit inter cogitationem, & extensionem. Subjicis, inquam, quoniam ego dixeram, *quæsisse me paulò ante Criterium, quo probares Imaginationem, seu Phantasiam ab intellectu, seu Mente distinguere, neque videri te allaturum.* Quo loco prætereo, an Responso ad Quæstionem quadret, an non? Adnoto potius non constare, neque pervideri à me, quod tam sæpè allatum dicis. Nam Mentem quidem esse aliud à crasso isto corpore, seu conspicuis membris, capite, pectore, ventre, brachiis, cruribus, vel etiam cerebro, corde, jecore, sanguine; à nemine est controversum. An sit verò aliud ab aura, spiritu, aut alio tenui, per conspicuum istud fuso corpore, id quidem controvertitur; sed allatum esse Criterium, quo id dignoscatur, hætenus non vidi. Dicis *totam Mentis naturam in eo consistere, quod cogitet; totam naturam corporis in eo quod sit res extensa.* Scilicet hæc fuit tua parturitio? Scilicet hoc est, quod Criterium vocas? Criterium, cum sit Regula, qua in dijudicando utimur, debet esse quidpiam per se manifestum; quod tu heic proponis illud ipsum est, quod in controversia versatur. Nam primò quidem circa Mentem, nisi sit falsum, saltem est dubium, an in utero, aut per Lethargum cogitet; neque potes ipse probare, ut superius objectum est, cogitare mentem per ea tempora, sine petitione principii. Quod si fortè non cogitat per ea tempora, an suà idcirco caret natura? Deinde, nisi verum est, saltem dubium est, an aliquid cogitet præter Mentem; Neque tu probare potes non cogitare Bruta, nisi ut paulò antè est dictum, tua evertas principia. Quòd si fortè cogitatio in Brutis est, an Mens ibi non est, ubi est tota ejus natura? Adhæc, nisi verum est, saltem dubium est, an eadem humanæ mentis, animæve substantia, quæ est cogitationis efficiens, sit efficiens generationis, nutritionis, accretionis; Neque tu probare potes non esse, nisi assumes pro principio substantiam cogitatricem, non posse esse generatricem, &c. id est petas ipsum principium: cum defendi possit eandem substantiam variis præditam facultatibus posse per unam cogitare, per aliam generare, per aliam aliud agere: Quod si ita sit, profectò pars naturæ Mentis non erit tota Mentis Natura. Præterea, ut Mens concedatur nihil aliud, quàm cogitare, nisi verum est, saltem dubium est, an cum hæc fuerit differentia; ipsa aliunde substantia generica pars naturæ non sit: imò, ut physicè rem dicam, an-non ipsa potius sit tota natura, & cogitatio solum actio, aut ad summum

proprietas ; Neque tu potes quicquam probare , quin rursus petatur principium. Quòd si ita sit, profectò non pars, non actio, non proprietas, tota erit mentis natura. Circa corpus, hoc solum noto, Si tota illius natura in eo consistat, ut sit res extensa, Igitur omnis actio, omnisque agendi facultas extra naturam corpoream est, quoniam extensio est merè passiva, & , qui rem dicit solum extensam, inter cætera non activam dicit. Igitur nulla erit actio, nulla erit agendi facultas in corporibus : Et unde-nam esset ? An à principio incorporeo ? at quod est incorporeum est solum cogitans, non verò corporeas actiones eliciens. An à corporeo ? at quod est corporeum est solum extensum, non verò agens aliquid. Confirmatur certè, quia ut mens non potest aliud, quàm cogitare, non autem generare, nutrire, &c. quia tota ejus natura in eo est, ut sit res cogitans ; ita corpus nihil potest aliud, quàm extensionem præbere, non autem generare, nutrire, illuminare, calefacere, &c. quia tota ejus natura in eo est, ut sit res extensa. Et recurre ad formas, ad differentias, ad quicquid voles aliud ; quandoquidem illud Mens non erit, atque aded erit aliquid corporeum, id, ne aliquid habeat, quod extra naturam corporis sit, non actiosum erit, sed solum extensum. Non oppono porro quàm absurdum sit nullam agendi facultatem, nullamque actionem corporibus tribuere ; observo solum quàm manifestum, ac idoneum sit tuum illud Criterium. Et quia subdis *nihil prorsus esse commune inter cogitationem, & extensionem*, Addo Primò controversiam de hoc ipso esse, objectumque supernus, fuisse probandum tibi hoc superesse, Vim cogitandi ita esse supra naturam corpoream, seu ut jam appellas, extensam, ut quicquid cogitat, necessariò sit incorporeum, & inextensum. Secundò, aut Bruta non cogitare, id est non sentire, non imaginari, &c. aut illorum animam, formam principiumve internum, esse inextensum, atque aded mentem inextensam ; aut si quidpiam extensum, esse igitur aliquid inter extensionem, & cogitationem commune. Tertio, formas aut qualiacumque dicas principia interna plantarum, habere haud dubie extensionem, & cum non temerè, sed scitissimè operentur, viderique proinde possint id, quod agunt, cognoscere, atque idcirco cogitare, nisi verum sit, dubium saltem fieri, an-non extensio habeat in ipsis aliquid commune cum cogitatione. Quartò, cum oppositarum sub eodem genere specierum oppositæ sint differentiæ, hasce tamen cogitationis, & extensionis differentias nullam inter se præ se ferre opposi-
tio-

tionem; Quare & cogitationem excludere quidem quicquid non cogitat, sed non confestim quicquid est extensum; quemadmodum extensio excludit quidem quicquid extensum non est; sed non confestim quicquid cogitat. Quintò, non alio principio te niti, ut id asseras quàm fallaci illo aliquoties jam memorato, de distinctione, quæ reipsà sit inter duas res, quæ conceptibus distinctis considerentur. Nam verum est quidem inter extensionem, & cogitationem in statu considerationis, quatenus extensio spectatur solum, ut extensio, & nihil aliud, cogitatio ut cogitatio, & nihil aliud: at velle ex statu considerationis argumentari ad rem ipsam; & quia cogitationem concepisti non concepta extensione, concludere ipsam esse absque extensione, & consequenter Mentem cogitantem expertem esse corporis extensi, hic demùm est paralogismus.

Caterùm, quia tanta est gloria, qua te evehis ob naturam mentis clarè, distinctèque perceptam, hominibusque renunciata, age hæreamus heic tantisper, & quod jam insinuatam est, paulò uberius inculcemus. *Tota*, inquis, *natura Mentis in eo consistit, quod cogitet.* Res scilicet nova, inaudita, grandis, Mens humana cogitat; & quod est ampliùs ejus natura in eo est tota, quòd cogitet. Scilicet stupidi hùc usque omnes homines ac præsertim Philosophi, qui non adverterunt mentem cogitare! scilicet deridiculi, qui aliud de ea requisierunt, aut cognoscere voluerunt, præter id unum, quòd cogitet? O! si nihil aliud præstandum erat toto illo molimine, quàm poteras tanto parcere labori! Siquidem & nihil invexisti novum, asserens Mentem cogitare; & non propterea studiosorum explesti desiderium, asserens totam mentis naturam in eo esse, quòd cogitet. Et certè si ex te quærat, Quid intelligis nomine Naturæ? An-non principium omnium proprietatum, facultatum, operationum? Et cùm naturam alicujus rei expetimus nosse, an-non tale principium, quale sit, nosse expetimus? Laboramus-ne de operatione? dubitamus-ne quin sit aliqua ejus operatio? quin talis operatio sit à principio ejusmodi? Non-ne hoc planè, & ab omnibus supposito, difficultas superest, ut cujusmodi id sit, cognoscatur? Et, si germana sit hæc tua philosophandi methodus, quæ-nam ergo erit in Mundo proprietas, naturaque occulta? An-non prorsus inepti crunt, si qui in natura Magnetis exploranda, aut investiganda laborent; cùm reputare debeant sibi factum satis hoc uno tuo verbulo, *Tota natura magnetis in eo consistit, ut ferrum trahat, dirigatque ad polos.* Quod idem quoque dicendum erit de rebus

III.

Iterum longe absesse, ut qui perspectum habet mentem cogitare, totam proprietatem, seu intimentis naturam perspicere habeat.

bus omnibus, Tota natura lapidis est, ut deorsum cadat, ignis, ut calefaciat, Equi, ut currat, aut hinniat; sicque abundè erit nosse alicujus rei actionem, ut statim pronunciemus, Tota hujus rei natura in eo consistit, ut hoc agat: Neque prorsus erit necesse substantiam ejus investigare, penetrare, evolvere, secundùm omnes partes, positus, modos, conditiones attendere. Sin verò nemo sit cordatus, qui hisce in rebus fidendum tibi censeat, seu à philosophando desistat (cùm non esset cur laboraret, naturis rerum ita per te in propatulo positis) non erit sanè cur censeat, totam Mentis naturam sic in eo consistere, quòd cogitet, ut non præter cogitationem, superesse putet laborem de ipso cogitationis principio, ad dignoscendum, si fieri possit, cujusmodi sit, quomodo se habeat, quomodo cohæreat, quomodo agat, habeatne facultates, & functiones alias; habeat-ne partes, an non? &, si habeat, quales-nam habeat? si non habeat, impartilisque sit, quomodo tam variè sese comparet? quomodo tot munia exerceat? qua ratione applicetur corpori? qua ratione ab illo excedat? quomodo sine illo degat? quomodo moveatur? & sexceata hujusmodi. An dices fortè, cùm cæteri ad unicum genus functionis internæ, Cogitationem restringerent, deprehendisse te varia operationum genera, quæ censeri præterea cogitationes debeant, dubitationem, intellectionem, affirmationem, negationem, volitionem, nolitionem, imaginationem, visionem, auditionem, & sensationes cæteras: ac certò novisse, aut etiam ostendisse non esse alia, quæ præstare Mens possit, atque adedò totam illius naturam in his præstandis consistere. Verumtamen quicquid nonnulli opinari potuerint, celebris est tamen philosophorum nobilissimorum antiqua, & recens opinio illis expressa vocibus *Mens videt, Mens audit*; Nemòque, quod sciam, unquam fuit, qui ista omnia, quæ enumeras, addo & plura alia, aut non putàrit cogitationes, aut saltem sine cogitatione non esse autumaverit. Inde enim est cur vulgò proponant, solvant-que illa problemata, Quì fiat, ut interdum oculis apertis, & parulis auribus deprehendamus non vidisse res coràm positas, neque audisse voces proximè prolatas? Nempe quia videndi, audiendique facultas aut ipsa mens est, aut saltem sine mentis attentione, cogitatione ve ad sentiendum objectum imperfecta, & inefficax est, eo modo quo remigum robur, sine Gubernatoris clavum tenentis directione, ad subeundum portum. Discrimen est solùm, quod quæstione proposita, An res, sive substantia illa, quæ dicitur Mens, habeat

habeat solum vim cogitandi, hoc est dubitandi, intelligendi, affirmandi, negandi, volendi, imaginandi quoque, ac sentiendi? An verò habeat præterea vim informandi corpus, continendi, movendi, dirigendi ipsum? An illud idem, assumpto alimento, nutriendi, adaugendi, & comparato semine ipsi simile generandi? An sese ab eodem corpore abducendi, seipiam de loco in locum movendi, aliquid pellendi, aliquid patiendi, & innumera alia? Tu pronuncies Mentem nihil horum, ac præter cogitationem, seu dubitationem, intellectiōnem, &c. nihil habere: Illi oppositum probabile putent, aut saltem assensum contineant, neque de re sibi incomperta temerè, securèque pronuncient: Ex quo fit, ut illi videantur legitimè philosophari, tu videaris semper deludi tuo illo paralogismo, ex præsumpto iudicio, quo existimas tuam notitiam debere esse Regulam eorum, quæcumque non modò cognosci de aliqua re ab homine possunt, sed etiam quæ in illa sunt. Inde quippe est tua Ratiocinatio:

Tota Mentis natura est, quod ego solum de ea cognosco:

Atqui ego hoc solum de Mente cognosco, quod cogitet, hoc est dubitet, intelligat, affirmet, neget, velit, nolit, imaginetur, ac sentiat:

Igitur tota Mentis natura est, quod cogitet, hoc est dubitet, intelligat, affirmet, neget, velit, nolit, imaginetur, ac sentiat.

Sed his dimissis, Dicis etiam te sæpe ostendisse distinctè posse mentem operari independentem à cerebro. At quæso, ubinam vel semel, & non dico distinctè, sed etiam confusè ostendisti rem huiusce momenti? Id mihi sanè incompertum. Nam quod temet abduxeris, quod te, ut rem cogitantem præcise consideraveris, id factum propterea absque concursu cerebri non est, & si probare factum voluisti, id ex vi solum paralogismi sæpius memorati potuisti. Dicis nullum esse usum cerebri ad purè intelligendum, sed tantum ad imaginandum, vel sentiendum. Et quid vocas purè intelligere? Et, quandōnam, aut quomodo, aut quid purè intelligis? Et meministi ne te aliquando, aliquid purè, & sine cerebri usu intellexisse? Et potest ne per te aliquis meminisse? Dixisti quippe non multò ante requiri vestigia in cerebro. Si non potes ergo ullius rei, quam intellexeris, sine vestigio in cerebro, atque aded sine cerebri usu recordari, ecquid scis, purè ne unquam aliquid intellexeris? Et, si fortè purè intelligi dicas quæ ratiocinando inferuntur; cùm nihil neque proponi, neque assumi possit sine subiectorum, attributorumque memoria; cùm nihil

IV.

Non fuisse probatum intelligere Mentem independentem à cerebro, etiam cùm inter somnians se somnare adveniat.

nihil inferri sine præmissarum concessarum recordatione; quomodo fieri ista possunt sine vestigiis in cerebro? quomodo potest Mens independenter à cerebro ratiocinari? Exemplum affert de eo, qui inter dormiendum advertit se somniare. Sed ista adversio, fit-ne sine cerebri usu? Dicis, quod somniemus, opus esse imaginationis, quod advertamus, opus solius intellectus. Sed quid opus fuit confugere ad somnium, in quo omnis illa adversio non pura, claræque, sed perturbata solum, obscuræque reflexio est; cum ecce per vigiliam non tantum experiamur nos imaginari, sed etiam purè, claræque reflexione uti supra id, quod imaginamur; sicque possint melius imaginationis, intellectusque opera distingui? Enimverò in utrovis statu probandum fuerat Imaginationem, seu Imaginatricem, & Intellectum esse duas facultates reipsa distinctas, & non potius unicam, quæ duo munera obeat. Nam quoddam advertere possit se somniare, seu intelligere se imaginari, nihil aliud est, quam cognoscere, quod cognoscat, seu una notione percipiat aliam; quod privilegium est facultatis internæ, non concessum sensui externo; nisi longè imperfectius, quatenus sensus externus, nisi externo corpore speciem faciei, aut vocis reflectente, reflexione uti non potest; cum facultas interior habeat intus & cerebrum, & in eo hærentia specierum vestigia ex organis, functionibusve sensuum externorum transmissa, impressave; imò & vestigia propriarum actionum, & uno verbo omnia necessaria ad reflectendum comparata. Vnde & qua facilitate advertit, attenditque ad id, quod imaginatur inter vigilandum, eadem etiam, proportionem, potest advertere, attendereque inter dormiendum. Et quia persæpe inter vigilandum miramur quàm absurda cogitemus per somnium; mirum non est, si aliquando ubi illa absque per somnium occurrunt, excitetur species illius admirationis, & consequenter alia, quoddam somnium sit, absurda illa apparere. Mihi certè ista maximè contingunt, ubi videre homines videor, quos mortuos interim recorder. Subit enim statim cogitatio, cum mortui non redeant, somnio igitur: ex eoque fit, ut vel statim mihi suboriatur nescio quæ confusio, & commotio, qua expergeciam; vel si ad excitandum me, aut explorandum, an-non reverà somnium sit; requirere pergam, ubi-nam igitur sim, qui somniem, qua in urbe, qua in domo, quo in cubiculo, quo in lecto, tunc demum pari confusione, commotioneque expergeciam. Scilicet, ut aliis in rebus experimur nos inter somniandum ratiocinari, demonstrareque, & similia omnia perinde agere, ac dum vigilamus;

vigilamus ; imaginibus nempe rerum sese concatenatione quadam in lucem educantibus ; ita possumus & cogitare absurda , & absurditatem mirari , & ratiocinari de illa , quòd non nisi somniando apparere possit , & alia hujuscemodi ; ut quod à Socrate quoque observatum est , de facta inter infomnia somniorum commemoratione .

D V B I T A T I O V I I .

De Exemplo Cerae ; Quòd detractis mente omnibus illius accidentibus , non propterea intima illius natura clarè , distinctèque , & intellectu quidem absque imaginatione noscatur .

ADfers deinde exemplum cerae , ac circa illud plurima habes , ut significes aliud esse , quæ vocant accidentia ceræ , aliud ipsam ceram ejusve substantiam ; ac opus esse solius mentis , sive intellectus , non verò sensus , aut imaginationis ipsam-met ceram , ejusve substantiam distinctè percipere . At primò illud ipsum est , quod omnes vulgo profitentur , abstrahi posse conceptum ceræ , substantiæve ejus à conceptibus accidentium . An verò propterea ipsa substantia , seu natura ceræ distinctè concipitur ? Concipimus quidem præter colorem , figuram , liquabilitatem , &c. esse aliquid quod sit subiectum accidentium , mutationumque observatarum ; sed quid-nam , aut quale illud sit , nescimus . Quippe latet semper , & solum , quasi conjiciendø , subesse debere aliquid putatur . Heinc miror quid dicas te peracta illa detractioe formarum , quasi vestium , perfectiùs , atque evidentius percipere quid cera sit . Nam percipis quidem ceram , ejusve substantiam debere esse aliquid præter ejusmodi formas : at quid illud sit , non percipis , nisi nos fallis . Neque enim id tibi revelatur , ut revelari potest homo , cujus priùs vestis , pileumque solum conspeximus : dum ista illi detrahimus , ut quis , aut qualis sit , noscatur . Deinde cùm putes id te quomodocùmque ; percipere , quomodo , quæso , percipis ? An-non ut aliquid fufum extensumque ? Neque enim tanquam punctum concipis , tametsi hujusmodi sit , ut nunc latius , nunc contractiùs extendatur . Et cùm hujusmodi extensio infinita non sit , habeatque terminum , an-non illud etiam concipis quadam ratione figuratum ? Et cùm videaris tibi illud quasi videre , non-ne illi prætereà nescio quem tametsi confusum colorem assignis ? Habes id certè ut corpulentius , ita visibilius , quàm me-

L

rum

rum inane. Quare & tua intellectio imaginatio quædam est. Si dicas te absque ulla extensione, figura, coloreque concipere; dic, bona fide, quale-nam ergo? Illud, quod habes *de hominibus visis, seu mente perceptis, quorum tamen non nisi pileos, aut vestes conspicimus, non arguit mentem potius esse, quàm imaginatricem, quæ dijudicet.* Certè & canis, in quo parem tibi mentem non admittis, simili modo dijudicat, cum non herum suum, sed pileum solum, aut vestes videt. Quid, quoddametsi herus stet, sedeat, cubet, reclinetur, contrahatur, effundatur, agnoscit tamen semper herum, qui sub omnibus illis formis esse potest, cum tamen non sub una potius, quàm sub alia sit, eadem proportionem, qua cera? Et cum leporem currentem venatur, integrumque, & mortuum, ac postea exco-riatum, discerptumque in frusta videt; putas non existimat eundem semper leporem esse? Quod proinde dicis, *perceptionem coloris, duritiei, & similium, esse non visionem, non tactum, sed solius mentis inspectionem*; Esto: dummodo mens non differat ab imaginatrice re-ipsa. Cum verò addis, *eam inspectionem esse posse imperfectam, & confusam, vel perfectam & distinctam, prout minus, vel magis ad illa, ex quibus constat cera attenditur*: id sanè arguit: non inspectionem mente factam, illius nescio cuius rei, quæ est præter omnes formas, esse claram, distinctamque cognitionem ceræ: sed inspectionem per sensus factam omnium, quantum fieri potest, accidentium, mutationumque, quarum cera est capax. Ex his certè concipere, & explicare poterimus quid nomine ceræ intelligamus; at nudam illam, vel potius occultatam substantiam neque ipsi concipere, neque explicare aliis valeamus.

R E S P O N S I O

Hic, ut sæpe alibi, tantum ostendis te non satis intelligere illa, quæ conaris reprehendere. Neque enim abstraxi conceptum ceræ ab ejus accidentium conceptu, sed potius indicare volui quo pacto ejus substantia per accidentia manifestetur, & quomodo ejus perceptio reflexa, & distincta, qualem nullam, & caro, videris unquam habuisse, differat à vulgari & confusa. Nec video quonam fretus argumento, pro certo affirmes canem simili modo atque nos dijudicare, nisi quia cum videas illum, etiam carne constare, eadem omnia quæ in te sunt putas esse etiam in illo; sed ego qui nullam in eo mentem animadverto, nihil simile iis quæ in mente cognosco in ipso reor inveniri..

IN-

I N S T A N T I A.

Mira profectò est fiducia, sed solitum tamen artificium, quo difficultatem constanter declinas, dum, ut caliginem facias, præmittis *me non satis intelligere, quæ reprehendere conor.* Videlicet ista, quæ dicis adèò sublimia, difficilia, nova, ac inaudita sunt, ut te non tam mei misereat, quàm indignatio subeat, quodd meo me pede, ac modulo non satis metiar. Age igitur, quia tu tantus Doctor; dictata ecce repetam, ut postremò constet, quo jure queraris. Quæsisisti primò exemplum rei singulæ ex iis, quæ putantur distinctissimè comprehendi; & accepta cera recente, observasti in ea saporem, odorem, colorem, figuram, magnitudinem, duritiem, frigiditatem, tactilitatem, sonum. Deinde, eàdem igni admodum deprehendisti saporem, odoremque exspirasse, mutatum colorem, mutatam figuram, adanctam magnitudinem; factam liquidam, Calidam, vix tactilem, & insonorantem. Tum quæsisisti, an eadem remaneret cera; & cum constaret remanere, ac nihil tamen remansisse eorum, quæ prius sensibus attigeras, requisisti quid esset illud, quod adèò distinctè remansisse comprehendebatur. Heinc dubitando, an-non esset corpus, quod paullo antiè apparebat modis illis conspicuum, ac deinde diversis; quæsisisti quid esset hoc, quod præcisè imaginabaris: & agnoscens, te solum præterea imaginari flexibilitatem, seu mutabilitatem, & extensionem; ac non posse tamen te imaginatione complecti omneis mutabilitatis modos, omneis extensionis ob varias incalesfactionum varietates, concludisti denique te non imaginatione, sed sola mente percipere, quid esset hæc cera. Requisisti consequenter quid esset hæc cera mente percepta; & respondisti esse eandem, quam videbas, tangebas, imaginabaris, quam arbitratus fueras; Verùm perceptionem neque esse, neque fuisse unquam visionem, tactionem, imaginationem, sed solius mentis inspectionem, eamque vel imperfectam, & confusam, ut prius, vel claram, & distinctam ut posterius, quatenus vel minus, vel magis ad illa, ex quibus constat, attendisti. Causatus es postèa fallaciam, quæ ex loquendi usu facile incurrit; Unde & quemadmodum respondendo è fenestra homines transueniens, & dicendo te homines videre, falsum dicis, si ad oculos referantur, cum pileos, & vestes solum videas, sub quibus latere automata possent; atque idcirco intelligendum est te judicare homines esse; ita arguisti id, quod te putabas de cera oculis videre, sola judicandi facultate, quæ in mente est, à te comprehendi. Ad hæc attendisti utrum perfectius, evidentiùsque perceperis ceram, cum primum

I.
Nihil non
fuisse jure
objectionem
ex ipsa
verborum
commemo-
ratione.

aspexisti, credidisti que te illam sensu externo, aut imaginariice cognoscere; an postquam diligentius novisti tum quid ea esset, tum quomodo cognosceretur: & pronunciaisti hac de re dubitare esse ineptum, cum nihil fuerit in prima perceptione dissimulatum, quodque non à quovis animali haberi posse videretur. Denique ita conclusisti, Ad verò cum ceram ab externis formis distinguo, & tanquam vestibus detrahis, nudam considero, sic illam reverà, quamvis adhuc error in iudicio meo esse possit, non possum tamē sine humana mente percipere. Quicquid convitieris, hæc sunt, quæ dixisti, vel dicere voluisti de cera. Iam si quis lector sit satis patiens, ut Dubitationem meam relegat, quæso, ut ferat simul de illa, deque Responsione iudicium. Dicis te non abstraxisse conceptum ceræ ab accidentium ejus conceptu: Cedo tuam fidem! An-non hæc ipsa tua sunt verba, Ceram ab externis formis distinguo, & tanquam vestibus detrahis, nudam considero? Et quid est aliud, Conceptum unius rei à conceptu aliarum abstrahere, quàm illam sine istis considerare? quàm illam nudam considerare, istis detrahis, ceu vestibus? An alia ratione conceptus naturæ humanæ abstrahi censetur ab individuorum conceptibus, quàm illam ab individuantibus, ut vocant, differentiis distinguendo, & tanquam vestibus detrahis nudam considerando? Verùm instare circa id pigeat, quod si nesciret Dialecticus, vapularret in scholis. Dicis te potius indicare voluisse quo pacto ceræ substantia per accidentia manifestetur. Istud voluisti indicare; & illud enunciaisti clarè; an-non suffugium lepidum? Et cum volueris indicare, quamnam ratione indicasti, aut manifestam ceram fecisti, nisi spectando primùm accidentia, ut vesteis, ac deinde illis detrahis ceram nudam considerando? Dicis voluisse te etiam potius indicare, quomodo reflexa, & distincta ceræ perceptio differat à vulgari, & confusa: Sed cum hoc solùm volueris, illud re ipsa præstitieris; an-non fuit evasio te digna? Et indicaveris re ipsa; Ista-ne reflexa, & distincta perceptio, non tum fuit cum ceram considerasti nudam, & detrahis accidentibus, tanquam vestibus, quæ prius non perceperas nisi vulgariter, & confuse? Piget rursus in his hære; Nam illa quidem tua verba, qualem nullam, O caro, videris unquam habuisse, quandoquidem laudes tuæ sunt, idè coquenda, & recoquenda bili tuæ volens relinquo.

II.
Diffinimur
latius inter
rim diffi-
cultates
principales
de substan-
tia ceræ
manente
occulta, ac
substantia
Mentis si-
militer,
quantum-
cumque co-
gnitus, de-
trahiturque
nonnullis
accidenti-
bus spe-
ctantur.

In eo potius non-nihil hæreo, quod effuso hoc velut atramento difficultatem præterfugisti, satisque esse existimasti, si nihil ad illud responderetur. Quæstio fuerat, an res, seu substantia, quæ cogitat, diciturque Mens, clarè, distinctè, & citra ullius, etiam tenuissimæ corporis

corporis imaginem, atque adeò sine imaginatione perciperetur. Tu asserueras, ego negaram. Attuleras exemplum ceræ, ut colligi posset, quemadmodum præter saporem, odorem, & reliqua accidentia, quæ sensu ac præter mutabilitatem, & extensionem, quæ imaginatione percipiuntur, superest ceræ substantia, quæ non modò non percipitur sensu, sed ne Imaginatione quidem; percipitur verò solo intellectu, & clarè quidem, atque distinctè: Ita Mentis substantiam clarè & distinctè, non sensu, aut imaginatione, sed intellectu solo percipi. Exceperam ego, percipi quidem ceram, ejusve substantiam debere esse aliquid, præter formas illas, quas ad sensum, aut imaginationem referres; at quid-nam illud, aut qualis sit, non percipi, neque enim revelari, ponique extra hujusmodi omnes formas, ut homo potest revelari, ponique extra pileum, ac vesteis, de quibus ipse dixerat; Quare & demirari me, quò diceres te peracta illa detractiōe formarum, quasi vestium, perfectiùs, atque evidentiùs percipere quid cera esset: Scilicet qui non alia ratione perfectiùs, evidentiùsque perciperes; quàm perfectiùs, & evidentiùs perciperes quis homo esset, qui latuisset sub illis pileo, ac vestibus, & postea lateret sub aliis, posteaque sub aliis; quòd intelligeres debere quendam hominem variis hujusmodi pileis vestibusque subesse. Tu ista planè dissimulasti. Exceperam rursus, illud quicquid sit, quod detractis formis, quasi vestibus superest, percipi non ut punctum, sed ut extensum aliquid, & cum infinitè non extendatur, etiam, ut figuratum; & cum omne terminatum sub colore aliquo confusè concipiatur, etiam ut coloratum. Quare & tuam intellectiōnem imaginationem quandam esse; ac nisi illud ipsum, seu ceræ substantiam, sub quadam hujusmodi extensione, figura, & colore perciperes; debere te bona fide dicere, qualem-nam ergo conciperes. Tu id quoque dissimulasti. Exceperam etiam, quòd perciperes hominem sub pileo, ac vestibus latere, id non arguere potiùs Mentis, quàm imaginatiōnis opus; quandoquidem canis cui mentem negares, imaginatiōnem solam relinqueres, hominem quoque seu herum suum latere perciperet sub pileo, ac vestibus; imò & sub alia varietate formarum; Tu argumentationis vim callidè dissimulasti, ac dixisti solum, *te nescire quonam fictus argumento pro certo affirmaverim canem simili modo, atque nos dijudicare.* Etenim vidisti quidem argumentum; neque enim te experientia similis effectus, de cujus causa agebatur, latuit; sed quia non habuisti quod reponeres, divertisti

à tramite, ac subterlapius iterum es sub atramento horum verborum, *Nisi quia cum videas illum etiam carne constare; eadem omnia, quæ in te sunt, putas esse etiam in illo.* Cæterum cum & hæc subjungas, *Sed ego, qui nullam in eo mentem animadverto, nihil simile iis, quæ in Mente cognosco, in ipso reor inveniri,* An-non si reris in te inveniri mentem, ex eo quodd agnoscis esse hominem, cujus præter pileum, ac vesteis nihil vides; & canis similiter agnoscit esse hominem, cujus præter pileum, ac vesteis nihil videt; an-non, inquam, rearis oportet mentem quoque tuæ similem in ipso cane inveniri? Denique Exceperam inspectionem illam ceræ imperfectiorem, & perfectiorem, confusioem, & distinctiorem, esse solum penes accidentia, mutationesque ipsius, non verò penes ipsam substantiam; Quare & posse nos ex illis concipere, & explicare quid nomine ceræ intelligatur; non autem nudam illam, vel potius occultatam semper manentem substantiam; ut quæ sit semper nescio quid sub accidentibus latens, & mutationibus subjectum. Tu denique etiam id dissimulasti, ac perstitisti in tuo illo hujuscemodi ratiocinio,

Qui considerat aliquam substantiam, tanquam nudam, detractis accidentibus, seu externis formis, tanquam vestibus; ipse illam percipit clare, distincte, & solo quidem intellectu, non item imaginatione:

Atqui ego considero ceræ substantiam tanquam nudam, detractis accidentibus, seu formis externis, tanquam vestibus:

Igitur ego percipio ceræ substantiam clare, distincte, & solo quidem intellectu, non item imaginatione.

De quo quidem ratiocinio quid sentiendum sit, tum ex ipsa dubitatione, ad quam responsum nihil est, tum ex recensione, qua heic institi, videtur satis manifestum.

D V B I T A T I O VIII.

*De Natura Memis non declarata, tantum abest, ut probatum sit
Esse eam notioem, quàm Corpus.*

SUbdis consequenter: *Quid autem dicam de hac ipsa mente, seu de meipso, nihil dum enim aliud admitto in me esse præter mentem?* *Quid, inquam ego, qui hanc ceram videor tam distincte percipere?* *Nunquid meipsum non tantum multò verius, multò certius, sed etiam multò distinctius, evidentiusque cognosco?* *Nam si judico ceram existere*
cx co

ex eo ipso, quòd hanc videam, quàn tò magis me? Fieri enim potest, ut hoc quòd video verè non sit cera. Fieri potest, ut nequidem oculos habeam, quibus quicquam videam: sed fieri planè non potest, cùm videam, sive (quòd jam non distinguo) cùm cogitem me videre, ut ipse ego cogitans non aliquid sim. Simili ratione si judico ceram esse, ex eo quòd hanc tangam; idem rursus efficitur, me esse. Si ex eo, quòd imaginor, vel quavis alia ex causa, idem planè. Sed & hoc ipsum, quòd de cera animadverto, ad reliqua omnia, quæ sunt extra me posita, licet applicare. Tortua sunt verba, quæ idèò repono, ut animadvertas demonstrare illa quidem te distinctè cognoscere quòd existas, ex eo, quòd distinctè videas, cognoscasve existere ceram, illaque ejus accidentia; at non probare te propterea cognoscere, quæ aut qualis sis, nec distinctè, nec indistinctè; quòd operæ pretium tamen fuerat; nam quòd existas, non dubitatur. Vide interim, ut heic non insistam, ut neque prius insisti circa id, quòd cùm nihil in te admittas præter solam mentem; atque idcirco oculos, manus, ceteraque organa corporea excludas; nihilominus loqueris de cera, ejusque accidentibus, quæ videas, quæ tangas, &c. Quæ profecto neque videre sine oculis, neque tangere sine manibus (seu, ut tecum loquar, cogitare te videre, & tangere) potes. Pergis: Si magis distincta visa sit ceræ perceptio, postquam mihi non ex solo visu, vel tactu, sed pluribus ex causis innotuit; quàn tò distinctius me ipsum à me nunc cognosci futendum est: quandoquidem nullæ rationes vel ad ceram, vel ad cujuspiam corporis perceptionem possunt juvare, quin eadem omnes mentis meæ naturam probent. Verùm, ut quæ de cera deduxisti, probant tantùm perceptionem existentiae mentis, non verò naturæ illius, ita non probabunt amplius omnia alia. Quod si velis præterea deducere aliquid ex percepta ceræ, aliarumque rerum substantia, inferes solum, quemadmodum substantiam illam confusè solum, & ut nescio quid concipimus, ita mentem quoque concipi; adeò ut verè repetere liceat quòd est à te dictum, illud nescio quid tui. Concludis, atque ecce tandem sponse sum reversus eò quòd volebam. Nam cùm mihi nunc notum sit ipsum Mentem, & corpora non propriè à sensibus, vel ab imaginandi facultate, sed à solo intellectu percipi: nec ex eo percipi, quòd tangatur, aut videatur; apertè cognosco nihil facilius, aut evidentius meæ mente posse percipi. Ita tu quidem; at ego non video, unde nam deducas, aut apertè cognoscas aliud posse percipi de tua Mente, quàm quòd existat. Vnde & quòd fuerat ipso titulo Meditationis promissum, fore ut per ipsam mens humana efficeretur corpore

pore notior, non video quæ præstitum sit : neque enim tuum institutum fuit probare esse mentem humanam, ejusve existentiam esse existentia corporis notio-rem: cum saltem, an sit, existat-ve contravertatur à nemine: sed voluisti haud-dubie facere illius naturam notio-rem natura corporea, & hoc tamen non præstitisti. De natura certè corporea recensuisti ipsa, & Mens, quàm multa noscamus, extensionem, figuram, occupationem spatii, &c. De te verò ecquidnam tandem ? Non es compages corporea, non aër, non ventus, non res incedens, non sentiens, non alia. Hæc ut concedantur (quorum tamen quædam tu quoque refellisti) non ea sunt tamen, quæ expectamus. Scilicet negationes sunt, & non postulatur quid non sis, sed quid tandem sis. Itaque refert nobis ad summum te esse Rem cogitantem, id est dubitantem, affirmantem, &c. Sed dicere primum te esse Rem, est nihil notum dicere. Hæc enim vox est generalis, indiscreta, vaga, & te non magis attinens, quàm quicquid in toto est mundo, quàm quicquid non est prorsus nihil. Tu es res ? id est, nihil non es : seu quod est idem, aliquid es. Sed lapis etiam nihil non est, seu aliquid est, & musica similiter, & cætera omnia. Deinde, quod te Cogitantem dicis, rem quidem notam dicis, sed tamen non prius ignotam, neque requisitam à te. Quis dubitet enim quin sis cogitans ? Quod nos latet, quod quæritur, intima tua substantia est, cujus proprium est cogitare. Quocirca, ut inquirere, sic concludere oporteret non quod sis res cogitans, sed qualis sis res, quæ es cogitans. An-non, si quæ- ratur ex te vini notitia supra vulgarem, non satis erit tibi dicere, Vinum est res liquida, ex uvis expressa, alba, vel rubra, dulcis, inebrians, &c. sed conabere explorare, declarareque utcumque internam ejus substantiam, prout contexta observatur, ex spiritu, phlegmate, tartaro, cæterisque partibus, hac, aliave quantitate, temperationeque inter se commistis. Pari ergo modo cum tui notitia supra vulgarem, hoc est hæcenus habitam, quæ- ratur ; vides haud dubiè non satis esse si nobis renunci- es te esse rem cogitantem, dubitantem, intelligentem, &c. sed incumbere tibi, ut labore quodam quasi chymico te ipsam ita examines, ut internam tuam substantiam & detegere, & demonstrare nobis possis. Hoc certè si præstiteris, explorabimus ipsimet, sis-ne ipso corpore notior, quod anatomia, quod chymia, quod tot aliæ artes, tot sensus, tot experimenta, cujusmodi sit, multum manifestant.

R E S P O N S I O.

Miror: hic fateri omnia illa quæ in cera considero, demonstrare quidem me distinctè cognoscere quòd existam, non autem quis aut qualis sim, cum unum sine alio non demonstretur. Nec video quid amplius ea de re expectes, nisi ut dicatur cujus coloris, odoris & saporis sit mens humana, vel ex quo sale, sulphure, & mercurio sit constata: vis enim ut ipsam instar vini, labore quodam Chymico examinemus. Quod te profectò dignum est, ô caro, & iis omnibus qui cum nihil nisi admodum confuse concipiant, quid de quaque re querendum sit ignorant: sed quantum ad me, nihil unquam aliud requiri putavi ad manifestandam substantiam, præter varia ejus attributa; adeò ut quò plura alicujus substantiæ attributa cognoscamus, eò perfectius ejus naturam intelligamus. Atque ut multa diversa attributa in cera distinguere possumus, unum quod sit alba, aliud quod sit dura, aliud quod ex dura fiat liquida, &c.

I N S T A N T I A.

Quid miraris fateri me? mirare potius dixisse te, cujus verba relata sunt, & ad quæ sola est attendendum: Nam quod cognitio existentia, sine cognitione essentia non demonstratur, iis persuadebis, quos pari tecum credulitate repereris. Existencia quippe cujuslibet rei vel sola exhibitione, ac præsentia, vel operatione, aut effectu necessario manifestatur: At essentia, perfecta quadam introspectione indiget, neque nisi omnium recessuum patefactione innotescit. Quam multa certè omnibus momentis coram oculis, & ad manum sunt, de quibus cum constet quòd sint, nescimus tamen, & interrogare solemus quid sint? Et quamvis dicas cogitationem esse actionem, ex qua probetur non modò quòd Mens sit, sed etiam quid sit, cum definiatur res cogitans; id tamen dicis quod non probas, & non definitionem tradis, quæ essentiam explicet; sed actionem proponis, quæ à Mente, cujus essentia investigatur, elicatur. Dicis non videre te quid amplius expectem, nisi ut dicatur, cujus coloris, odoris, & saporis sit Mens humana, vel ex quo Sale, Sulphure, & Mercurio sit constata; velle enim me, ut ipsam instar vini, labore quodam Chymico examinemus. Quàm exquisita subtilitas, nisi jam perspectus esset tuus genius! Scilicet nihil aliud conaris, quàm offusâ nebula Lectoribus illudere, ut si fieri possit id, quod caput est,

M

non

I.
Difficul-
tates præ-
cipuas dis-
simulas

non animadvertant. Verùm, neque erunt, opinor, qui existiment voluisse me Mentem in Alembicum injici; neque qui te putent stetit promissis, nisi Chymicis paria, seu analoga feceris. Pergis id dignum me carne esse, & iis omnibus, qui, cum nihil, nisi admodum confusè concipiunt, quid de quaque re quærendum sit, ignorant: sed quantum ad Te, &c. Bene porro est, quòd meam causam non planè esse desertam putas, sociotque mihi adhibes. Ipse lubens illos admitto, ac esse ejusmodi censeo, qui veritatem studiosè quærant, ostentationem exosam habeant, & sincere sive quid nòrint, sive non nòrint, profiteantur. Qui parùm curent dici abs te nihil non confusè concipere, consili sibi nihil esse perspicuitate carius; cum & non ignorent, quid sit de unaquaque re quærendum, & humani ingenii vireis satis attentè expenderint; ac moneant ipsi interim alios opinione sui inflatos, ut detumescant, in se descendant, secum habitent, nòrint sibi quoque suppellectilem esse curtam, cessent anhelare prælargo pulmone; & ne hiatu magno grande aliquid, quod sit granditate grandius polliceantur. Verùm, ne de illis jam dicam, Equam spem ipse non feceras, titulo illo Meditationis, *De Natura mentis humanæ, quòd ipsa sit notior, quàm corpus?* Non repeto quæ jam objeci, cum ad ea respondere nihil potueris, ac evasionem solum quæsieris ex comparatione eorum, quæ ad naturam corporis faciunt, quasi penitus eadem, & non potius analogà ad notitiam mentis non modo æquè claram, sed etiam clariorem consequendam faciant. Cum præsertim dissimulâris id, quod institi circa vocem *Res*, circa vocem *Cogitans*, circa occasionem ac vim similitudinis, de notitia substantiæ vini. Immoror solùm in eo, quod subdis, *Quantum ad te est, te nihil unquam aliud requiri putasse, ad manifestandum substantiam, præter varia ejus attributa.*

II.

Quicquid
de rebus
cognoscimus,
non
esse intimam illarum naturam, quam voluit Deus latere nos ut ejus notitia non periret de nobis, ac accidentium necessaria.

Quo loco, si putasti nihil aliud esse requirendum, quatenus vires humani ingenii, nihil possunt præstare majus; præclare omnino, quantum ego quidem arbitror, putasti; præclareque etiam illud subjunxisti, adeo ut, quòd plura alicujus substantiæ attributa cognoscimus, eò perfectius ejus naturam intelligamus; nempe, si putasti, quatenus naturam illius substantiæ intelligere vel possumus, vel dicimur. Verùm, si putasti substantiam, ejusve naturam esse propterea manifestatam, intellectamque, qualis reverà in se est, adeò ut non lateant, quæ illius intima sunt; longè, quantum quidem opinor, aberras à scopo, ad quem humani ingenii imbecillitas potest, ac debet collineare. Quippe ut aliud est attributum, seu proprietas, & aliud sub-

sub-

substantia, siue natura, cuius est, vel ex qua emanat; ita cognoscere attributum, siue proprietatem, proprietatumque aggeriem, non est propterea cognoscere ipsam substantiam, siue naturam. Quicquid possumus cognoscere, est, hanc, vel illas esse huiusce substantiæ, siue naturæ proprietates, quando id observando patet, & experientiâ perspicuum sit; Neque penetratur propterea in ipsam substantiam, siue naturam intimam; ut dum spectantes aquam scaturientem, cognoscimus quidem hanc aquam esse ex hoc fonte; at non propterea obtutus aciem in interiorem, ac subterraneam scaturiginem figimus. Ita videtur instituisse Deus Opt. Max. cum & naturam condidit, & nobis usuram illius concessit. Etenim quicquid fuit nobis de re unaquaque nosse necessarium, illud nobis apertum fecit,tribuendo rebus proprietates, per quas innotescerent, & nobis sensus varios, quibus illas apprehenderemus, ac facultatem interiorem, qua de eisdem iudicaretur. Quod ad internam verò naturam, & quasi scaturiginem, illam, ut nobis cognitu non necessariam, occultam voluit; & nos, cum nosse affectamus, aut præsumimus, intemperantiâ laboramus. Non sanè, quodd nosse, & pulcrum, & desiderabile non videatur; sed eo nempe modo quo pulcrum, ac desiderabile est (sic certè soleo dicere) ut alas habeamus, aut ut in perpetua iuventute simus. Siquidem ut ista, ita illud quoque aut exoptare, aut sperare, intemperantis, & naturæ suæ conditionem ignorantis animi est. Et quod-nam sanè foret discrimen inter Deum, & hominem, si foret homo conscius omnium, quæ in ipsis Dei operibus sunt? Si gloriari posset se totam alicujus rei naturam ita habere perspectam, ut Deus de ea nihil cognosceret amplius? Videtur proinde ter-Maximus Deus ita se gessisse, ut solent vulgò opifices automatum admirandorum. Quippe ut isti automata ita in vulgus exhibent, ut spectaculum motuum admirabilium non inuideant; & injurium sit, si cum illi facere manifesta nolint interiora machinamenta, spectatores obmurmurent; Ita & Deus opifex Mundi, rerumque in eo omnium à maxima usque ad minimam admirabilium, ea fuit erga nos bonitate, ut illarum contemplationem nobis non inviderit; & injuria illi fiat, si quis præter ea, quæ voluit de illis innotescere, conqueratur, quodd intima quoque naturæ cujusque arcana non detexerit, aut sese de iis, quantum ipse, posse cognoscere præsumat. Sed ad rem ut redeam, cum id, quod hac tua Meditatione evicisti, nihil aliud sit, quàm Mentem esse rem cogitantem, Ecquid-nam amplius evicisti, quàm si quis la-

borioso quodam de Magnete opere, evincat, Magnetem esse rem attrahentē terrum, dirigentemq; illud ad polos, quod exemplum jam usurpatum est? Ac si nescivissemus quidē proprium esse Mentis cogitare, essemus tibi multū obstricti, qui rem incompertā doceres? At, per tuam fidem, novum-ne est, atque inauditum, quōd Mens cogitet, quōd sit res cogitans, quōd ejus proprium sit cogitare? hoc-ne ex ipso titulo Meditationis sperandū fuit? Certē nō magis, quā si aliquis titulo præmissio de Magnetis natura, & quōd illa sit, quā Lux Solis notior, nihil doceret nos ampliū, quā quod omnes jam pridem scimus, Magnetem ferrum trahere, vel esse rem trahentem ferrum, vel trahere ferrum esse ejus proprium, atque ita de cæteris.

III.

Effugium esse lepidum, tot proprietates Mentis agnoscere, quot res singulares possint ab ea cognosci; ut inde arguatur plenior illius, quā ullius alterius rei haberi motitiam.

Quid lepidius porrō à te excogitari potuit, quā quod invexisti ad multiplicandum, augendumque notitiam, quæ de natura mentis habetur? Atque ut, inquis, multa diversa attributa in cera distinguere possumus, unum, quōd sit alba, aliud, quōd sit dura, aliud, quōd ex dura fiat liquida, &c. ita etiam in Mente totidem sunt, unum, quōd habeat vim cognoscendi albedinem cere, aliud, quōd habeat vim cognoscendi ejus duritiam; aliud, quōd mutationem duritiei, sive liquefactionem: & statim, Unde clarè colligitur nullius rei tot attributa cognosci, quā nostra mentis; quia quocumque cognoscuntur in qualibet alia re, tot etiam numerari possunt in Mente, ex eo quōd illa cognoscat, atque adeo ejus natura omnium est notissima. Imprimis enim perinde facis, ac si quis naturam calami, quo ista perscribo explorans, tot facultates in eo agnoscat, quot exarare potest literas majusculas, minusculas, Latinas, Græcas, Arabicas, cæteras; quot item lineas rectas, curvas, longas, brevis; quot triangulos, quadrangulos, & figuras alias magnas, parvas, rectilineas, circulares, ellipticas, parabolicas, alias, & cætera, quæ sunt innumerabilia; existimetque quantō quis plureis ex his facultatibus noverit, tantō perfectiūs calami naturam innotescere, & nullius generis tot cognosci figuras, quot facultates sunt calami, sicque naturam calami præ omnibus figuris characteribusque notissimam esse. Nisi verò requisitā calami naturā, non explorandum potiūs sit, an penna sit? an canna? an ex aurichalco, ex argento, aut alia materia? & cujuscumque horum generum sit, ex quibus principiis constet? quæ sit illorum conditio, commissio, temperatio, proportio, & similia? Nam quōd sit comparatus ad scribendum, exarandumve figuras, hoc universè notissimum est, & uno verbo explicatur. Et, si lubeat potiūs de manu, quā de calamo quærere, non facultates in ea variæ, aut potiūs innumera-

mezz.

meræ juxta varietatem, aut innumerabilitatem characterum, figurarum, aliorumque operum, quorum manus artifex est, inquirendæ videbuntur, sed textura potius ipsius manus ex carpo, vola, digitis, articulis, ossibus, musculis, tendinibus, nervis, spiritibus, partibusque aliis; itemque compositio, mixtura, conspiratio, connexio, dependentia, situs, flexilitas, mobilitas, & id genus cætera. Pari autem modo ecquid nos promovet, aut juvat tot enumerare in mente facultates cognoscendi, quot res cognoscibiles sunt, ad pernoscendum ejus naturam? Vno enim verbo dicitur Mens habere facultatem cognoscentem, quæ deinde pro objecti divisionibus, subdivisionibusque quantum voles extendatur, & ex cujus extensione, non tam plures mentis facultates, quam plura illius objecta noscantur. Et quamvis plures quoque facultates, seu, ut tu vocas, attributa noscantur; superest tamen semper id, quod est in Mente præcipuum, substantia nempe, sive natura, cujus sunt hujuscemodi facultates, & attributa. Deinde Est, quod ipse vis, *Naturam alicujus substantiæ manifestari per attributa, atque adeo naturam Mentis manifestari per ista, quod habeat vim cognoscendi albedinem, &c.* Dico oportere igitur ad manifestandum totam naturam alicujus substantiæ, cognoscere omnia ejus attributa; & consequenter ad manifestationem totius naturæ mentis, oportere cognoscere omnia attributa mentis, hoc est omneis vireis cognoscendi omnia singularia objecta, quæcumque Mens cognoscere potest: atque adeo ipsa objecta, ex quorum cognitione vis ea cognoscendi manifesta fit: Quare & te, si manifestatam, seu cognitam reipsâ habes totam naturam mentis, uti te jactasti superius habere, oportere reipsâ cognoscere singularia omnia objecta quæcumque Mens cognoscere potest. Quænam verò sunt ista? Certè non modò cera, aut albedo, durities, & cætera accidentia singularis illius ceræ, quam habuisti præ manibus; sed omnes omninò res singulares cum omnibus suis singularibus accidentibus, quæ sunt in omnibus generibus, ac speciebus omnium omninò animalium gradientium, volantium, natantium, repentium, zoophytorum, arborum, fruticum, suffruticum, herbarum, gemmarum, saxorum, metallorum, succorum, meteororum, ac cæterorum, quæ sunt supra terram, intra terram, in mari, in aëre, quæque sunt, fuerunt, erunt, aut esse Deo auctore possunt tam in hoc globo, quàm in Sole, Luna, Planetis omnibus, fixis si scribis; tam in hoc Mundo, quàm in aliis innumeris, quos similibus, dissimilibus, æqualeis, inæqualeis Deus condere in æternū potest?

An verò tanta est tua cognitio? Certè cùm sit proportio ineffabiliter minor eorum, quæ cognoscis, ad ea quæ ignoras, quàm sit guttulæ aqueæ ad totum Oceanum; erit minor quoque ineffabiliter proportio eorum attributorum Mentis, ex quibus cognitis ejus natura tibi manifestatur, ad attributa illa mentis, ex quibus tibi incognitis natura Mentis immanifesta tibi est, quàm sit guttulæ aqueæ ad Oceanum comparatæ. An igitur ille ridiculus, qui ob conclusam in phiala aquæ guttulam, jactaret se in ipsa totum conclusisse Oceanum; Et tu, quòd tua mente comprehenderis guttulam attributorum, naturæque mentis, jactabis te comprehendisse totam naturam ipsius Mentis? Vide, quo te lepida illa subtilitas adegerit.

IV.
Tota secunda Meditatio in Syllogismum cogitur, ut ratiocinationis imbecillitas magis pateat; ac varia notantur circa id, quod Mens dicitur esse notior, quàm corpus.

Notas postremò, quod obiter attigi, de eo, quòd, cùm Mens esses, dicebas te videre, seu (ut tecum loquar) cogitare te videre, ut concludas exinde argui, quàm absurda sæpe, atque injusta cavillationes ab iis, qui non tam aliquid intelligere, quàm reprehendere satagunt, excogitentur. Sed an cavillatio, an absurda, an injusta fuerit, an non intellexerim quod volebas; an ista potius quadrent in te, dum aded jejunam, aut etiam, teipso insinuante, nullam effundendi convitia occasionem captas, ii, qui volent tua, ac mea verba expendere, dijudicabunt. Mihi ad calcem meditationis colligere sufficit, & cogere in Syllogismum tuam totam de natura Mentis, ejusque notitia ratiocinationem.

Qui non est compages membrorum, nec tenue corpus ipsis infusum; cognoscit verò se præcisè esse rem cogitantem, hoc est dubitantem, intelligentem, affirmantem, negantem, volentem, nolentem, imaginantem, sentientem; cognoscit autem non imaginatione, sed intellectu, eo modo, quo substantiam ceræ propriis attributis nudam: ac præterea perspectam habet omnia attributa, quibus natura mentis manifestatur; omnes scilicet singulareis vireis, cognoscendi omnia singularia attributa tam ceræ, quàm omnium omnino rerum singularium, quibus cognitis tales vires cognoscuntur; Ille & perspectam habet totam naturam mentis, & mentem habet notiozem, quàm corpus.

Atqui ego non sum compages membrorum, nec tenue corpus ipsis infusum; cognosco verò me, &c.

Igitur ego & perspectam habeo totam naturam mentis, & mentem habeo notiozem, quàm corpus.

Cùm

Cum verò ad imbecillitatem ratiocinationis nihil sit addendum ad ea, quæ deducta hæcenus sunt; Dico solùm, si veram esse, verèque probatam conclusionem putas; si existimas confecisse te, quod promissisti titulo, ac saltem illud, *Quod Mens sit notior, quam corpus*; debere tibi igitur non esse incognitum corpus. (Et quomodo certè illud comparares cum mente, & diceres notitiam unius esse clariorem notitia alterius, nisi in te esset utriusque notitia? Quomodo ex attributis corporis intelligeres attributa mentis, nisi præ-intelligeres ipsa attributa corporis? Quomodo reversus eò, quod volebas, illud diceres, *Cum mihi nunc notum sit Mentem, & corpora non proprie à sensibus, vel ab imaginandi facultate, sed à solo intellectu percipi, &c.*) Dico id, inquam, Primò; ut intelligas illud non abs re tibi objici, *Propter quod unumquodque est tale, & illud magis tale est; Atqui propter attributa corporis nota sunt attributa mentis; Igitur attributa corporis sunt notiora attributis mentis.* Et subsumendo, *Ex duobus, illud est notius alio, cujus attributa notiora sunt* (si quidem substantia ex te per attributa manifestatur) *Atqui ex comparatis corpore, ac mente; attributa corporis sunt notiora attributis mentis; Igitur corpus est notius mente.* Secundò; ut agnoscas te non probasse existere corpus, neque deduxisse illius aut existentiam, aut essentiam, aut attributa, ex tuo principio Archimedeo. Tertio; ut non possis deinceps causari corpus tibi nondum esse cognitum, probandumque superesse quòd sit, aut quid sit; nisi velis & tibi ipsi contradicere, & principium petere, & perdere fructum totius hujus meditationis, in quam scribis alicubi *te non minus industriæ, quam in quicquam aliud, quod unquam scripseris videri tibi consilisse.*

IN MEDITATIONE M III,

Quæ est

De Deo, Quòd existat.

D V B I T A T I O I .

Circa tertiam, ex eo quod agnoveris claram, distinctamque notitiam illius propositionis, *Ego sum res cogitans*, causam esse certitudinis, quam de illa habes, inferens te posse statuere

tuere generalem hanc regulam, *Illud omne verum est, quod valdè clarè & distinctè percipio*. Cæterùm licèt hætenus regula nulla melior in tanta rerum caligine inveniri potuerit; cùm videamus tamen ingenia tam magna, quæ videntur debuissè tam clarè, tamque distinctè plurima percipere, censuissè rerum veritatem vel in DEO, vel in puteo esse absconsam; an-non suspicari par est regulam fortè esse fallacem. Et certè, cùm tibi ignota Scepticorum argumenta non sint; quid est, quod possimus verum inferre, tanquam clarè & distinctè perceptum, nisi apparere id, quod cuique apparet? Ego saporem peponis gratum clarè, distinctèque percipio: itaque verum est peponis saporem apparere mihi huiuscemodi. At quod propterea verum sit talem in ipso pepone esse, quomodo mihi persuadeam, qui puer cùm essem, ac bene valerem, secus judicavi? nimirum clarè, distinctèque alium in pepone saporem percipiens. Video & multis hominibus secus videri: video & multis animalibus, quæ gustu pollent, optimèque valent. An ergo verum vero repugnat? an potiùs, non ex eo, quòd aliquid clarè, distinctèque percipitur, id secundùm se verum est, sed verum solummodò est, quòd clarè, distinctèque tale percipiat? Idem penè est dicendum de iis, quæ ad mentem spectant. Iurasset aliàs non posse à minore quantitate ad maiorem transiri, nisi transeundo per æqualem: non posse item duas lineas, ad sese continuò magis accedentis, si producerentur infinitè non tandè concurrere: nempe videbar mihi ista adedò clarè, distinctèque percipere, ut pro axiomatibus verissimis, indubitatissimisq; haberem: & postea tamèn fuere argumenta, quæ oppositum suaserint, veluti perceptum clariùs, distinctiusq;. Nunc verò rursus ambigo, cùm ad Mathematicarum suppositionum naturam attendo. Quare & dici quidem potest verum esse me taleis, taleisque propositiones agnoscere, prout quantitatem, lineas; & similia hoc se habere modo suppono, aut concipio: at quod illæ propterea veræ secundùm se sint, pronunciari tutò non potest. Et quicquid sit de rebus Mathematicis, quæso te, quod ad cæteras, de quibus jam quæritur, spectat; cur-nam tot, tamque variæ sunt inter homines opiniones? Putat unusquisque se clarè, distinctèque eam percipere, quam defendit. Et ne dicas plerosque aut hære, aut fingere; sunt ecce, qui pro iis, quas habent, opinionibus, etiam mortem oppetant, tametsi videant alios pro oppositis oppetentis: nisi verò putas tum demum à pectore imò veras voces non ejici. Et attingis quidem ipse difficultatem, quod prius

mul-

multa ut omnino certa , ac manifesta admiseris , quæ postea deprehenderis dubia. Verum hoc loco neque solvis , neque firmas regulam ; sed occasionem solum capras differendi de Ideis , quibus deludi potueris , ut repræsentantibus quidpiam extra te , quod extra te tamen fortassis non fuerit , iterumque tractas de Deo deceptore , à quo falli potueris circa illas propositiones , duo & tria sunt quinque , quadratum non habet plura latera quàm quatuor : Quò nempe innuas expectandam confirmationem regulæ , donec Deum esse ostenderis , qui non possit esse deceptor. Quanquam , ut hoc præmoneam , non tam est tibi laborandum , ut confirmes hanc regulam , ex qua proclive adeò est falsum pro vero admittere , quàm ut proponas methodum , dirigentem nos , ac docentem quando fallamur aut non fallamur , quoties existimamus nos clarè , distinctèque aliquid percipere.

R E S P O N S I O .

E*Vge hic tandem aliquam contra me affers rationem , quod nulli prius te fecisse animadversi ; ut enim probes non esse regulam certam , quòd ea quæ valde clarè , & distinctè percipimus sint vera , dicis ingenia permagna quæ videntur debuisse plurima clarè , & distinctè percipere , censuisse nihilominus rerum veritatem , vel in Deo , vel in puto esse absconditam. In quo fateor te rectè ab auctoritate argumentari , sed meminisse debuisses , ô caro , te hic affari mentem à rebus corporeis sic abductam , ut ne quidem sciat ullos unquam homines ante se existisse , nec proinde ipsorum auctoritate moveantur. Quod deinde affers de Scepticis , locus est communis non malus , sed nihil probans , ne neque quod quidam pro falsis opinionibus mortem oppetant , quia probari nunquam potest illos clarè , & distinctè percipere id quod pertinaciter affirmant. Quod denique addis non tam de veritate regulæ esse laborandum , quàm de methodo ad dignoscendum an fallamur , necne , cum existimamus nos aliquid clarè percipere , non inficior ; sed hoc ipsum accuratè à me præstitum fuisse contendo suis in locis , ubi primum abstuli omnia præjudicia , & postea enumeravi omnes præcipuas ideas , ac distinctè claras ab obscuris , aut confusis.*

I N S T A N T I A.

I.
De connectione Meditationum, & quæ prægnantia consequantur ex Regula hæc supposita, & non habita quæ supponitur futura de Deo notitia.

Quam præclarus es Monitor! quàm in mala causa securus! Ego quidem, an nullam hæctenus rationem attulerim, an tu id rectè animadverteris, iis, qui volent cognoscere, plenam iudicandi libertatem facio. Quod ad te spectat, existimasti exiguo hoc ce pulvere, quem felium instar retrojecisti, quicquid egeris, occultatum iri. Credidisti quoque tua dignum solertia, si, ut faceres rem ridiculam, præmitteres esse aliquam rationem, quam tamen esse non rationem, sed auctoritatem statim caussareris, & me oblivionis convinceres, qui qualis esses non meminisses. Scilicet qui existimàrim mihi esse rem cum viro sapiente, meminisse debui mihi esse rem cum viro, qui adhuc somniaret, qui putaret se à Deo decipi, aut saltem à maligno genio fascinari. Verùm quicquid sit de tua urbanitate, & priusquam de allata à me seu ratione, seu auctoritate dicatur, Age videamus quid hanc tertiam Meditationem cum secunda connectas. Postquam dixisti velle te claudere oculos, obturare aureis, &c. ut te penitus inspicias, ac repetisti te esse rem cogitantem, id est dubitantem, affirmantem, &c. subjungis, Nunc circumspiciam diligentius, an foris adhuc apud me alia sint ad quæ nondum respexi. Pergis autem, Sum certus me esse rem cogitantem. Itaque primum quod animadvertis, certitudo est illius tuæ propositionis, Ego cogito: quam nullo modo revocas in dubium, sed quæris consequenter, Nunquid ergo etiam scio, quid requiratur, ut de aliqua re sim certus? Respondes autem, Nempe in hac prima cognitione nihil aliud est, quàm clara quædam, & distincta perceptio ejus, quod affirmo; quæ sane non sufficeret ad me certum de rei veritate reddendum, si posset unquam contingere, ut aliquid, quod ita clarè, & distinctè perciperem, falsum esset; ac proinde jam videor pro regula generali posse statuere, Illud omne esse verum, quod valdè clarè, & distinctè percipio. Attexis tamen dubitationem circa Regulam, quod prius ut omnino certa, & manifesta admiseras, quæ tamen postea esse dubia deprehenderis, nempe terram, cælum, sidera, & cætera omnia sensibus usurpata, ac etiam Arithmetica, & Geometrica illa, Duo, & tria esse quinque, & similia, in quibus Deus possit facere ut fallaris; Quare & inquis, Quam-primum occurret occasio, examinare deo, an sit Deus, & si sit, an possit esse deceptor; hac enim re ignorata, non videor de ulla alia planè certus esse unquam posse. Vnde & tum demùm Regulam confirmas in quarta, & quinta Meditationibus.

onibus, cum constituisſi eſſe Deum, qui non poſſit eſſe deceptor. Iam illud imprimis prætereo, quòd à conſideratione tui ad proprietatem ipſius conſiderationis, certitudinem ſcilicet, divertendo videatur eſſe admodum accidentaria deductio; (uti eſt etiam ruſus ab inexpectato illa, quam captas diſſerendi de Deo) cum legitima tamen Methodus videatur exigere, ut conditiones cognitionis tradantur ſeorſim ab ipſis rebus cognitis; & non poſtquam ceptum fuerit de his dicere, digrediendi ad illas occasio capetur. Deinde illud, quòd videatur ab hoc uſque loco inchoari circulus, quatenus es certus futurus Deum eſſe, & non eſſe deceptorem, quoniam habeas claram, & diſtinctam ejus rei notitiam; & certus ſis futurus claram, & diſtinctam notitiam eſſe veram, quia noveris eſſe Deum, qui non poſſit eſſe deceptor. Tertio illud, quòd heic videaris præpoſtere, & præter leges Inductionis propoſitionem univerſalem ex perſpecto unico ſingulari colligere; dum ex eo ſolo quòd obſervavi certitudinem hujus propoſitionis, *Ego cogito*, ex clara & diſtincta perceptione proficiſci, deducis conſuſionem hanc, *Igitur Illud omne verum eſt, quod clarè, & diſtinctè percipio*: adeò proinde ut mirum non ſit, ſi adeò proclivis ad paralogiſmos ſit lapſus. Quarto, illud, quòd cum dicis *iis, quæ de Deo ſunt quærenda, ignoravi, non poſſe de ulla re planè haberi certitudinem*, aut comprehendas etiam certitudinem illius propoſitionis *Ego cogito*, aut non comprehendas: Et ſi comprehendas quidem, nihil hæcenus egeris, temerèque pronunciaveris, & ratiocinatus fueris te cogitare, te eſſe, & cætera omnia; imò & deinceps nihil acturus ſis, cum omnia, quæ es de cæteris rebus diſputaturus, aſſerturufq; ſupponant certitudinem, firmitatemque illius tui pluſquàm Archimedei pun-cti. Si non comprehendas, tum præcipua tua certitudo non à Deo, notitiave de illo habita dependeat; imò certitudo notitiæ de Deo, firmitatem ſuam ex illa fortiatur, poſſitque adeò omnis certitudo de quacumque alia re non ad certitudinem de exiſtentia, & veracitate Dei, ſed ad certitudinem illius tuæ propoſitionis, *Ego cogito*, revocari. Hæc inquam prætereo, & adnoto ſolum, cum ais, *Sum certus me eſſe rem cogitantem*, ita ratiocinari te, ut arguaris *non eſſe certus eſſe te rem cogitantem*. Nimirum hæc tua eſt argumentatio,

Non eſſem certus me eſſe rem cogitantem, niſi certus eſſem non poſſe unquam contingere, ut aliquid, quod ita clarè, & diſtinctè perciperem, falſum eſſet:

Atqui certus non sum, an-non aliquid tale possit contingere, (quoniam multa prius ut omnino certa, & manifesta admisi, quæ postea dubia deprehendi; & quousque cognovero esse Deum, qui non possit esse deceptor, non possum planè unquam esse certus de ulla re:)

Igitur certus non sum me esse rem cogitantem.

II.
Declina-
ram fuisse
dissimula-
tamque
difficulta-
tem pre-
cipuam,
qua suis
adversus
Regulam,
applicatio-
nemve il-
lius ob-
jecta.

Porro, quia tu pro generali Regula heic statueras *Illud omne esse verum, quod valde clarè, & distinctè perciperes*, urgere nihil volueram de voce illa valde, utpotè interpolitam quasi manifestum effugium. Regulam potiùs admiseram, tanquam non posset in ista rerum caligine melior haberi; ac dubitando solùm proposueram, an-non cum magna ingenia quæ viderentur debuisse multa clarè, distinctèque percipere, censuissent tamen veritatem remanere absconsam; suspicari par esset eam regulam esse fallacem; Tu verò, qui veluti habens sub pedibus nimbos, & caput intra sidera condens, nullam agnoscis caliginem, non potuisti ferre patienter Regulam non fuisse à me absolutissimè admissam; & tentanti vel levem quandam suspicionem ingerere, ita insultasti, *Meminisse debuisses, O Caro, te huc affari Mentem à rebus corporeis sic abductam, ut nequidem scias ullos unquam homines ante se existisse, nec proinde ipsorum autoritate moveatur.* Quo sanè loco planum facis non fuisse me affatum mentem abductam à rebus corporeis, quam vel levicula vox corporea, carnea scilicet, ita tetigit; ac non Mentem, sed reverà hominem esse demonstravit. Nisi etiam non est humanitatis indicium, ita affectare *αὐτοδιδάκην*, ut nihil te magnorum virorum autoritas moveat; & prætextum quæras abductionem illam, ut prætextum supra quaesivisti, quod loquereris non ex tua, sed ex vulgari aliorum sententia; eo scribendi stylo propterea delecto, qui visus est tibi comparatissimus ad hæc argutias. Ac dicerem quidem meminisse me satis, te eo, quo volebas modo abductum, & quia in te non remanserant nisi judicia, saltem rerum imagines, de quibus judicia ferrentur, voluisse me tibi proponere, non sapientum autoritatem, sed Experimentiam in ipsis factam, tanquam verisimilitudinis argumentum, de quo posses iudicium ferre. Præoccuparem quoque responsiones, seu tergiversationes varias; sed tempus in nugis conterere piget. Venio ad id, quod ais *afferre me de Scepticis locum communem non malum*; quodque contentus addere, *sed nihil probantem*, nihil de illo respondeas. Hoc verò jam novum non est, ut cum respondere nihil possis, simili verbulo te subducas. Sed Lectorem heic interpello, pu-

tece-

ret-ne sibi factum satis circa ea quæ ego proposui de me, & quibus similia in se, ac in cæteris experietur? Scilicet oportet, ut planè contraria, imò contradictoria sint vera, si illud omne verum sit, quod se quisque percipere judicat clarè, & distinctè. Quare & oportuit omnino te solvere nodum circa perceptionem utrimque claram, & distinctam de sapore peponis, & de ductu duarum linearum ad se continenter accedentium, Atque ita circa sexcenta, quæ possunt proponi id genus similia; non verò tacitè declinare, hoc solum dicendo, *Locus nihil probat*. Neminem certè vidi, qui dubitatione pellecta, non avidissimè expectaverit, ecquid ad illam responderetur; quòd nisi difficultate resoluta, ac exposita, Regula non posset non haberi fallax. Nam dicere quidem aliquem, & aliquandò percipere solum clarè, & distinctè, non item valdè clarè, & distinctè; id sanè valere apud eos non potest, qui non modò valdè, sed etiam valdissimè clarè & distinctè opposita percipiunt. Subdis *neque illud probare, quod quidam mortem oppetunt pro falsis opinionibus* (dixeram ego pro oppositis) *quia probari nunquam potest illos clarè, & distinctè percipere id, quòd pertinaciter affirmant*. Sed hoc quoque effugium quàm præclarum est, dum subindicas in ipsorum non modò caput, ac cerebrum, sed etiam in mentem penetrandum esse, ut qua conditione percipiant probetur; rem sanè tibi uni, qui te pro mente geris, concessam! Nobis, qui & homines sumus, & ut homines decet, ex effectis ratiocinamur, perspicuum videtur argumentum, (tibi profectò non declinandum) percipere illos clarè & distinctè opinionem aliquam tanquam optimam, atque præferendam, Quòd pro ea mortem oppetant. Nempe ipsi non possunt nobis exhibere majus suæ perceptionis argumentum, quàm profundendo, & amittendo vitam, rem adeò caram, & cujus recuperandæ nulla est spes, ut neque consequendi aliquid ex tanta jactura emolumentum, quo deinceps fruantur, ut propterea liceat illis fingere, quemadmodum casibus aliis, vita constante, contingere posset; cùm etiam aliunde tantum absit, ut fugendum putent, quin agnoscant, si finxerint, fore se æternis, ac planè infandis suppliciis addictos: Vno verbo, hoc ipsum, quòd tantà pertinaciâ affirmant, ut etiam pro eo, quod percipiunt, moriantur, demonstrat abundè quomodo percipiant. Non quòd aliqui non fallantur; sed quòd putent se tam clarè distinctèque percipere id, quòd verum putant, licèt falsum sit; quàm putant ii qui non falluntur, se percipere id, quòd verum putant, & quòd verum est. Oportuerat proinde in

hoc ipsum incumbere, ut dubitationem explanando, complanares tuam regulam; non verò, ut superiorem difficultatem præteritione simplici defugas; ita hanc de oppetentibus mortem pro oppositis opinionibus, obliquo ductu præterlabi.

III.

*Desiderari
ad hunc Re-
gulam, si-
ve Metho-
dum, qua
putantes
nos aliquid
clare, di-
stinctèque
percipere,
certi sumus
omnia ita
esse circum-
specta, ut
nihil possit
suboriri,
unde erras-
se depre-
henda-
mur.*

Circa id, quod præmonueram de tradenda Methodo, quæ dirigit, doceatque nos quando fallamur, aut non fallamur, quoties existimamus nos clarè, distinctèque aliquid percipere; hoc enim esse operæ-premium, Respondisti hoc ipsum accuratè à te præstitum fuisse suis in locis, ubi primum abstulisti omnia præjudicia & postea enumerasti omnes præcipuas Ideas, ac distinxisti claras ab obscuris, aut confusas. Vbi primum miror non indicasse te locum de Deo, aut habita de ejus existentia, & veracitate, notitia. Verùm pervidisti, opinor, fore ut regereremus, nos, qui, favente divina gratia, Dei existentiam, & veracitatem persuasi sumus, ac profitemur, agnoscere tamen nos persæpe falli, etiam in iis rebus, quas existimamus nos clarè, distinctèque percipere; ac superesse Methodum, quam objectum est esse requirendam. Quare & non ad illum locum, sed ad alia nos esse remittendos censuisti. Lectorum porrò conscientiam testor, qui non modò citatum locum, sed etiam totum opus legerint, & in ejus meditatione etiam hebdomadas ac menseis triverint, & contriverint; testor, inquam, si tuam illam accuratam Methodum observaverint, si teneant, si quavis occasione usurpare valeant, si certi sint fore, ut nunquam deinceps fallantur. Nam clarè quidem, & distinctè esse aliquid cognoscendum, ac nihil esse prætermittendū, quò minus clarè, & distinctè cognoscamus id, quod ut verum defendimus, id neque novum, neque dubium est, neque Regula, quasi tibi propria est tibi ipsi vindicanda: Sed quia experimur nos fuisse tam sæpe deceptos, in iis, quæ visi aliàs nobis fuimus clarè, & distinctè cognoscere, postquam nihil prorsus omisimus eorum, quæ ad cognoscendum clarè, distinctèque esse necessaria arbitrati sumus; ideo superest Methodus tradenda, quam si olim habuissemus, non fuisset decepti, & quam si habeamus in posterum, futuri obnoxii deceptioni non sumus. Et ne fortè dicatur fuisse olim omnia circumspicienda accuratiùs, quippe, quòd non satis circumspecta fuerint, ipso eventu probatum fuisse: Patet id ipsum esse, quod quaeritur, quomodo nempe agnosci possit, quandònam fuerint omnia satis circumspecta, vel non; Nam ut priùs per decem annos credidi fuisse omnia à me accuratissimè circumspecta, & exacto tamen decennio animadverti quidpiam defuisse; ita possum pu-

putare jam circumspexisse me omnia, ac pari modo decipi, & in deceptione perseverare non modò toto decennio, sed etiam toto vitæ decursu: unde & requiro adhuc Methodum, qua constet omnia esse, vel non esse à me accuratissimè circumspecta. Ex quo fit, ut nisi eam tradas, jure exhibilare Scepticos non possis, qui longè melius, quàm tu præjudicia exuunt; quando in rebus ad naturales speculationes pertinentibus non statim, ut tu, in alia præjudicia sese conjiciunt, & Ideas claras distinctasque ab obscuris, & confusis ita discernunt, ut tamen existiment eas, quæ nunc claræ distinctæq; apparent, posse olim fieri obscuras, & confusas; easque, quæ nunc obscuræ, & confusæ, posse olim fieri claras, & distinctas; unde & assensum sapientissimè sustinent, ut nisi veritatem consequantur, saltem non incidant in errorem.

D V B I T A T I O I I .

*De adventitia omnium Idearum origine, etiam Chimerarum;
etiam Rei, Veritatis, Cogitationis.*

Distinguis consequenter, *Ideas* (quas vis esse cogitationes, prout sunt tanquam imagines) in *innatas*, *adventitias*, *factitias*. Et *primi* quidem generis statuis, quod intelligas quid sit *Res*, quid *veritas*, quid *cogitatio*: *secundi*, quod *strepitum* audias, *Solem* videas, *ignem* sentias: *tertii*, quod *Sirenas*, & *Hippogryphes* fingas: ac subdis posse fortè *omneis* esse *adventitias*, vel *omneis* *innatas*, vel *omneis* *factas*: quatenus nondum *originem* illarum clarè perspexisti. Porro, ne aliqua interea, donec perspexeris, fallacia subrepat, adnotare placet videti *omneis* *Ideas* esse *adventitias*, procedere à rebus extra ipsam mentem existentibus, & cadentibus in aliquem sensum. Videlicet mens facultatem habet (vel ipsa potius facultas est) non perspicendi modò ipsas *Ideas* *adventitias*, seu quas ex rebus per sensus trajectas accipit, perspicendi, inquam, *nudas* & *distinctas*, & omnino quales in se recipit: sed præterea illas variè componendi, dividendi, contrahendi, ampliandi, comparandi, & id genus similia. Heinc tertium saltem *Idearum* genus distinctum non est à secundo: nam *Idea Chimæræ* alia non est, quàm *Idea* capitis leonis, ventris capræ, caudæ serpentis, ex quibus mens unam componit, cùm illæ seorsim, sive singulæ *adventitiæ* sint. Sic *Idea* *gigantis*, hominisve instar montis,

aut

aut mundi totius concepti, non alia est, quàm adventitia; Idea putà hominis magnitudinis vulgaris, quam mens ampliat pro libitu, tamen si tantò confusius, quantò amplius concipit illam. Sic Idea pyramidis, urbis, aut alterius rei nunquam visæ, non alia est, quàm adventitia visæ antea pyramidis, urbis, aut alterius rei non nihil deformata, ac proinde confusâ aliquâ ratione multiplicata, comparatâque. Quod spectat ad species, quas dicis innatas, eæ profectò nullæ videntur, & quæcunque dicuntur tales, videntur originem quoque habere adventitiâ. *Habeo*, inquis, *à mea natura, quòd intelligam quid sit Res*. Non puto verò te velle loqui de ipsa vi intelligendi, de qua nec dubium, nec quæstio est; sed potius de Idea R.E.I. Non loqueris etiam de Idea alicujus Rei particularis: nam Sol, hic lapis, omnia singularia, sunt Res, quarum esse Ideas innatas non dicis. Loqueris ergo de Idea Rei universè consideratæ, & prout cum ente synonyma est, ac tam latè, quàm illud patet. Quæso te verò hæc Idea quomodo esse potest in mente, nisi simul sint tot res singulares, illarumque genera, ex quibus mens abstrahat, formetque conceptum, qui nullius singularium proprius sit, & omnibus tamen conveniat? Profectò si Idea Rei innata est, innata quoque erit Idea animalis, plantæ, lapidis, omnium universalium: nihilque erit opus, ut nos fatigemus ad internoscendum plura singularia, quò resectis variis discriminibus, id solùm retineamus, quod videbitur omnibus commune, seu, quod idem est, generis Ideam. Dicis quoque *te habere à tua natura, ut intelligas quid sit veritas, seu*, ut ego interpretor, *Ideam veritatis*. Porro, si veritas nihil aliud est, quàm conformitas judicii cum re, de qua fertur judicium, Veritas est quædam relatio, ac proinde nihil distinctum ab ipsis re, Ideaque ad se relatis; seu, quòd idem est, ab ipsa rei Idea: quippe quæ & se, & rem, qualis est, repræsentat. Quare & non alia est veritatis Idea, quàm Idea rei, quatenus rei conformis est, seu quatenus ipsam repræsentat cujusmodi est: aded proinde, ut si Idea Rei non innata, sed adventitia sit; Idea quoque veritatis adventitia sit, non innata. Et cum id de qualibet veritate singulari intelligatur, intelligi etiam potest universè de veritate, cujus notio, seu Idea (ut jam dictum est de Idea Rei) ex notionibus, seu Ideis singularium eruitur. Dicis rursus *te habere à tua natura, ut intelligas quid sit cogitatio*: (interpretor semper *Ideam cogitationis*.) Verùm, ut mens ex idea unius urbis fingit Ideam alterius: ita ex Idea unius actionis, ut visionis, vel gustationis, fingere potest Ideam alterius,

ipsius

ipſus putà cogitationis. Nempe analogia agnoſcitur quædam inter facultates cognoſcenteis, unâque ad alterius notitiâ facile deducit. Quanquam de Idea cogitationis laborandum non eſt; ſed de Idea potius ipſius mētis, atque aded animæ, quam ſi innatam de-derimus, nihil erit incommodi admittere quoque Ideam cogitationis innatam. Quare & expectandum eſt, donec probata res fuerit de ipſa Mente, ſeu anima.

R E S P O N S I O.

Miror verò ratiocinium, quo probare vis omnes noſtras ideas eſſe adventitias, nullasque à nobis factas; quia, inquis, mens facultatem habet non tantum percipiendi ipſas ideas adventitias, ſed præterea illas variè componendi, dividendi, contrahendi, ampliandi, comparandi, & id genus ſimilia: unde concludis ideas chimærarum, quas mens facit componendo, dividendo, &c. non eſſe ab ipſa factas, ſed adventitias. Quo pacto etiam poſſes probare nec ſigna nulla facta fuiſſe à Praxitele, quoniam à ſe non habuit marmor ex quo illa exſculperet; nec te has objectiones feciſſe, quia ex verbis non à te inventis, ſed ab aliis mutatis ipſas compoſuiſti. At certè nec forma chimære in partibus capræ, aut leonis, nec forma tuarum objectionum in ſingulis verbis quibus uſus es, ſed in ſola compoſitione conſiſtit. Mirabile etiam eſt quod ideam Rem non poſſe eſſe in mente ſuſtineas, niſi ſimul ſint ideæ animalis, plantæ, lapidis, omniumque univerſalium: tanquam ſi ut agnoſcam me eſſe rem cogitantem debeam agnoſcere animalia, & plantas, quoniam debeo Rem, ſive quid ſit Res agnoſcere. Nec veriùs hîc de veritate agis. Ac denique cum ea tantum de quibus nihil affirmavi impugnes, non niſi in ventos præliaris.

I N S T A N T I A.

Miraris meum ratiocinium; Ego verò miror tuam ſecuritatem; quaſi ego cenſuerim nullas Ideas eſſe à nobis factas, aut concluderim ideas Chimærarum (quarum dixi parteis adventitias) non eſſe à mente factas; & non dixerim mentem facere, componendo, dividendo, &c. Mirabilior eſt uſurpatio & applicatio exempli de Praxitele; aded illud quadrat ad meum inſtitutum, arguitque te id quod voluiſti dicere, non conſideraſſe. Nimirum ut Praxiteles non habet ex ſe marmor, & aliunde tamen oblarum exſculpit, formatque

I.
Declinat
fuiſſe diffi-
cultates
precipuas,
quibus ef-
ficatur
non eſſe
ideas, niſi
adventi-
tias; &
quo arti-
ficio alia
idea in ex-
emplum
aſſumpta,
ita præ-
termiſſa.

ita ego cenfui Mentem non habere in fe Ideam Chimærae ; fed ex adveniente , oblatæque aliunde triplici Idea Leonis , Capræ , & Serpentis , refecare aliqua , & ita coadunare refidua , ut Idea maneat confecta , quæ fit Prima Leo , poftrema Draco , media ipfa Chimæra . Ac fi dixiffem quidem nullas effe Ideas factitias , pernegaffemque Ideam Chimærae , cæterorumque fimilium ; non id mirarer : verùm fupposui planè quòd effent , cùm declaravi me velle folum genus illud Idearum tertium non effe à fecundo diftinctum , quatenus factitiæ ad adventitias pertinent , tanquã ex illis factæ , pro ea vi , quam mens habet adventitias componendi , dividendi , contrahendi , ampliandi , comparandi , &c. Idem de compofitione mearum objectionum ex verbis quorum author non fum , quod de fculptura Praxitelis dicis ; fed fœlicius ne eam ufurpes , applicesve , res ipfa clamat . Nam & quod fubjungis *nec formã Chimærae in partibus Capræ , aut Leonis , nec formã mearum objectionum in fingulis verbis , quibus ufus fum , fed in fola compofitione confiftere* : Cedò quid velis ? Pergis id etiam effe mirabile , quòd Ideam Rei non poffe effe in mente fufineam , nifi fimul fint *Idea Animalis , Plantæ , lapidis , omniumque univerfalium , tanquam , fi , ut agnofcas te effe rem cogitantem debeas agnofcere animalia , & plantas , quoniam debes Rem , frue quid fis Res agnofcere* . Sed mirabiliffimum fanè eft velle te hoc modo difficultatem eludere ; & præterlabi aliam , hocce verbulo , *Nec verius hic de veritate agis* . Cùm addis verò me ea tantum , de quibus nihil affirmaffi impugnantem , non nifi in ventos præliari : id fignificas , quod pridem agnovi , quodque unum reperio , videlicet ventum . Et quod ad hunc quidem locum attinet , verum quidem effe te non affirmaffe , an diftinctis tribus Idearum generibus omnes effent adventitiæ , vel omnes innatæ , vel omnes factæ , quòd nondum clarè veram illarum perpexiffes originem ; Sed neque me id latuit , qui & verba retuli , & ne fallacia tamen fubreperet , donèc perpexiffes , pronunciarefque ea de re , declaravi , quas Ideas factas , innatasque fupponeres , revocari ad adventitias : Neque , fi id non affirmaffi , afferere debes te nihil affirmaffe , qui & affirmaffi illas Ideas effe in te ; & habere te duo cogitationum genera ; & nullam propriè effe falfitatem in iis quæ funt Ideæ , aut affectus , &c. Prætereo autem te non affirmaffe neque determinaffe deinceps quid fentendum foret de triplici illo genere Idearum , ac de iis præfertim , quas ad primum genus pertinere cenfueras , Ideam Rei , Ideam veritatis , Ideam cogitationis ; ac me proinde haud abs re illas expendas hoc loco cenfuiiffe , quas tu innatas fupponeres , & velles nihilo-

lomi-

lominus te non supponere videri. Eadem ratione dixi de factitiis, quas tu supponeres (& velles tamen videri non supponere) posse à Mente fieri, licèt nihil habente adventitium, nihilve mutuante à rebus externis. Verùm tu noluisse ad ista attendi; Ne cùm postea censeret quosdam aut haberi à te, aut fieri à te, admoneri posses te, licèt abductum à rebus corporeis, retinere illas ex eo usque statu, in quo versabaris cum rebus corporeis. Quin etiam te oblervo artificiosè non recensuisse heic in genere innatarum Ideas Dei, & animæ; ut nempe videreris postea advertere primùm illas tibi innatas esse: recensuisse verò Ideas Rei, Veritatis, cogitationis, ut videreris ex teipso, & nulla alia re cognita, advertisse, quòd esses Res Cogitans, quòdque id esset Verum.

Porro, quia præfertim mirabile ducis, quod de Idea Rei obijeci, adverto imprimis, quàm id properè reprehenderis; cùm non sustinuerim, quod ais, *Ideam Rei non posse esse in mente, nisi si mul sint Idea Animalis, Plantæ, Lapidis, omniumque universalium*; sed quæsierim primùm quomodo Idea Rei posset esse in mente, nisi simul essent tot res singulares, illarumque genera, quot sufficerent, ut abstraheretur, formareturque universalis rei conceptus: ac deinde dixi, si Idea Rei innata foret, innatas quoque fore Ideas Animalis, plantæ, lapidis, aliorum, quæ instar Rei sunt universalis. Adverto rursus, quàm parum consonanter iis, quæ dixeram, consequutionem deduxeris; utque cùm debuisses saltem declarare an ad agnoscendum de te, quòd esses Res, necessaria foret præter tui notitiam, agnitio nullius, unius, quorundam singularium; te id callidè declinasse, ac latenter præteruisse sub causante particula, *tanquam si*. An dices non fuisse necesse, ut id explicares, quoniam cùm Ideam Rei innatam statueres, manifestum fuerit nullius rei singularis, præterquam tui, agnitionem necessariam esse? At primò id nondum statueras, ut statuisse intererat. Deinde statueris, non statueris; eadem remanet semper difficultas. Nam quando dicis *Ego sum Res*, Aut conceptus Rei est singularis, aut universalis. Si singularis, ergo, tui ipsius; nam si alterius, sensus propositionis foret, *Ego sum alius à teipso*. At si tui ipsius, identica est; ut loquuntur, & nugatoria propositio, idem enim est, ac si diceret *Ego sum Ego*. Si universalis, ergo includit comparisonem tui ad alia, quibus idem attributum conveniat; idemque est ac si diceret, *Ego sum certæ res*, seu *una ex numero rerum*. Igitur præter agnitionem tui debent res aliæ quoque agnosci. Sic cùm dicis *Res cogitans*, ipsa vox

II.

Declinat-
tum speci-
aliter quod
objectum
fuerat cir-
ca Ideam
Rei non
formatam,
nisi ex per-
spectu sin-
gularibus,
præhabi-
tisque illo-
rum Ideis:
Et, eum,
qui post-
quam asse-
ctavit ex-
nere præ-
judicia,
deprehendit in se a-
liquas ide-
as, dicere
non posse
eas esse in-
natas.

Cogitans se habet haud-dubiè per modum differentiae limitantis late-potentiam ipsius vocis *Res*, ut cum dicis *Ego sum res Cogitans*, sensus sit, *Ego sum Res non qualibet, sed talis*, quæ cogitet; unde & res aliæ, quæ non cogitant, agnoscuntur. Quorsum hæc verò? Nempe ut noscatur Ideam Rei non innatam, sed verè acquisitam esse ex inspectione plurium rerum singularium, detractis discriminibus, & retenta solum communi notione. Ex quo duo dico; unum; si nihil unquam novisses, & concessio tamen, quod te omnibus sensibus obturatis cogitasses, verisimile prorsus esse, quod nihil aliud cogitasses præter hoc, *Ego, Ego, Ego*; Siquidem nihil potuisses tibi tua cogitatione tribuere, cum neque novisses ullum attributum, neque novisses vim verbi *Sum*, qui non novisses quid foret esse, aut discrimen inter esse, & non esse. Et quamvis cogitasses, non potuisses tamen dicere ego cogito, quia non intellexisses, quid esset cogitare. Alterum, non posse te ex iis quæ tibi in ista tua abductione fingis, argumentari ad ea, quæ facturus fuisses in illa mera omnis notitiæ præexistente negatione. Quippe si jam cogitas Cælum, Angelum, *DEVM*, Si Rem, veritatem, cogitationem; si Solem, ignem, strepitum, si Sirenas, Hippogryphas, Chimæras, si Ideas, Iudicia, affectus; si de his, cæterisque tam multis affirmas, negas, ratiocinaris varia; non idcirco dicere potes fuisse te eadem cogitaturum, affirmaturum, negaturum, ratiocinaturum in illo ejusmodi statu. Quid ita porro? Scilicet ne deinceps putes admitti debere ut certissimum demonstrationis principium, quod in hunc modum fuerit conclusum:

Qui, rebus prius cognitis, habet se in statu ignorantie per affectatam abstractionem, huic promptum est agnoscere Ideas innatas, seu quas haberet in statu ignorantie per puram negationem:

Atque ego, rebus prius cognitis, habeo me in statu ignorantie per affectatam abstractionem:

Igitur mihi promptum est agnoscere Ideas innatas, seu quas haberem in statu ignorantie per puram negationem.

DVBITATIO III.

De adventitia Idearum origine, ex iis, quæ cæco, & surdo defuncti comprobata: & de Idea unica Solis, quæ sensu habita, ratione ampliatur.

Videris postea vertere in dubium, non tantum utrum Idea aliqua procedant ex rebus externis, sed etiam utrum omnino sint externæ res aliquæ: viderisque proinde inferre, quamvis sint in te Ideæ rerum, quæ dicuntur externæ, non tamen Ideas arguere, quod res sint, quoniam non ab ipsis necessario procedant: sed possint vel à te, vel modo alio nescio quo esse. Hac puto de causâ ante dicebas, te non percepisse prius terram, cælum, sidera; sed terræ, cæli, siderum Ideas, à quibus posset esse delusio. Itaque, si nondum credis terram, cælum, sidera, & cætera esse; cur quæso supra terram ambulas, promoveſve corpus, ut respectes Solem? cur ducis ad ignem, ut calorem sentias? cur ad mensam, aut cibum, ut famem exſaties? cur moves linguam, ut loquaris, aut manum, ut hæc ad nos scribas? Certè ista quidem aut dici, aut excogitari subtiliter possunt; at negotium nihil promouent: & cum revera non dubites, quin res istæ extra te sint, agamus seridè, ac bona fide, & ut res sunt, ita loquamur. Sin supposita existentia rerum externarum, putas abundè demonstratum non posse nos ex illis mutuari quas habemus ipsarum Ideas; solvendæ tibi rationes sunt, non modò quas ipse tibi objicis, sed quæ præterea objici possunt. Scilicet ita accipis, quasi Idea admittantur provenire ex rebus, quia ita videmur docti à natura; & quia experimur illas à nobis, nostræ voluntate non pendere. Verùm ut nihil neque de rationibus, neque de solutionibus dicamus, opponendum quoque, & solvendum erat inter cætera, quamobrem in cæco nato nulla sit Idea coloris, aut in surdo vocis; nisi quia istæ res externæ non potuerunt ex se immittere in infelicitis illius mentem ullam sui speciem: quod fores à nativitate conclusæ, obicesque illis trajiciendis fuerunt perpetuò positi. Virges postea exemplum Solis, cujus cum duæ sint Ideæ, una hausta ex sensibus, ut putâ quâ parvus apparet; altera ex rationibus Astronomicis; quâ ingens esse concipitur: illa similior, ac verior est, quæ non ex sensibus ducta est, sed ex notionibus innatis elicitâ, vel quacumque alia ratione effecta. Enimverò geminæ illæ Solis Ideæ similes

les sunt, & veræ seu Soli conformes, sed una magis, alia minus; eodem modo, quo duæ ejusdem hominis Idæ, una emissæ ex decimo passu, alia ex centesimo, aut millesimo, similes & veræ, seu conformes sunt; sed illa magis, ista minus, eò quòd illa, quæ propiùs venit, deteritur minus, quæ longiùs, magis, ut explicaretur, si liceret paucis, neque tu ipse satis caperes. Quod autem mente sola percipiamus vastam illam Ideam Solis, non ea propterea elicitur ex innata quadam notione; sed ea, quæ per sensum incurrit, quatenus experientia probat, & ratio illi innixa confirmat res distantes apparere minores seipsis vicinis; tantùm ampliatur ipsa vi mentis, quantùm constat Solem à nobis distare, exæquarique diametro suâ tot illis terrenis semidiametris. Et capere vis hujusce Idæ nihil à natura esse insitum? illam require ex cæco nato. Experire primum non esse in illius mente coloratam, aut lucidam: experire deinde neque esse rotundam, nisi quis illum monuerit, ipseque prius corpus rotundum manibus attrectaverit: experire denique non esse tantam, nisi vel ratione, vel autoritate motus præacceptam ampliaverit. Quanquam, ut istud interjiciam, quæso te, nos ipsi, qui toties Solem conspeximus; qui toties apparentem ejus diametrum observavimus; qui toties de vera ratiocinati sumus; quæso te, inquam, habemus-ne aliam, quam vulgarem imaginem Solis? Colligimus quidem ratione esse Solem majorem terra centum sexaginta, & pluribus vicibus: at propterea Ideam-ne tam vasti corporis habemus? Ampliamus hanc sanè sensibus acceptam, quantum possumus, contendimus mentem, quantum possumus: at nihil tam aliud, quam tenebras meras nobis facimus: & quoties habere distinctam de Sole cogitationem volumus, oportet mens redeat ad speciem, quam intercedente oculo accepit. Sufficit illi si non abnuat, quin Sol revera major sit, quin si oculus propiùs admoveatur, ampliorem Ideam adeptura sit; & interea tamen quantam obtinet, ad tantam attendat.

R E S P O N S I O.

Hic ut convellas rationes ob quas de verum materialium existentia censui esse dubitandum, quæris cur ergo supra terram ambulem, &c. in quo manifestè principium petitur: assumis enim id quod esset probandum, nempe tam certum esse me supra terram ambulare, ut de eo non possis dubitari. Et cum rationibus, quas mihi obijci & refutavi, unam vis addere, quamobrem in cæco

cæco nato nulla sit Idea coloris, aut in surdo vocis, planè ostendis te nullam habere ullius momenti; qui enim scis nullam esse ideam colorum in cæco nato? cum interdum in nobis, etsi claudamus oculos, nihilominus sensus lucis, & colorum excitentur; & quamvis quod ais conceciatur, nunquid eodem jure dici potest ab eo qui negat existentiam rerum materialium, cæcum natum non habere ideas colorum, quia ejus mens facultate illas formandi est destituta, quo à te dicitur ipsum easdem non habere quia oculis est privatus? Quæ subjungis de duabus ideis Solis nihil probant: sed cum ambas pro una accipis, quoniam ad unum Solem referuntur, idem est ac si diceret verum & falsum non differre, cum de eodem subiecto affirmantur: & cum illam quam ex rationibus Astronomicis colligimus negas esse ideam, nomen ideæ ad solas imagines in phantasia depictas, contra id quod expresse assumpsisti, restringis.

I N S T A N T I A.

R Idiculum planè me habeam, si assumam tibi probandum te supra terram ambulare, videre, caleferi, comedere, loqui, sentire, &c. Dixisti tu neminem unquam sanæ mentis seriò de istis dubitasse: Si ergo seriò jam dubitas, & cum ego quæsierim, ut seriò, ac bona fide ageremus, loqueremurque de rebus, ut essent, conditionem non accipis, ecquid est, cur hac de re instem? Dicis me nullam ullius momenti habere rationem quærendi quamobrem in cæco nato nulla sit Idea coloris, aut in surdo vocis. Age ergo, quamnam tu ipse & cujus momenti adversus id affers? *Qui enim scis*, inquis, *nullam esse ideam colorum in cæco nato, cum interdum in nobis, etsi claudamus oculos, nihilominus sensus lucis, & colorum excitentur.* Peregre giè videlicet. Quæsitum fuerat, An cum habeamus ideas rerum, quæ dicuntur externæ, exempli gratiâ, coloris, aut vocis, probari posset nos tales ideas ex ipsismet rebus mutuari. Negâras tu, & allatis duabus adversus te rationibus, illas solveras; Ego objeci non eas solas afferri, ac solvi debuisse, sed debuisse maximè illam, quæ ex comparatione nostri, cum cæco, ac surdo nato petitur. Cum enim idea coloris sit in nobis, quæ non est in cæco, & idea vocis, quæ non est in surdo, argumentatus sum causam esse, quia nos, Deo propitio, habemus oculos apertos, quibus colores; apertas aureis, quibus sonos exceperimus; illi neque oculos, neque aureis apertas, quibus unquam exceperint, excipereve potuerint, habeant. Jam cum deberes hoc solvere, declarareque quam aliam ob causam sint in nobis ideæ colorum, ac vocum, in cæco verò, ac surdo non sint, si po-

I.
Objectio-
nem factâ
de cæco.
Et sur-
do esse in-
solutam:
neque ex
quibusdam
solum pro-
positis, id
quod in-
tenditur,
legitimè
concludi.

si potuimus aliunde illas , quàm ex ipsis rebus mutuari , subterfugis , interrogando , *Qui sciam in cæco nato nullam esse ideam colorum ?* Interdum verò potuit-ne lepidius quicquam abs te requiri ? Et putas quòd respondere non potui , quod olim Aristoteles , dum quærenti cuiquam , quorsum nos res pulchræ delectent , cæci ista quæstio est , inquit . *At interdum* , inquis , *in nobis* , licet claudamus oculos , nihilominus sensum lucis , & colorum excitantur . Ita sanè interdum excitatur sensus obtusus aliquis lucis , clariorumve colorum : Sed nempe quia videntes sumus , & palpebras transparenteis habemus , aded ut sint in nobis instar veli non planè opaci . At perinde ne excitatur iis , quibus oculi vel confossi , vel effossi sunt , & quibus pares (quod ad privationem facultatis videndi spectat) Cæci ab exortu accipiendi sunt ? Fuit olim cæcus ab exortu , qui sub eodem mecum Professore Philosophiæ operam dedit . Memini me ipsi non semel apposuisse tam in Sole , quàm in umbra colores varios , iussisseque , ut experiretur num quidpiam foret discriminis ; porrò nullum unquam agnovit . Tu nisi credis , idem experire , & quamvis iudicium de coloribus ad cæcum remittas , agnosces saltem , ut opinor , Te , si cum hac , qua polles videndi facultate , mansisses hùc usque clausis oculis , non tam multas futuras fuisse ideas colorum , imaginisque rerum in te , ac jam sunt , postquam toties , tamdiùque apertos , attentosque habuisti . Addo , ut concedam in cæco eundem fieri sensum lucis , & colorum , qui interdum in nobis clausis oculis excitatur , difficultatem semper solvendam manere , unde-nam ille accipiat obtusam hujuscemodi lucis , colorumque Ideam , nisi accipiat ex rebus externis ? & unde fiat , ut quam nos claram , distinctamque habemus , ille non habeat , nisi habeamus ex iisdem rebus , quatenus ipsarum speciebus ad nos adlabentibus , apertas fores habuimus ; illi apertas non habuerunt . En aliud genus subtilitatis , dum ais *negantem existentiam rerum materialium , tam dicere posse cæcum natum non habere Ideam colorum , quia ejus mens facultate illas formandi est destituta ; quam ego dico non habere , quia est privatus oculis .* quasi verò vel audiendus sit , qui negat existentiam rerum materialium , atque aded se hominem ? vel ille perinde in mentem cæci penetret , ut agnoscat quæ facultates illi desint , aut non desint , ac ipse inspicio in ejusdem faciem , & quæ sint in illa , aut non sint organa discerno ? vel denique ille possit probabiliter aded dicere , hic cæcus idcirco non videt , quia mens ejus caret facultate videndi , non quia caret oculis ; quos tametsi haberet optimè dispositos , nihilominus non vide-

videret; ac ego possum dicere, hic cæcus idcirco non videt, quia caret oculis, non quia caret facultate videndi, quam licet haberet perfectissimam, nihilominus carens oculis non videret. Ex his constat, quàm solida ista ratiocinatio sit:

Qui duabus quibusdam rationibus non movetur, ut existimet Ideas, quas habet rerum externarum, esse desumptas ex ipsis rebus, is non debet admittere esse ex ipsis rebus desumptas:

Atqui ego non moveor duabus quibusdam rationibus, ut existimem Ideas, quas habeo rerum externarum, esse desumptas ex ipsis rebus:

Igitur non debeo admittere esse ex rebus ipsis desumptas.

Haud dispar subtilitas est, dum ais me duas illas Solis Ideas, quæ ad unum Solem referuntur, accipientem pro una, idem facere, ac si dicerem verum, & falsum non differre, cum de eodem subiecto affirmantur. Quasi verò, aut ego dixerim Ideam Solis, quatenus pedalis apparet, ita esse veram, ut cum ratione deducimus coæquari Solem tot illis terrenis semidiаметris, ampliata pro captu Idea sit falsa? Aut quasi verum simul non sit, & apparere Solem pedalem, & esse ingentis illius magnitudinis, quæ ratiocinando ostenditur? Aut periculum sublit, ne Dialectici deprehendant me affirmantem verum, & non verum de eodem subiecto, respectu ejusdem considerationis, ac idcirco esse in me contradictionem sint ostensuri? Verùm subtilissima subtilitas est, cum pro more ais, ea, quæ subjungo de duabus Solis Ideis nihil probare; ac sub iis verbis præterfugis ipsum caput difficultatis. Quia enim quæstio erat, Idea-ne Solis esset innata, seu ex notionibus innatis elicitæ; remisi te ad cæcum natum, ut experireris, qualem-nam Ideam Solis haberet ex se, qui neque lucidam, neque coloratam, imò neque rotundam, neque Solem, quantus est, representantem, nisi fando quid accepisset, habere posse videretur; at Tu, ut solertissimè, ita & providissimè cavisti, ne in hujusmodi scopulum videreris fuisse impactus. Causaris deinde, quòd nomen Idea restringam ad solas imagines in phantasia depictas, contra id, quod tu expresse assumpsisti. Quo loco non reprehendis primò quòd Ideæ nomen restringam ad imagines. Et quorsum certè faceres, cum non modò ea sit omnium de Ideis loquentium notio, ut illas pro rerum imaginibus habeant; sed tu quoque antea Cogitationes dividendas, ita dixeris, quedam ex his, tanquam Imagines sunt, quibus solis propriè convenit Idea nomen, ut cum hominem; vel chimæram, vel calum, vel Angelum, vel Deum cogito. Alias verò, alias quasdam præ-

II.

Difficultatem præcipuam de Idea Solis dissimulatam: Ideam propriè imaginem esse: Aliqua per veram ideam percipi, aliqua vi consequentius.

P

sercæ

terea formas habent, ut cum volo, cum timeo, cum affirmo, cum nego;
semper quidem aliquam rem, ut subjectum meae cogitationis apprehendo;
sed aliquid etiam amplius, quam istius rei Similitudinem complector; &
ex his aliae voluntates, sive affectus, aliae iudicia appellantur. Quae qui-
dem refero, ut memineris te accipere propriè Ideas, pro quibus-
dam Imaginibus, seu Similitudinibus rerum; ipsas autem actiones
affirmandi, negandi, timendi, volendi, aut quicquid in ipsis repe-
ritur, præter imagines, aut Similitudines rerum, quæ apprehen-
duntur, dum affirmantur, negantur, &c. non esse censendum Ideas;
aut saltem, si censeantur, id fieri improprie. Secundò ergo repre-
hendis, quòd Nomen Ideæ restringam ad imagines in phantasia depictas.
Cæterùm ego neque ad depictas in phantasia, neque ad depictas in
Intellectu restringo; sed extendo potius ad omnes, quascumque,
& quomodocumque, & ubicumque in nobis licet experiri. Quid
est ergo, quod reprehendis, aut quod inter te, & me est discriminè
Nimirùm quòd ego retineam generalem illam, & tibi mox antè
probatam notionem Ideæ, ut scilicet imago sit; tu brevi oblitus,
ad id transferas, quod imago non sit, quodque non possis dicere
qualem tibi rem repræsentet. Et quia ægrè fers tibi objici, aut
quæri ex te qualem-nam ergo rem concipias, cujus dicis te habere
Ideam, & cujus ego non experior habere me imaginem, objicis-
tu quærere me Ideas, seu Imagines, quales depinguntur in Phan-
tasia, non verò quales in Intellectu. Tum quia perabsurdum videtur
Imagines, quæ sint in Phantasia, qualis est Solis diametri pedalis esse
adeò claras, & distinctas; Imagines verò, quæ in Intellectu, qualis
est Solis terræ majoris plusquàm centies sexagies, adeò obscuras,
& confusas; parum abest, quin neges imagines esse, & censeas ni-
hilominus veras, proprièque dictas Ideas. Heinc securus ipsas à te
percipi clarè, & distinctè, prorumpis in convitia, quasi ipse solus
intellectu utaris, ego in sola phantasia, seu imaginatione consi-
stam. Viderint tamen id Lectores, ubi ea percurrerint; quæ de
Idea, ac magnitudine apparente, & vera Solis in dubitatione
dixi, memores eorum, quæ attigi in superiorem Meditationem.
Repeto hoc solum, aliud esse, percipere nos aliquid per veram
Ideam, seu Imaginem; aliud per necessariam ex supposito aliquo
antecedente consequutionem. Etenim priore modo concipimus
rem esse quid tale, posteriore debere esse quidpiam tales: Et ut pri-
ore intelligimus rem distinctè, & qualis in se est; ita posteriore
non intelligimus nisi confusè, & analogicè, hoc est referendo ad
aliquid,

aliquid, quod sit per Ideam aliquam perceptum. Exemplum est jam insinuatum : Occurrunt nobis duo homines , unus facie apertâ , alius larvatâ : prioris faciem percipimus per veram Ideam, seu imaginem , posterioris per consequutionem ex eo , quodd in eo agnoscimus cætera humanæ formæ indicia. Vnde & intelligimus in priore quidem humanam faciem esse , at in posteriore debere esse; & ut prioris faciem cognoscimus distinctè , & qualis est in se; ita posterioris non nisi confusè , & ex analogia ad faciem cæterorum hominum , in quibus observavimus frontem, nasum, mentum, oculos , genas , os, cætera , quibus iste debeat habere similia. Idem dicendum de superficie , & de fundo maris, quorum alterum per Ideam , alterum per consequutionem intelligitur. Idem de aliis omnibus rebus , ac iis etiam , quarum species nimis vel minutas , vel auctas habemus ; aded ut ad veras referendæ sint. Sic enim cum nobis dñæ turres inter se æquales , veram una propè , alia procul occurrerint , utramque quidem percipimus per Ideam , sed quia propioris erit germana , posterioris imminuta , fiet tamen ut percipiamus remotiorem æqualem priori , non per veram Ideam , sed per consequutionem , habitâ ratione distantia , & per ampliacionem speciei , prout ad germanam refertur.

D V B I T A T I O I V.

De Idea substantia non propria , & per accidentia , ac instar ipsorum ; deque Idea Dei desumpta ex rebus , earumve perfectionibus.

A Gnoscens deinde inæqualitatem , & diversitatem Idearum , Procul dubio , inquis, *illæ quæ substantiam mihi exhibent , majus aliquid sunt , atque ut ita loquar , plus realitatis objectivæ in se continent , quàm illæ quæ tantum modos , sive accidentia repræsentant.* Et rursus illa , per quam summum aliquem Deum æternum , infinitum , omnipotentem , rerum omnium , quæ præter ipsum sunt , creatorem intelligo ; plus profectò realitatis objectivæ in se habet , quàm illæ per quas finitæ substantiæ exhibentur. Incedis porrò heic passu grandi. Quare non nihil sistenda es. Ac non hæreo quidem circa id , quod vocas realitatem objectivam. Satis est , quodd cum vulgò dicant res externas esse subjectivè , seu formaliter in seipsis , objectivè autem , seu idea-

liter in Intellectu; videaris tu nihil aliud velle, quàm debere Ideam conformari rei, cujus est Idea: adeò ut repræsentativè nihil contineat, quod ipso facto non sit in ipsamet re; & tantò plus repræsentet realitatis, quantò res repræsentata plus realitatis in seipsa habuerit. Distinguis certè statim pòst realitatem objectivam à formali, quæ, ut interpretor, sit ipsa Idea, non ut repræsentans, sed ut entitas aliqua. Cæterùm constat seu Ideam, seu realitatem objectivam ejus, non esse mensurandam penes totam realitatem formalem rei, seu quam res ipsa habet in se; sed penes eam duntaxat partem, cujus intellectus notitiam accepit; seu, quod est idem, penes notitiam, quam intellectus habet de re. Sic nempe esse in te dicitur Idea perfectæ, ejus hominis quem attentè, & læpius, & in omnem faciem circumspexeris; at illius, quem in transcurso, quem semel, quem ex parte solùm videris, erit profectò imperfectæ. Quod si non ipsum hominem, sed larvam faciei obductam, & vestis corpus undequaq; contegenteis adspexeris; aut dicendum est non esse in te illius Ideam; aut si est aliqua, illà esse imperfectissimam, summèque confusam. Ex quo dico haberi quidem Ideam distinctam, germanamque accidentium; at substantiæ sub iis latentis non nisi confusam, fictamq; ad summum. Adeò ut cùm dicis *plus esse realitatis objectivæ in Idea substantiæ, quàm in Idea accidentium*; primùm negandum sit substantiæ esse veram Ideam seu repræsentationem, atq; idcirco ullam ipsius realitatem objectivam; ac deinde ubi fuerit aliqua concessa, negandum quoque sit eam esse majorem, quàm sit in Ideis accidentium, cùm quicquid realitatis hujusmodi habet, habeat ex Ideis eorum accidentium, sub quibus, vel quorum instar concipi substantiam suprà diximus, declarantes illam concipi non posse nisi ut extensum, figuratum, coloratum aliquid. Circa id quod subdis *de Idea Dei*, quæso te, cùm tibi nondum constet an sit Deus, quomodo nosti Deum repræsentari per sui Ideam, summum, æternum, infinitum, omnipotentem, omnium creatorem? An non ex præconcepta de Deo notitia, quatenus audiisti illa attributa de Deo enunciari? Quippe si nihil tale hæcenus audiisses, ita ne describeres? Dices hoc jam solum afferri in exemplum, absque eo, quod quidpiam adhuc definiatur. Esto: sed vide ne postea id habeas quasi præjudicatum. Dicis esse in Idea Dei infiniti plus realitatis objectivæ, quàm in Idea rei finitæ. Sed primò, cùm humanus intellectus non sit concipiendæ infinitatis capax; idèd neque habet, neque respicit Ideam infinitæ rei repræsentatricem. Quare & qui infinitum

infinitum quid dicit, attribuit rei, quam non capit, nomen quod non intelligit; quoniam ut res extenditur ultra omnem illius captum; ita finis negatio extensioni illi attributa ab eo non intelligitur, cujus intelligentia sine aliquo semper coercetur. Deinde, cum maximæ quæque perfectiones soleant Deo attribui; videntur eæ omnes delumptæ ex rebus, quas vulgo miramur in nobis, cujusmodi sunt diurnitas, potentia, scientia, bonitas, beatitudo, &c. quæ quantum possumus ampliantes, pronunciamus Deum æternum, omnipotentem, omniscium, optimum, beatissimum, &c. Quæ Idea porro hæc omnia repræsentat, non habet propterea plus realitatis objectivæ, quam habeant res finitæ simul sumptæ, ex quarum Ideis, Idea illa compacta est, ac deinde, modo jam dicto, adaucta. Nam neque qui dicit æternum, complectitur propterea mente totam extensionem ejus durationis, quæ nunquam cœpit, & nunquam desitura est: neque qui omnipotentem, totam multitudinem effectuum possibilium, atque ita de cæteris. Postremò, ecquis dici potest habere Ideam de Deo germanam, seu quæ repræsentet Deum qualis est? Quàm pusilla res esset Deus, nisi esset alius, haberetque alia, quàm nostra hæc quantillacumque? Annon censenda est esse minor perfectionum proportio inter Deum, & hominem, quàm inter Elephantem, & intercutaneum animalculum acari? An ergo, si quis ex observatis acari perfectionibus, efformaret in se Ideam, quam Elephantis diceret, germanamque asseveraret, ineptissimus haberetur: & sibi plaudet, si quis ex visis hominis perfectionibus, Ideam efformet, quam & Dei esse, & germanam esse contendat? Quæso etiam pauculas istas, quas in nobis esse deprehendimus, quomodo in Deo agnoscimus esse? Et ubi agnoverimus, qualem-nam licebit propterea ejus essentiam imaginari? Est profectò Deus supra omnem captum infinitis intervallis; & cum mens nostra ad illius contemplationem comparatur, non modò caligat, sed & nulla est. Quare neque est cur dicamus germanam ullam esse Ideam, quæ Deum repræsentet; abundèque est, si ex analogia harum rerum nostratum, qualemcumque, & ad usum nostrum eliciamus, formemusque ideam, quæ captum humanum non superet, neque realitatem contineat, quam in rebus cæteris, cæterarumve rerum occasione non percipiamus.

RESPONSIO.

Idem hic facis, cum negas substantiæ esse veram ideam, quia nempe substantia non imaginatione, sed solo intellectu percipitur. Atqui dum ego protestatus sum, ô Caro, nihil mihi negotii esse cum illis qui sola sua imaginatione, non autem intellectu uti volunt. Vbi vero ais, substantiæ ideam nihil habere realitatis, quod non habeat ex ideis eorum accidentium, sub quibus, vel quorum instar concipitur, probas te revera nullam habere distinctam, quia nunquam substantia instar accidentium concipi potest, nec suam realitatem ab iis mutuari; sed contra vulgò à Philosophis accidentia substantiarum instar concipiuntur, nempe quoties realia esse dicuntur. Nulla enim accidentibus realitas (hoc est nulla entitas plusquam modalis) tribui potest, quæ non ab idea substantiæ desumatur. Porro ubi ais, ideam Dei haberi tantùm ex eo quoddã audiverimus quædam attributa de Deo enuntiari, vellem adderes undenam ergo primi homines, à quibus ista audivimus, eandem Dei ideam habuerint; si enim à se ipsis, cur non etiam eandem à nobis habere possumus? si verò à Deo revelante, ergo Deus existit. Cum autem addis, eum qui infinitum quid dicit, attribuere rei quam non capit nomen quod non intelligit; non distinguis intellectiōnem modulo ingenii nostri conformem, qualem de infinito nos habere unusquisque apud se satis experitur, à conceptu rerum adequato, qualem nemo habet, non modo de infinito, sed nec foris etiam de ulla alia re quantumvis parva. Nec verum est intelligi infinitum per finis, sive limitationis negationem, cum è contra omnis limitatio negationem infiniti contineat. Nec verum etiam est, ideam omnes illas perfectiones quas Deo tribuimus repræsentantem, non habere plus realitatis objectivæ quàm habeant res finitæ. Fateris enim ipsemet istas perfectiones ab intellectu nostro ampliari ut Deo tribuantur. An ergo existimas illa quæ sic ampliata sunt non ideò majora esse non ampliatis? Et unde esse potest facultas omnes perfectiones creatas ampliandi, hoc est aliquid ipsis majus, sive amplius concipiendi, nisi ex eo quod idea rei majoris, nempe Dei, sit in nobis? Nec denique verum est, perpusillum fore Deum si non sit major quàm à nobis intelligatur; intelligitur enim esse infinitus, atque infinito nihil majus esse potest. Atqui confundis intellectiōnem cum imaginatione, fingisque nos Deum imaginari instar hominis alicujus permagni, tanquam si quis nunquam visum elephantem imaginaretur esse instar animalculi acari quammaximi, quod secum faceret esse ineptissimum.

I N-

I N S T A N T I A.

QUAM gratus es, qui cum te geras pro pura mente, & quicquid protestatus dudum fueris, tecum tamen, qui Caro sis, aliquid negotii habere dignaris? An quia putas mihi adhuc intellectus quidpiam relinqui, quo gratiam hanc tuam percipiam? Videris sane: alioquin enim, cur haberi ineptus velles, stylum in meram carnem exacuens? At, si ita sit, unde arguis uti me intellectu nolle, sed imaginatione duntaxat? An-non te satis interpellavi, ut criterium traderes, quo possem agnoscere uti me nunc intellectione, quæ non esset imaginatio, nunc imaginatione, quæ non esset intellectio? Et quare, si aliquod nōras, noluisti illud tradere? An Imaginationem vis esse, cum rem aliquam sic percipimus, ut imaginem ejus quandam nobis obversantem quasi intueamur: Intellectionem verò cum rem percipimus, & nullam tamen imaginem velut obversantem habemus? At primum, vel neget oportet intellectiōnem corporum esse, sive corpora intellectu percipi, quoniam illa sine imagine veluti obversante percipi non possunt; vel si admittas, admittas oportet eandem actionem esse simul imaginationem, & intellectiōnem. Et certè, qui negari possit intellectus functionem esse, cum sedulo, studiosè, datà operà, cōq; sine, ut quanta maxima haberi potest, habeatur cognitio, incumbimus, attendimusque ad corporeum aliquid præsens, & quod oculis usurpemus, attrectemusque manibus, adeò ut germanam illius imaginem menti obversantem habeamus? Qui possit inquam id negari, nisi negetur simul intellectum nihil posse ratiocinari, aut deducere circa corpora: cum id non possit nisi circa ea, quæ ab ipso cognoscuntur, & corpora cognosci non possint, nisi per sui imagines? Deinde, cum velis Ideas esse in Intellectu, & Intellectum per illas cognoscere res, quarum sunt Ideæ: Nonne etiam in Intellectu sunt imagines, & Intellectus per imagines cognoscit? Quid enim aliud est Idea rei, quàm Imago ipsius rei? Idea certè Idea non est, nisi quia rem repræsentat, & Imago imago non est, nisi quia rem repræsentat. Quamquam quid in hoc immorer, cum tu quoque id asserueris, ut est jam antè inculcatum. Ecquid ergo discriminis erit inter imaginationem, qua res percipiuntur per imagines, & intellectiōnem, qua res per imagines percipiuntur? An addes Imaginatricem non ratiocinari, ratiocinari verò Intellectum?

Ac

I.
Videri intellectiōnem non posse ab imaginatione sejungi: & eandem esse, sive obversari in utraque imaginationem.

At quo modo tu negabis imaginatricem ratiocinari ; negabo ego Intellectum imaginari ; addamque solam esse Rationem, quæ ratiocinetur ; nempe ut unaquæque facultas cognominem functionem obeat, sicque & imaginatrici Imaginatio, & intellectui intellectio, & rationi ratiocinatio duntaxat tribuatur. Quod si putes eandem Intellectus facultatem, quæ simpliciter res intelligit, posse quoque ratiocinari, deducereve unam ex alia ; Cur non putes eandem imaginari posse, ac tantò magis, quantò intelligere simpliciter res, nihil videtur aliud, quàm res simpliciter imaginari ? An dices esse in Imaginatrice imagines corporeas tantum, in intellectu verò incorporeas ? At si imaginamur quidem, & intelligimus corpus aliquod, ec-quonam demùm discrimine imaginem illius existentem in intellectu ab ejusdem imagine in Imaginatrice existente discernes ? Quæso tuam fidem, agnoscere potes esse in te duas illius imagines, & dignoscere quando una, quando alia percipias corpus ? Heic non in isto, qui putes posse imaginem illam dici incorpoream, quæ ut repræsentat, ita constare ipsa debet variis partibus, coloribus, figuris, & similibus, de quibus aliàs opportuniùs. Dico duntaxat, si aliquæ sunt in intellectu imagines, quonam modo illæ repræsentare aliquid possunt, secùs ac eæ, quas degere in Imaginatrice admittis. Nulla certè earum repræsentat rem veluti in Puncto ; sed cum aliqua veluti diffusionè, aut extensione. Et seponat mens quantum volet, aut potiùs quantum poterit materiam, atque corpulentiam ; semper tamen supererit in ea imagine diffusio, aut extensio quædam. Atqui diffusio, seu extensio est corporeæ imaginis proprium, & qualera ipse degere in imaginatrice concedis. Dices me esse nimis carneum, qui non experiar mihi obversari imaginem ullam alicujus rei, quæ neque sit in puncto, neque extensionem habeat aliquam : Sed ego, cum meam hebetudinem fatear, occasionem habeo conquerendi de tuo acumine, qui tuum experiundi modum non tradideris, rogatus licèt, instigatusque. Præter cætera enim quæsiui exte, quomodo te ipsum, seu Mentem pro contemplationis objecto haberes, & substantiam cogitantem definiciens, experireris te ipsum obversari tibi ipsi alia ratione, quàm ut auram aliquam tenuem, puram, perspicuam, &c. Tu verò id dissimulasti. Et nunc, cum dicas te habere Ideam, sive imaginem mentis ; nonne dicere oporteret quomodo hæc Idea sit imago, & quæ possit tradi generalis definitio imaginis, ut applicari ipsi possit ? ut mentem referat neque in puncto, neque in extensione quapiam existentem ? Verùm id agamus, de quo a-

quo agitur ; Statim enim rursus idem rogitandi occasionem facies.

Dicis *substantiam non imaginatione, sed intellectu solo percipi*. Ego Intellectu percipi non nego ; neque enim potest ut quidpiam distinctum ab accidentibus concipi sine abstractione, & consequentis deductione, quæ Intellectus propria est ; at contendo imaginatione quoque simul percipi, seu imaginatrix sit facultas distincta, quæ cum intellectu concurrat ; seu potius sit una, eademque facultas, sensu mox antè exposito. Ratio verò est, quia non potest intellectus substantiam intelligere ex mutationibus accidentium, quin ipsam apprehendat ; non potest autem nisi sub Idea, formæ quadam apprehendere ; Et quia talis idea est imago, & apprehensio per imaginem est imaginatio ; sit ut intellectus substantiam intelligere, nisi imaginando non possit. Tu qui vis substantiam intellectu solo, & non imaginatione etiam percipi, dicito quomodo id fiat ? dicito quid aliud Intellectio quàm Ideæ perceptio sit ? quid sit aliud imaginatio, quàm perceptio imaginis ; & cum Idæa imago sit, quid aliud sit Intellectio, quàm imaginatio ? An Idea porro substantiæ sit germana, clara, distincta, alia quæstio est. Contendis tu esse ; ego esse nego, & cum tu neque velis, neque possis dicere cujusmodi ipsam concipias, sed excandesceas solum in me, ego bona fide dico, & expono quemadmodum illam concipiam. Dico scilicet nos substantiam non percipere nisi ex consequutione, atque aded sub abstracta, impercepta, conjecturalique idea duntaxat. Cum enim accidentia sint quasi vestes substantiæ, perinde ratiocinamur ex mutationibus accidentium, esse subjectum ipsis commune, & nunc istis, nunc illis substans ; ac commutatis vestibus intelligimus esse corpus, quod nunc has vesteis, nunc illas induit. Et quemadmodum licet intelligamus esse sub vestibus corpus aliquod, non habemus tamen veram illius ideam, nescientes putà, sitne album, an fuscum ; glabrum, an pilosum ; purum, an maculatum, &c. sed confusè tantum, generaliterve cæterorum instar id concipimus ; Ita licet sub extensione, figura, colore, sapore, mollitie, aliisque accidentibus intelligamus latere, seu esse debere aliquod subjectum, quod nominamus substantiam, non habemus tamen propterea germanam illius Ideam, neque asseverare possumus cujusmodi sit ; sed confusè solum, & sub generali quadam specie subjectorum concipimus ; aded ut, tamen si conemur seponere mente extensionem, figuram, colorem, accidentiæque cætera, experia-

II.
Falsum videri substantiam non imaginatione percipi : & quam habemus illius ideam non pendere ab eis, quæ habemus accidentium.

periamur tamen adhuc nobis obversari nescio quid indefinitè extensum, confusè figuratum, obscurè coloratum, &c. uti objectum fuerat. Talem itaque dico esse Ideam, seu imaginem; sub qua substantiam concipimus; permirumque erit, si tu cùm non possis divinare cujusmodi sit illud corpus, quod nunquam vidisti, nisi vestibus circumtectum, divinare possis, & exponere cujusmodi substantia sit, quæ tibi nunquam nisi obvelata suis accidentibus apparuit. Heinc, quia ego dixi *Substantiæ Ideam nihil habere realitatis, quod non habeat ex ideis eorum accidentium, sub quibus, vel quorum instar concipitur*; arguis tu quidem probare me nullam habere reverà distinctam; at ego cùm fatear nullam me habere reverà distinctam, & qualemcumque habeo ingenuè profitear, non sum tamen ita credulus, ut te distinctiorem habere persuadeam; quòd neque movear supercilio, quo ita vis credi, neque tu alia ratione probare possis habere te reverà distinctam, quàm explicando cujusmodi sit; rem tantò tibi faciliorem, quantò vis ideam esse distinctiorem. Nunquam, inquis, *substantia instar accidentium concipi potest, nec suam realitatem ab iis mutuari*. Transis à concreto ad abstractum; Non dico ego substantiam esse concipive ut nudam extensionem, nudam figuram, nudum colorem; sed ut aliquid extensum, figuratum, coloratum. Quare & cùm dicis substantiam nunquam posse concipi instar accidentium, excipere licet, non posse substantiam ex opposito concipi unquam nisi instar accidentium, concretorum videlicet, ut sit sensus concipi semper ut quoddam Ens quodammodo extensum, quodammodo figuratum, quodammodo coloratum; tibi quoque incumbit declarandum, quænam alia sit illius distincta, & clara conceptio. Quod dicis substantiam suam realitatem ab accidentibus non mutuari, verum est; sed falsum est quod non mutuetur illam sui notitiam, quam in mentibus nostris habet; quatenus nos nihil de ea aut cognoscere, aut conjicere possumus, nisi interventu accidentium, mutationumque ipsius. An, & quomodo *Philosophi vulgò accidentia concipiant substantiarum instar, dicant vera alia*, heic non disputo, cùm satis mihi sit illa, substantiarum instar, divinitus esse, prout fide doceor in Eucharistico Mysterio. Non disputo etiam utrum sint Entitates solùm modales, ut olim defendi; nec posset hoc loco non inopportunè memorari: satis mihi est, quòd cùm jam de Ideis substantiæ, & accidentium quæstio sit, id de illis sentiam; & dicam, quod ratio, & intelligentia, seu sensus, ut dicunt, communis non respuat. An tu idem præstes, cùm ais;

nullam

nullam realitatem accidentibus tribui posse, quæ non ab Idea substantiæ desumatur, quasi notitia accidentium pendeat ex notitia substantiæ; & non potius notitia substantiæ ex notitia accidentium, alii viderint. De comparatione realitatis objectivæ, quam utrique Idææ attribuis, differetur non multò pòst.

Quod dicis te velle ut addidissem, undenam primi homines, à quibus attributa de Deo accepimus, ideam Dei habuerint; Velim ego scias me non addidisse, Primùm quia persuasus fui, ut te quoque persuasum habui, primam de Deo notitiam habitam fuisse ab ipso, met Deo revelante, seseque primis hominibus, à se creatis manifestante, ac illam deinceps propagatam fuisse in universos homines, atque aded ad te, & me usque. Quod tu verò præoccupans ais, *Si à Deo revelante, ergo Deus existit;* verè id quidem inferis; sed evertendo interim id ipsum, quod adstruere vis. Nam si Idea Dei est accepta à Deo revelante, sive per seipsum, sive per internuncios sese manifestaverit, id quidem arguit Deum esse, sed arguit tamen simul Ideam non innatam, ut tu contendis, sed revelatione habitam, & infusam. Deinde, quia tu non agebas de Dei notitia, quatenus per fidem, seu revelationem habetur, sed quatenus potest haberi ratione, seu naturali lumine, addendum non censui quemadmodum illi, qui destituti lumine, quo nos Religio sacra illustrat, Philosophati sunt de Deo, existimârint homines primos potuisse in Dei pervenire notitiam; quoniam credidi rem notissimam non posse abs te ignorari. Et si fecissem, nonne ipsulstasses, ut prius, meminisse debuisses me, *affari me heic mentem à rebus corporeis sic abductam, ut nequidem sciat ullos nunquam homines ante se existisse, nec proinde ipsorum autoritate moveatur.* Sed age, quoniam nunc tibi alia mens est, & ne videaris rem voluisse meas vires aded superantem, ecce in pauca contraham, quæ diffusissimè habentur apud vulgaratissimos authores. Hoc solum præmitto, etiam notitiam quam Ethnici Ethnicissimi habuere de Deo, gratiâ fuisse ipsius Dei, qui variis modis & argumentis homines invitât ad sui notitiam; ex quo fit ut illi fuerint inexcusabiles, quod Deum agnoscences ex operibus, non ut Deum glorificaverunt, sed evanuerunt in cogitationibus suis: stultè nempe existimantes sese ex seipsis factos sapienteris, qui reputare debuerant illam suam sapientiam esse Dei donum. Iam verò produnt ecce Authores, homines primos cum viderent Solem, Lunam, cætera Alstra *αἰὲρ ἡρώτα* incessanter currentia, vocasse illa *θεοὺς*, Deos, ac præ cæteris ipsum Solem, cujus cursus esset

III.
Quaratione videantur primi homines Dei ideam habere potuisse, se non habuere ingentiam; *Quæ ratio cinetur, qui habere se ingentiam putat.*

præsertim conspicuus. Tum quòd Solem agnoscerent summopere beneficium, censuisse illum circumambire terram, ut omnibus ex ordine nationibus benefaceret, ac appellasse rursus *θεὸν Δεὸν* *τοῦ τῆς θῆρας*, quòd & *videret* universa, & *providere* omnibus. Heine quia *DEVS* erat ipsis benefactor, attribuisse hoc *DEI* nomen, tam hominibus, quàm cæteris rebus, à quibus aliquod beneficium consequerentur; sicque non modo homines, ut Cererem, Bacchum, Herculem, dictos, habitosque in Diis; sed etiam fonteis, flumina, cætera ad vitam utilia. Ac inter homines quidem dignatos præsertim hoc nomine fuisse ipsos Principes, quoniam cùm plus possent, plus etiam benefacerent, veluti Iovem, & alios; imò & illos duxisse dignos, qui ut Sol imperium in cælo tenerent; unde sedem ipsis in cælo tribuerunt. Successisse proinde assentatores, imitatoresque illos Poëtas, qui cælum implerent hujusmodi Numinibus, innumersisque interim fabulis omnia commiscerent. Et cùm vellent Principes omnes, etiam pessimi, haberi in Diis, habitos fuisse noxios *DEOS*; aded ut cùm multiplicato *DEORVM* quasi Regno, distribuerentur eorum munia erga homines, habitus fuerit unus quasi Rex, cæteri quasi ministri, aut minores Dii, quorum ut aliqui conferrent beneficia, ita alii exigerent pœnas. Creditum fuisse proinde Mundum administrari, summi simul & minorum Deorum providentiâ (accedente potissimùm contemplatione ordinis, quo omnia vices suas obirent) & neque Eclipseis, neque Cometis, neque fulmina, neque monstra, neque ulla prodigia, neque omnino quicquam sine eorum dispositione, interventuque contingere. Cœpisse exinde philosophari aliquos, haberéque Mundum animalis instar, ut effectus omnes, qui attribuebantur *DEORVM* naturæ, uni veluti Animæ per totum fusæ tribuerentur, præcipua quadam illius parte existente velut principio, à quo regimen dictaretur; reliquis existentibus veluti facultatibus, per quas omnia peragerentur. Hac occasione Legumlatores, cùm viderent esse homines malignos, qui suppliciorum quidem metu abstinere palam, non abstinerent tamen clam ab inferendis injuriis; induxisse eam persuasionem, quòd Divina natura secretiora omnia permearet, occultaque etiam observaret scelera, quæ nisi in hac vita, in inferis saltem puniret per furias, suppliciâque illeic parata. Sed hæc prosequi nihil est necesse, ut neque percurrere specialiores quasdam Aristotelis, Democriti, cæterorumque vias, aut modos; Ista, ut præsertim vulgaria, attigisse sufficiat, quo videas potuisse primos homines

Ideam.

Ideam quandam DEI habere, etsi non haberent, ut tu vis, innatam. Quare & nihil prodest tibi querere, *Si illi à seipsis haberunt, cur non etiam nos habere à nobis possimus*: Quippe vides tibi responderi posse, neque illos habuisse à seipsis, neque etiam nos habere à nobis; Sed & illos potuisse, & nos posse habere pari argumento, hoc est, ex inspectione Solis, ordinisque universi, in quem nos DEVS respicere voluit, dum iussit nos attendere non ad Ideam ingentem, sed ad exercitum cælorum, ad arcum cælestem, ad opera cætera, ex quorum contemplatione agnoscamus, & benedicamus illum, qui ipsa creavit. Addo, post habitam aliquam de DEO notitiam, ejus Ideam à viris piis, sapientibusque excoli, qui nunc hoc, nunc illud commutent, addant, detrahant, prout agnoscunt, aut edocentur esse divinæ majestati magis consentaneum; ac te gloriari non debere, quod obtinueris ex te potius, quam ex aliis acceperis eam, quam jam habes de Deo Ideam, repræsentantem Deum summum, æternum, infinitum, omnipotentem, &c. ut prius quoque objectum fuit. Addo, tamen tu id dicas, ac fortè etiam persuadearis habere te talem Ideam non ex auditu, non ex inspectione corporum cælestium, aliarumve rerum externarum, non fore tamen auctoritatem, persuasionemve illam tuam principium ejus demonstrationis, cujus tantam fecisti spem; tamen illam existimes ratiocinio hoc stabilitam:

Si quis habens se in statu ignorantie per affectatam abstractionem comparato, dicat se agnoscere, ac persuaderi quod habeat Ideam, per quam summum aliquem Deum æternum, infinitum, omniscium, omnipotentem, rerumque omnium, quæ præter ipsum sunt, creatorem intelligat; absque eo, quod ipsam vel ex auditu, vel ex contemplatione rerum externarum acceperit; est illius auctoritas, ac persuasio germanum principium demonstrationis, qua probetur esse parem Ideam omnibus hominibus ingentem, non verò ex auditu, aut ex contemplatione rerum externarum acceptam.

Atqui ego me habeo in statu ignorantie per affectatam abstractionem comparato, & dico me agnoscere, esseque persuasum, quod habeam Ideam, per quam, &c.

Igitur mea auctoritas, ac persuasio est germanum principium demonstrationis, qua probetur, &c.

IV.
Dei, cum
infinite
sit, non ha-
beri ve-
ram ide-
am: Infi-
nitum
negatione
solum cog-
noscitur: Unde
sit Idea
ampliatio:
Injuria
negari fore
perpussil-
ium De-
um, si ma-
ior non sit
quam a
nobis in-
telligatur.

Circa id, quod dixi, eum, qui infinitum quid dicit, tribuere rei, quam non capit, nomen, quod non intelligit, admones, distinguendam esse intellectionem modulo ingenii nostri conformem, qualem de infinito nos habere unusquisque apud se satis experitur, à conceptu rerum adæquato, qualem nemo habet non modo de infinito, sed ne forte etiam de ulla alia re, quantumvis parva. Hoc verò prout heic dicitur, non modo esse verum consentio, sed exosculor etiam, maximoperèque commendo. Quod autem dicis me non distinguere; vide, an-non ipse potius re ipsa distinguam, tu id contentus dicere, tanquam præclarum aliquid; distinctionem tamen, re ipsa non teneas. Ego quippe distinctione admissa, nullam intellectionem, seu nullum conceptum adæquatum in hominibus comperio, etiam de re quantumvis parva, cuiusmodi est acari, cuius natura, generatio, compositio, vivificatio, motio, & id genus cætera, videntur mihi omnem humanam solertiam, sagacitatemque excedere insuperabilibus parasangis; Ac proinde fuisse verissimè dictum à Doctore doctissimo, *Divinum opificem ita magnum esse in magnis, ut in parvis minor non sit*. Quare tantum abest ut ego non distinguam Intellectionis modulum; quin potius nihil agnosco præter Modulum; & cum sit modulus respectu acari, quantum magis, putas, respectu Entis infiniti? Edè certè adducor, ut cum nulla sit proportio inter acari, & non totum modò Mundum, sed etiam infinitum Ens, existimem, Si is conceptus, quem formo de acaro intellectionis modulus sit, conceptum de Deo, seu Ente infinito, non modò non modulum, sed ne minimuli quidem modululi umbellissimam umbellulam esse. An tu perinde modulum teneas, aut te tenere existimes, verba tua satis declarant. Dicis verum non esse intelligi Infinitum per finis, seu limitationis negationem. Quasi verò ut vox Infiniti negationem finis, seu limitationis importat, non ita res illa cui tribuitur, intelligatur esse ejus diffusionis, ut maxima ejus pars nos lateat, ac eatenus solum concipiatur, quatenus ejus finis non est; ubi finis est nostræ conceptionis. Nempe quantumvis concipiamus rem non terminari, ubi terminatur conceptio; chaos tamen est, quod concipimus, eoque nos recipimus, ut dicamus nos quicquid id est, concipere non posse. Dicis è contra omnem limitationem infiniti negationem continere. Sed perinde est, ac si dicenti, Cæcum esse privatum visu, objiceret non ita esse, sed è contra videntem esse privatum cæcitate. Ac licitum quidem est tibi positivam rem duplici negatione explicare; verum illi qui negativam negatione explicant, non videntur non planius loqui. Quod dixi *Ideam repræ-*
sentam

sentantem perfectiones ex rebus finitis acceptas, mentēque ampliatas, & Deo attributas, non plus continere realitatis objectivæ, quàm habeant res ipsæ finitæ simul sumptæ; admittis tu quoque istas perfectiones ab intellectu nostro ampliari, ut Deo tribuantur. Quod autem rogas, an existimem illa, quæ sic ampliata sunt, non idèò majora esse non ampliatis? Nonne hoc est, quod sæpius dixi, ac notavi præsertim videri te decipi, quòd existimes plus esse realitatis, seu substantiæ in dilatata aliqua re, quàm in eadem, dum est contracta, ut in lamina, plusquàm in globo non dilatato, aut in reti, plusquàm in tela, ex cujus filis contextitur; aut in Byrsæ arcis circumductu, plusquàm in corio integro: Et rursus causam referens, quomobrem Ideam tantò confusiozem faciamus, quantò illam ampliamus magis, quasi intercepta inanitate, & facta distractione partium, quæ quòd propterea plures non sint; idèò plus quidem dilatationis habeant, sed non idèò plus realitatis, quæcumque illa sit, contineant; Quæris, unde esse possit facultas ampliandi perfectiones creatas, nisi Idea Dei, seu Entis majoris, sit in nobis? Sed cum non negem Ideam Dei esse in nobis, seu ex auditu, seu ex contemplatione sit, ut jam dictum est; cum admittam Dei esse beneficium, quòd habeamus facultatem ampliandi perfectiones creatas; Dico tamen non esse necessarium recurrere ad Ideam Dei, ut ingenitam, quo hujusmodi facultas id præstet. Præstat scilicet ea ratione, qua Deus talem fecit, ut Ideam Pygmæi ampliaret instar ideæ Gigantis; lapidis instar montis; Lacus instar maris, &c. Quippe vis nativa intellectus habenda non est minor ea vi, quæ est in manu, ut pastam diducat; in ore, ut vitrum exfufflando dilatet, & ita de cæteris. Negas perpsissimum fore Deum, si major non sit, quàm à nobis intelligatur. Sed ohe! ubi Modulus? Intelligitur, inquis, infinitus, atque infinito nihil majus esse potest. Sed iterum ohe! ubi Modulus? Nam infinitum quidem dicis, sed rem non intellectam dicis. Quippe aliqua quidem notio videtur huic voci subjecta; Verumtamen alia non est, quàm finis negatio in Ente, cujus positivam amplitudinem cum non capias, imò neque partem illius millesimam, imò neque centies milles millesimam, imò denique nullam, fateri cogaris voluisse te intelligere rem, quæ non potest intelligi, & nihil aliud posse te dicere de illa, nisi quòd infinita sit, hoc est inæstimabiliter excedens finitudinem tuæ perceptionis. Dicis me intellectionem cum Imaginatione confundere: Nempe quia dum requisivi qualem-nam liceret Dei essentiam imaginari, requirere potius debueram qualem-nam liceret intelligere? Verùm

non

non est, cur aliquid ad antedicta adjiciam, aut de voce ipsa contendam, quæ ut admodum propria, etymoque suo conformis, ita persamiliaris est. Tuum potius fuit dicere, cum Deum intelligeres, qualem-nam tuæ intellectiōni obversari experieris? An non quasi quandam auram ubique, & absque fine diffusam, tenuissimam, purissimam, simplicissimam, lucidissimam, cui competere esset intelligentissimam, potentissimam, optimam, &c. Et nisi hoc modo, aut formā humanā, quadam certè alia; cum illius Ideam haberes secus, quàm in puncto, quàm expertem similitudinis, naturæve imaginis. Non sanè quod propterea censeret Deum hujusmodi esse, sed quod non alium conciperes; & cum non posses concipere, qualis in se esset, interim tamen qualem posses, tibi ipsi representares, ut fieret objectum, de quo aliquid negares, aut assereres. Ego saltem simpliciter, ac bona fide id quod experior, quodque non experior, enuncio, neque meæ me ignorantia pudet; Tu, si secus tibi videatur, perge agere, ut videbitur.

D V B I T A T I O V.

De illo effato, Nihil est in effectu, quod non sit in causa, intelligendo de causa materiali: & quatenus verum esse possit, tantum saltem esse debere realitatis formalis in causa ideæ, quantum objectivæ in idea est.

Assumis consequenter manifestum esse naturali lumine tantumdem ad minimum debere esse in causa efficiente & totali, quantum in effectu est: idque ut inferas, tantumdem saltem esse debere realitatis formalis in causa Ideæ, quantum objectivæ in Idea est. Passus nempe hic etiam grandis, & in quo non-nihil consistendum sit. Primò vulgare illud dictum, nihil esse in effectu, quod non sit in causa, videtur debere potius de materia, quàm de efficiente intelligi. Quippe efficiens externum est, & diversæ plerumque naturæ ab effectu. Et quamvis effectus dicatur habere realitatem ab efficiente; habet tamen, non quam efficiens habeat necessariò in se, sed quam mutuari aliunde possit. Patet res perspicuè in effectu artis. Nam quamvis domus habeat totam suam realitatem ab artifice; artifex tamen illam non à se, sed aliunde acceptam tribuit. Idem facit Sol, cum materiam inferiorem variè commutat, variæque animalia

malia procreat ; imò etiam parens , à quo licèt proles habeat materiæ aliquid , illud tamen non ut à principio efficiente, sed ut à materiali habet. Quod objicis , *esse effectus debere vel formaliter , vel eminenter contineri in causa* , nihil amplius arguit , quàm effectum aliquando habere formam similem formæ suæ causæ , aliquando dissimilem , & imperfectiorem quidem , ad eò ut forma causæ supra illam emineat. Sed non sequitur ut propterea vel *eminens* causa det aliquid de suo esse , vel quæ continet formaliter , partiatur suam formam cum effectu : Nam & quamvis id fieri videatur in generatione viventium , quæ est ex semine ; non dices tamen , opinor , patrem , cùm generat filium , refecare darèque illi rationalis animæ partem. Vno verbo , causa efficiens non alia ratione continet effectum , quàm quatenus illum ex certa materia adumbrare potest ac perficere. Deinde circa illud quod infers , *de realitate objectiva* , exemplum usurpo imaginis meæ , quæ spectari potest , vel in speculo cui me objicio , vel in tabula quam pictor adornat. Ut enim ego ipse sum causa imaginis in speculo , quatenus ex me emitto mei speciem in speculum , & pictor causa imaginis , quæ exhibetur in tabula ; ita cùm Idea , vel imago mei sit in te , vel quovis alio intellectu , quæri potest , an ego ipse sim causa illius , quatenus emitto mei speciem in oculum , & intercedente oculo in ipsum usque intellectum ; an verò sit causa quæpiam alia quæ illam quodam quasi penicillo, stylove in intellectu delineet. Videtur porrò non alia causa præter me esse requirenda : nam & quamvis postea intellectus mei Ideam ampliare , minuere , componere , alia ratione tractare possit ; ipse sum tamen causa primaria totius realitatis , quam illa habet in se : & quod heic dicitur de me , idem intelligendum est de quolibet objecto externo. Iam realitas illa Ideæ distinguitur duplex per te ; & formalis quidem alia esse non potest , quàm tenuis illa substantia , quæ ex me effluxit , & in intellectu recepta , inque Ideam conformata est. (Nisi velis autem speciem ex objecto procedentem effluxionem esse substantialem , fac quodcumque lubuerit , realitatem semper imminues.) Objectiva autem nihil esse potest præter repræsentationem seu similitudinem mei , quam gerit Idea : aut certè præter symmetriam , qua partes Ideæ ita disponuntur , ut me referant. Quocumque modo acceperis , nihil esse quidem reale videtur ; quoniam est sola relatio partium inter se , & ad me , vel modus realitatis formalis , quatenus hoc modo conformata est : sed nihil refert ; dicatur , quia placet,

R

realitas

realitas objectiva. Hoc posito, videreris tu quidem debere comparare realitatem formalem Ideæ cum realitate mea formali, seu cum mea substantia: & realitatem objectivam Ideæ cum symmetria partium mei, seu delineatione & forma externa: at placet tamen tibi comparare realitatem objectivam Ideæ cum realitate mea formali. Porro quicquid sit de explicatione superioris axiomatis, patet non modò esse in me tantundem realitatis formalis, quantum est objectivæ in mei Ideæ; sed realitatem etiam formalem Ideæ, nihil penè esse respectu meæ formalis, seu totius meæ substantiæ. Quocirca & tibi concedendum esse, *tantundem saltem esse debere realitatis formalis in causa Ideæ, quantum objectivæ in idea est*, quando totum quicquid in Idea est, nihil penè est comparatione ipsius causæ.

R E S P O N S I O.

M *Utra hic dicis ut mihi videaris contradicere, nec tamen ullo modo contradicis, cum planè idem quod ego concludas. Sed tamen multa hinc inde permisceas, à quibus valde dissentio, ut quod axioma, nihil est in effectu quod non præextiterit in causa, de causa materiali potius quàm de efficiente sit intelligendum, nunquam enim perfectio formæ in causa materiali, sed in sola efficiente præexistere potest intelligi; & quòd formalis realitas Ideæ sit substantia, & talia.*

I N S T A N T I A.

I.
Haud jure
relinqui
regiam vi-
am, qua
Dei existi-
scentia
probat
ex effecti-
bus in uni-
verso ma-
nifestis; ut
per voca-
tam obje-
ctivam I-
deæ reali-
tatem pro-
betur: Re-
alitäts
vocem im-
proprie u-
surpavi.

E Rras, si me existimas tibi aliquid objecisse contradicendi animo, aut ut contradicere viderer. Feci amicè, quòd te amicè excepturum non diffidebam, hoc est, proposui dubitationes, de quibus te velle moneri putabam; Vnde & principia expendi, & quæ tu dixeras obscurè, experiri volui, an satis intelligerem; ac proinde vel vera, vel nihil obstantia admisi, ut hærerem. solum vel falsis, vel dubiis: sicque me hoc loco potissimum gessi. Tu verò ita excepisti ut qui rixantur in Scholis solent: dum me amicè accedentem intuitus es torvè, quasi inimicum; & me officiosè aliquid largiente, videri voluisti quasi vi herculeæ à reluctante id extorsisse. Age porrò ecquidnam est, in quo me non contradixisse; & conclusisse tecum gloriaris? Nempe conclusi, *tantundem saltem esse debere realitatis formalis in causa Ideæ, quantum objectivæ in idea est*. Ego verò cum id conclusi, juxta expositionem antecedentem conclusi;

clusi; & cùm dicis me nullo modo tibi priùs contradixisse, tibi ipse statim contradicis, cùm ais, dissentire te valde ab eo, quòd præmissi, Effatum illud intelligendum potius, quàm de efficiente causa, &c. Et agnosco sanè quid velis; sed, ut hoc præmoneam; Cùm probanda foret Dei existentia ex quibusdam operibus, quorum causa agnosceretur, tu non potuisti quidem aliud, quàm petitum ex dependentia effectus à causa argumentum excogitare; at deservisti tamen viam Regiam, quam & Scriptura indicat, & Sapientes omnes sectantur; videlicet contemplationem admirabilis universi; & per nesciò quam somnii, deceptionis, delusionis semitam, subduxisti te ex ipso universo; videlicet ipsum & quicquid esset præter te, falsum esse existimans; ac falsum simul quicquid ex eo, & præter te deduceretur. Quæsiisti ergo in teipso aliquem effectum, cujus si nullam posses causam, præter DEUM agnoscere, existere Deum exinde probares: Et quia ipsa Dei Idea occurrit, idèd visum est circa illam totum opus impendere. Ac videbas quidem te illam habere ex auditu, ac meditatione, & ex conversatione usque cum hominibus habita; neque enim, licèt voluisses, exuere planè potueras ideas rerum priùs visarum, auditarum meditatione formatarum; sed te tamen sic habere voluisti, quasi nullas planè haberes Ideas ex rebus, essetque tibi liberum, ut disquirereres, an non aliunde potius, quàm ex rebus haberes, ut quas non esse supponeres. Tum quia hujusmodi Idea videbatur esse miræ tenuitatis sustinendæ moli, tanti ponderis, idèd corroborandam censuisti distinctione illa realitatis duplicis, formalis, atque objectivæ, cujus inventionem ita es gloriatus, ut censueris posse eà solà, ceu Equo Durateo llium expugnari. Cæterùm ut nihil heic dicam nec de via Regia relicta, nec de delusoria illa semita, nec de falsa suppositione, quòd existimes te non accepisse Ideas ex rebus; nec de incapacitate demonstrandi quod te aliquid de te referente auctoritas tua pro principio demonstrationis habenda sit; Quæso circa tuam distinctionem (ex qua si quidpiam sis probaturus, non aliis, sed tibi probaturus sis) Quæso inquam, quid nomine *Realitatis* intellectum velis? Si dixisses *Entitatem*, idem, ut videtur, dixisses, & vocem tritam, saltem in Scholis tuo sensui accommodasses; at sapere placuit nihil nimis vulgare: Quid ergo Realitas est? Vox abstracta est, cujus concretum est Reale: Quid verò est id, quod Reale vocas? Reale vox est derivata, cujus primitiva est Res; Quid verò est Res? Quàm verèor ne vocem usurpâris,

quam non possis describere ! Sed hoc mittatur ; Nonne Res per te est sola substantia , cum quicquid præterea est , non sit Res , sed modus Rei ? Igitur id solum quod substantiale est Reale est , sicque sola substantialitas realitas erit ? Iam verò Idea per te , est-ne substantia ? dicis manifestè non esse , dicis manifestè esse Modum , imò & modum dicis non substantiæ , sed operationis , quæ ipsa est modus . Igitur Idea per te non est Res , sed modus duntaxat ? Igitur quod erit Ideale , Modale quidem dici poterit , sed non tamen Reale ; & ipsa Idealitas erit quidem Modalitas ; sed non poterit Realitas dici . Igitur haud bene distinguis in Ideâ Realitatem duplicem , quæ ne ullam quidem Realitatem habet . An dices de Idea , quod universè de accidente dixisti , totam ejus realitatem , sive entitatem modalem ab Idea substantiæ , (dicendum fuit à substantia) desumi ? At cum Idea spectari possit vel quatenus Idea est , seu est repræsentativa objecti ; vel quatenus unà cum operatione , cujus est modus , coheret cum mente , seu operante substantia ; poterit quidem dici habere realitatem posteriore modo , sicque ad summum habebit eam , quam realitatem formalem dicis ; at priore nullam habebit , sicque haud bene appellabis realitatem objectivam . An dices modalitatem posse analogicè appellari realitatem ? Sed cur relinquas proprium , congruumque nomen modalitatis , usurpes verò improprium , & incongruum Realitatis ?

II.
Videri ideam cum sua realitate obiectivâ , sese habere ut figuram ac impressam eam suâ sigilli repræsentatione ; adeo ut quemadmodum figura repræsentativa est , sigillum repræsentabile : sic idea habeat realitatem obiectivam , seu repræsentationem causâ ; ipsa causâ realitatem formalem , seu repræsentabilem.

Vno verbo , cum non labores de Realitate Idææ formali , sed sola Realitas objectiva esset cordi , quid necesse fuit tum ea distinctione offunderè tenebras , tum obtrudere vocem illam Realitatis objectivæ , cujus loco poteras dicere similitudinem , repræsentationem , aut esse repræsentativum , vel quid simile , ut explanatius res diceretur ? Ego ut dicam , si quid percipio ; cum tu nolis Ideas , seu species ac imagines rerum ita dimanare in nos , ut quidpiam realitatis formalis ex earum substantia retineant , ac nolis proinde eam imaginem quæ dicitur Idea confurgere , fieri , aut esse in mente per modum picturæ , seu quomodo imago per applicationem colorum depingitur in tabula ; Superest ut censeas eam imaginem , quæ dicitur Idea , confurgere , fieri , aut esse in mente per modum impressionis , seu quomodo Imago per applicationem sigilli in cera imprimitur . Dices statim me nimis carneum , qui rerum corporarum instar res mentales concipiam . Sed , ô bone , discrimen hoc puto inter te , & me , quod cum uterque eodem modo concipiamus , ego bona fide modum explicem , neque opinionem facere velim .

velim, quodd subtiliorem modum concipiam; tu eundem modum non agnoscas, & cum subtiliorem non reveles, videri tamen velis, habere subtiliorem. Hoc certè loco, aut longè fallor, aut non aliam habes imaginationem, quàm figuræ in re molli à sigillo impressæ; videlicet omnia, quæ dicis huic imaginationi conformia sunt; at fateri tamen non vis, imò neque mentionem facere ejus similitudinis, quam habes in mente, ne faciliè nimis res mentales corporearum instar intelligere convincaris. Certè etiam quod spectat ad Ideam Dei, non videris posse, aut habere illam ut notam impressam, aut concipere causam imprimentem; aut intelligere conservationem notæ impressæ ex impressione incessante per causam imprimentem facta, modo ullo magis mentali, ac Seraphico, quàm D. Bonaventura, dum usus est similitudine notæ, seu figuræ, quæ ita in aqua à sigillo imprimitur, ut quo momento sigillum definit imprimere, notæ, seu figura prorsus evanescat. Vt cumque sit, & cum universa nostra Philosophia, (quæ nostra est infirmitas) in comparandis rebus consistat, Neque enim rem incòmpertam ex alia comperta deducere possumus, quin ad simile aliquid, ac magis notum referamus; mirari non debes si ego infirmitatis conscius, comparando philosopher, ac censeam res à me conceptas non posse meliùs explicari aliis, quàm si ipsis easdem, quibus ipse uttor, comparationes, seu similitudines, palàm faciam. Heinc seu assequar mentem tuam, seu non assequar, imaginabor saltem te concipere Ideam veluti figuram in cera impressam, & causam Ideæ, veluti sigillum, à quo figura impressa sit. Nempe contendis *causam Ideæ nihil transfundere de sua realitate actuali, sive formali in Ideam*; non transfundit verò etiam aliquod sigillum in figuram impressam, (idque quicquid demùm voces actualem, formalemve realitatem; seu nempe substantiam, seu potiùs formam ipsam repræsentabilem, qualis est in sigillo forma externa, seu figura & similitudo repræsentabilis per figuram impressam.) Dicis *ideam esse talis naturæ, ut nullam aliam ex se realitatem formalem exigat, præter illam, quam mutuatur à cogitatione, cujus est modus*: talis verò etiam est natura figuræ, ut non aliam exigat quàm ipsius ceræ, sive substantiæ, cujus est modus. Subdis, *quod Idea realitatem objectivam hanc, vel illam contineat, poriusquàm aliam, hoc profectò habere debere ab aliqua causa, in qua tantundem sit ad minimum realitatis formalis, quantum ipsa continet objectivæ*: Quod verò figura hanc vel illam si similitudinem, seu repræsentationem, potiùs quàm aliam habeat, debet hoc profectò ha-

bere ab aliquo sigillo, in quo tantundem sit ad minimum repræsentabilitatis, quantum ipsa continet (ita loqui liceat) repræsentativitatis. Scilicet potest quidem sigillum multa præterea alia repræsentabilia continere; (ut si ex parte solum fuerit cera applicitum) at figura nihil potest habere repræsentativum illius, quod, ab ipso non habeat, quodque saltem in eo, ut repræsentabile non sit. Ad dis, *quemadmodum modus essendi objectivus competit Ideis ex ipsarum natura, ita modum essendi formalem competere Idearum causis ex earum natura*: quemadmodum verò modus essendi repræsentativus competit figuræ ex sua natura; ita & sigillo modus essendi repræsentabilis ex sua natura. Sequitur, *Quamvis foris una Idea ex alia nasci possit, non tamen hic dari progressum in infinitum, sed tandem ad aliquam primam debere deveniri, cujus causa sit instar archetypi, in quo omnis realis formaliter contineatur, quæ est in Idea tantum objectivè*; Quamvis verò una figura ex alia nasci possit (ut si cera figurata, & indurata imprimatur materiæ molliori) non tamen datur processus in infinitum, sed tandem ad aliquam primam debet perveniri, cujus causa, seu sigillum, à quo est facta, sit instar archetypi, in quo omnis similitudo repræsentabiliter contineatur, quæ est in figura tantum repræsentativè. Concludis *Lumine naturali esse tibi perspicuum ideis in te esse veluti quasdam imagines, quæ possint quidem facile deficere à perfectione rerum, à quibus sunt desumptæ, non autem quicquam majus, aut perfectius continere*: Lumine verò naturali perspicuum est figuram esse velut imaginem, quæ possit quidem facile deficere à perfectione sigilli, à quo fit (ut si cera sit granulosa, aliasve impura, aut non satis mollis) non autem quicquam majus, aut perfectius continere, (seu repræsentare ex sigillo) valeat. Quorsum porro hæc omnia? non alio fine, quam ut intelligamus, quò respexeris, respicereve potueris, cum tuam illam realitatem objectivam obtrulisti, cujus loco si similitudinem, repræsentationem, aut quid simile visum fuisset dicere, perinde dixisses, & clarius dixisses.

III.
Dissimulatus difficultates fuisse: & quatenus verum, aut non verum sit, præexistere effectum in causa; ut de objectiva idea realitate concludatur.

Videamus jam quo apparatu, ac molimine machinam commoveas. Iam verò, inquis, *Lumine naturali manifestum est tantundem ad minimum esse debere in causa efficiente, & totali, quantum in ejusdem causæ effectui*; Nam quæso undenam posset assumere realitatem suam effectus, nisi à causa? Et quomodo illam ei causa dare posset, nisi eam haberet? Hinc autem sequitur nec posse aliquid à nihilo fieri, nec etiam id, quod magis perfectum est, hoc est, quod plus realitatis in se continet, ab

eo, quod minus. Quis nō expectaret hoc loco effectum quantus est universus Mundus? videlicet ad demonstrandum perfectionem divinæ causæ, quæ tot tantasque perfectiones universo indidit Mundo? Tu tamen pro effectu accipis non totum Mundum, non Solem, non terram, non hominem, non mentem, nō substantiam ullam, imò neq; operationem ullius substantiæ, atque aded ne mentis quidem; sed solum, ac simplicem modum operationis ipsius mentis; tamen neq; integrum illum, seu prout esse formale habet, sed qua parte solum habet objectivum. Intermiscuisti autem vocem realitatis, ut tibi viam sterneret ad attribuendum id nominis Idææ objectivè acceptæ. Sed de nomine quidem dictum jam est, & de ipsa re paulò post dicetur. Nunc cum dicere suffecisset, *Tantumdem ad minimum esse debere in re sui imaginem imprimente, quantum in imagine ipsa impressa*: Placuit tamen longiore circuitu & ab universaliori effato, eò, quod tendebas, accedere. Ac ipse quidem, effatum illud, quoddum fuerit ritè acceptum, videatur esse verissimum, universè non improbavi; sed prout abs te propositum fuit, difficultates opposui, quas tu solertissimè declinasti pro more. Dixeras tu manifestum esse naturali lumine tantundem ad minimum esse in causâ efficiente, quantum in effectu: Ego ut ostenderem manifestum non esse, opposui debuisse te potius loqui de causâ materiali, quàm de causâ efficiente; & exemplo rem declaravi in artis, naturæque effectibus. Tu deinceps nihil ad hoc, sed dixisti solum te à me valde dissentire, quia nunquam formæ perfectio in causâ materiali, sed in sola efficiente præexistere intelligi possit. Sed ut præteream quàm constanter pares tibi suffugia ex ipsa ratione loquendi, cum non formam dicis, de qua, ut parte effectus, seu substantia, seu accidens, seu modus, seu quicquid deniq; sit, erat potissimum dicendum; sed perfectionem formæ, ex qua phrasi non possis nihil non comminisci. Vt hoc, inquam, præteream, nonne oportuerat responsonem adjicere, nisi ad alia, saltem ad id, quod fuerat de Insectorum à Sole, productione objectum? Nonne explicandum, quomodo vel forma, vel anima ranæ in Sole præexistat? & nisi anima, saltem perfectio hujus animæ, non extrinseca illa quidem (ne ad aliquid recurras, quod extrà cum sit, nihil ipsius sit, tantum abest, ut sit perfectio) sed omninò intrinseca, & quæ sit essentialiter ipsamet, aut certè aliquid ab ipsa non plusquàm modaliter, & consideratione distinctum? Nonne explicandū, inquam, quomodo in Sole, potiusquàm in materia, materialibusve principiis (qualia non negem aliqua, utpote corpuscula Lucis ex

Sole

Sole usque advenire) quæ ex varia sui permissione, adjectione, deductione, transpositione, &c. videantur posse nunc hanc, nunc illam, nunc aliam exhibere formā, illiusve perfectionem; eodem modo, quo dum statua, aut domus, aut quidvis aliud per artem fit, tota forma, perfectioque ejus intelligitur præexistisse in materia, quatenus oportuit duntaxat aliquid ipsius detrahere, addere, transmutare, &c. aded ut nihil planè in effectu sit, quod nō antea potuerit demonstrari in ipsa materia? Addo me ex abundanti admisisse modum loquendi vulgarem, quo Materia dicitur causa; quandoquidem propriè loquendo solum efficiens causa est; aded ut causa, & efficiens Synonyma sint, & utraque vox significet principium, à quo, & materia, nihil aliud, quàm materia fit, & significet principium ex quo. Aduoto verò, ut insinuem, quàm facile nobis circa res ipsas imponatur, nisi circa voces satis attenti fuerimus. Hoc certè loco nemo non dicit Effectum præexistere in causa; Et tamen Primò effectus non præexistit, quoniam, si præexistet, existeret, cùm non existit tamen supponatur. Secundò, neque præexistit, neque existit unquam in causa; sed existit solum, sive fit à causa; idque eo tempore, quo fit; Nam de antecedente dicitur solum fieri potuisse, & consequente factus fuisse à causa. Tertiò neque præexistit, existitve quidem in ipsa materia, sed existit solum, ieu fit ex materia, & eo quidem tempore, quo existit, aut fit; nam antecedente, aut consequente dicitur solum fieri potuisse, & factus fuisse ex materia. Quartò proinde dici non potest aliquid effectus præexistisse in materia, sed fuisse potius ipsa materia: siquidem materia non fuit suiipsius subjectum, sed ipsamet sua entitas. Addo rursus, me non abs re dixisse, tamen interdum effectus habeat aliquid de efficientis materia, ea ratione tamen ab ipso non ut ab efficiente, sed ut à materiali principio pendere. Innuere enim volui, cùm Efficiens hujusmodi est, ut rescare aliquid ex se ipso non valeat, tum nihil planè, quod in effectu sit, præexistisse in efficiente; qua ratione se habet effectus artis respectu artificis, ac se habere debet effectus naturæ respectu causæ immaterialis. Ex quo fit ut tales effectus dici possint præ cæteris non tam in causa, quàm à causa esse; & consideratione translata ad tempus productionem antecedens, non tam debeant dici præfuisse in causa, quàm esse, vel fieri potuisse à causa. Dicere certè fuisse in potentia activa causæ, eo tantum sensu probari potest, quod potentia ipsius productrix fuerit in causa; cùm aliunde nihil effectus neque in potentia causæ,

causæ, neque in causâ fuerit; & quod dicitur fuisse formaliter, vel eminenter, tum hoc sensu accipi debeat, tum adungi debeat interpretatio in Dubitatione exposita. Dicere etiam fuisse in intellectu causæ propter Ideam, eo tantum sensu potest admitteri, quod ejus faciendi Idea in intellectu causæ fuerit; cum alioquin effectus neque sit ipsa Idea, neque omnino aliquid, quod in intellectu extiterit, sed quidpiam planè extra ipsum. Vtcumque sit, En ut non graver idem planè quod tu iteratò concludere:

Tantundem ad minimum realitatis formalis, seu similitudinis representabilis debet esse in causâ, seu re imaginem sui imprimens, exempli gratiâ in sigillo, quantum est realitatis objectivæ, seu similitudinis representativæ in ejus effectus, seu imagine, exempli gratiâ in figuracæ à sigillo impressa:

Atqui datur causâ imprimens in mente Ideam, seu imaginem sui; ipsâque Ideâ, seu Imago in mente impressa est effectus illius causæ:

Igitur tantundem ad minimum debet esse realitatis formalis, seu similitudinis representabilis in causâ Ideâ, quantum est realitatis objectivæ, seu similitudinis representativæ in ipsa Ideâ.

D V B I T A T I O VI.

De non habente ex se sui ipsius ideam Mente (quæ non videatur posse seipsam magis intelligere, quàm oculus seipsum videre)
Et neque Dei, neque Angelorum, neque corporearum
potissimum rerum.

Subsumis, si in te sit Idea, cujus realitas objectivâ sit tanta, ut nec eminenter, nec formaliter illam continueris, atque adeò illius causâ esse non poteris; tum demum sequi necessariò existere aliquid præter te in mundo: cum secus careas argumento, quo certius reddaris esse aliquid. Verum ex jam dictis, tu causâ non es realitatis Idearum; sed ipsæmet res per Ideas representatæ, quatenus emittunt imagines sui in te, ut in speculum: licet tu ex ipsis occasionem possis aliquando sumere chimærarum depingendarum. Sed seu ipsa sis causâ, seu non; an propterea incerta es, esse aliquid præter te in mundo? Bona verba.

S

. quæso :

quæso : nam opus non est , ut , quicquid de Ideis sit , argumenta ad id quæramus. Percurris deinceps *Ideas quæ in te sunt , ac præter ideam tui , numeras Ideas Dei , rerum corporearum , inanimatarumque , Angelorum , animalium , hominum* : idque , ut cum de Ideâ tui difficultatem non esse dicas , inferas *Ideas hominum , animalium , Angelorum , componi posse ex iis , quas habes tui , Dei , rerum corporalium* : & *Ideas rerum corporaliū potuisse quoque à te proficisci*. Hoc verò loco mirari subit , quid dicaris habere Ideam tui , (& fecundam adeò , ut ex illa possis tot alias depromere) ac rem carere difficultate : cum reverâ tamen aut Ideam tui nullam habeas , aut illam admodum confusam atque imperfectam , prout jam observavimus in superiore Meditationem. Et inferebas tu in illa , nihil posse facilius , atque evidentius à te percipi , quàm teipsam : Quid si , cum non habeas , nec habere possis tui Ideam , dicaris posse quidvis aliud facilius , atque evidentius , quàm teipsam percipere? Cogitanti certè mihi quorū fieri possit , ut neque visus seipsum videat , neque intellectus seipsum intelligat ; illud in mentem subiit , quod nihil agat in seipsum : quippe nec manus (aut in ipsa digitus summus) se verberat ; nec pes sibi calcem impingit. Cum aliunde verò ad notitiam alicujus rei eliciendam , necesse sit rem agere in facultatem cognoscentem ; immittere nempe in illam sui speciem , sive sui specie illam informare : perspicuum videtur ipsam facultatem , cum extra seipsam non sit , non posse illam sui speciem in seipsam transmittere , neque sui notitiam consequenter , elicere , sive , quod idem est , percipere seipsam. Et quare putas oculus , cum se in seipso non videat , videt tamen in speculo ? Nempe quia inter oculum , speculumque est interstitium , & oculus ita agit in speculum , immittens in illud sui speciem , ut speculum in ipsum reagat , propriam ejus speciem in illum remittens. Dato mihi porrò speculum , in quod ipsa perinde agas ; spondeo fore , ut eo reflectente in teipsam tui speciem , tum demum te , non directâ quidem , sed reflexâ tamen cognitione percipias : quousque autem non dederis , spes non est , ut teipsam nôris. Possem heic quoque insistere , quid dicaris habere Ideam Dei , nisi fortè qualem , & quo modo jam diximus? Quæ Angelorū? de quibus nisi aliquid audiisses , nescio an unquam cogitasses? Quæ animalium , cæterarumque rerum , quarum , si in sensus non incidissent , penè certus sum te nullas Ideas fuisse habituram : ut & nullam habes innumerarum rerum , quarum ad te neque adspectus , neque fama pervenit? Sed his dimissis , illud admitto , Ideas diversarum rerum in mente existentis ita posse com-

com-

- componi , ut plures aliarum formæ cooriantur , tametsi quas enumeras , non videantur sufficere ad istam tantam diversitatem ; imò neque ad distinctam , determinatamque certæ cujuscumque rei Ideam . Hæreo autem solum circa Ideas rerum corporearum , quodd difficultas non parva sit , quomodo ex sola tui Idea , dum te pro incorporea geris , teque ut talem consideras , eas deducere ex te possis . Nam si solam substantiam incorpoream nosti , quomodo fieri potest ut capias præterea substantiam corpoream ? Est-ne aliqua inter hanc , & illam analogia ? Dicis utramque convenire in eo , quodd sit apta existere : at ista convenientia non intelligitur , nisi prius res utraque quæ convenit , intelligatur . Notionem quippe communem facis , quæ priusquam formetur , oportet particularia intelligi . Profecto si ex intellecta substantia incorporea potest intellectus formare Ideam substantiæ corporeæ : non est cur dubitemus quin cæcus , vel qui à nativitate detentus fuerit in densissimis tenebris , formare apud se Ideam & lucis , & colorum possit . Dicis posse consequenter haberi Ideas extensionis figuræ , motus , aliorumque sensibilem communium : sed facile nimirum dicis . Id mirum , cur non lucem , colorem , alia , facilitate pari deducas : verum immorandum in istis non est .

R E S P O N S I O .

S I quid haberes ad existentiam rerum materialium probandam , procul dubio hic attulisses , sed cum tantum interroges , an ergo mea mens incerta sit esse aliquid præter se in mundo ; & singas non opus esse ut argumenta ad id quæras , atque ita provoces tantum ad præjudicatas opiniones ; multo clariùs ostendis nullam te ejus quodd affirmas dare posse rationem , quàm si omnino tacuisses . Quæcumque verò hic disputas de ideis non egent responsione , quia tu nomen ideæ ad solas imagines in Phantasia depictas restringis ; ego verò ad id omne quodd cogitatur extendo . Sed obiter quærere libet quo argumento probes , nihil agere in se ipsum ? Nempe non soles uti argumentis ; hoc autem probasti exemplo digiti , qui seipsum non verberat , & oculi qui se in seipso non videt , sed in speculo . Quibus facile est respondere non esse oculum , qui speculum videt magis quàm seipsum , sed mentem quæ sola & speculum , & oculum , & seipsam quoque agnoscit . Atque etiam dari possunt alia exempla in rebus corporeis , ut cum turbo se in gyrum vertit , nunquid ista conversio actio est quàm in seipsum exercet ? Denique notandum est me non affirmasse , ideam rerum materia-

S a

lium

lium ex mente deduci, ut non satis bona fide hic fingis; expressè enim postea ostendi ipsas à corporibus sæpe advenire, ac per hoc corporum existentiam probari: hic verò tantum exposui, nullam in iis tantam realitatem inveniri, ut ex eo quod nihil sit in effectu, quod non formaliter, vel eminenter præxistit in causa, concludi debeat illas à sola mente non potuisse proficisci, quod nullo modo impugnas.

INSTANTIA.

I.
Non ineptiendum.
Difficultates declinatas fuisse. Omnem ideam esse imaginem; quare in intellectu, non minus quam in imaginatrice, imaginem esse.

QUAM velles me facerem ineptum, si tui instar dubitarem esse aliquid præter me in mundo, & ad probandum aliquid esse, rationes alias, quàm evidentiam aut conquirerem, aut afferrem. Tu ut voles, somniato, decipitor, deluditor, quocumque lubebit modo caveto, ne te versari nobiscum putes, nos alloqui, ad nos scribere, &c. Ego agere pergo bona fide, qui in Mundo, seu Natura rerum tam multa obscura, & perscrutatione digna invenio, ut nimis puerile, & ridiculum putem res aded apertas vertere indubium, & in ipsarum existentia comprobanda terere tempus. Et dicito me nihil aliud, quàm interrogare; dicito provocare me ad opiniones præjudicatas; dicito me nullam habuisse rationem; dicito satius fuisse ut tacerem; non extorquebis tamen à me, ut esse ineptiendum putem. Ad rem potiùs ipsam; Dicis quæcumque hic disputo de Ideis non egere responsione: Sed perspectum jam artificium, quo, dum nihil habes, quod respondeas, nihil esse dignum responsione dicis. Causam subdis, *Quia nomen Ideæ ad solas imagines in phantasia depictas restringam, tu ad id omne, quod cogitatur, extendas.* Quàm verò cautè scopulum declinas! Videlicet postquam dixisti restringere me Ideæ nomen ad imagines in phantasia depictas (quod tamen non feci) cavisti acutissimè ne subjiceres te extendere ad imagines in mente depictas; quas non exclusas à me novisti, & de quibus par, aut eadem potiùs fuit difficultas; sed obliquando subjecisti te extendere ad id omne, quod cogitatur. Quæso te verò, quicquid cogitatur, nonne est objectum cogitationis? Istud verò objectum, nonne objicitur, & quasi obversatur menti cogitanti? Et istud nonne objicitur, obversaturque sub aliqua, nisi phantastica, saltem mentali imagine? & ista imago nonne erit Idea? Et reciprocè ista Idea nonne erit imago in mente existens? Et nonne tu quoque, ut est adnotatum, dixisti ea tantum, quæ cogitantur ut imagines, esse propriè ideas? Proba igitur ecquasnam ex omnibus imaginibus ideas esse non admitterim.

serim ad phantasiam, reduxerim ad mentem; sive ad id omne, quod cogitatur, non extenderim. Sed hoc nempe te angit, quòd cum nihil possit objici, sive obversari menti cogitanti, nisi tanquam imago; videas talem imaginem esse semper speciem corpoream, atque adeò rem cogitatam non exhiberi menti, nisi sub specie corporea; quomodo nobis non exhiberi substantias incorporeas tu persuadere adnixus es, ut inferre posses illarum notitiam ex corporearum notitia non proficisci, aut dependere.

Quæris deinde obiter, quo argumento probem nihil agere in seipsum; nempe qui non soleam uti argumentis? Sed mihi quidem visum est superfluum argumentum subjicere, ubi tam manifestum fuit actionem, & passionem, idem esse cum motu: adeò ut cum omnis motus habeat terminum à quo, & terminum ad quem, ut loquuntur, ipsa actio sit ab agente, tanquam à termino à quo, & passio sit in patiente, tanquam in termino, ad quem; sintque agens, & patiens proinde distincta, quòd aliàs non essent duo termini, neque idcirco ullus motus. Vnde & contentus fui adferre exemplum de manu; & ne cavillareris manum agere in seipsam, quatenus digito extremo volam pulsar (quanquam tunc non tota manus agit in seipsam, sed una pars manus in aliam) idcirco accepi exemplum de digito summo, qui se jam non pulset; & de calce, quæ utcumque possit in aliam partem ejusdem corporis impingi, non tamen in seipsam potest. Tu verò, quòd non omnia, quòd non superflua dixerim, ansam accepisti, quasi ab inexpectatò, ut tibi fidem faceres, dicenti me nullas adferre rationes, nullis uti argumentis, nihil objicere responsione dignum. Sed de me quidem alii viderint, qui nunquam mihi tam parùm tribuent, ut non plus æquo attributum censeam; Quod te adtinet, cum hoc loco reprehendis in me, quòd argumento usus non sim, dum agere nihil in seipsum dixi, contendisque ex opposito posse aliquid in seipsum agere, ecquònam quæso argumento id, quod proposui, improbas? ecquònam id ipsum, quod asseris, probas? Nullo certè; ut mirum sit nullis te uti argumentis, ubi me nullis usum caufaris. Dicis exemplis à me allatis facile esse respondere; Sed ad memorata quidem nihil respondisti, dixisti que solùm aliquid de exemplo oculi, quod cum ipse non attulissem, nisi ad præveniendum responsionem; tu dissimulasti instantiam, qua proposui emissionem speciei ex oculo in speculum, non esse remissionem ex speculo in oculum; ut ostenderem circa emissionem oculum esse agens, & speculum patiens;

II.
Probatum non fuisse idem non agere in seipsum, suggillari immerito. Et retorqueri in doctorem culpam. In circumductione turbinis non agere idem in seipsum.

circa remissionem verò speculum agens, & oculum patiens: recurristi autem ad mentem, quæ cum cognoscat cætera, sese quoque ipsam cognoscat; tamen hoc ipsum in quæstione sit, neque ullo à te argumento probatum. Hinc quia parum idonea videbatur esse responsio, non argumentum quidem, sed exemplum solum attulisti in rebus corporeis. Nam, inquis, cum turbosè in gyrum versis, Nunquid ista conversio actio est, quam in seipsum exercet? DEVM immortalem! nisi non aut manus, aut scutica tuit, quæ in orbem acta hanc impressit vertiginem? Nisi non eadem est ratio, quæ sagittæ transvolantis per aërem. Et quamvis fortè dicturus sis sagittam habere eum motum non ab arcu, aut manu, sed à seipsa; idcirco-ne idem agat in seipsum? Certè dici quidem potest pars agere in partem, hoc est pars sequens quælibet ab usque capulo impulsio à chorda in quamlibet antecedentem, hoc est ad usque cuspidem; at non propterea eadem pars in seipsam, aut tota sagitta in totam sagittam; alioquin enim tam esset actio à capulo in capulum, quàm à capulo in cuspidem, sicque sagitta non magis progrediretur, quàm regrediretur, foretque aded immobilis. Quare & quod turbo vertatur in orbem, tum modus impressionis tum figura facit, ob quam partes non directè, ut in sagitta, sed orbiculariter dispositæ sunt, seque proinde in orbem quidem, sed ordine tamen, sive successivè propellunt: Aded ut una aliqua prima designata, postquam impressio ordinatè pervenerit ad ultimam, impellatur ab ipsa, ut sibi contigua, sicque revolutiones plures peragantur, neque propterea aut eadem pars in seipsam, aut totus turbo in se totum agat; conversæ sit actio, quam turbo in seipsum exercent; nisi eo modo, quo, dum homo sua manu femur suum percutit, hanc percussione actionem dices, quam homo in seipsum exercent, ac ided concludas idem agere in seipsum.

III.

Nihil confictum fuisse, cum objectionem est distam esse Mentem posse deducere ex se Ideas rerum corporearum; Neque respondisse ad difficultatem, quæ proposita fuerat ea de re.

Dicis postea, notandum esse te non affirmasse ideas rerum materialium ex Mente deduci, ut non satis bona fide hic fingo. Ceddò porrò non-ne tu ipse es, qui te dicis Mentem, aut nomine Mentis loqueris, loquutusve es? Et non-ne ista tua fuerunt verba? Quantum autem ad ideas rerum corporalium, nihil in illis occurrit; quod sit tantum, ut non videatur à me ipso potuisse proficisci? Et facta distinctione, Ex iis verò, quæ in ideis rerum corporalium clara, & distincta sunt, quedam ab idea mei ipsius videor mutuari potuisse, nempe substantiam, durationem, numerum, & si quæ alia sunt ejusmodi. Nam cum cogito lapidem esse substantiam, sive esse rem, quæ per se apta est existere; itemque me esse substan-

tiam;

tiam; *quantvis concipiam me esse rem cogitantem, & non extensam; lapidem vero esse rem extensam, & non cogitantem, ac proinde maxima inter utrumque conceptum sit diversitas, in ratione tamen substantiæ videntur convenire.* Cedò proinde ecquid-nam finxi? Ecquid non satis bona fide? An quod dixi te *affirmare*, cùm tu solùm dixeris *videri*? At hoc ipsum est, quod tutemet fingis; cùm eam vocem mihi attribuis. Siquidem mea hæc verba fuerunt, *Hevco solùm circa ideas rerum corpor earum, quod difficultas non parva sit, quomodo ex sola tui idea, dum te pro incorporea geris, teque ut talem consideras, eas deducere ex te possis.* Nulla affirmationis mentio, sed eo solùm modo, quo aut affirmares, aut tibi videri diceres, hæcere me dixi. Verùm fac me illud *videri* ita fuisse interpretatum, quasi tu seriò affirmares, An-non propter consequutionem abs te deductam id licuit? Nempe id statim pòst habuisti, tanquam seriò, & affirmanter constitutum, sic inquires, *Itaque sola restat Idea Dei, in qua considerandum est, an aliquid sit, quod à meipso non potuerit proficisci.* Dicis te postea expressè ostendisse ideas rerum materialium à corporibus sæpe advenire, ac per hoc corporum existentiam probari. Sed hoc difficultatem non solvit, donec te habes in eo statu, in quo nihil ad te perveniat ex corporibus, in quo si aliquid remaneat, quod olim ex corporibus pervenerit, id reputes falsum; in quo tui ipsius, ac Dei notitiam mutuari contendis, non ex ulla notitia corporum rerumve externarum; sed planè ex teipso, aut ex iis, quæ in te sunt, seclusis planè rebus externis. Dicis te *hic tantùm exposuisse nullam in iis tantam realitatem inveniri, ut ex eo, quòd nihil sit in effectum, quod non formaliter, vel eminen- ter præexisteret in causa, concludi debeat illas à sola mente non potuisse proficisci.* Et subdis, *me hoc nullo modo impugnasse.* Sed primùm facis tu chimæras, & vis deinde illas impugnemus? Fingis te nempe in eo statu, ut nescias an aliqui homines ante te existiterint; an sit aliquid omninò extra te: ut nôris duntaxat teipsum, hoc est mentē tuam, mentisve naturam (cùm ipse nempe sis sola mens) omninò clarè, & distinctè; ut clarè, & distinctè cognoscas esse substantiam incorpoream, & tamen si neque lapidem, neque ullum omninò corpus unquam videris, aut falsum sit, quod videris, cogites tamen lapidem esse substantiam; & in ratione substantiæ convenire cum mente, & similia. Nisi verò ista chimære non sunt, aut digna sunt non impugnatione, sed ne commemoratione quidem? Deinde, hoc tuum fuit artificium, dicere me non impugnasse, cùm animadvertisti te respondere non posse ad difficultates, quas impugnando tibi propo-

propofui. Illas non repeto, fed quæſo duntaxat patientem Lectorem, ut confideret, annon respondere debuiffes ad ea quæ objeceram, ab illis, usque verbis, *Nam ſi ſolam ſubſtantiam incorpoream noſti, quomodo fieri poteſt, &c.* & ad quorum calcem teſtatus ſum nolle me in iis immorari. Nempe quia difficultas præcipua circa conſuſionem intentam ſtatim urgenda remanebat; Qua occasione, cum properarem, teſtatus quoque fueram mox antè, nolle me inſiſtere, ut pluribus ſanè licuiſſet, circa ea, quæ dixeras de Ideis Dei, Angelorum, animalium, cæterarum rerum, ut extenſionis, ſubſtantię, coloris; & de quibus loquutus ſic fueras, quaſi nihil unquam de rebus per illas repræſentatis neque vidiffes, neque audiiffes, neque alio modo quàm falſò noviffes; ac interim tamen Ideas ita partireris, ut cerneres alias potuiſſe à teiſpo proficiſci; alias accipi à rebus extra te exiſtentibus; alias à nihilo procedere, videlicet Ideas falſas. Eadem porrò occaſio eſt, ob quam nunc etiam non inſiſto, contentus proponere ratiocinationem, qua fretus illa edifferuiſti, cujuſque jam antè eſt facta ſuſpicio.

Si quis habens ſe in ſtatu ignorantie per affectatam abstractionem, perſuaſus ſit ſibi promptum eſſe agnoſcere Ideas innatas, ſeu quas haberet in ſtatu ignorantie per puram negationem; illi promptum eſt diſcernere Ideas vel à ſe habitas, vel à re extra exiſtente acceptas, vel à nihilo etiam profectas:

Atqui ego me habens in ſtatu ignorantie per affectatam abstractionem, perſuaſus ſum mihi promptum eſſe agnoſcere ideas innatas, ſeu quas haberem in ſtatu ignorantie per puram negationem:

Igitur mihi promptum eſt diſcernere Ideas, vel à me habitas, vel à re extra exiſtente acceptas, vel etiam à nihilo profectas.

DUBITATIO VII

De capitali Demonſtratione pro Dei exiſtentia, ex præcedente apparatu; ad cujus imitationem conſciatur exiſtere reipſa infinitos mundos, quorum habita eſt idea ab antiquis philoſophis.

Concludis, Itaque ſola reſtat Idea Dei, in qua conſiderandum eſt, an aliquid ſit, quod à meipſo non potuerit proficiſci. Dei nomine intelligo ſubſtantiam quandam infinitam, independentem, ſummè intelli-

intelligentem, summè potentem, & à qua tum ego ipse, tum aliud omne, si quid aliud exstat, quodcumque exstat, est creatum. Quæ sanè omnia talia sunt, ut quò diligentius attendo, tantò minùs à me solo profecta esse posse videantur: ideoque ex antedictis Deum necessario existere est concludendum. Scilicet huc est quò tendebas. Ego verò ut conclusionem amplector, ita non video quò sic concludas. Dicis ista, quæ de Deo intelligis, hujusmodi esse, ut proficisci à te solo non poterint: id nempe intendens, ut debuerim ab ipso Deo proficisci. Sed primùm, nihil verius est quàm quòd à te solo profecta non fuerint, seu quòd illorum intelligentiam à te, vel per te duntaxat non habueris: sunt enim profecta, habitaque à rebus, à parentibus, à magistris, à Doctoribus, à societate hominum, in qua es versatus. At mens sola sum, inquires, nihil admitto extra me; ne aures quidem quibus audierim, neque homines mecum colloquutos. Hæc dicere potes: sed diceresne, nisi auribus nos audires, ac nisi essent homines, à quibus verba acciperes? Loquamur seriò, & dic bona fide: Voces illas, quas de Deo effers, nonne habes à societate hominum, quibus convixisti? Et cum ab illis voces habeas, nonne & notiones subiectas, designatasque vocibus? Igitur non sint à te solo, videntur tamen non propterea à Deo, sed aliunde esse. Deinde quidnam in illis est, quod accepta primùm à rebus occasione, habere ex te ipse deinceps non potueris? An-ne propterea aliquid capis, quod sit supra humanum captum? Sanè si intelligeres Deum cujusmodi est, esset cur à Deo te doctum putares: hæc verò omnia, quæ Deo attribuis, nihil aliud sunt, quàm observatæ aliquæ in hominibus, aliisque rebus perfectiones, quas mens humana valeat intelligere, colligere, & amplificare, ut aliquoties dictum jam est. Dicis, cum ex te possit esse Idea substantiæ, quia substantia es; non posse tamen Ideam substantiæ infinitæ, quia infinitus non es. Verùm nulla est propterea in te infinitæ substantiæ Idea, nisi nomine tenus, & quatenus homines comprehendere (quod est reverà non comprehendere) infinitum dicuntur: adeò ut necesse proinde non sit talem Ideam à substantia infinita proficisci; ea nempe fieri componendo, ampliandoque potest: quemadmodum jam dictum est. Nisi cum prisca Philosophi ex comprehenso hoc vilibili spatio, hoc unico mundo, his paucis principiis, ipsorum Ideas sic in se habuerunt, ut illas ampliantes Ideas efformaverint infiniti universi, infinitorum mundorum, infinitorum principiorum; dicturus sis illos non efformasse taleis Ideas ex vi suæ mentis: sed eas processisse in mentem ex infinito uni-

T

verso,

verso, infinitis mundis, infinitis principiis? Quod defendis autem *te percipere infinitum per veram Ideam*: tanè, si illa esset vera, repræsentaret infinitum cujusmodi est, ac proinde perciperes quod est in ipso præcipuum, & de quo nunc agitur, videlicet infinitatem. Verùm cogitatio tua semper terminatur ad finitum aliquid, solùmque infinitum dicis, quia non percipis quod est ultra tuam perceptionem: ut proinde non malè censearis percipere infinitum per negationem finiti. Neque sufficit dicere, *percipere te plus realitatis in infinita substantia, quàm in finita*. Oporteret enim te percipere realitatem infinitam; quod tamen non facis. Quin etiam revera non plus percipis: quoniam finitam solùm amplias, ac deinde imaginariis esse amplius realitatis in eo, quod dilatatum est, quàm in eodem, dum est contractum. Nisi velis quoque Philosophos illos plus percepisse realitatis, quæ reverà esset, cùm plureis mundos conciperent, quàm dum unicum in mente haberent. Ex quo obiter adnoto causam, cur mens nostra tantò magis confundatur, quantò aliquam speciem, sive Ideam magis ampliat, ex eo esse videri, quod hujusmodi speciem à suo situ distrahit, distinctionem partium illi adimit, ac ita totam attenuat, ut tandem evanida fiat. Ne memorem mentem perinde confundi ad causam oppositam, cùm nimis contrahit Ideam. Dicis *non obflare, quod non apprehendamus infinitum, aut omnia quæ in illo sunt: sed sufficere, ut pauca quedam intelligas, quò veram, & maxime claram, distinctamque Ideam habere dicaris*. Imò verò non habes veram Ideam infiniti, sed finiti solùm, si non comprehendas infinitum, sed finitum duntaxat. Dici potes ad summum cognoscere partem infiniti: at non propterea ipsum infinitum: ut ille qui nunquam egressus specum subterraneam, dici quidem potest cognoscere partem mundi, at non propterea ipsum mundum: adeò ut propterea ineptus evasurus sit, si tam angustæ partis Ideam, censeat esse Ideam veram, germanamque totius mundi. At, inquis, *de ratione infiniti est, ut à te, qui finitus es, non comprehendatur*. Credo equidem: at non est de ratione veræ Ideæ rei infinitæ, ut illius tantùm partem minimam, sive potius nullam, ob nullam cum toto proportionem repræsentet. *Sufficere, ais, ut pauca hæc à te clarè percepta intelligas*. Sed nempe, ut sufficit videre extremum capillum ejus hominis, cujus vis habere germanam Ideam. An non esset mei egregia effigies, si pictor unum mei capillum, ejusvè extremū duntaxat depingeret? At minor, non dico longè, aut longifimè, sed infinitè etiam est proportio eorum omnium quæ de infini-

to,

to, seu de Deo cognoscimus, quàm unius mei capilli, apicisve ejus ad meipsum totum. Vno verbo hæc de Deo nihil probant, quod non probent etiam de infinitis illis mundis; ac tantò magis, quantò illi potuerunt clariùs ex hoc uno clarè perspecto intelligi quàm Deus, vel ens infinitum ex tua substantia, quæ cujusmodi sit, nondum tibi constat.

R E S P O N S I O.

Hic nulla habes quæ non jam ante dixeris, & à me fuerint explosa: unum monebo de Idea infiniti, quam ais non posse esse veram, nisi comprehendam infinitum, dicique posse ad summum me cognoscere partem infiniti, & quidem partem minimam, quæ non meliùs infinitum refert, quàm exigui capilli effigies hominem integrum repræsentat. Moneo, inquam, è contra plane repugnare, si quid comprehendam, ut id quod comprehendo sit infinitum. Idea enim infiniti ut sit vera nullo modo debet comprehendi, quoniam ipsa incomprehensibilitas in ratione formalis infiniti continetur, & nihilominus est manifestum Ideam quam habemus infiniti non repræsentare tantùm aliquam ejus partem, sed revera totum infinitum, eo modo quo debet repræsentari per humanam Ideam; etsi procul dubio alia multò perfectior, hoc est, accuratior & distinctior, haberi possit à Deo, aliâve naturâ intelligente, quæ sit humanâ perfectior. Eadem ratione qua non dubitamus quin Geometria imperitus totius trianguli Ideam habeat, cum figuram esse tribus lineis comprehensam intelligit, etsi à Geometris alia multa de eodem triangulo cognosci possint, atque in ejus Idea animadverti, quæ ab illo ignorantur. Ut enim sufficit intelligere figuram tribus lineis contentam ad habendam Ideam totius trianguli; sic quoque sufficit intelligere rem nullis limitibus comprehensam, ut vera & integra Idea totius infiniti habeatur.

I N S T A N T I A.

An nihil heic habeam non dictum; an tu omnia exploseris, si qui legent, ii judicium ferent: ac specialiter quod heic attigi de infinito universo, deque infinitis principiis, ac mundis; quòdque cum nulla ratione posses solvere, solito more es præterlapsus. Id ut meliùs pateat, ac simul, quæ sit Archimedææ tuæ demonstrationis vis inclarescat, rem ex antecedentibus resumere est operæ-premium. Demonstrare voluisti Deum existere;

T 2

rem

I.
Capitulus
forte illa
demon-
stratio pro-
ponitur
formâ syl-
logisticâ;
ejusque
imbecilli-
tas uni-
versè pri-
mum, ac
varie mon-
stratur.

rem aliunde certissimam, sed visus es tibi ea ratione, seu demonstratione probare, qua præfatus fueris, nullam meliorem ab humano ingenio excogitari unquam posse. Illam hoc loco ita concludis,

Si sit in me Idea, cujus realitas objectiva sit tanta, ut non potueris à me proficisci, necesse est illam esse in me positam ab aliqua causa distincta à me, in qua tantundem ad minimum sit realitatis formalis, quantum est in Idea objectivæ, quæque proinde reipsa existat:

Atqui est in me Idea, cujus realitas objectiva est tanta, ut non potueris à me proficisci; illa scilicet, quæ mihi repræsentat, aut per quam intelligo Deum substantiam quandam infinitam, æternam, independentem, summè intelligentem, summè potentem, & à qua tum ego ipse, tum aliud omne, si quid aliud existat, quodcumque existat, creatum est:

Igitur necesse est talem Ideam esse à causa, in qua tantundem ad minimum sit realitatis formalis, quantum in ipsa Idea est objectivæ, quæque proinde reipsa existat.

Sed in solo Deo est tantundem ad minimum realitatis formalis, quantum in ipsa Idea est objectivæ, solus enim Deus est substantia infinita, quidvis autem aliud, atque ego etiam finita:

Igitur talis Idea à solo Deo est, ac proinde Deus existit.

Hæc itaque tua Demonstratio est, quam non modò evidentiorrem, certiorremque esse Geometricis statuis, sed etiam evidentissimam, ac certissimam dicis. Id-ne porrò ita se habeat, attendere ad ista imprimis universè juvat. *Primò* tu tibi soli demonstras, de te solo loqueris, de tuo solo factò respondes: Germana autem demonstratio homines omneis adinet, generalis est; & factum usurpans pro principio, id non privatum, privatimve apparens, sed universale, omnibusve universè apparens usurpat. Quare & tua ratiocinatio cum tui respectu vim habeat, non potest tamen apud alios habere vim demonstrationis, sed ad summum autoritatis, qua prout polebis apud homines, fidem tibi referenti, prout quisque volet, habebit. *Secundò* Ratiocinatio tua supponit te esse in statu, in quo revera non es, & ex quo proinde, tanquam posito fundamento demonstrare nihil potes. Supponis enim te somnare, decipi, deludi; supponis te non habere corpus, non manus, non caput, non cerebrum; supponis omnia quæ hætenus videris, audiveris, olfeceris, gustaveris, tetigeris, cogitaveris, esse non modò dubia, verum etiam falsa; nisi quòd jam advertisti te cogitare, te esse, te rem cogitan-

gitantem esse. Supponis te ex tua cogitatione delevisse omnes imagines rerum corporalium, vel (quia id difficile sit) te illas ut inaneis, ac falsas nihili pendere, & te solum alloqui, inspicereque penitus in teipsum: Supponis te in hoc ignorantiae per affectatam hujuscemodi abstractionem statu, tam posse iudicium ferre de cæteris rebus, an sint, an non sint, quàm facere in statu ignorantiae per puram negationem, ut si nihil unquam vidisses, audisses, &c. Supponis ideas quas habes Angelorum, animalium, cæterorum corporum non facere te certum, quòd res per illas repræsentatæ aut fuerint, aut sint, aut sit omnino aliquid præter te in mundo: Supponis denique te certum non esse, an aliquid de Deo vel alio loquente, vel te audiente acceperis, & quam de illo habes Ideam, partim auditu, partim propria cogitatione formaveris. Hæc & alia sunt, quæ supponis, quæ profectò falsa cum sint, quid-nam certi superextruetur? quid veri demonstrabitur? *Tertio*, nihil potes demonstrare, quousq; habueris propositiones, de quibus clarè distinctèq; perceptis, sis certus quòd fallaces non sint: Atqui nondum habere potes, neque es omnino habiturus, priusquàm in quarta Meditatione stabilieris pro viribus illud pronuntiandum: *Quicquid clarè, distinctèque percipio, est verum*. Nempe initio hujus Meditationis difficultatem de eo movisti, quam sublaturus non fuisti, nisi post ostensam Dei existentiam, illiusque veracitatem; id quod demùm conatus es Meditatione quarta præstare, docendo illud pronuntiandum idèò non fallere, quòd omnis clara, & distincta perceptio cum sit aliquid, DEVM habeat autorem, quem, cum summè perfectus sit; repugnet esse fallacem. Quamobrem, cum hoc nondum loco probâris Deum esse, & repugnare ut fallax sit, propositiones habere non potes, quales ad demonstrandum necessariae sunt; Vnde & sequitur, ut dum aliquas heic usurpas, certus de illis, tanquam clarè, distinctèque à te perceptis, ut probes Deum existere; in diallelum incidas, sive circulum, ut vocant, committas.

Deinde, ut dicam etiam aliquid de majore Propositione; deferuisti, *Primo*, ut est antè dictum, regiam, planam, perspicuam viam, qua ad notitiam existentiae, potentiae, sapientiae, bonitatis, aliorumque DEI attributorum pervenitur; præclarum hoc nempe universi opus, quod sua magnitudine, distinctione, varietate, dispositione, pulcritudine, constantia, aliisque adjunctis suum clamat Auctorem: totum, inquam, hoc opus tam magnum, tam varium, tam mirabile, rejecisti, pro falso habuisti, quicquid de illo tibi

II.
Monstratur deinde speciatim, ac varietate in maiore Profyllogismi propositione.

innotuerat; & ad probandum DE I existentiam, potentiam, attributâque cætera, usurpasti solum ideam intra tuam mentem conclusam, quæ & tibi obscura sit, & ostendi aliis non possit, ut ostenduntur sidera, aliæque partes universi. Ideam, inquam, qualem omnes non habent, qualem tu non semper habuisti, qualem potes non semper habere; rem fluxam, rem accidentariam, imò non rem, sed rei modum, sed modi modum, sed partem modi. *Secundò* scilicet usurpasti non totam Ideæ realitatem, sed objectivam solummodò; quanquam neque realitatem per te habet, quia res non est, sed modalitatem solum, quia est solum modus. Et certè ut figura ceræ impressa nihil per se est, sed est solum ipsamet cera, quatenus heic depressa est, illeic eminens, heic latior, illeic angustior; sic idea menti impressa, nihil est per te, sed est solum ipsa-met mens prout suo modo, & hac se, illave, aut alia ratione comparatam habet; & ut similitudo seu repræsentatio sigilli, quæ est in cera, est mera relatio, atque aded non Ens; ita & similitudo, seu repræsentatio rei alienæ quæ in mente est, quamque tu appellas realitatem objectivam, mera relatio, ac non ens erit. Ceddò proinde, quàm insignis effectus fuerit usurpatus abs te ad tantam causam demonstrandam. *Tertiò* Realitas objectiva Ideæ, ut tu accipis, est inseparabilis à realitate ejusdem Ideæ formali; neque enim nisi formalis sit, objectiva erit; neque, nisi objectiva, formalis. Igitur à qua causa efficiente pendebit formalis, pendebit etiam objectiva: Atqui per te realitas formalis non ab alia causa pendet, quàm à tua cogitatione, seu mente; Quippe expressis verbis doces, *Talem esse naturam ipsius Ideæ, ut nullam aliam ex se realitatem formalem exigat præter illam, quam mutuatur à cogitatione tua, cujus est modus*: Igitur objectiva quoque realitas à tua sola cogitatione, seu mente pendebit. Quamobrem vel hypothesis supervacanea est, & inepta, si causam requiras extra te, quam novisti esse in te; vel tibi ipsi veritatem celas, mirumque non est, si ad conclusionem eadem celatâ deducaris. *Quartò*, quid-nam dici potuit obscurius, quàm *santundem ad minimum esse realitatis formalis, in causa, quantum est objectivæ in effectu*? Etenim tamen si formalem alio nomine dixeris actualem, non declarasti tamen neque in quo formalitas, neque in quo actualitas consisteret; neque an realitas causæ esset ipsius substantia, an ipsa per ideam repræsentabilitas, an quidpiam aliud denique, quod ad reddendum propositionem evidentem fuit necessarium. Tamen etiam addideris, *Modum essendi objectivè in intellectu per ideam, quantumvis im-*
per-

perfectus sit, non tamen profectò nihil esse; nihilominus non dixisti quatenus esset aliquid, quatenus dici res mereretur, quatenus realitatem haberet, quatenus causam exigeret; quod sanè fuit quoque necessarium ad evidentiam propositionis. Rursus tamen si compareris realitatem objectivam cum formali, non explicuisti tamen, an utraque esset absoluta, an utraque relativa, an absoluta una, relativa altera; neque quid illud esset, in quo realitas formalis æqualis esset, aut excedere posset objectivam; & id genus alia, quibus non explicitis, non potuit propositio non inevidens esse.

Præterea, ut dicatur quoque de Minore, seu Assumptione, Dicis *Primò* te habere Ideam, quæ repræsentet tibi DEVM *substantiam quandam infinitam, &c.* Sed quandonam habes? An priusquam plane aliquid audieris de DEO, aliquid de substantia, aliquid de infinitate? Priusquam certè ad hanc ratiocinationem te accingeres, accepisti ab aliis & voces, & vocum significatus, juxta quos notionem ideæve rerum significatarum fuere in tua mente formatæ, in eaque hæserunt, ac etiam-num hærent; Neque meministi ullarum notionum, sive idearum res vocibus illis significatas repræsentantium, quas in tua mente habueris, priusquam alios audieris, de DEO, de substantia, de infinitate loquentis. Dicis *Secundò* te intelligere *substantiam quandam*; Et benè quidem dicis *quandam*; Nam qualis sit neque intelligis, neque aut intelligere, aut fando explicare potes. Quippe ne substantiam quidem corpoream, & ne ipsius quidem ceræ, quantumcùmque ipsam multifariam versaveris, qualis revera est, cognoscis, sed confusâ solùm, & obscurâ quadam ratione imaginariis; seu, quia placet, intelligis. Quomodo igitur distinctè, & clarè intelligeres cujusmodi sit illa substantia, quæ adeò verè dicitur tenebras posuisse latibulum suum; & lucem quidem, sed nihilominus inaccessibilem habitare? Bene iterùm dicis *quandam*; ut quæ prorsus talis non sit, quales sunt prorsus omnes, quæ à nobis intelliguntur, aut intelligi putantur substantiæ: quæ non substat ulli accidenti, quæ nulli planè subsistat rei; quæ propriè substantia non sit, quæ potius super substantia sit; quæ sit aliquid longè excellentius, quàm quicquid substantiam intelligimus; quæ denique sit aliquid, quod intelligere non possimus. Dicis *Tertiò* te intelligere *infinitam*; at hoc ipsum est, quod tibi pernegatum est; quandoquidem solius infiniti intellectus est rem intelligere infinitam; quod ille solus tantum sit intellectivus, quantum res intelligibilis est. Et quamvis nos utamur voce infiniti, non tamen propterea intelligimus.

III.
Similiter
que in
Minore,
sive assumptione..

mus totam illam Late-potentiam, quâ secundû se res diffunditur; sed aliquousque intelligendo progressi, agnoscentesq; nobis non licere progredi ulterius, tametsi ibi finem non viderimus, tum quasi in nos regressi, infinitum id dicimus, cujus non agnovimus finem; significamusque proinde hac voce, non id quod de re intelligimus, sed quod non intelligimus potius. Idem nempe est, ac si aliquis in cavernam subiens conetur visu penetrare totam crassitudinem montis: Quippe aliquousque progressus, & nihil ulterius videre valens, impenetrabilem visu montem dicet, & hac voce significabit non quod viderit, sed potius, quod non viderit. Verûm hac de re plura sunt jam dicta, & sunt etiam quædam statim pòst dicenda, ubi expendetur quid responderis. Dicis *Quartò* te intelligere *æternam*: At hoc ipsum quoque negatur; Nam æternitas nihil aliud est, quàm durationis infinitudo; & ut infinitudo seu secundû locum, seu secundû perfectionem non potest intelligi; ita neque infinitudo secundû durationem. Hoc dicimus, æternam rem principio, & fine carere; sed non idcirco intelligimus totam durationis latitudinem; verûm aliquousque secundû antecedentem durationem progressi, aliquousque secundû consequentem, consistimus, regredimur, & neque principio, neque fine agnito, rem æternam dicimus, hoc est cujus nec sit principium, nec finis. Quare & hoc quoque nomine non quod intelligimus, sed quod non intelligimus dicimus. Dicis *Quintò* te intelligere *independentem*; At quomodo hoc potes, nisi infinitatem, & æternitatem intelligas, ut tibi appareat, neque alicubi, neque aliqua in re, neque aliquando dependere? Dicis *Sextò*, te intelligere *summè intelligentem, seu omnisciam*: At quomodo id potes, nisi tantum sis intelligens, quantum ipse est *Deus*? Cùm si intelligas partem solû eorum, quæ intelligit; neque summè intelligentem, neque omniscium intelligas? Dicis *Septimò* te intelligere *summè sive Omnipotentem*: At quomodo potes, nisi intelligas quotquot unquam effecta produxit; producet, potuit, potest, poterit in æternum producere. Si enim partem solû hujuscemodi effectorum intelligas, profectò non intelliges summè, sive omnipotentem. Dicis *Octavo* te intelligere *te tuû & cæterorum omnium quæ exstant, si aliqua exstant, creatorem*? At quomodo potes, primû quidem tui, si nosti solû de te, quodd cogites, quodd sis, quodd res cogitans sis? An te probasti creatum esse? An meministi te aliquando non fuisse? An meministi ejus momenti, quo transivisti ex non esse ad esse? An quomodo transiveris? An qua

qua causa agente transiveris ? An ex materia aliqua , an ex nihilo , an à parentibus , an cum parentibus , an sine parentibus factus fueris ? Quomodo potes etiam aliorum , si omnia alia falsa putas , si ignoras aliquid-ne creatum fuerit , aut non creatum ? An cum nihil videris creari , intelligere potes quid sit creari , quid sit creatum esse , quid sit omnia creata esse ? An fuisti quo tempore omnia fuere creata , ubi fuere creata ; & percepisti quomodo creata ? An si non fuisti , si non percepisti , illud reverà intelligis , quod te intelligere dicis ? Nonò proinde quod dicis Ideæ , qua D E V M intelligis , *realitatem objectivam esse tantam , ut non potueris* , &c. admitteretur quidem , si diceres te intelligere D E V M substantiam infinitam , æternam , &c. confuso , obscuro , humano , seu potius humanissimo , hoc est imperfectissimo modo ; At quia jactas non semel te intelligere clarè , distinctè , & parùm abest , quin eo modo , quo Angeli , seu qui vident non jam amplius per speculum , & in ænigmate , sed facie ad faciem , ut loquitur Scriptura sacra ; ideò sit ut vox illa tanta tuo sensu non admittatur . Quo eodem modo , cum Decimo dicis tantam , *ut non potueris à te proficisci* , Id admitteretur quidem , si ejusmodi esse Ideam intelligeres , ut sine parentibus , Præceptoribus , Sacerdotibus , cæteris hominibus , quibuscum conversatus es , & à quibus sæpe audisti appellari D E V M infinitum , æternum , omnipotentem , creatorem cæli & terræ , eam in te habere non potueris ; aut si fingas te talem fuisse , qualem fingi ab Ethnicis primos homines vidimus ; habere eandem non potueris , sine existentia , & conversionibus siderum , sine ornatu , ordine , perfectioneque Univerſi , & partium ipsius : At quia tantam intelligis , ut ne hoc quidem modo , seu externis rebus menti tuæ præluccatibus , non potuerit ex te proficisci ; idcirco non admittitur .

Ex his patet , quo firmamento Conclusio illius tui Proſyllogismi nitatur ; quo robore constet quæ illi velut superextruitur . Verùm ut etiam aliquid de Sub-assumptione addatur ; Cum illud ais , *esse in Deo tantundem ad minimum realitatis formalis , quantum in Idea est objectivæ* ; Id quidem non modò admittendum est , sed addendum quoque esse infinite ampliùs ; quicquid denique per realitatem formalem intellexeris . Nam si intelligas substantiam divinam ; ecquid est illud , quod ex ipsa tuæ menti objicitur , respectu ejus immensitatis , quæ non objicitur , quæque te , & omnem creatum intellectum latet ? Si repræsentabilitatem , ecquid est illud , quod ex D E O tuæ menti repræsentatur , comparatum ad illud , quod beatis Mentibus re-

IV.
Ac rursus
in Sub-
assump-
tione ; ubi
de con-
sequentiæ
pro exi-
stenti in-
finitorum
Mundo-
rum.

præsentatur in cælo Empyreo ? imò quid est illud , quod repræsentatur beatis mentibus , comparatum ad id , quod ipsi DEO repræsentatur ? Si quidvis aliud denique intellexeris , idem planè. At cum addis *in Solò Deo* , quasi tua Idea aliquid contineat , quod res ipsæ quæ sunt in Mundo , visu , audituve perceptæ , mente cogitatæ , & nativa mentis vi comparatæ , copulatæ , amplificatæ non contineant ; idipsum est , quod tibi negatur , quod negatum est , quod probandum fuit. Ea non repeto , quæ sunt aliquoties in Dubitationibus dicta , circa amplificationem perfectionum , quæ in rebus creatis observatæ , referuntur in DEVM , detrahis quantum per intellectus imbecillitatem licet imperfectionibus omnibus ; & seposita præ cæteris omni finitudine , seu limitatione , promovendo nempe perfectiones , quantum possumus , versus infinitatem , veluti observatam aliquam alicujus rei creatæ magnitudinem , durationem , scientiam , potentiam , felicitatem , &c. absque eo tamen , quòd unquam totalem illam , verèque infinitam magnitudinem , durationem , scientiam , potentiam , felicitatem , cætera , mente assequamur , aut possimus dicere nos aliquid amplius quàm finitum , creatum , aliquousque amplificatum , & quale revera in DEO non est (cum sit nempe modo inexcogitabiliter eminentiore) assequi. Addo heic , tuam illam rationem in textu expressam his verbis , *Non esset in me idea substantiæ infinita , cum sim finitus , nisi ab aliqua substantia , quæ reverà esset infinita , procederet* , fecisse partem , occasionemve potissimam Paralogismi. Videlicet existimasti te verè intelligere totam infinitudinem , seu amplitudinem positivam infinitæ substantiæ ; neque voluisti advertere negativam illam infiniti vocem imponere tibi , tuamque intelligentiam non propterea in immensum , & absque ullo fine protendi. Heinc manifestam quidem tibi feci consequutionis fallaciam , allato exemplo ex antiquis philosophis , infinitum Univerſum , infinitos Mundos , infinita principia cogitantibus : at tu oculos quasi occlusisti , deductamque ex illo exemplo consequutionem dissimulasti , ne videri posses aut agnoscere , aut profiteri Paralogismum. Tua ratiocinatio hujusmodi fuerat :

Si est in me Idea substantiæ infinitæ , talis idea non potest esse in me posita , nisi ab ipsamet substantia infinita , quam proinde sis necessarium existere :

Atqui est in me Idea substantiæ infinitæ , videlicet Dei infiniti , æterni , &c.

Igitur

Igitur talis idea non potest esse in me posita, nisi ab ipsamet substantia infinita, seu Deo, quem proinde sit necessarium existere.

Ego verò objeceram consequutionem illam Majoris propositionis esse fallacem, quoniam prisca Philosophi potuissent pari jure sic ratiocinari:

Si est in nobis idea infinitæ substantiæ, talis idea non potest esse in nobis posita, nisi ab ipsamet substantia, quam proinde sit necessarium existere:

Atqui est in nobis idea infinitæ substantiæ, videlicet infiniti Universi, infinitorum Mundorum, infinitorum principiorum:

Igitur talis idea non potest esse in nobis posita, nisi ab ipsamet infinita substantia, scilicet infinito Universo, infinitis Mundis, infinitis principiis, quæ proinde sit necessarium existere.

An-non solvendum hoc fuerat, si paralogismum esse non putabas? Ac verbum quidem quasi in transcurso in dubitationem sequentem interdicere visus es: sed illud ibi apparebit. Prætereo heic infirmitatem tuæ illius consequutionis ex tuis ipsius principiis. Cum enim admiseris posse in te esse ideas falsas, neque causam positivam præter te exigere; quorsum si in te sit idea substantiæ infinitæ, illa non possit esse falsa, neque ullam positivam præter te exigere causam, cujusmodi censenda est extitisse idea antiquorum philosophorum? Et præoccupas ipse quidem objectionem his verbis, *Nec dici potest hanc fore ideam Dei materialiter falsam esse, ideoque à nihilo esse posse, ut paullo antè de ideis caloris, & frigoris, & similium animadverti: Nam contra cum maximè clara, & distincta sit, & plus realitatis objectivæ, quàm ulla alia contineat, nulla est per se magis vera, nec in qua minor falsitatis suspicio reperiatur.* Veruntamen quomodo id probas esse maximè claram & distinctam, nisi te probes esse unam ex beatis mentibus, quæ in cælo sunt? quomodo continere plus realitatis, quàm ullam aliam, qualis ex rebus creatis, desumi, colligi, & ampliari potest; imò & speciatim quàm illam antiquorum philosophorum? quomodo nullam esse per se magis veram, & in qua minor falsitatis suspicio reperiatur; nisi idem licere putes antiquis illis philosophis? Pergis, *Est inquam hac idea Entis summè perfecti, & infiniti maximè vera; Nam quamvis foret fingi possit tale Ens non existere, non tamen fingi potest ejus ideam nihil reale mihi exhibere, ut de idea frigoris antè dixi.* Idem dixissent philosophi. Sequitur, *Est etiam maximè clara, & distincta; nam quicquid clare, & distinctè percipio, quod est reale, & verum, & quod perfectionem aliquam importat, totum in*

ea continetur. Idem illi quoque dixissent; cùm tu intereâ heic assumas pro principio, quod erit tibi infrâ probandum ex eo, quod probare jam vis, circa perceptionis claræ, & distinctæ realitatem, ac veritatem: Vt voculam illam reticeam, & quod perfectionem aliquam importat, totum in ea continetur: ex qua statues inferius specialem quandam, & quasi ab ista separatam demonstrationem.

V.

Falsam, quam habemus Ideam entis infiniti representare reverâ non partem, sed totius infinitum: Et qui differat Ideam, quam Deus habet sui, ab ea quam homo habet de Deo.

Atque ex his demùm apparet, palmaris-ne illa tua Demonstratio ad probandum Dei existentiam, ejusmodi sit, ut implorare debueris Deum, ut ita loquar, & hominum fidem; interpellando sacram Facultatem, ut illam sanciret, habendamque præscriberet, non modo ut æquantem, sed etiam ut superantem Geometricas certitudine, atque evidentia; ac talem, ut via non pateat humano ingenio, per quam melior inveniri unquam possit. Vt aliquid porrò Coronidis vice ad illud adjiciam, quod admones de comparatione à me instituta de eo, qui extremi capilli effigiem pro totius hominis effigie accipiat. Cùm ais, planè repugnare, si quid comprehendas, ut id quod comprehendis, sit infinitum; id ambabus ulnis accipio, ut etiam illud quod sequitur, Idea enim infiniti, ut sit vera, nullo modo debet comprehendi. etenim dici nihil veriùs potuit, modò non extendatur ad Ideam, quam Deus habet de seipso. Cùm pergis autem, Et nihilominus est manifestum, Ideam, quam habemus infiniti, non repræsentare tantum aliquam ejus partem, sed reverâ totum infinitum: Heic jam requiro constantiam. Nam primum, dicere debebas Ideam, quam habemus infiniti vel comprehendendi, vel non comprehendendi, ut inferres esse veram, vel nò veram; & deflexisti tamen ratiocinium; à comprehensione, quæ est ex parte intellectus, ad repræsentationem, quæ est ex parte Ideæ, faciens transitum. Deinde, ut quæram, quod prætermisisti, Ista Idea, quam habemus entis infiniti, comprehenditur-ne à nobis, an non comprehenditur? Nam si illam quidem quoquo modo comprehendimus, vera per te non est; si non comprehendimus, neque id etiam, quod repræsentat comprehendimus, cùm Idea solum agnoscatur ex repræsentatione rei, cujus est Idea, & de realitate formali rei cognitæ, ex realitate objectiva Ideæ feratur judicium. Si rem porrò, quæ per Ideam repræsentatur, non comprehendimus; unde-nam scimus illam per Ideam repræsentari? unde totam repræsentari? Addo, si Idea, quæ est in nobis, repræsentat nobis totum infinitum; ergo nihil infiniti nos latet; Nam si vel minima aliqua nos lateret particula, reverâ non repræsentaret totum. Porrò si nihil ejus nos latet; igitur totum infinitum comprehendimus; quid enim est aliud.

aliud nos aliquid comprehendere, quàm illud ita cognoscere, ut nihil ipsius nos lateat? Atqui, per te, repugnat, ut id, quod comprehendimus, infinitum sit: Igitur id, quod infinitum est, infinitum esse repugnat. Dicis, *Ideam Entis infiniti eo modo repræsentare totum, quo repræsentari debet per humanam Ideam*: Et benè id quidem; sed quæstio manet, an talis Idea humana sit vera, & reverà rem repræsentet. Nam id quidem, quod tibi repræsentatur per humanam Ideam, ipse comprehendis, alioquin enim neque de eoloquereris, neque id aut assereres, aut assumeres aliis demonstrandum: atqui dixisti id, quod comprehenditur, non esse infinitum: quare quod tibi repræsentatur per humanam ideam, non est infinitum: quare neque vera est illa Idea, vel ex eo, quod dixeris Ideam infiniti, ut sit vera, nullo modo debere comprehendi. Pergis, *Est procul dubio alia multò perfectior, hoc est accuratior, & distinctior haberi possit à Deo, aliàve natura intelligente, quæ sit humanà perfectior*. Quàm es verò cautus, cum etiam de Idea, quam Deus de se habet, loquens, dicis ipsam esse perfectiorem ea, quam de illo habes non infinitè, sed solum multò: ne si instaretur nullam esse infiniti ad finitum proportionem, cogereris admittere tuam Ideam non esse veram. Vt cumque id sit, meministi-ne eorum, quæ dixisti, dum me superius distinguente duas Ideas Solis, duasque hominis ejusdem, procul & propè visi species, utramque similem, & eam, tamen aliam magis, aliam minùs; excepisti enim me facere idem, ac si dicerem, *Verum, & falsum non differre, cum de eodem subjecto affirmantur*? Patere id jam in te regei; reverà enim cum attribuis Enti infinito tuam, seu humanam Ideam, ac Ideam ipsius Dei; idem facis, ac si diceres, *Verum, & falsum, cum de eodem subjecto affirmantur, non differre*. Quid-ni verò patiaris? Nam certè, cum ego ex hoc terræ loco conspexero Solem, & Eudoxus, si fiat voti compos, ex loco Solis proximo, utrique verè videbimus, & species, seu imago Solis in utriusque tam oculo, quàm intellectu repræsentata vera erit, quatenus aliquid Solis repræsentabit, & nihil repræsentabit, quod in Sole non sit: tamen quod ego videro, intellexeròque ex Sole, sit penè incomparabiliter minus eo, quod viderit, intellexeritque Eudoxus. At inter te, & Deum, potest-ne eadem comparatio, quæ inter me terræ hærentem, & Eudoxum Soli admotum institui? Nonne sive pes, sive alia communis mensura assignari poterit, quæ & distantiam inter me & illum, & magnitudinem illi apparentem, cum ea quæ mihi apparebit comparatam me-

tiatur; nulla verò prorsus assignari poterit, quæ repetita, aut intellectum tuum divino; aut Ideam quam de Deo habes, illi quam de se Deus habet exæquet? Qua ratione ergo, si mea Solis Idea respectu Eudoxiæ falsa sit; vera erit tua respectu divinæ? Similitudo autem illa tua de Triangulo, quàm apposita esset, si ut imperitus ille capit totam Trianguli naturam, relinquendo Geometris proprietates sibi ignotas, ita tu caperes totam Naturam Entis infiniti, & Deo superessent cognoscendæ proprietates tibi incompertæ? Et quomodo dicere potes, *Ut sufficit intelligere figuram, tribus lineis contentam ad habendum Ideam totius Trianguli*; sic quoque sufficere intelligere rem nullis limitibus comprehensam, ut vera, & integra Idea totius infiniti habeatur. Videlicet figura illa non est major Ideâ, qua percipitur: At Ens infinitum non modò simpliciter, sed etiam infinitè est majus Ideâ, qua percipis ipsum. Quare & verum quidem est intelligere te figuram tribus contentam lineis; intelligis enim quot lineas figura habet, & quomodo dispositas habet: At falsum est intelligere te rem nullis limitibus comprehensam, quoniam non intelligis quicquid habet, nec quomodo habet, sed intelligis solum quod non habet, videlicet limites. Cum dicis autem veram, integramque Ideam totius infiniti haberi; requiro rursus constantiam, seu quonam modo id cohæreat cum eo, quod censuisti, *Ideam infiniti, ut sit vera, nullo modo debere comprehendi*: cum habere Ideam veram, atque integram, nihil aliud sit, quàm comprehendi? Quomodo etiam cum eo, quod dixisti repugnare id, quod comprehenditur, esse infinitum; cum non possit haberi Idea totius infiniti, nisi comprehendatur infinitum; Nam qui totum dicit, nihil excludit, seu nihil incomprehensum facit.

D V B I T A T I O VIII.

De subsidiaria Demonstratione, ex eo, quòd, Qui sibi deesse sensit aliquid, inferre debeat dari Ens, quod sit infinitè perfectius.

ARgumentaris aliunde sic, *Qua enim ratione intelligerem me dubitare, me cupere, hoc est aliquid mihi deesse, & me non esse omnino perfectum, si nulla Idea entis perfectioris in me esset, ex cujus comparationis defectus meos agnoscerem?* Verùm, si de re aliqua dubitas,

tas, si aliquam cupis, si agnoscis quidpiam tibi deesse, quid mirum; cum non noris omnia, cum non sis omnia, cum non habeas omnia? Agnoscis te non esse proinde omnino perfectum? Et hoc profecto verum est, dicique citra invidiam potest. Ergo intelligis esse aliquid te perfectius? Quid-ni? tametsi quicquid cupis non sit semper te, quacumque ratione, perfectius. Quippe cum panem desideras, non est panis te, vel corpore tuo unde quaque perfectior; sed perfectior solum ea inanitate, quæ in stomacho tuo est. Quomodo ergo colligas esse aliquid te perfectius? Nempe quatenus vides universitatem rerum, quæ & te, & panem, & cætera complectitur: aded ut, cum singulæ partes Vniversi aliquid perfectionis habeant, & aliæ aliis inserviant, advenireque valeant; facile sit intelligere plus perfectionis esse in toto, quam in parte; ac proinde te, cum sis solum pars, debere agnoscere quidpiam te perfectius. Hoc igitur modo esse potest in te Idea entis perfectioris, ex cuius comparatione defectus agnoscas. Ut præteream posse quoque parteis alias perfectiores esse; te cupere quod illæ habent, & ex iisdem tecum comparatis posse tuos defectus agnosci. Quippe cognoscere potuisti hominem, qui foret sanior, robustior, pulchrior, doctior, moderatior, ac proinde perfectior: neque fuit tibi difficile concipere illius Ideam, & ex illius comparatione intelligere non esse in te gradum sanitatis, roboris, aliarumque perfectionum, quæ in illo forent. Objicis tibi post-modum; *Sed fortè majus aliquid sum, quàm ipsa intelligam, omnesque illæ perfectiones, quas Deo tribuo, potentiâ quadam in me sunt, etiamsi nondum ad actum reducantur, ut fieri potest, si mea cognitio magis, magisque augeatur in infinitum.* Respondes autem, *Vt verum sit meam cognitionem gradatim augeri, & multa esse in me potentiâ, quæ actu nondum sunt, nihil tamen horum ad ideam Dei pertinet, in qua nihil est potentiale: namque hoc ipsum gradatim augeri certissimum est imperfectionis argumentum.* Porro verum quidem est illa, quæ in Idea percipis, esse actu in ipsa Idea: at non sunt tamen propterea actu in ipsamet re, cuius est Idea. Architectus quippe sibi fingit Ideam domus, quæ Idea actu constat ex designatis parietibus, tabulatis, tectis, fenestris, &c. & tamen domus illa, ipsiusque partes nondum actu sunt, sed potentiâ tantum. Sic illa Philosophorum Idea continet actu infinitos mundos: at non dices propterea illos infinitos actu esse. Quare sive quid in te sit, sive non sit potentiâ: satis est, quod Idea vel cognitio tua, gradatim augeri, ampliari possit: neque propterea inferri debet quod

quod per eam repræsentatur, cognosciturve, actu esse. Quod agnoscis deinde, *cognitionem tuam nunquam fore infinitam*, ultro accipitur: sed nempe agnoscere debes neque fore in te unquam veram, germanamque Dei Ideam, de quo semper amplius (imò infinite) cognoscendum restet, quàm de homine, cujus videris extremum duntaxat capillum. Certè & nisi hominem illum totum videris: vidisti tamen alium, ex cujus comparatione aliquam facere de illo conjecturam valeas: at aliquid simile Deo, illiusque immensitati nunquam est datum cognoscere. Dicis, *te judicare Deum actu infinitum*, ut nihil perfectioni ejus addi valeat. Sed judicas nempe quod ignoras, & ex præsumptione solum judicas, ut judicabant Philosophi infinitos mundos, infinita principia, ac infinitum universum, cujus immensitati nihil addi posset. Quod subijcis, *esse objectivum Ideæ non pendere ab esse potentiæ, sed ab actuali*; Vide quì possit esse verum, si verum sit, quod jam diximus de Ideâ Architecti, & antiquorum Philosophorum: ac præsertim ubi memineris hujuscemodi Ideas constatas esse ex aliis, quas intellectus præhabuerit ab existentibus actu causis.

R E S P O N S I O.

E Undem hic repetis errorem, cum veram Ideam Dei haberi negas, *est enim omnia quæ in Deo sunt non cognoscimus, omnia ea nihilominus sunt vera quæ in eo esse cognoscimus. Quæ verò intermiscēs, ut panem non esse eo, qui panem desiderat, perfectiorem, ex eo quodd percipiam aliquid esse actu in Ideâ, non idèò esse actu in re cujus est Ideâ; me judicare id quod ignoro, & talia, testantur tantum te, ô Caro, multa temerè velle impugnare, quorum sensum non assequeris; Neque enim ex eo quod quis panem desideret, inferitur panem esse ipso perfectiorem, sed tantum illum qui pane eget esse imperfectiorem se ipso, cum non eget: & ex eo quod aliquid sit in Ideâ, non infero idem esse in verum natura, nisi cum nulla alia istius Ideæ causæ reddi potest præter rem quam repræsentat actu existentem, quod non de pluribus mundis, nec de ulla alia re, præterquam de solo Deo, verum esse demonstravi. Nec judico id quod ignoro, rationes enim attuli cur id judicarem, & quidem tam firmas, ut nullam ex ipsis vel minimè impugnare posueris.*

I N S T A N.

I N S T A N T I A.

Quam egregiè ludis ab æquivocatione? Cùm vox enim *vera Idea* possit accipi pro germana, atque adæquata, seu representante Deum qualis, & quantus in se est: vel pro representante aliquid verum, quod nobis de Deo affirmare pro modo nostræ cognitionis liceat, perspicuum est agere nos, & diffcultatem solùm inter nos versari de vera Idea juxta priorem significatum: Tu verò respondes de vera Idea juxta posteriorem accepta, comminiscerisque, & dicis *Errorem me repetere*, de quo longissimè abfui ut somniam. Quàm subtiliter etiam consequenter elaberis, dissimulasque vim argumenti, seu modum illum, quo objeci esse in te posse Ideam Entis te perfectioris, absque eo quod sit propterea in te Idea Entis infiniti: Quippe tu volens ostendere priorem quodam modo in te esse perceptionem infiniti, quàm finiti, hoc est Dei, quam tui ipsius, causam subjeceras iis verbis, *Qua enim ratione intellexerem me dubitare, &c.* ex quibus hoc modo videbaris ratiocinatus:

Si sit in me Idea entis perfectioris, ex cujus comparatione defectus meos intelligam, est in me Idea Entis infiniti:

Atqui est in me Idea Entis perfectioris, ex cujus comparatione defectus meos intelligam, (quoniam intelligo me dubitare, me cupere, hoc est aliquid mihi deesse, & me non esse omninò perfectum:)

Igitur est in me Idea Entis infiniti.

Ego admisi te reverà dubitare, te cupere, deesse tibi aliquid, non esse te omninò perfectum; esse aliquid te perfectius, te illud intelligere: Et quia videbaris nimis exorbitanter *ὑπερβολικῶς*, propter illam consequentiam *Est in me Idea Entis perfectioris; ergo est Idea Entis infiniti;* atque aded, *Est aliquod Ens me perfectius;* Ergo illud est infinitum; quasi inter te, ac Ens infinitum nulli essent gradus intermedii, esseque uno minor Iove; idcirco ostendi posse te intelligere Ens perfectius te, absque eo quod illud infinitum sit; ac primùm quidem considerando Universum, cujus sis tantum pars; cùm aliunde notissimum sit totum esse perfectius parte: deinde verò mentem flectendo ad partem universi aliam, in qua deficientes in te perfectiones reperiantur, cujusmodi esse potest homo sanior, robustior, pulchrior, doctior, moderatior, &c. Tu, cùm tuam defendere consequentiam deberes, ubi sensisti te id non posse, ef-

I.
Dissimulatum diffcultatem fuisse circa illam consequentiam, Si unum alio perfectius est, igitur illud est infinitum.

fundendum esse stramentum censuisti, dicens *me quædam intermiscere, quæ testentur me, caro cum sim, multa tamen velle impugnare, quorum sensum non assequar.* Quo sanè loco subodorari non possum, quid bilem tibi moverit, nisi fortè quòd cum tu dixisses te dubitare, ego ut serid dictum accepi, admisique te & non nosse omnia, & cognoscere potuisse hominem, qui esset te doctior, moderatior, & cætera quoque perfectior; hoc autem, nisi verum sit, gaude bonâ tua fortuna. Id mirum; cum ego ea verba; *tametsi quicquid cupis non sit semper te quacumque ratione perfectius; quippe cum panem desideras, &c.* intexuisses solum ad præoccupandum cavillum, quem prælenseram posse arripi; te in illo solum hæsisse. Ecce enim reperisti quod causareris, *Ex eo quod panem quis desideret, non inferri panem esse ipso perfectiorem; sed tantum illum, qui pane eget, esse imperfectiorem seipso, cum non eget.* quanquam aliquid nec heic dicis, quod reipsâ non dixerim. Nimirum & expressè dixi panem non esse perfectiorem te desiderante; & cum dicis te egentem pane esse imperfectiorem te non egente, seu habente panem, nihil aliud quàm concretè dicis, quod ego abstractè, comparando panem cum inanitate, seu indigentia panis. Quod caput est, non fuit faciendum *παρεργον ἔργον*; aut consequenter ostendendum, quomodo ex eo, quòd sis nunc sine pane imperfectior, nunc cum pane perfectior, sequi esse in te Ideam Entis infinitè perfecti. Nam potes quidem colligere; si quis fame non laboret, esse eum perfectiorem te; si quis sit, qui non dubitet de rebus tibi dubiis, esse eum perfectiorem te; si quis habeat, quæ tibi desunt, eum esse perfectiorem te; potesque tibi fingere Ideam hominis, qui tui instar non prematur fame, non hæreat de rebus incertis, deesse sibi nihil sentiat; at neque potes colligere talem Ideam esse Ideam Entis infiniti, infinitè perfecti; neque magis licet inferre hominem Ideâ illâ repræsentatum, reipsâ existere, quàm existere reipsa Gigantem, Chimæram, cæteraque huiusmodi, quorum Ideas fingere potes.

II.

Committitur semper paralogismus, quibus ex Esse actuali Ideæ, colligitur Esse actualiter: ex finitudine cognitionis, quæ possit adhuc crescere, in finitudinem cognitionis; ex eo, quod ali-quid in Ideâ est, existèntia illius ut causa.

Ad hæc, quia tu fueras sic ratiocinatus:

Illares existit, in cuius Ideâ nihil est potentiale, sed totum actuale:

Atqui in Ideâ Dei nihil est potentiale, sed totum actuale:

Igitur Deus existit:

Objeceram ego te malè ratiocinari ex iis, quæ actu sunt in Ideâ, ad ea, quæ sunt actu in rerum natura; Et quia poteras sic actuale, potentialèque distinguere, ut cum quicquid per Ideam repræsentaretur, actu quidem repræsentaretur; sed intelligeretur tamen

aut

aut ut potentia solum existens, aut ut actu quoque existens in rerum natura; idcirco ut ostenderem neutro modo consequutionem valere, exemplum duplex attuleram, unum de Architecto, cuius Idea repræsentat actu domum, ut potentia solum existentem; aliud de antiquis Philosophis, quorum Idea repræsentabat actu infinitum univarium, infinitos mundos, infinita principia, ut actu existentia. Tu verò sensisti vim quidem; Nam & reverà si ex eo quòd Idea repræsentat tibi Ens infinitum, in quo nihil sit potentiale, sed totum actuale, inferas illud existere; nihil obest, quo minus Philosophi illi ex eo, quòd Idea illis repræsentat infinitum Univarium, infinitos Mundos, infinita principia, inferant existere infinitum Univarium, infinitos Mundos, infinita principia. Quid-nam igitur ad hæc respondisti? Nempe istud, *Ex eo, quòd aliquid sit in Idea, non infero idem esse in rerum natura, nisi cum nulla alia istius Ideæ caussa reddi potest, præter rem, quam repræsentat actu existentem; quod non de pluribus Mundis, nec de ulla alia re, præterquam de solo Deo, verum esse demonstravi.* At primò verum non est, demonstrasse te nullam aliam rem esse posse causam Ideæ quam habes rei infinitæ, præter ipsam rem actu existentem, uti hætenus declaratum est. Non est quoque verum, demonstrasse te id, quod de Deo conclusisti, non posse concludi de pluribus Mundis. Quippe tota ratio cur probaveris Deum existere, fuit ipsius infinitudo per tuam Ideam repræsentata, assumpto illo principio, *tantundem ad minimum est realis formalis in caussa Ideæ, quantum objectiva in Idea est;* atqui eadem militat ratio pro antiquis Philosophis, Univari nempè, Mundorum, principiorumque infinitudo; eodem assumpto principio, eadèmq; argumenti formà. An-non ergo exinde constat Paralogismi evidentia; magnæ alioquin, ex manifesta petitione principii, sive circulo, quo probas Ens infinitum existere actu, quia in Idea repræsentatur ut actuale; & aliunde Ens infinitum in Idea repræsentari ut actuale, quia actu existit. Cum fuisses præterea sic ratiocinatus:

Ille, cuius cognitio non potest ita augeri, ut fiat actu infinitus & non sit semper incrementi capax, potest nihilominus judicare esse Ens ita actu infinitum, ut ejus perfectioni addi nihil possit:
Atqui mea cognitio non potest ita augeri, ut fiat actu infinita, & non sit semper incrementi capax:
Igitur possum nihilominus judicare esse Ens ita actu infinitum, ut ejus perfectioni addi nihil possit.

Ego insinuâram, ut agnosceres hæc secum pugnare. Nam cùm cognitio alicujus objecti tantò semper evadat major; quantò amplius de objecto cognoscitur; sequitur ut si cognitio non possit ita incrementum ut infinita evadat, non possint etiam infinita de objecto cognosci; sicque ille, cujus est cognitio, non possit judicare objectum esse actu infinitum; & cùm finita solum cognoscat, ac propter capacitatem incrementi, supersint semper multa incognita, non possit judicare quid objecto desit, aut non desit; tantum abest ut possit judicare illi nihil deesse (quia ut posset, deberet cognoscere omnia quæ in illo sunt) & repugnare esse aliquid, quod nō sit in illo. Insinuâram, inquam, te propterea debere agnoscere, non fore unquam in te veram, germanamque DEI ideam, ut de quo semper amplius, (imò infinitè amplius) cognoscendum restaret, quàm de homine, cujus vidisses extremum duntaxat capillum, &c. Tu nihil ad hoc, sed quia ego subjeceram *te judicantem Deum ita actu infinitum, ut nihil perfectioni ejus addi valeret, judicare quod ignorares, & ex præsumptione solum judicare, ut judicabant philosophi infinitos Mundos, &c.* Id stomachabundus ita excepisti; *Nec judico id, quod ignoreo; rationes enim attuli, cur id judicarem, & quidem tam firmas, ut nullam ex ipsis vel minimum impugnare potueris.* Quod quidem quàm verum sit, quàmque satisfaciat, viderint lectores. Admoneo solum, cùm tu postremò ita fuisses ratiocinatus:

Quod est in esse objectivo idea, id actu existit, (quoniam esse objectivum idea non à solo esse potenciali, quod propriè loquendo nihil est, sed tantummodo ab actuali, sive formali potest produci:)

Atqui in esse objectivo mea Idea est Deus, vel Ens infinitum: Igitur Deus, vel Ens infinitum actu existit:

Insinuasse me quoque ut videres quid firmitudinis haberet illud principium, *Esse objectivum idea, &c.* propter illud, quod jam objeceram de Idea Architecti, antiquorumque philosophorum; qui necessariò inferrent existere infinitos Mundos, si ejus ideæ, quam de illis haberent, esse objectivum non solum ab illorum esse potenciali, sed solummodo ab actuali, seu formali produci posset: admoneo, inquam, me insinuasse; & cùm respondendum haud dubie fuisset aliquid, nihilominus te nihil respondisse.

DVBITATIO IX.

De alia subsidiaria demonstratione, ex eo, quòd aliquid fieri, aut exsistere non possit, si Ens infinitum non exsisteret : quodque partes temporis sint inter se independentes.

QUæris deinceps, *An jam habens Ideam entis te perfectioris, esse ipsa posses, si tale ens nullum exsisteret? Et respondes, Nempe à quo essem? à me scilicet? vel à parentibus? vel ab aliis quibuscumque Deo minus perfectis? Probas consequenter, Te non esse à te: sed hoc nihil necesse. Rationem etiam reddis, cur non semper fueris: sed id quoque superfluum; nisi quatenus vis simul inferre habere te causam tui non productricem modò, sed & conservatricem. Nempe, ex eo quòd tempus vitæ tuæ pluris partis habet, inferes te creari debere in partibus singulis, ob mutuam illarum à se independentiam. Sed vide quòd id intelligi possit. Nam sunt nonnulli quidem effectus, qui ut perseverent, neque momento quolibet deficient, indigent præsentia, continuæque efficientia causæ, per quam primum esse cœperunt, cujusmodi est solis lux: (quanquam hujusmodi effectus non tam iidem reipsa sunt, quàm æquivalenter, ut de fluminis aqua dicitur:) at videmus alios, qui perseverent non modò eâ causâ, quam agnoscunt, non amplius agente, sed, si velis, etiam corruptâ, redactâque in nihilum. Hujus generis sunt tot res genitæ, factæque, ut recensere pigeat: sufficitque te esse unam ex illis, quæcunque tandem tui causa sit. At partes tui temporis non dependent aliæ ab aliis. Heic instari posset, quænam sit excogitabilis res, cujus partes sint à se invicem inseparabiles magis? inter cujus partis sit inviolabilior series, & connexio? cujus quæ sunt partes posteriores possint minus averti, magis coherere, magis dependere à prioribus? Sed ne hæc urgeamus, quid propterea facit hæc seu dependentia, seu independentia partium temporis, quæ externæ sunt, successivæ sunt, activæ non sunt, ad tui productionem, reproductionemve? Profectò nihil magis, quàm fluxus, ac pertransitio partium aquæ, ad productionem, reproductionemve alicujus rupis, quam fluvius præterfluit. At ex eo quòd paulò ante fueris, non sequitur te nunc esse debere. Credo sanè: verum non ex eo, quòd causa requiratur, quæ*

te de novo creet : sed quod non teneatur abesse causa: quæ te possit destruere , vel tu non debeas in te habere imbecillitatem , qua tandem deficias. Dicis, *proinde esse manifestum naturali lumine , conservationem à creatione non nisi ratione differre.* Sed quomodo est manifestum , nisi fortè in ipsa luce , effectibus-ve similibus ? Subdis , *non esse in te vim , per quam paulò post sis futura , quòd conscia illius non sis , cum sis tamen res cogitans.* Verùm est in te aliqua vis , quæ possis existimare te quoque paulò pòst futuram : non tamen necessariò , aut indubiè , quia illa tua vis , seu naturalis constitutio , quæcumq; ea sit , eò non extenditur , ut omnem causam corruptentem , seu internam , seu externam arceat. Quare & futura es , quòd vim habeas , non quæ te de novo producat , sed quæ , ut perseveres , præstare sufficiat , nisi corruptens causa superveniat. Quod autem colligis , *dependere te ab aliquo ente diverso à te , bene colligis ; non tamen quasi de novo ab eo producaris ; sed quasi producta ab ipso olim fueris.* Pergis , *tale ens non esse parentes , aliasve causas quaslibet.* Sed quare parentes non sint , à quibus videris adèd manifestè unà cum corpore producta ; ne aliquid dicam de Sole , cæterisque causis concurrentibus ? At ego , inquis , *sum res cogitans , Ideamque Dei in me habens ?* Verùm nonne parentes tui , mentesve illorum fuere quoque res cogitantes , habentesque Ideam DEI ? ut propterea heic urgeri non debeat effectum illud , de quo jam ante , *tantumdem ad minimum esse debere in causa , quantum in effectù.* Si sit alia , inquis , *præter Deum causa , queri potest , an sit à se , vel ab alia ?* Nam si à se , erit Deus ; si ab alia , *quoties quaeretur , donec ad illam perveniatur , quæ à se , & sit Deus ; cum in infinitum progredi non liceat.* Verùm si causa fuere parentes , ea potuit esse , non à se , sed ab alia , illaque rursus ab alia , atque ita in infinitum. Neque absurdum probaveris progressum istum infinitum , nisi simul probes cœpisse aliquando mundum , ac ideò fuisse parentem primum , cuius parens non fuerit. Infinitus certè progressus videtur duntaxat absurdus in causis ita inter se connexis , subordinatisq; , ut inferior agere sine superiore movente non possit : ut dum lapis quidpiam impellit , impulsus à baculo , quem impellit manus , vel cum infimus annulus catenæ pondus trahit , tractus ipse à superiore , & iste ab alio ; sic enim perveniendum est ad unum movens , quod primum moveat. At in causis ita ordinatis , ut priore destructa , ea quæ ab illa pendet , supersit , possitque agere , non videtur esse perinde absurdum. Heinc cum dicis , *factis apertum , progressum hanc infinitum non dari :* Vide an fuerit adèd apertum Aristote-

li, qui persuasus tantopere fuit nullum fuisse parentem primum. Pergis, *nec pluris causas partialis ad te efficiendum convenisse, ex quibus Ideas variarum perfectionum Deo attribuiturum acceperis; cum illæ reperiri non possint, nisi in uno, ac solo Deo, cujus unitas, seu simplicitas est præcipua perfectio.* Verumtamen, seu una, seu plures tui causæ fuerint, non est propterea necesse, ut illæ in te impleverint suarum perfectionum Ideas, quas adunare potueris. Interea verò occasionem facis quærendi à te, cur nisi plures tui causæ, *sætem res plures esse potuerint, quarum perfectiones mirata, beatam illam rem duxeris, in qua existerent omnes simul?* Nosti ut Pandoram Poëtæ describant? Quid-ni, tu mirata in hominibus variis eminentem quandam scientiam, sapientiam, justitiam, constantiam, potentiam, sanitatem, pulchritudinem, beatitudinem, diuturnitatem, & alia, componere hæc omnia potuisti, & suspiciendum existimare, si quis omnia simul haberet? Cur non deinceps omneis perfectiones variis gradibus adaugere, donec ille magis videretur suspiciendus, si ejus scientiæ, potentiæ, durationi, & cæteris nihil deesset, addive posset, sicque foret omniscius, omnipotens, æternus, & cætera omnia? Et cum videres tales perfectiones in humanam naturâ cadere non posse, cur non potuisti existimare beatam fore illam naturam, si cui ista competerent? Cur non dignum putare investigatione, talisne esset aliqua, an-non? cur non argumentis quibuscumque induci, ut consentaneum magis videretur esse, quàm non esse? Cur non consequenter ipsi adimere corporeitatem, limitationem, & cætera omnia, quæ imperfectionem quandam connotarent? Ita profectò processisse plurimi videntur; cum existentibus tamen variis ratiocinationis modis, gradibusque, aliqui corporeum reliquerint Deum, aliqui membra humana habentem: aliqui non unum, sed multiplicem, & quæ sunt alia nimis vulgaria. Circa illud, *de perfectione unitatis*; nihil repugnat omneis perfectiones Deo attributas concipere, ut intimè junctas & inseparabiles; tamen si Idea, quam habes illarum non ab ipso fuerit in te posita, sed à te hausta ex rebus perspectis, ampliataque, ut dictum est. Sic certè depingunt non modò Pandoram omnibus donis, perfectionibusque ornatam deam: sed perfectam etiam Rempublicam, perfectum Oratorem, &c. Denique, *ex eo quòd existas, entisque perfectissimi Ideam in te habeas, concludis demonstrari evidentissimè existere Deum.* At cum conclusio vera sit, Deum nempe existere; non apparet tamen ex dictis, eam esse à te evidentissimè demonstratam.

R. E-

R E S P O N S I O.

Cum negas nos continuo causæ primæ influxu indigere, ut conservemur, negas rem quam Metaphysici omnes ut manifestam affirmant, sed de qua sæpe illiterati non cogitant, quia tantum ad causas secundum fieri, non autem secundum esse attendunt. Sic Architectus est causa domus, & pater filii secundum fieri tantum, ideoque cum opus absolutum est, potest absque istiusmodi causâ remanere; sed Sol est causa lucis ab ipso procedentis, & Deus est causa rerum creaturarum non modo secundum fieri, sed etiam secundum esse; ideoque debes semper eodem modo influere in effectum, ut eundem conservet. Hocque aperte demonstratur ex eo quod explicui de partium temporis independentia, quodque frustra conaris eludere, proponendo necessitatem consecutionis quæ est inter partes temporis in abstracto considerati, de quo hic non est quæstio, sed de tempore seu duratione rei durantis, cuius non negas singula momenta posse à vicinis separari, hoc est rem durantem singulis momentis desinere esse. Cumque ais, vim esse in nobis, quæ ut perleveremus, præstare sufficiat, nisi corrumpens causa superveniat, non advertis te creaturæ tribuere perfectionem creatoris, quod nempe independentem ab alio in esse perseveret, ac creatori imperfectionem creaturæ, quod nempe per positivam actionem tendere debeat in non ens, si quando velis efficere ut esse desinamus. Quod deinde addis, de progressu in infinitum; nempe, non absurdum esse illum dari, à te ipso postea infirmatur, faceris enim absurdum esse in causis ita inter se connexis ut inferior sine superiore agere non possit: de talibus enim tantum hic quæstio est, nempe de causis in esse, non de causis in fieri, ut sunt parentes; nec proinde Aristotelis auctoritas hic mihi adversatur: ut neque etiam id quod ais de L'andora; faceris enim omnes perfectiones quas in hominibus animadverto, variis gradibus posse à me adaugeri, adeo ut postea videam tales esse, ut in humanam naturam cadere non possint: quod omnino mihi sufficit ad Dei existentiam demonstrandam. Est enim illa ipsa vis perfectiones omnes humanas eoque ampliandi, ut plusquam humanæ esse cognoscantur, quam urgeo & contendo non futuram fuisse in nobis, nisi à Deo facti essemus. Atqui quod tibi non appareat me istud evidentissime demonstrasse, nequaquam miror, quia non hactenus animadversti te ullam ex meis rationibus recte percipisse.

I N S T A N T I A.

Quid est, cur cùm aliud non negem, quàm ratiocinii tui vim, tu invidiosè sic impetas, quasi ipsam quoque conclusionem negem? Non ego is sum, qui negem continuum primæ causæ in nos influxum. Non nego quicquid Metaphysici, Theologique saniores de Deo sentiunt (nempe cùm tu dicis omnes Metaphysicos, opponere possem non modò omnes penè antiquos, sed ex Scholasticis etiam Doctoribus quos tu *omnes* vocas, nonnullos:) Nego verò solùm eam consequutionem, qua te consequens adstruxisse putas. Heinc dum allatum, explicatumque à me duplex genus causæ, effectusque resumis, & mutatis nominibus *secundum fieri*, ac *secundum esse* appellas, Scholasticè quidem id facis: (neque ego non te agnosco egregium Scholasticum esse; quamvis tu me talem non agnoveris, dum non tam philosophicis rationibus, quàm oratoris quibusdam artibus utentem censuisti) Enimverò, quàm malè agi secum Scholæ principes reputarent, nisi firmitus corroborarent, quæ tu ex ipsis in hac speciatim Meditationis parte sumpsisti; quantumcumque dicas. te non meminisse, homines. niè ulli fuerint ante te? Dicis *Solem esse causam lucis*, & *Deum rerum creaturam non modò secundum fieri, sed etiam secundum esse*; ideoque debere semper eodem modo influere in effectum, ut eundem conservet. Sed primùm, demonstrasti. ne res esse creatas, & *DEVM* esse earum creatorem, sive causam in fieri; ut jam iisdem perseverantibus, assignes *DEVM* conservatorem, sive causam in esse? Si quis enim neget Deum *Primò creare*, negabit profectò *consequenter creare*: ac tantò magis, quantò *prima* rei productio potest intelligi; *consequens* autem, sive continuata, non potest. Quippe cùm lapidem videmus, fieri eum potuisse intelligimus; at fieri illum continuò minimè intelligimus. Quemadmodum enim, ut aliquid fiat, debet non esse, ita, ut continuò fiat, debet continuò non esse: quomodo autem dici potest continuò non esse, quod continuò esse deprehenditur? quomodo item fieri continuò, quod idem planè, individuumque immutabiliter perseverat? Videtur proinde nulla esse causa, nisi in fieri, quia causa est propriè, à qua res fit, & quando fit; aded ut, cùm in esse perseverans non fiat, sed facta supponatur, non censeatur propriè habere causam in esse, sed habuisse causam cur esset; & cùm interdum dicitur habere causam sui esse, intelligatur causa,

I.
Non fuisse
demon-
stratum in
antecedentibus esse
Deum
creatorem,
ut neque
esse Deum
causam
rerum, eo
modo, quo
Sol lucis
causa est.

quæ præbuerit esse, seu quæ fecerit; non quæ deinceps præbeat, seu faciat. Et quamvis esse perinde dicas dare alicui rei esse, ac impedire ne esse illi adimatur; patet profectò, physicè quidem perinde non esse, sed moraliter, ut loquantur, solùm; cùm si quis telum in caput alicujus directum avertat, destructorive ædium obstitat, non ea, quæ pater, aut opifex faciat. Deinde exemplum de Sole nihil juvat ad unius, ejusdemque numero, sive singularis, ac individuae rei conservationem probandam. Si quidem Sol non modò non est conservator, seu causa luminis in esse; sed videtur etiam causa in fieri deterioris longè conditionis, quàm quilibet artifex. Etenim lux Solis, quæ perseverare videtur in aère, una, eademque numero non est, sed continenter nova, ac nova; eo modo quo aqua perseverare visa in profluente, non eadem individua est, sed continenter alia, ac alia; aded ut non immeritò Sol dicatur esse fons lucis; quatenus ut fons continenter novam aquam suppeditat, ita Sol quoque novam lucem; idque seu lux sit substantialis quidam effluxus; seu qualitas quædam emanans; seu ἐκδελχέα, vel continua motio. Quare & tantum abest, ut Sol conservet lucem semel productam, ut potius ipsam evanescere, ac perire sinat, ejusque loco aliam numero distinctam substituat. Vnde & potest quidem dici causa in fieri, sed nullo modo causa in esse; estque proinde similis non artifice domum constituenti, quæ deinceps constet, sed artifice, si quis talis sit, à quo non prius domus sit exstructa, quàm corruat, quique eodem momento aliam inchoet, ipsaque rursus corrumpente aliam, haud absimiliter ruituram. Agitur heic autem de rebus creatis, quæ eadem numero, individuaeque perseverant. Et licet res corporeæ, ac potissimum animatæ in continuo quasi partium fluxu, & novarum partium substitutione versentur; attamen & ipsa saltem partium substantia, sive materia incorrupta, & sine fluxu, ac substitutione manet; Et quæstio heic est præsertim de Mente, quam carentem partibus facis, & quam, ut opinor, dicturus non es aliam, aliamque continuò fieri, instar lucis, videlicet; potiusquàm eandem numero, individuaeque perseverare, instar scilicet lapidis, aut domus.

II.

*Remanere
Paralogis-
mum ex
assumpta
Temporis
conditione,
seu natura
alia, quàm
sit.*

Pergis, hoc aperitè demonstrari ex eo, quod explicuisti de partium temporis independentia. En verò tuam explicationem: Quoniam omne tempus vite in partem innumeratè dividi potest, quarum singulæ à reliquis nullo modo dependent, ex eo, quod paulò antè fuerim, non sequitur me nunc debere esse, nisi aliqua causa me quasi rursus creet ad hoc momentum, hoc est me.

est me conservet. Perspicuum enim est attendenti ad temporis naturam, eadem planè vi, & actione opus esse ad rem quamlibet singulis momentis, quibus durat, conservandam, qua opus esset ad eandem de novo creandam, si nondum exsisteret; adeò ut conservationem sola ratione à creatione differre, sit etiam unum ex iis, quæ lumine naturali manifesta sunt. Hoc verò loco, quanta materies, segesve paralogismorum! Nam primò perspicuam supponis temporis naturam, qua nihil potest dici obscurius. Indicio sanè esse potest vel innumerabilis illa opinionum varietas, quæ apud antiquos Philosophos fuit, quæque etiamnum perseverat. Tametsi enim tu me dicas Mentem alloqui, quæ ne sciat quidem an Philosophi fuerint, quæque illorum autoritate non moveatur; cùm hæc nihilominus Mens ignara aded rerum omnium, quæ extra se sunt, supponat temporis naturam esse aded perspicuam, ut demonstrationem exinde contexat; & me de perspicuitate illa dubitante (ob caliginem, quæ sola est causa varietatis opinionum inter tot alioquin sapientes, perspicacesq; Philosophos) ipsa Mens non alia ratione perspicuitatis fidem faciat, quam auctoritatem suam obrudendo; Non subest profectò, cur ego, aut alius, auctoritate ejus moveamur, ipsamque ejus auctoritatem fundamentum esse, aut principium demonstrationis existimemus. Et quàm beabis deinceps nos! quàm obstringes totam Sapientum nationem, si perspicuam, & in aperto feceris temporis naturam; si explicueris utrum sit aliquid reale, an-non? quî à re durante differat, aut non differat: quid in illa sit, vel non sit: cæteraque his consimilia! Quod ad me spectat, fateor ingenuè ignorare me temporis naturam; ac tametsi mihi videar intelligere utcumque quid sit, explicare tamen, si velim non possum; mihi que statim præclara illa D. Augustini verba succurrunt, *Quid est ergo tempus? Si nemo ex me querat scio; si querenti explicare velim nescio*; quanquam etiam convinco me ided nescire quid sit tempus, quòd dicere aliis non possim quid sit. Certè pro voto satis non est, cùm dico me concipere tempus, sive durationem, quasi quendam fluxum, qui nunquam cœperit, qui jam perseveret, qui nunquam desiturus sit: qui neque impediri, neque retardari, neque accelerari possit. Qui secundum totam suam amplitudinem acceptus, & quatenus principio, ac fine caret, dici possit æternitas, seu duratio DEI, ipsi toti, ob ejus naturæ immutabilitatem coëxistentis, ut coëxistit rupes præterlabenti flumini; acceptus verò secundum parteis, sit duratio rerum exortui, interituique obnoxiarum, cujusmodi est totus Mundus,*

dus, cujusmodi sunt omnes partes Mundi, siue res creatæ, quæ do-
 nec simul perseverant, non pluribus temporibus, sed uno, eodem-
 que tempore durare censeantur. Cujus denique, cum sit successivus,
 homines mensuram adinvenerint, motum scilicet, successivum ip-
 sum, ac cælestem potissimum; absque eo tamen, quod motu ve-
 lociore, aut tardiore facto, fluxus temporis ideo fiat concitator;
 aut segnior; quippe qui uno tenore sit, quique seu quidpiam mo-
 veatur, seu nihil; imò & seu Mundus fiat, seu destruat, & seu
 aliquid sit, seu nihil prorsus, invariabiliter continetur. Id, inquam,
 non mihi fatis est pro voto; Sed utcumque sit, huc est quod respexi.
 cum te dicente, *posse Tempus in partibus innumeras dividi, quarum reli-
 quæ à singulis nullo modo dependant, ipse objeci instari posse, Quæ-
 nam sit excogitabilis res, cujus partes sint à se invicem inseparabiles ma-
 gis? inter cujus partibus sit inviolabilior series, & connexio? cujus quæ
 sunt partes posteriores possint minus averti, magis coherere, magis depende-
 re à prioribus? Quid tu ad hoc? Nempe; voluisse me eludere, proponen-
 do necessitatem consequutionis quæ est inter partibus temporis in abstracto
 considerati, de quo hic non est quæstio; sed de tempore, seu duratione rei
 durantis, cujus non nego singula momenta posse à vicinis separari, hoc est
 rem durantem singulis momentis desinere esse. At falleris sanè, dum ex-
 istimas me fuisse conatum eludere, potiusquam jactatam à te per-
 spicuitatem adipisci. Dicis me proposuisse consequutionem quæ est inter
 partibus temporis in abstracto considerati. At quid vocas tempus abs-
 tractum, abstractève consideratum? Ego quidem unicum agnosco,
 quod non diffitebor sanè dici, aut considerari posse abstractum,
 quatenus non pendet à rebus, cum siue res sint, siue non sint; siue
 moveantur, siue quiescant, eodem semper tenore fluat; ac inva-
 riabiliter perseveret: At esse aliud præter istud, quod possit dici,
 aut considerari quasi in concreto, quatenus rebus competit, seu
 quatenus res illo durant, nullo profecto modo agnosco. Aggre-
 deris tu declarare, cum dicis *quæstionem esse non de illo, sed de tem-
 pore, seu duratione rei durantis*: Ego verò solum requiro, quodnam
 aliud tempus rei durantis sit, quam illud? Audivisti vulgò distingui
 tempus externum, & internum; At si illud quod ego dixi, externum
 sit, quodnam erit istud internum? Id experiamur. Ego verbi
 causa sum res à quinquaginta jam annis durans, agnoscoque me du-
 rare eadem duratione, qua omneis coætaneos, qui omnes simul
 non amplius hætenus duravimus, quam unus; Neque enim à nostro
 exortu fluxere tot illæ annorum myriades, quæ supputari possent,
 si toties*

fi toties seipſis quinquaginta adderentur , quot quinquagenarii jam ſumus : at internum tempus , quod mihi peculiare ſit , & quod præter externum illud tibi vocatum in abſtracto , mihi in concreto conveniat , neque agnoſco , neque à te addiſco. Dicis *me non negare ſingula huius momenta poſſe à vicinis ſeparari , hoc eſt rem durantem ſingulis momentis deſinere eſſe*. Quam lepidè facis , dum id quod controvertitur , pro conſeſſo habes ! Ego certè ne agnoſco quidem quæ momenta me non negare dicis. Nam fateor quidem rem durantem deſinere poſſe ſingulis momentis ; ſed momentis nempe durationis illius communis , quibus eiſdem , & non aliis , res quoque aliæ ſimul durantes poſſunt deſinere , & quæ ſeparari à ſe mutuò propter indiſſolubilem concatenationem non poſſint. Tu ſi ſecus capis , quare non declaras ? Nam poſſe rem hoc momento deſinere , & poſſe ſequente deſinere , & poſſe alio deſinere , eſt rem habere potentiam durandi infirmam ; ſed non eſt habere momenta , ſive parteis temporis , quæ in momentis , ſive partibus temporis alterius deſinere poſſint. Heinc eſt ille vulgaris error , quo poëtici dicunt *Tempus edax rerum* ; Sanè enim tempus nihil deterit , ſed Phyiicæ ſunt cauſæ , quæ niſi uno , ſaltem alio tempore deterunt , ac deſtrunt.

Sed jam formetur tua Demonſtratio :

Si partes ſingulæ temporis vitæ nullo modo dependent à reliquis ; tum ex eo , quòd paullo ante fuerim , non ſequitur me nunc debere eſſe , niſi aliqua cauſa me quaſi rursus creet ad hoc momentum , hoc eſt me conſervet :

Atqui partes ſingulæ temporis vitæ nullo modo dependent à reliquis :

Igitur ex eo , quòd paullo ante fuerim , non ſequitur me nunc debere eſſe , niſi aliqua cauſa me quaſi rursus creet ad hoc momentum , hoc eſt me conſervet.

III.
Variè peccare Demonſtrationem ex independentia partium temporis inter ſe deducam.

Primùm conditio propoſitionis , quatenus ex ea aſſumptionem facis , eſt falſa ; quoniam partes temporis ita ſunt inter ſe connexæ , ut poſteriores neceſſarià , & ut ita loquar inimpedibili conſequuti-one dependeant à prioribus ; & quamvis tu potentiam deſinendi ſingulis momentis accipias pro ipsis temporis momentis , perperam tamen accipis , quoniam rem durantem cum duratione confundis , tot multiplicas tempora , quot ſunt res durantes ; & quacùmque alia ratione temet explices , tempus , rem obſcuram , obſcuriorem facis. Deinde cùm ea conditione poſita deducis , non ſequi ex eo

quod paullo antè fueris, te nunc esse debere, heterogenea planè est deductio; quoniam ut pars temporis præcedens non fuit caussa, ut prius esses; verùm ea caussa, quæ te in illo produxit, aut quæ, ut non esses, non fecit; ita neque pars temporis sequens est caussa ut posteriùs sis, aut non sis; sed ea caussa quæ te in illo aut conservat, aut perimit: Ex quo fit, ut ex eo, quodd antè fueris, non sequatur te nunc esse debere; non quia partes temporis dependentes, aut independentes ab invicem sunt; sed quia est quædam caussa, quæ cùm antè te non destruxerit, destruere nunc potest. Hinc est cur etiam infirmitas consequutionis vel ex eo pateat, quodd alia planè opposita pari jure sit admittenda. Nam ut dixisti, *Ex eo, quodd paullo antè fuerim, non sequitur me nunc debere esse*; potuisti quoque dicere, *ex eo, quodd paullo antè fuerim, non sequitur me debere non esse*; Sed nempe non propter dependentiam, aut independentiam partium temporis, sed propter præsentiam causæ conservantis; vel propter absentiam causæ corruptentis. Possem quoque proponere res incorruptibileis, ac DEUM præsertim, quem non dixeris, ex eo, quodd paullo antè fuerit, non sequi nunc esse debere; tanquam DEO habente ex immutabilitate naturæ, ut non possit desinere; nõ verò ex dependentia, aut independentia partium temporis, quibus coëxistit. Tertiò cùm absque antecedente id consequens possit admitti, *Ex eo quodd paullo antè fuerim, non sequitur me nunc esse debere*, Nulla tamen necessitas est ulterioris consequutionis, *Nisi aliqua caussa me quasi rursus creet*. Nam si loco horum verborum illa adhibeantur, *nisi caussa absit, quæ me destruat*; vel, *nisi sit caussa, quæ me tueatur*; vel, *nisi sit in me satis virium, ut adhuc subsistam*, aut similia, nulla non magis videbuntur, quàm tua ista coherere. Quippe ipsa sponte, ac planè sequuntur; cùm tu rem deducas ab inexpectato; ac tantò magis, quantò, ut antè dicebam, non potest intelligi rem quæ continuò est, continuò produci. Quartò Cùm dicis te *rursus creari*, aut *quasi creari*, supponis te prius creatum; Igitur à DEO creatore; Igitur à DEO existente; atqui hac tua ratiocinatione contendis probare, & Deum existere; & esse creatorem; & te, cæteraque creasse. Igitur non modò argumentaris à non caussa ut caussa; verùm etiam petis principium; ne memorem rem planè miram; Mentem nempe adeò ignaram, tam parùm adhuc ratiocinatam, potuisse rem adeò arcanam, ac est Creatio, cognoscere, quam tot illustres Philosophi, post tot circa illam ratiocinia, habuere prorsus incompertam! *Quinò ex his patet* cujus roboris sit totius propositionis confirmatio, dum ais,

Perspi-

*Perſpicuum enim eſt attendenti ad ſem̃poris naturam, eadẽ planẽ vi, & actione opus eſſe ad rem quamlibet ſingulis momentis, quibus durat, conſervandam, quã opus eſſet ad eandẽ de novo creandam, ſi nondum exiſtenter. Quippe & temporis natura perſpicua non eſt, ut ad eam attendens rem facias perſpicuam, quæ obſcuritatis eſt tantæ. Et cùm ad iſta attendis, nondum conſtituiſti aliquid creari; neque noviſti quæ actio ſit creatio; ut ſcias utrum conſervatio eadem actio ſit, an diverſa; & utrum ab eadem planẽ vi, an ab alia procedat. Et cùm meminiffe poſſis exempli lucis, & ſimilium, quorum infirmitas eſt jam antè declarata, ſuccurrere poteſt exemplum domus, quæ proſectò non eadem vi conſervatur, & ſingulis momentis durat, qua fuit exadificata; itemque pulli, qui non eadem vi, & actione conſervatur, & durat, qua fuit genitus, & aliorum innume-
 rorum. Et cùm poſſis dicere aliam eſſe rationem de prima cauſa; hoc ipſum tamen in quæſtione eſt, neque adhuc probaſti eam dari, ut neque actionem ipſius eſſe creationem ex nihilo, potiusquàm productionem ex præjacente æternũ materia; aut ſimplicem Mundi ab æterno exiſtentis adminiſtrationem. Et non meminſti ipſe an creatus ab illo fueris; neque quando, ubi, ex quo, qua occasione, qua vi, quomodo. Et quamvis meminiffes, reſque eſſet tibi perſpicua de te, non poſſes tamen idem dicere de re quãlibet, qui rei cuiuſlibet conditionem, ac naturam non noſſes; Et denique, videtur potiùs attendenti perſpicuum minus eſſe laboris in re conſervanda, ut dicebam de domo, quàm in eadem producenda. Sextò, cùm ita colligis, adeò ut conſervationem ſola ratione à creatione differre ſit etiam unum ex iis, quæ lumine naturali manifeſta ſunt, Nihil aliud ſubit dicere, niſi quod beatus nimium es, cujus lumini naturali ſunt omnia adeò manifeſta. Tibi enim ſpoliato omni anteceden-
 te notitia, idem tam ſponte occurrere, quod doctiſſimis, ac ſubtiliſſimis Theologis ſimul ac Philoſophis, non niſi poſt diuturna ſtudia, & profundam rerum divinarum, ac humanarum perſcrutationem occurrit; id ſanè debet incomparabilis exiſtimari ſœlicitatis. Dic tamen amabò; An ſaltem hæc verba ita extuliſſes, niſi à Scholaſticis accepiſſes? Et quod illi ut creationem, ſic conſervationem referant præſertim ad lumen ſupernaturale, nihil-ue fuit ſcrupuli, te ab ipſis deſciſcere, & referre ad ſolum naturale? Et cùm conſervatio non poſſit eſſe manifeſta naturali lumine, quin creatio quòque manifeſta ſit, à qua ratione ſola differt, exiſtimaviſti-ne te fuiſſe demonſtratione mera perſuaſum, quemadmodum conſervationem,*

tionem, ita & creationem esse? Et, si ita sit, quomodo putasti posse fieri, ut id diceretur manifestum naturali lumine, quod omnes proisus Philosophi, qui solo lumine naturæ fuere ducti, non modò non habuere manifestum, sed oppositum etiam asseruerunt, defendentes nihil creari, seu ex nihilo nihil fieri? An credidisti te hoc modo legitimè ratiocinari?

Illud est manifestum naturali lumine, quod immanifestum fuit omnibus Philosophis solo naturæ lumine usis:

Atqui creatio (& consequens illam, ut sola ratione differens conservatio) fuit immanifesta omnibus Philosophis solo naturæ lumine usis:

Igitur creatio (& consequens illam conservatio) manifesta est naturali lumine.

IV.

Non agi
heic de ve-
ritate Rei
ipsius, sed
de vi Ra-
tioniis:
adversus
quam qua
objecta
praesertim
fuerant,
aut inso-
luta sunt,
aut insta-
bila.

Ad tuam Responzionem ut redeam, Quòd dixerim, vim esse in te, non quæ te de novo producat, sed quæ, ut perseveres, prestare sufficiat, nisi corrumpens causa superveniat; Excipis me non advertere, tribuere de vi Rationis perfectionem Creatoris, quòd independenter ab alio perseveret. Sed cum ego advertam quam personam geram, nempe non impugnantis id quod res est, verum ostendentis imbecillitatem tui ratiocinii; Non videris tu satis quàm sustineas advertere, dum loco germanæ responzionis, nihil aliud planè quàm allegas incommodum, & incommodum quidem ejuscemodi, ut sit illud ipsum, de quò quæritur. Non-ne enim hoc ipsum quæritur, tuque defendendum suscepisti, Te dependenter à Deo Creatore conservari, seu perseverare in esse? Pergis, me etiam tribuere Creatori imperfectionem creaturæ, quòd nempe per positivam actionem tendere debeat in non-Ens, si quando velit efficere, ut esse desinamus. Sed iterum, ego non tribuo, & peream potius, quàm ut tribuam imperfectionem ullam Creatori, à quo est omne datum optimum, & omne donum perfectum; in quo vivo, moveor, & sum; cui benedictio, claritas, sapientia, gratiarum actio, honor, virtus, fortitudo in sæcula: Tuum est ratiocinium, cui rursus eam imperfectionem tribuo, ut nihil aliud, quàm alleges incommodum, ac id ipsum quidem, quod est in quæstione. Nimirum in quæstione est, *Deus-ne res servet continuo influxu; adeò ut subtracto influxu servari non possint, sed desinant esse.* Prætereo autem debuisse te quoque ostendere, cur imperfectioni vertatur, si Deus non sola negatione concursus, sed positiva etiam actione quidpiam destruat. Nonne enim vim agendi habet, qua ut educit ex nihilo, ita derrudat in nihilum? An si concurrat cum homine ut inc

ut inferat gladium in jugulum tauri, non poterit ipse sine homine gladium inferre in jugulum? An imperfectio erit in Deo, si possit se solo, & positiva actione jugulare taurum, sive ut tu loqueris, tendere in non Ens, hoc est mortem tauri? Sed voluisti nempe ostendere quantum in distinctionibus Scholasticis esses versatus. Opposueram consequenter posse se quidem colligere dependere se ab Ente diverso à te: sed ita tamen ut illud intelligeretur non à quo de novo, continuoque produceris, sed à quo fuisses olim productus: Verum tu id existimasti ejusdemmet incommodi allegatione salvatum. An verò debuisti ejusdem prætextu illud præterire, quod objeceram de Parentibus? Siquidem tu ita quæsieras, Nempe à quo essem? à me scilicet? vel à parentibus? vel, &c. Ego imprimis dixeram, nihil fuisse necesse ut probares te non esse à te; supponens quippe te ea de re nec potuisse, nec debuisse dubitare, qui & meminisses te non semper fuisse (nisi quod poteras existimare te ab æterno tempore dormiisse somnum absque insomniis, ac sponte demùm evigilasse, cum cogitare primum cœpisti, immemor causæ productricis) & inter tam multa tibi manifesta, illud te latere non posset, Nihil esse sui ipsius causam. Deinceps verò requisivi, cur non existimares te à tuis Parentibus esse, à quibus videreris esse adeò manifestè productus? Et quia tu præveneras, quoniam esses res cogitans, Ideamque Dei in te habens, & tantundem ad minimum deberet esse in causa, quantum in effectu; idcirco ita institi, Verum nonne parentes tui, mentesve illorum (nempe ita fuit distinguendum, quod tu loquereris ut Mens) fuerunt quoque res cogitantes, habentesque Ideam Dei? Tu porro ad hoc nihil respondisti; ut neque reverà respondere potuisti, nisi negando parentes tuos, quando te genuerunt, non habuisse mentem, aut habuisse quidem, sed non cogitantem; aut cogitantem quidem, sed non habentem Ideam DEI; aut habentem quidem, sed non tantundem ad minimum realitatis objectivæ continentem, quantum te, aut mentem, quam tunc accepisti, & agnovisti deinceps (etiam intra uterum degens) te habere.

Hoc prætermisso, id impetis, quod circa progressum infinitum dixi. Ut appareat porro quàm lepidè facias, id solum noscendum, de quo agitur: Tu probaturus non esse te à Parentibus, aliâve causâ, quàm à Deo, productum, usus fueras illa ratione apud Doctores familiari, Si alia sit causâ, potest de illa quæri, an sit à se, vel ab alia; Nam si à se, patet ex dictis illam ipsam Deum esse; quia &c. Si autem ab alia, rursus eodem modo de hac altera quæres, an sit à se, vel ab alia.

V.
Pravè de-
sorium,
quod obje-
ctum fue-
rat de pro-
gressu infi-
nito, in
causis es-
sentialiter
& acci-
dentaliter
subordina-
tis.

ab alia; donec tandem ad causam ultimam deveniatur, quæ erit Deus: Ego excepi, Verum si causa fuerit parentes, ea potuit esse non à se, sed ab alia, illaque rursus ab alia, atque ita in infinitum. Quo loco quid est manifestius, quàm institutam fuisse quæstionem de progressu infinito causarum in fieri, seu accidentariò (ut loquuntur). subordinatis, non verò causarum in esse, seu subordinatis essentialiter? Et ne id verti posset in dubium, rem consequenter exposui, declaravi que tibi probandum absurdum esse progressum in infinitum, non in causis essentialiter subordinatis, seu in esse, ut de quibus non esset quæstio; sed de accidentariò subordinatis, seu in fieri, cujusmodi sunt parentes, seu Pater, avus, proavus, abavus, aravus, tritavus, & cæteri, quibus non existentibus, possunt filii, nepotes, pronepotes, & cæteri agere, fieri ve pari modo causæ. Iam tu ais, Quod ego addo de progressu in infinitum (nempe non absurdum esse illum dari) infirmari postea à meipso. Quomodo verò? Quoniam fateor absurdum esse in causis ita inter se connexis, ut inferior sine superiore agere non possit. Et non-ne hoc lepidum est? Dixi ego absurdum in istis causis; Ergo infirmavi, quod addidi; cum dixi non esse absurdum in aliis ita ordinatis, ut priore destructa, ea quæ ab illa pendet, supersit, agereque possit? Sed nempe is modus tuæ consequutionis. Pergis, De talibus enim tantum hæc quæstio est, nempe de causis in esse, non de causis in fieri, ut sunt Parentes. Sed nonne potius de causis in fieri, ut sunt Parentes, agitur? Attamen ulterius insistere piget. Id potius noto, præterlabi te callidè, dum quas in esse causas vocas, cum iis, quas vocant essentialiter subordinatas confundis; quasi causæ sic subordinatæ non sint reverà in fieri, & non modò quidem quod ad conservationem, sed maximè etiam quod ad primam productionem spectat; ac interim dicis quæstionem esse de causis in esse, non autem in fieri, simulque tacitè declinas quod de Aristotele non alio fine memini, quàm ad ostendendum non esse ista adedò aperta naturali lumine, ac tu asseveras; Si Aristoteles quidem lumine naturæ non caruit.

VI.

Non ex eo, usque gradum, ut in humanam naturam cadere non possint, lætor visum quod perfectio aliqua mente ampliat, illam ampliatam reipsa dari.

Quod dico postea de ampliatione perfectionum humanarum, ad eum fuisse tibi esse argumentum, ad demonstrandum Dei existentiam: At non eam proinde pervideo, quam tu, illiusmet necessitatem. Nam quod perfectionem, seu potentiam saliendo, quæ in homine est, ita mente amplificemus, ut concipiamus illum ex Atlante transilientem, vel potius transvolantem in Caucasum; & ex Terra in orbem Lunæ; ac discurrentem porro per Stellarum globos, ad inter-

internoscendum quid illeic geratur, aut quæ omnia se in iis habeant; Et agnoscetes licet talem perfectionem, (amplificatam scilicet) non cadere in humanam naturam, reputemus tamen scilicet, si cui ipsa contigerit; non video propterea quorsum admittatur talem perfectionem necessariò esse; ac nisi hominem, saltem naturam aliam, saltem DEVM ipsummet dari, qui ea ratione transvolet. Quippe & rursus sic amplificare, ut talis natura in omnibus illis orbibus, & ubique sit, sicque volatu, aut motu ad pergendum, cognoscendumque omnia non egeat; Consequutio est ex eodem principio, quod probandum foret, *Omnia quæ ampliando intelligimus, concipimusque, reipsa esse.* Pergis esse eam ipsam vim, perfectiones omnes humanas eo usque ampliandi, ut plusquam humana esse cognoscantur, quam urges, & contendis non futuram fuisse in nobis, nisi a Deo facti fuissetus. Verum quæstio non est an urgeas, & contendas; sed an probes, atque demonstres? Quod concludis ceriè non mirari te mihi non apparere te istud evidentissimè demonstrasse, quòd non hactenus animadverteris me nullam ex tuis rationibus rectè percepisse; gratulor beatitudinem ex tanto admirationis defectu tibi contingentem.

D V B I T A T I O X.

De modo impressionis Idea Dei in Mente, ut nota impressa ab Artifice, cujus similitudinem Mens gerit.

Superest, inquis, ut examinem, qua ratione Ideam istam à Deo accipis: neque enim illam à sensibus hauri; nec etiam à me efficta est; (nam nihil ab illa detrudere, nihil illi superaddere planè possum) ac proinde superest ut mihi sit innata; quemadmodum etiam mihi est innata Idea mei ipsius. Enimverò ut illam partim hauri à sensibus, partim effingere potueris, aliquoties jam dictum est. Quod autem dicis te nihil posse illi addere, aut detrudere, cogita ut initio non æquè perfectam habueris: cogita ut possint esse homines, vel Angeli, aut aliæ naturæ te doctiores, à quibus aliqua moneri de Deo valeas, quæ nondum novisti: cogita posse saltem Deum te sic erudire, eaque claritate sive in hac vita, sive in alia perficere, ut reputari nihilum, quicquid de illo jam nosti, possit. Quicquid demum sit, cogita, ut ex perfectionibus rerum creaturarum fieri ascensus valeat

ad cognitionem perfectionum Dei, & ut illæ omnes non uno momento noscuntur, possuntque & plures & plures in dies detegi; ita posse Ideam Dei non uno momento haberi perfectam, sed magis, magisque in dies perfectiorem. Pergis, & *scire non mirum est Deum in creando, Ideam illam mihi indidisse, ut esset tanquam nota artificis operi suo impressa. Nec opus est, ut nota illa sit aliqua res ab opere ipso diversa: sed ex hoc uno, quod Deus me creavit, valde credibile est me quodammodo ad imaginem, & similitudinem ejus factum esse: illamque similitudinem, in qua Idea Dei continetur, à me percipi per eandem facultatem, quâ ego ipse à me percipior: h. e. dum meipsum intelligo, non modò intelligo me esse rem incompletam, & ab alio dependentem, remque ad majora, sive meliora indefinitè aspirantem: sed simul etiam intelligo illum à quo pendeo, majora ista omnia, non indefinitè & potentiâ tantum, sed reipsâ infinitè in se habere, atque ita Deum esse. Ac tu speciosè quidem hæc omnia, ipseque non esse vera non objicio: sed quæsierim tamen undenam probentur? Ut antè dicta enim præteream, Si Idea DEI est in te, ut nota artificis operi impressa, quis-nam est modus impressionis? quænam est forma istius notæ? quo-nam modo illam discernis? Si non est aliud ab opere, sive à re ipsa; tu ipsa ergo es Idea? tu ipsa nihil aliud es, quàm cogitationis modus? tu ipsa es & nota impressa, & subjectum impressionis? *Credibile est*, inquis, *te factam ad imaginem & similitudinem Dei*. Credibile sanè religiosa fide: at ratione naturali, quâ liceat intelligere, nisi Deum facias hominiformem? Et, in quo-nam consistere potest hæc similitudo? An tu cum sis pulvis & cinis, præsumere te similem potes æternæ illi, incorporeæ, immensæ, perfectissimæ, gloriosissimæ, & quod caput est, invisibilissimæ, incomprehensibilissimæque naturæ? An illam de facie novisti, ut tecum ipsa comparans, asseverare conformem possis? *Credibile dicis, ex eo quod creavit*: sed ex eo potius incredibile est. Siquidem opus operanti simile non est, nisi cum ab eo generatur per communicationem naturæ. At tu hoc modo genita à DEO non es; neque enim es ejus proles, naturæve ejus particeps: sed creata solum es, hoc est ab eo ficta secundum Ideam: adeo ut non possis te dicere illi magis similem, quàm sit domus fabro murario. Atque id quidem supposita tui, quam nondum probasti, à Deo creatione. Percipis, inquis, *similitudinem, dum intelligis te rem incompletam, dependentem, & ad majora, melioræque aspirantem*. Sed quare non hoc potius sit dissimilitudinis argumentum; cum Deus ex opposito sit completissimus, independentissimus, sibi suffici-*

tissimus,

tissimus, quippe maximus, optimusque? Ut præteream, cum te dependentem intelligis, non propterea statim intelligere te id, à quo dependes, esse aliud, quam parentes; vel si aliud intelligis, non fuisse causam, cur te ipsi similem putes. Ut præteream quoque mirum esse, cur non cæteri hominum sive mentium, idem, quod tu intelligant: ac præsertim, cum non sit ratio cur non credatur, Deum illis perinde ac tibi, impressisse Ideam sui. Profectò vel hoc unum arguit non esse Ideam à Deo impressam; quandoquidem si ita esset, & omnibus, & simul una, eademque impressa esset, hominesque omnes conciperent DEUM simili formâ ac specie; eadem illi tribuerent; eadem planè de eo sentirent; cum oppositum tamen notissimum sit. Sed de his tamen multa jam nimis.

RESPONSIO.

Cum reprehendis id quod dixi, nihil Ideæ Dei addi, nihilque ab ea detrahi posse, non videris attendisse ad id quod vulgò ajunt Philosophi, essentias rerum esse indivisibiles; Idea enim repræsentat rei essentiam, cui si quid addatur, aut detrahatur, protinus fit alterius rei Idea: sic Pandora, sic falsi omnes Dii ab iis qui verum Deum non rectè concipiunt, effinguntur. At postquam semel concepta est Idea veri Dei, quamvis novæ deæque possint in ipso perfectiones quæ nondum fuerant animadversæ, non ideo tamen augetur ejus Idea, sed tantum distinctior redditur & expressior, quia omnes in eadem illa quæ prius habebatur, debuerunt contineri, quandoquidem supponitur fuisse vera. Ut neque augetur idea trianguli cum variæ in eo proprietates quæ prius fuerunt ignoratæ advertuntur. Neque enim, ut scias, Idea Dei formatur à nobis successivè ex perfectionibus creaturarum ampliatis, sed tota simul ex hoc quod ens infinitum, omnisque ampliationis incapax mente attingamus. Cum autem petis, undenam probem Ideam Dei esse in nobis tanquam notam artificis operi impressam, & quis sit modus impressionis, quæve forma istius notæ? idem est ac si aliqua in tabella tantum artificis deprehendens ut ipsam à solo Apelle pingi potuisse judicaret, diceretque inimitabile istud artificium esse veluti quandam notam, quam Apelles tabellis omnibus suis impressit, ut ab aliis dignoscantur; tu verò quæretes quæ forma istius notæ, quisve modus impressionis? cerè risu potius quàm responsione dignus videreris. Quid cum pergis? si non est aliud ab opere, tu ipsa ergo es Idea, tu ipsa nihil aliud es quàm cogitationis modus, tu ipsa es & nota impressa, & subiectum im-

impressione. Nunquid æquè acutum est, ac si dixissem artificium illud quo Apellis tabellæ ab aliis dignoscuntur, non esse quid diversum ab ipsis tabellis; urgeres, ergo tabellas istas nihil aliud esse quàm artificium, nec ex ulla materia constare; ergo ipsas esse tantum modum pingendi, &c. Quid cum ut neget nos ad imaginem Dei factos esse, dicis, ergo Deum esse hominiformem, & ea colligis in quibus humana natura differt à divina? es ne in eo acutior quàm si ut negares quasdam Apellis tabellas ad similitudinem Alexandri factas fuisse, disceres ergo Alexandrum fuisse instar tabellæ, tabellas autem ex ligno, & pigmentis compositas esse, non ex ossibus & carne, ut Alexander. Nempe nō est de ratione imaginis, ut in omnibus eadem sit cum re cuius est imago, sed tantum ut illam in aliquibus imiteretur. Et perspicuum est perfectissima illam vim cogitandi, quam in Deo esse intelligimus, per illam minùs perfectam quæ in nobis est representari. Cum verò mavis conferre Dei creationem cum fabri operatione, quàm cum generatione parentis, sine ulla ratione id facis: etsi enim illi tres agendi modi toto genere diversi sint, propius tamen est à productione naturali ad divinam, quàm ab artificiali argumentari. Sed nec tantam similitudinem esse dixi inter nos & Deum, quanta est inter filios & parentes; nec etiam semper nulla est similitudo inter opus fabri, & ipsum fabrum, ut patet cum statuarius sibi simile signum exsculpsit. Quam mala autem fide refert mea verba, cum fingis me dixisse, à me percipi similitudinem in eo quod sim res incompleta, & dependens; cum è contra ista in dissimilitudinis argumentum attulerim, ne putaretur me velle homines Deo æquare. Dixi enim me non modò percipere me in istis Deo esse inferiorem, & interim ad majora aspirantem; sed etiam majora ista in Deo esse, quibus majoribus aliquid simile in me sit, cum ad ipsa ausim aspirare. Denique cum mirum esse ais, Cur non cæteri hominum idem quod ego de Deo intelligant, cum in illis, æquè ac in me, imprefferit ideam sui, idem est ac si mirareris, quod cum omnes norint ideam trianguli, non tamen omnes æquè multa in ipsa animadvertant, & fortè nonnullis falsa quedam de ipsa ratiocinentur.

I N S T A N T I A.

E Gregiè prorsus Doctorem agis, dum mones quid vulgo Philosophi doceant; egregiè prorsus Disputatorem, dum subtili aded distinctione subterfugis. Non videor, ut inquis, attendisse ad id, quod vulgò ajunt Philosophi; Sed de hoc statim; juvat imprimis Lectionem tuam repetere, ipsam nempe Coronidem Medita-

I.
Quia conclusa ad calcem Meditationis III, Syllogistica forma exhibentur: ut quid virium habeant, uno prospectu pateat.

Meditationis, de qua est quæstio. *Quinque* sunt, quæ in ea præstas. Nam postquam superesse dixisti, ut examines qua ratione Ideam DEI à DEO acceperis, Resumis *Primum* quadam veluti anacæphalæosi probationem, quòd tibi sit innata; *Secundò* ostendis quomodo fuerit tibi impressa; *Tertiò*, Concludis Argumentum de probata DEI existentia ex ejus Idea; *Quartò* subinfers DEVM non esse fallacem. Denique dicis placere tibi hîc aliquandiu in contemplatione DEI immorari. De hoc autem postremo capite ut nihil dicam; Quoniam cætera sunt quasi compendium totius tuæ Demonstrationis, & aditus quidam ad ea, quæ sequuntur, idcirco singulorum vim exprimere placet syllogisticâ formâ. *Primum* igitur ita habet:

Si, quam habeo ideam Dei, non est hausta à sensibus; neque à me efficta, quòd nihil ab illa detrabere, nihil superaddere planè possim, superest ut mihi sit innata, quemadmodum etiam mihi est innata idea mei ipsius:

Atqui Idea Dei, quam habeo, non est hausta à sensibus, neque à me efficta, quòd nihil ab illa detrabere, nihil superaddere planè possim:

Igitur superest ut idea Dei quam habeo, sit mihi innata, quemadmodum mihi est innata idea mei ipsius.

Quod Demonstrationis hujus robur sit, tum ex hæcenus dictis clarè patet, tum erit statim plenius dicendum circa illam particulam, quòd nihil detrabi, nihil superaddi Ideæ possit. Secundum est hujusmodi:

Si non mirum est Deum me creando ideam illam mihi indidisse, ut esses tanquam nota artificis operi suo impressa, nec etiam opus est, ut nota illa sit aliquares ab opere ipso diversa, sed ex hoc uno, quòd Deus me creavit, valde credibile est me quodammodo ad imaginem, & similitudinem ejus factum esse, illamque similitudinem, in qua Dei Idea continetur, à me percipi per eandem facultatem, per quam ego ipse à me percipior; hoc est dum in meipsum mentis aciem converto, non modo intelligo me esse rem incompletam, & ab alio dependentem, remque ad majora, & majora sive meliora indefinîtè aspirantem; sed simul etiam intelligo illum, à quo pendeo majora ista omnia non indefinîtè, & potentia tantum, sed reipsa indefinîtè in se habere, atque ita Deum esse: Si, inquam, hoc mirum
non

non est, Sequitur Deum me creando ideam illum mihi indidisse, ut esset tanquam nota artificis operi suo, &c.

Atqui mirum non est Deum me creando ideam illam mihi indidisse, ut esset tanquam nota artificis operi suo, &c.

Igitur Deus me creando, ideam illam mihi indidit, ut esset tanquam nota operi suo, &c.

Nempe non alio examine, neque alia ratione ostendis, quomodo Ideam Dei ab ipso Deo acceperis, ipsa ve fuerit in te impressa. *Tertium est,*

Si agnoscam fieri non posse ut existam talis naturæ, qualis sum, nempe ideam Dei in me habens, nisi reverâ Deus etiam existat, Deus, inquam, ille idem, cujus idea in me est, hoc est habens omnes illas perfectiones (quas ego non comprehendere, sed quocumque modo attingere cogitatione possum) & nullis planè defectibus obnoxius; sequitur Deum existere:

Atqui agnosco fieri non posse ut existam talis naturæ qualis sum, nempe ideam Dei, &c.

Igitur Deus existit.

Quid habeat quoque roboris hujuscemodi Demonstratio, constat satis ex antè dictis. Heic noto solum duo, Vnum, cum ais te non comprehendere, sed cogitatione solum quomodocumque attingere perfectiones, quæ in Deo sunt, manifestum fieri, te ex unaquaque earum perfectionum, quas cognoscis, aliquid solum cognoscere, non verò totam, atque aded non cognoscere infinitam; & cum numerus earum, quas cognoscis, finitus sit (neque enim novæ, ac novæ in omne ævum dinumerabis) cognoscere te solum aliquid non ex omnibus, sed ex aliquibus duntaxat; quare & te nihil in Deo infinitum cognoscere; neque proinde habere reverâ ideam entis infiniti. Alterum, cum addis, *Et nullis planè defectibus obnoxium*, id quidem verum esse; at non posse tamen assumi, quasi demonstratum à te; cum etiam perfectiones, quas de Deo novisti, & te demonstrare ex tua idea existimasti, ipse non comprehenderis, sed quomodocumque solum attigeris, adeo ut nescias, quousque extendantur; & cum non omnes, sed aliquas solum cognoveris, nescias quousque perfectiones plures, ac plures in Deo habeantur; sicque ostendere non possis, divinas perfectiones hujusmodi esse, ut imperfectionem omnem excludant, ac Deus proinde nullis planè defectibus obnoxius sit. *Quartum* denique:

Si Deus obnoxius non est ullis planè defectibus, putet fallacem esse non posse; quia omnem fraudem, & deceptionem à defectu aliquo pendere, lumine naturali manifestum est:

Atqui Deus nullis planè est obnoxius defectibus:

Igitur Deus fallax esse non potest.

Nimirum hoc fuit, quod voluisti, cum illam particulam mox adnotatam subrexiisti. Quorsum verò ex tot defectibus, qui recenserentur potuerant, delegisti fallaciam, cujus ad calcem meminisses? Scilicet ut hanc conclusionem *Deus fallax esse non potest*, sine strepitu in penu, aut armarii quasi angulo conderes, quam cum opus foret, depromere posses, quasi demonstratissimum principium. Id deinceps videbitus.

Nunc de Responsione, ut dicam, objicis *me non attendisse ad id, quod vulgò ajunt Philosophi: Sed primum, attendisti-ne tu ad id, quod ipsemet dixisti?* Verba certè tua hæc fuerunt sub finem responsionis ad objecta in superiorem Meditationem, *Quantum ad me, nihil unquam aliud requiri putavi ad manifestandam substantiam, præter varia ejus attributa, adeo ut, quò plura alicujus substantiæ attributa cognoscimus, eo perfectius ejus naturam intelligamus.* Quid jam ajunt Philosophi? *Ajunt, inquis, essentias rerum esse indivisibiles: Idea enim repræsentat essentiam, cui si quid addatur, aut detrahatur, protinus fit alterius rei idea.* Id-ne verò jam approbas, an-non? Approbas sanè; nam in hoc est tota vis tuæ responsionis. At si essentia, seu natura est indivisibilis; igitur ubicumque est illius vel quam-minimum, ibi tota omnino est, neque aliquid ampliùs est; neque enim quod indivisibile est, parteis ullas habet. Si idea quoque hujusmodi sit, ut ipsi nihil addi, nihil detrahi possit; igitur ubicumque est ideæ vel quam-minimum, ibi tota idea est, nihilque est in re, quod non repræsentet; si enim aliquid esset, quod posset repræsentare præterea, tunc illi quidpiam adderetur, fieretque rei alterius idea. Iam cum admittas non unicum, sed plura, ac plura alicujus substantiæ, naturæ, sive essentiæ attributa sic posse cognosci, ut quò plura cognita fuerint, eo res perfectius intelligatur. Quæro; quando primum cognitionem aggredieris, & unicum essentiæ attributum cognoscis, putes-ne totam rei essentiam in eo contineri, an-non? putes-ne ideam, quam de ea re habes, esse totam rei ideam, an-non? Si putes; igitur falsum est esse plura attributa, & te per plura attributa rem intelligere perfectius; Si non putes; igitur essentia rei non consistit in indivisibili, sed latitudinem attributorum habet,

A a

imò

*Falsum
ideis. quas
de rebus
habemus;
nihil posse
addi, aut
adimi.*

imò & distinctionem quandā attributorum inter se, quatenus unum cognosci potest, non cognitis aliis. Igitur & ipsa rei idea talis non est, ut ipsi addi nihil possit, sed eatenus potius est additionis capax, quatenus attributa posterius cognita tam possunt per ideam representari, quàm cognitum primò. Verumtamen seu tu ad ista attenderis, seu non attenderis, Quod attineat quidem ad philosophos, non requiro heic quatenus admitti debeat, vel non debeat, quod ajunt *rerū essentias esse indivisibiles*; ut neq; an rerum essentias, quibus id accommodent, nōrint: Quod ad te spectat, cūm dicis *ideam representare rei essentiam*, inferre posse videor non malè, si quæpiam res sint, quarum essentiam non noveris, non habere te illarum ideam. Quæso te ergo, nosti-ne Solis, Lunæ, aut alterius sideris essentiam? Non dices, opinor, te nosse; quid nosti enim ex illis amplius, quàm magnitudinem, figuram, motum, distantiam, lucem, candorem, calorem, vim generandi, fovendi, movendi, & si quæ sunt hujusmodi; Atqui hæc sunt adjuncta solūm, sive accidentia; ipsa verò essentia, natura, sive substantia intima, quæ iis subjacet, omnino te latet; Nam & quamvis asseras te hæc attributa cognoscentem, intelligere siderum naturam, uni tibi asseres, uni tibi probabis, unus tibi plaudes, unus tamen nihil amplius habens, quàm cæteri, te ipsum præ cæteris coles. Neminem certè esse puto, qui te hæc solūm cognoscentem cognoscere putet siderum essentiam; Quare neque, per te, habere siderum ideam. Nisi autem siderum habeas, quarum-nam rerum igitur? An Terræ? An aquæ? An alicujus meteoris, lapidis, mineralis, plantæ, animalis, hominis? An universè ullius corporis, aut rei in Universo existentis? Nullius sanè essentiam nosti; quæcūque enim proferre potes, quæ de illis noveris, ea pari modo nihil sunt aliud, quàm adjuncta, seu accidentia; proprietates, atque effectus, omnia præter ipsam essentiam. Quare nullius planè rei, quæ sit in Mundo habes ideam. Vnde-nam esse igitur potest, ut tu quoque ipse loquaris de rebus; quæ in Mundo sunt, easque proinde intelligas, nisi illarum habes ideas? Nempe habes quidem ideas, sed non quales ipse designas. Quippe ideæ solūm sunt rerum, quatenus illas novimus; Et quia distincta cognitione novimus earum accidentia, non verò essentiam, quam solūm confuse sub ipsis delitescere, quasi suspicamur, vel concipimus; idcirco idea distincta est ipsorummet accidentium, non verò essentiæ, confuse duntaxat sub eis comprehensæ. Ex quo proinde efficitur, ut tantò

clariorem

clariorem, exquisitioremque alicujus rei ideam habeamus, quanto clarius, exquisitiusque, & plura ipsius accidentia noverimus. Cum experiamur enim Ideas esse in mente nostra veluti imagines rerum; & imagines sint non essentiae, sed accidentium ipsius; heinc fit, ut quemadmodum imago alicujus hominis expressa in tabula tanto est perfectior, quanto symmetria, dispositio, & repraesentatio plurium partium elaboratior fuerit, ac singulares quæque notæ, quæ in singulis partibus, exhibitæ fuerint studiosius; ita Idea cujusque rei tanto evadat perfectior, quanto plura ejus accidentia, seu plures quasi circumstantias ordinatius, disertè magis, magis ad vivum retulerit.

Quod ad illam spectat, de qua agitur, Quia tu dixeras te talem Dei habere Ideam, *ut ipsi nihil detrabere, nihil superaddere posses, ipse varios obijci modos, quibus posses ipsi superaddere aliquid.* Tu, ut eludas, innuis imprimis attendisse te ad Dei essentiam, cujus cum indivisibilis sit, debuerit similiter esse indivisibilis idea; cui nihil proinde posset addi, aut adimi, quin alia, alteriusque rei protinus efficeretur. Tum, non negas quidem, quin novæ perfectiones à te non prius animadversæ possint detegi; sed negas augeri ideam (hoc est aliquid ipsi addi; nam quamvis vocem detorqueas, aut dissimules, de ipsa tamē est questio) sed distinctiorem solum reddi, quoniam antè eas contineret. Cæterum valdè Primùm demiror, qui ignores non modò Solis, sed minimi etiam acari essentiam: & putes tamen nosse te aded perfectè essentiam Dei. Inepti ergo illi, qui & dies poscunt, & multiplicant, & finem nunquam faciunt, ut disquirant quid Deus sit; quod quanto magis considerant, tantò putent rem fieri obscuriorem. Nimirum, si te imitentur, uno momento aded claram de essentia Dei habebunt notitiam, ut superaddi ipsi nihil possit. Inepti rursus, qui ex effectibus, actionibus, proprietatibus, perfectionibus, quasi quibusdam rivulis in comitatum velut quæstis, deducuntur ad oram extremam immensè illus Oceani. Nimirum, si te consequantur, non ex rivulis in oram pervenient; sed mox uno passu dimetientur Oceanum, & per rivulos deinceps procedent. Deinde cum habes essentiam divinam cæterarum instar indivisibilem, non habes ipsam propterea ut punctum. Certè enim cum habeas infinitam, extensionem quandam in ea concipis, cum ea re, quæ sine ulla extensione concipitur, nihil possit esse finitius. Et quamvis sis repositurus te concipere divinam essentiam, non ut punctum quidem, sed non tamen propterea ut quidpiam extensum; non id-

III.
Falsum, nihil addi posse ideam, quam de Deo semel habemus. Quo sensu rerum essentia sint indivisibiles, etiam divina: Et de divinis attributis.

circò tamen explicabis quomodo & infinità simul, & indivisibilem concipias, cum & notio infinitatis sine extensionis notione non sit, & extensionis notio esse cum notione indivisibilitatis non possit. Potius ergo quemadmodum Philosophi illi, qui, cum vulgò ajunt hominis v. c. essentiam esse indivisibilem, non intelligunt illà extensione quadam, sive partibus quibusdam carere, taleis enim esse dicunt genus & differentiam, ut puta animal, & rationale; vel physicè loquendo, corpus, & rationalem animam; sed contendunt solùm nexum harum partium adedò simplicem, indivisibilemque esse, ut absque eo homo neque sit, neque intelligatur; ac proinde nullaejusmodi partium aut seorsim accepta, aut cum alia quapiam conjuncta, intellectàve homo sit. Quemadmodum, inquam, illi sic accipiunt, ita & tu quoque, ut puto, non vis Deum carere amplitudine quadam, atque varietate attributorum essentialium, quæ & perfectione, & numero sint infinita; sed vis solùm ea omnia esse inter se adedò inseparabiliter connexa, ut planè sine ipsis, aliquibùsve ipsorum esse Deus nequeat, aut intelligi. Cum porrò idea, quam putamus nos habere de essentia hominis, repræsentare debeat non præcisè ipsum nexum indivisibilem partium, seu attributorum essentialium; sed ipsas potius partes, sive attributa indivisibiliter connexa; atque idcirco essentiæ hominis idea indivisibilis non sit, quasi instar puncti sit, & partibus careat: Pari sanè modo, idea repræsentans Dei essentiam, cum repræsentare debeat non præcisè illum quasi nexum attributorum Dei essentialiū, sed ipsa potius Dei attributa indivisibiliter conjuncta, simplicissimève; & ut ita loquar, identissimè unita; non est, cur censeamus hanc ideam indivisibilem instar puncti, & quasi carentem variis veluti partibus repræsentantibus attributa varia. Ad-hæc; quæso te, quænam sint attributa ista essentialia Dei? Nempe enumerata illa abs te, cum dixisti Deum substantiam æternam, infinitam, independentem, omnipotentem, summè intelligentem, creatricem rerum omnium, earundemque conservatricem. At primùm, licèt Theologi ista, cæteraque generis ejusdem attributa vocent essentialia; faciunt hoc tamen, Tum quòd distinguentes in Deo essentiam unam, & personas treis, attributa simul distinguant, quæ conveniunt Deo ut uni secundùm essentiam, ab iis, quæ ut trino secundùm personas, ex quo fit ut illa essentialia, hæc Personalia censerì possint. Tum ut expressius significant simplicitatem, integritatemq; inalterabilem divinæ essentiæ; quoniam si diceretur habere attributa quædã accidentaria,

taria, intelligi posset habere quædā accidentia, quæ & compositionem quandam cum essentia facerent, & ipsi adesse, abesseq; possent. Tum proinde ut intelligamus quodlibet horum attributorum tanta necessitate Deo convenire, quanta conveniunt, (imò majore, quàm conveniant) homini suum genus, suâq; differentia: atq; idcirco quicquid in Deo est, & penitus esse à Deo inseparabile, & Deum ipsum esse. Enimverò ista non obstant, quin præter ipsa attributa, essentiam agnoscant, cui illa attribuant (& certè attributa sunt, quoniam alicui attribuantur) unde & requirunt, & concludunt quemadmodum tum inter se, tum ab essentia distinguantur; exprimentes aliunde illa etiâ concretis vocibus, ut cùm omnipotentem verbi causa dicunt, intelligamus non modò ipsam omnipotentiam, quæ est attributum, sed etiam essentiam, cûi omnipotentia attribuitur. Hæc verò attingo, ut imuam, præter cognitionem attributorum, quæ nobis utcumq; per effectus, & à posteriori, ut loquuntur, innotescunt, superesse adhuc cognitionem essentiæ, quam si tu haberes, Mose ipso scælicior esses, qui tamen si cum Deo toties colloquutus, nisi posteriora tamen nunquam vidit. Sunto deinde hæc attributa ipsa Dei essentia: ecquid quæso de illis nosti? aut quotam partem illorum nosti? Nihil sanè de illis nosti, nisi definitè, analogicè, confusè, obscurè, in ænigmate; & partem aliunde ipsorum nosti tantulam, ut quæcumque nosti, ne sint quidem quasi guttula, punctumve guttulæ respectu Oceani totius. Et dicis nihilominus te talem habere divinæ essentiæ ideam, ut superaddi ipsi nihil possit. Sed nempe nihil distinxisti inter ideam & essentiam, putastique nihil differre esse rem in se, & cognosci ab aliquo; quando existimasti nihil esse in Deo, quod in idea tua non esset.

Rursus igitur, qualem-nam intellexisti tuam ideam? Nimirum IV. quale est acari; indivisibilem enim facis, quale est acari oculi respectu. Et videor sanè non ineptè eam cum acari comparare. Nam ut imago seu idea acari in tuo vel oculo, vel cerebro, vel intellectu depicta repræsentabat tibi ante viginti quinque annos albicans solium, & sine ulla distinctione partium, punctulum; nunc verò invento microscopio, & postquam illo ulus es, repræsentat tibi animal grandiusculum, & cum suis quidem capite, cauda, cruribus, dorso, partibusque cæteris; sic idea Dei, quam primum habuisti, repræsentavit tibi *essentiam indivisibilem*; deinceps autem ea *reddita distinctior, & expressior fuit, cùm potuisti perfectiones deiegere, quæ nondum fuerant animadversæ*. Porro ut postquam es microscopio speculatus acari ejus idea facta est auctior; quidni etiam facta sit auctior

Declaratur variè, ut idea semel habita de Deo amplietur.

idea divinæ essentiae? *Quia* inquis, *omnes perfectiones in eadem illa, quæ prius habebatur, debuerunt contineri.* Vide; quàm sit verum, quod dicebam mox, æquiparare te ideam essentiae, quasi essentia nihil contineat, quod non contineat quoque idea? quasi aut probare possis esse in idea; aut dicendq̃ *debere esse, continerive in idea, quoniam vera supponitur*, non manifestam principii petitionem insinues? An dicis verò pari modo ideas speciales partium acari, quæ microscopio detectæ sunt contineri debuisse in ea, quæ habebatur ante microscopium? Non dices opinor; Tibi enim est, convexitatis vitri natura perspectior, quàm ut putes non augefcere speciem acari propter deflexionem, interpolationemque radiusculorum accedentium ex iis acari partibus, quæ ob superficieculæ ipsius inæquabilitatem aliò respectarent, neque speciales imagines cæteris interpositas in oculo depingerent. Quamobrem, neque est cur censeas ea, quæ per priorem ideam in Deo non vidisti, fuisse ut in Deo, sic in ipsa idea; Quippe si fuissent in idea, profectò in Deo vidisses; idque quoniam idea mensura est non rei, sed notitiæ, quæ habetur de re. Nisi verò lubens admittas comparationem acari, utere comparatione cum Luna, aut Sole, aut quocumque voles objecto antè, & post inventionem telescopii; idem omninò efficietur. Sin malis nti oculo nudo, ac sine vitro interposito, utere comparatione, cum re nunc procul, nunc prope visa; efficietur pariter idem. Tametsi enim superiùs, cum ageretur de Sole, improbasses quod dixeram de veritate duplicis ideæ, visus es tamen postea probare, & nunc etià videris planè non improbaturus, quando supponis *ideam, quæ prius fueris minùs distincta, atque expressa, fuisse nihilominus veram.* Quare te cum vides hominem primum ex passu centesimo, & non agnoscis satis vultum, propter speciem minùs distinctam; ac vides postea ex decimo, agnoscisque distinctiùs vultum ob distinctiorem speciem: profectò species, seu idea, quam habes illius propioris, est in te ut distinctior, ita auctior ea, quam habes distantioris; eademque propioris idea plureis parteis habet, quæ non continebantur in alia, propter radios partium, quæ aliò, quàm in oculum directè spectabant. Verùm comparationem video, quæ fortè magis sit placitura. Videris enim velle ideam priorem esse quasi rudem adumbrationem, seu lineares ductus, quibus pictor in tabula imaginem faciendam designat; posteriorem verò quasi perfectam imaginem, ut putà adornatam coloribus vivis. Porro quamvis rudis imago secundùm ambirum non augeatur, augetur tamen numero, &

conditione

conditione colorum , distinctioneque , & qualitate partium; & utcumque illam augeri non dicas , dicere tamen non potes ipsi nihil addi ; ut idem tibi proinde sit de Idea Dei dicendum. Et , si forte dicas in eadem invariata imagine , posse plura distinctius , expressiusque cognosci , ubi major lux fuerit , aut oculus propius accesserit : tunc mutabis suppositionem , comparabisque jam imaginem cum objecto , cui nihil novi advenit ; & non cum idea , cui aliquid accedit. Denique , quia tibi præsertim comparatio imaginis per sigillum impressæ arridet , Considera , si initio quidem & totum , & qua par est profunditate impressum ceræ sigillū fuerit , nihil planè desiderari , quo minùs ab initio usque , imago tam sit , quàm esse potest integra , distincta , expressa ; Pari enim modo si Idea Dei tota ab initio , & quantum potest impressa sit , nusquam deinceps poterit magis integra , distinctior , expressiorque reddi : At si dicas reddi ; fatendum est illi idem advenire quod imagini in cera impressæ , dum ab initio vel non totum sigillum , vel non secundùm totam eminentiæ , cavitatisque varietatem in profundum adigitur ; ut ipsi proinde addi quidpiam possit. Quanquā quid in his immoror , cùm constet , quacumque ratione id fiat , ei notitiæ , ac proinde ideæ , quam de Deo habes , posse aliquid indies superaddi. Ad illud verò , quod subjicis de Idea trianguli , nihil addendum est ad ea , quæ superius dicta jam sunt ; quousque planum feceris , essentiam Dei , atque adeò omnia attributa ejus essentialia tam esse tibi explorata , teque illa tam in promptu , ac numerato habere , quàm habes treis lineas , ex quibus triangulus constituitur. Nam quod alioquin dicis , *ut sciam* (nempe , ut dixi , Doctorem magis omnino egregium , & auscultatione dignum) *Ideam Dei non formari à nobis successive ex perfectionibus creaturarum ampliatis , sed totam simul , ex hoc , quod Ens infinitum , omnisque ampliationis incapax mentē attingamus ; explorarem ecquidnam velles , nisi aut tibi ipsi contradiceres , docens ideam Dei formari totam simul à nobis , quam hoc præsertim capite contendis à Deo imprimi , aut si id ipsum , quod volebas , nō satis pro voto dixisti , ipsum principium non peteres , & solutionis loco nihil ad difficultates aliud , quàm quod controvertitur , responderes. Ne innuā te semper eadem hallucinatione teneri , quòd tam facile sit totum ens positivum , totamve ejus capacitatem , tametsi carentem fine , cogitare , quàm facile est pronunciare , tribueréque ipsi nomen negativum. Idque potissimum , cùm de re finita , cujusmodi est Mundus , cum omnibus suis partibus , particulisque , earumque proprietatibus polliceri*

liceri tibi non possis; imò neque polliceri sibi possint omnes homines, quotquot sunt, aut futuri sunt.

V.

*Difficultatem le-
pidè elu-
sam: qua-
si agatur
de Idea,
qua sit non
similitudo
artificis,
sed nota
peritia ip-
sius.*

Cùm petiissem unde probares *Ideam Dei esse in nobis, tanquam notam artificis operi impressam*, & quis esset modus impressionis, quæve forma ipsius notæ: Excepisti tu, id esse perinde acutum, ac si aliqua in tabella tantum artificii deprehenderes, ut ipsum à solo Apelle pingi potuisse judicares, diceresque inimitabile illud artificium esse veluti quandam notam, quam Apelles tabellis omnibus suis impressit, ut ab aliis dignoscantur; ego verò quærerem quæ forma ipsius notæ? quisve modus impressionis, adjecisti que me certe risu, potiusquam responsione dignum iri visum. Age proinde experiamur, uter sit ridendus, & illa ducat. Quæstio agitur de Idea, seu imagine, quæ rem qualis est, repræsentet. Assumat igitur Apelles tabulam, in qua dicas ipsum facturum picturam ad imaginem, & similitudinem suam, hoc est, quæ ipsum Apellem, qualis qualis est, perfectissimè referat; & in qua nihilominus ille vespertilionem solum depingat. Ego quidem nullam imaginem, aut similitudinem, qualis promissa fuerat, agnoscam; tu agnosces tantam, ut censeas non esse ovum ovo similis, quàm vespertilio erit Apelli. Tum, quia fortè eorum cachinnos timebis, qui sple-ne erunt petulanti, reclamabis puto, ac excipies, noluisse te dicere vespertilionem esse similem Apelli, sed artificium, quo fuerit per-acta, esse notam certissimam, qua Apelles intelligatur. Atqui heic agitur, non de quavis nota, sed de nota, quæ sit imago, quæ similitudinem gerat, & qualis fuisset, si Apelles se, non vespertilionem pinxisset. Nam multis quidem aliis notis potuit Apelles intelligi, epigraphe, sigillo, aliis; verùm debuit intelligi repræsentatione personæ. Et vis id melius agnoscere? Comparatur heic Apelles cum Deo, quatenus ut Deus varias res creavit, sic Apelles varias tabellas depinxit. Et quælibet quidem creatura suum clamat, no-ratque Authorem, quatenus ejusmodi est, ut non alià, quàm Dei manu potuerit è nihilo educi, conformari, concinnarique, & eam quam habet, perfectionem accipere; quemadmodum omnes tabellæ clamant, indicantque principem Pictorem, quatenus eà arte sunt elaboratæ, ut non potuerint alià, quàm Apellis perfici manu. Verùm comparatio hoc loco non fuit instituenda circa operum perfectionem, seu notam peritiæ, quæ nihil sit aliud, quàm ipsa perfectio (sic enim unaquæque creatura, & unaquæque tabella continet hujusmodi notam) sed circa repræsentationem per ima-ginem; adedò ut cùm quæstio sit non de qualibet creatura, sed de sola

sola mente, quatenus Deus illam creavit ad imaginem, & similitudinem suam; ita tu de Apelle loquens, assumere debueris non tabellam quamlibet, sed eam solum quam depinxerit, ut in ea sui imaginem, similitudinemque exhiberet. Non fecisti autem, sed exittimasti te pro more fucum facturum, difficultatemque evasurum, si ut quæstionem, sic comparisonem à recto statu abduceres; Et cum rogareris quis esset modus impressionis, & quæ forma notæ, seu Idææ, imaginisve operi impressæ, artificiosè eluderes, quasi rogatus fuisses de nota, non quæ esset Idæa, seu imago, sed quæ solam peritiam artificis subindicaret. Eodem spectat, quod paulò post dicis, *cum malo conferre creationem à Deo cum fabri operatione, quam cum generatione à parente, sine ulla ratione id fieri.* Sed nemo non videt optimam rationem, quòd per generationem à parente filius habeat eandem naturam cum patre, & sit secundum omnes sui partes, etiam internas similis patri; per creationem verò à Deo homo nullo modo habeat eandem cum Deo naturam, neque sit ei secundum omnia, etiam essentialia attributa conformis. Contrà verò, ut per operationem fabri constructa domus est naturæ à fabro diversæ, & est tamen planè similis Idææ, quam faber in mente concepit; ita per Creationem à Deo homo est diversæ naturæ à Deo, & est tamen prorsus conformis Idææ, quam Deus ab æterno habuit: Idque cum non obstat, quòd aliunde docent Theologi de ratione imaginis Dei expressæ in homine propter animæ facultates, comparisonem vestigii expressi in cæteris rebus. *Sed neque dixisti, inquis, tantam esse similitudinem inter nos, & Deum, quanta est inter filios, & parentes.* Et quare dixisses: cum non nisi unicus possit esse divinus filius, qui sit splendor Paternæ gloriæ, & figura substantiæ ejus? *Nec etiam, inquis, semper nulla est similitudo inter opus fabri, & ipsum fabrum, ut patet, cum statuarium sibi simile signum exsculpsit.* Heic jam agnosce tale tibi usurpandum fuisse exemplum, non verò tabellam, in qua non imago, aut similitudo, sed sola nota peritiæ foret; quo casu respondendum tibi ad quæsitam fuisset, neque solo risus prætextu captato effugium quævisisses.

Quæris aliunde, *an cum negem nos ad imaginem Dei factos esse, & dicam Deum esse hominiformem, eaque colligam, in quibus humana natura differt à divina, sim in eo acutior, quam si ut negarem quasdam Apellis tabellas ad similitudinem Alexandri factas fuisse, dicerem ergo Alexandrum fuisse instar tabellæ; tabellas autem ex ligno, & pigmentis compositas esse, non ex ossibus, & carne, ut Alexandrum.* Sed, & acutissime

VI.

Debere in imagine, non omnimodam quidem, sed saltem tamen aliquam esse similitudinem cum eo, cujus est imago.

B b

VIRO

virorum (satis enim sensi initio id *ἄριστον* tibi restituendum) non sum ego quidem admodum acutus, sed sum tamen satis, ut agnoscam non debere te adedò invidiosè mecum agere, ut si quam obijcio, ea mihi stet sententia. Non ego is, sum, qui nos negem ad imaginem Dei factos; benèque est, quòd in ipsa quoque Dubitatione testatus sum id religiosa Fide credendum; sed is sum, qui meminerim te demonstrationem pollicitum fuisse; ac me requisivisse quì posset talis imago intelligi juxta rationem naturalem. Sed post meam hebetudinem, tuam acutiem consideremus. Heic imprimis non quærebat, an Deus hominem fecisset ad imaginem alterius rei; ut tu heic facis Apellem pingentem tabellam non ad sui, sed ad Alexandri similitudinem: Verùm id nihil est, fingamus Apellem pinxisse non Alexandrum, sed seipsum, ut cùm dixisti Statuarium exsculpere signum sibi simile. An non repræsentare in tabella debuit sui frontem, oculos, nareis, genas, parteis alias, universèque sui formam, adedò ut ex tabella judicium ferri posset de ipso; & ut de tabella dici poterat quòd esset Apelliformis, ita de Apelle dici posset, quòd esset Tabelliformis; hoc est quòd inter Prototypum, ectypumque esset relatio conformitas dicta, ratione cujus relatorum alterum esset alteri reciprochè conforme? Cur igitur, si Deus quidem hominem creavit ad imaginem sui, formamque suam illi impressit, inferri ex ipso lumine naturæ non valeat, esse ergo hominem Deiformem, & Deum hominiformem, ad indicandum conformitatem, qua Deus ut prototypus, & homo ut ectypus, seu Dei imago, conformes adinvicem sint? An istud perinde est, ac ossa, & carnes in tabella requirere, cùm de imagine agatur, quam constat non esse necessarium, ut sit secundùm omneis, etiam interiores perfectiones prototypo, illive rei, cujus est imago, conformis? Id agnoscis ipse; sed cùm subjicis, *non esse de ratione imaginis, ut in omnibus eadem sit cum re, cujus est imago, sed tantum, ut in aliquibus imitetur*; debuisti sanè adjicere esse tamen de ratione imaginis, ut eatenus saltem eadem sit, eatenusque imitetur, sive tantum repræsentet de re, quatenus res per ipsam agnosci, ac discerni possit: Certè enim, cùm ex Apelle non requisierim, ut sive Alexandri, sive sui depicturus imaginem, ossa quoque, & carneis tribuat; jure tamen requiram, ut ampliùs, quàm extremum sui, Alexandrive (quod supra dicebam de me) capillum in tabella pingat. Siquidem quantumvis pictura extremit capilli dici possit aut eadem, aut in aliquo similis cum Apelle, aut Alexandro; constat tamen hoc

hoc non sufficere, ut alterutrius imago censeatur. Ex hoc autem est; cur tametsi in homine, aut humana Mente, ad hoc, ut Dei imago sit, non requiram omnimodam cum ipso Deo conformitatem, videar tamen posse requirere tantam, quæ Deo dignoscendo sufficiat. Quippe, si ea tantula sit, ut quod per hominem, ejusve mentem, & quicquid est in ea, repræsentatur de Deo, minorem cum Deo proportionem habeat, quàm capilli apex cum Apelle, aut Alexandro; videtur fieri perspicuum hominem, illiusve mentem non esse imaginem Dei. Heinc, cum apud te sequitur, *Et perspicuum est perfectissimam illam vim cogitandi, quam in Deo esse intelligimus, per illam minùs perfectam, quæ in nobis est, repræsentari*; Perspicuum est sanè eam longè, imò incomparabiliter, imò infinitè minùs, repræsentari, quàm repræsentetur Alexander totus per apicem unius capilli. Quod exclamas porrò, *Quàm mala fide tua verba retulerim, fingens te dixisse à te percipi similitudinem in eo, quòd sis res incompleta, & independens, cum è contrà ista in dissimilitudinis argumentum attuleris, ne putaretur te velle hominem Deo æquare, dixisti enim, &c.* Quomodo quæso retuli mala fidè, quin ne una quidè litera omiſsa, additæ ea retuli! Quàm malà potius tu refers mea, dum quod ex tuorum sensu contradictionem colligens dixi, *Percipis*, inquis, *similitudinem, dum intelligis te rem incompletam, dependentem, &c.* Tu ita refers, quasi dixerim, *percipis*, inquis, *similitudinem in eo quòd sis res incompleta, & dependens, quæ quantum distent, nemo non videt.* Sed vitilitigationis piget, ac præsertim cum sit perspicuum, nihil voluisse me aliud, quàm dissimillimas esse duas res, quarum una sit incompletissima, dependentissimaque; altera completissima, ac independentissima; quod artificio solito censuisti esse dissimulandum.

Tandem, quòd mirum esse ais, *cur non ceteri hominum idem, quod tu de Deo intelligant, cum in illis, æquè, ac in te impresseris Ideam sui; idem esse dicis, ac si mirarer, quòd cum omnes nòrint Ideam Trianguli, non tamen omnes æquè multa in ipsa animadvertant, & fortè nonnulli falsa quædam de ipsa ratiocinentur.* Sed quàm callidè scopulum, sive potius seriem scopulorum pro more declinas! Nam primò non dixi, quòd ais, *Deum impressisse Ideam sui cæteris hominibus*, quòd esset omninò rem tibi controversam concedere; sed, *non esse rationem, cur non credatur Deum illis perinde ac tibi impressisse Ideam sui*; nempe, si tibi quidè impressit. Deinde, quod quæſivi, *cur idem, quod tu non intelligant*, non tantùm eos notat, qui alia, quàm tu, sed etiam eos, qui

VII.

Prætextu comparationis Trianguli novæ appositæ, declinationis difficultatem, de iis, qui Ideam Dei vel nullam habent, vel eandem non habent.

qui intelligunt nihil. Historiæ quippe, Relationesque Navigatio-
num in novum orbem, memorant non modò singulareis homines
(ut fuere semper aliqui) sed integras etiam nationes (ut recita-
tum quoque pridem de aliquibus insulis) nullam de Deo vel noti-
tiam, vel suspicionem sæculis retrò elapsis habuisse. Innuere autem
ex hoc volui, non esse Ideam à Deo impressam omnibus hominibus;
& cùm non sit ratio major de his, quàm de illis, fuisse impressam
nemini, ac ne tibi quidem; aded ut, si & tu, & ego, & alii Ideam Dei
in mente habeamus, illa adventitia videatur, ac potissimum ex audi-
tu, quo nomine Deus beare nos voluit, qui omni Nàtioni, ut Scri-
ptura loquitur, non taliter fecit, nec sua judicia manifestavit. Quo
autem modo Ethnici quoque absque impressione Ideæ, pervenire
olim in Dei notitiam potuerint, declaratum superiùs est; cùm id
quoque divinæ gratiæ, & largitionis fuerit, uti etiam quòd intelle-
ctum ejus capacitatis habuerint, qui potuerit eò pervenire. Tu ni-
hil igitur dixisti de illis, in quibus nulla Dei notitia, cùm prætereun-
dum sub prætextu comparationis tuæ non fuerit. Et quamvis sis for-
tè de illis dicturus, quòd vel ad seipsos non satis attendant, vel quòd
Ideam Dei habeant sopitam quidem, sed quæ minima auditione,
aliave occasione excitari valeat; divinatio est, atque conjectura;
non promissa illa, expectatæque abs te, ut evidentissima, ita certif-
sima demonstratio. Divinatio, inquam est mera; Et maximè,
cùm qualiscumque habeatur deinceps ab illis notitia, ejusmodi sit,
quæ, tametsi supposueris Ideam non præhabitam, possit perinde ob-
tineri; cùm illi Ideam experturi sint, non necessariò, qualis est tua, sed
qualem suggererint, quicumq; , & quomodocumq; aliquid de Deo
docuerint; tametsi illi ad ætatem adultam proveci, & corpore men-
tisque sani, vigilantes, ratiocinantes, non videantur minùs idonei ad
agnoscendum talem Ideam, Deumve ipsà repræsentatum, quàm tu
conclusus in utero, aut sopitus Lethargo. Quod ad illos spectat, qui
diversa sentiunt, non perinde sanè est de illorum Ideis, ac de Idea
Trianguli. Siquidem ex iis omnibus, qui Trianguli notitiam habent,
nemo non capit, nec diffitetur Trianguli naturam, in eo, vel per te
esse constitutam, quòd figura sit tribus lineis comprehensa; quic-
quid sit de proprietatibus, quas potest aut non advertisse, aut et-
jam non satis bene advertisse: At ex iis qui Dei notitiam; nemo-
ne de ejus natura dissentit? Ecce alii corporeum faciunt, alii incor-
poreum: & ex prioribus alii formà humanà, alii alià: Ex posteriori-
bus quidam faciunt animam Mundi, aliqui substantiam separatam
volunt.

volunt. Nonnulli censent esse unum, multiplicem ceteri: hi infinitum, illi finitum; isti mobilem, alii immobilem; quidam immensæ potentæ, quidam limitatæ; quidam æternum, quidam natum; Quidam authorem universi; quidam universum, illiusve partem: quidam scientem, & providum; quidam plurium ignarum, & agentem sua; quidam passionum expertem, quidam passionibus obnoxium. Ut breve faciam, describito utcumque voles Dei naturam; describito tuam Ideam essentiaæ divinæ, ut voles, conformem; nihil omnino adferes, quod universè admittatur; cujus non oppositum plerisque appareat. An-ne igitur idem est de Idea Dei, ac de Idea Trianguli? Addo vim argumenti in eo fuisse, ut si ipsemet Deus imprimeret Ideam sui omnibus hominibus, uniformem imprimeret; quippe ipse unus, & non multiplex; simplex, & non varius; ipse, qui eo fine imprimeret, ut agnosceretur, ac nihil alienum pro suo, ne quem falleret, imprimere vellet: Aded ut quemadmodum ex impressione ejusdem sigilli in centum, in mille, in innumeris ceris, eadem semper figura est, eademque expressio sigilli, ac lineamentorum ipsius; quantumcumque cera alba, nigra, rubea, alteriusve coloris sit; ita planè ex impressione divinæ essentiaæ omnibus facta Mentibus, esse deberet eadem Idea, seu imago, & quasi figura; seu expressio, ac representatio divinæ essentiaæ, perfectionumque ipsius, quantumcumque statuere posses inter Menteis diversitatem: (Dicere enim præterea corpus illam obscurare, atque immutare, addendo, detrahendo, transponendo, transformando id, quod est incorporeum, facturus opinor non es; aut si dicas, gratis dicturus.) Addo, inquam, istud fuisse argumentum; Te verò magni æstimasse, si te sub tuo Triangulo delitescentem subduceres, & tacitè difficultatem consequutionis declinares.

IN MEDITATIONEM IV

Quæ est

De Vero , & Falso.

D V B I T A T I O I.

*De creata à Deo facultate judicandi erroris non immuni ;
deque rejecta à Physica caussarum finali-
um consideratione.*

CIrca quartam , Recenses initio quæ putas in superioribus demonstrata , quibusque factam viam præsumis ad progrediendum ulterius. Ipse , ne remoram injiciam , non infitam continuò debuisti te illa firmius demonstrare : abunde erit , si memineris quid concessum fuerit , quid non : ne res trahatur in præjudicium. Ratiocinarius consequenter non posse Deum fallere te , & ut facultatem fallacem , errorive obnoxiam , quam ab ipso habes , excuses , conjicis culpam in nihilum , cujus tibi Ideam quandam obversari dicis , ex quo te ais participare , inter quod & **DEVM** , te medium assumis. Ac pulchra quidem ratiocinatio : sed ut præteream explicari non posse quomodo habeatur , aut qualis sit nihili Idea , quomodo participemus ex nihilo , & alia ; observo solùm , ex distinctione hac non tolli , quin Deus potuerit dare homini facultatem judicandi erroris immunem. Nam quamvis non dedisset infinitam , ejusmodi tamen dare poterat , quæ errori non assentiretur , aded ut , quæ nosset quidem , ea clarè perciperet ; quæ non nosset , non pronunciaret esse hujusmodi , potiùs quàm alia. Id tibi objiciens , *non mirandum censet , si aliqua à Deo fiant , quorum rationem non intelligas*. Et id quidem rectè ; sed mirandum tamen , esse in te Ideam veram , quæ repræsentet **DEVM** omniscium , omnipotentem , omninò bonum , & videre te nihilominùs aliqua ejus opera non omninò absoluta : aded ut , cùm saltem potuerit perfectiora condere , neque tamen condiderit , argumento esse videatur , quodd aut nescierit , aut non potuerit , aut noluerit : ac saltem in eo imperfectus fuerit , quodd .

quòd si sciens & potens noluerit, poſthabuerit perfe&ionem imperfe&ioni. Quòd autem, à *Phyſica conſideratione rejicis uſum cauſarum finalium*, aliò fortassis occasione potuiſſes rectè facere: at de D E O cùm agitur, verendum profe&ò, ne præcipuum argumentum rejicias, quo diuina ſapientia, providentia, potentia, atque adeò exiſtentia lumine naturæ ſtabiliri poteſt. Quippe ut mundum uniuerſum, ut cælum & alias ejus præcipuas partes præteream, undenam, aut quomodo meliùs argumentari valeas, quàm ex uſu partium in plantis, in animalibus, in hominibus, in te ipſo (aut corpore tuo) quæ ſimilitudinem Dei geris. Videmus profe&ò, magnos quoſque viros ex ſpeculatione anatomica corporis humani, non aſſurgere modò ad D E I notitiam, ſed hymnum quoque ipſi canere, quòd omnes partes ita conformauerit, collocaueritque ad uſus, ut ſit omninò propter ſolertiam, atque providentiam incomparabilem commendandus. Dices Phyſicas eſſe cauſas hujusmodi formæ, ac ſitus, quæ inueſtigari debeant, ineptosq; eſſe, qui ad finè potiùs quàm ad agens, aut materiam recurrant. Sed cùm nemo mortalium poſſit intelligere, necdum explicare, quod agens formet collocetque, eo quo obſervamus modo, valvulas illas, quæ ad vaſorum oriſicia in ſinibus cordis conſtitutæ ſunt; cujus conditionis, aut unde mutuetur materiam, ex qua illas elaborat; quomodo ſeſe ad agendum applicet; quibus utatur organis, aut quomodo illa uſurpet; quid opus illi, ut eà temperie, conſiſtentiâ, cohærentiâ, flexilitate, magnitudine, figurâ, ſitu illas perficiat: cùm, inquam, nemo Phyſicorum, hæc & alia perſpicere declarareque valeat; quid eſt, cur non ſaltem miretur præſtantiffimum illum uſum, & ineffabilem providentiam, quæ tam appoſitè ad illum taleis valvulas concinnavit? Cur non laudetur, ſi exinde primam quandam cauſam neceſſariò admittendam agnoſcat, quæ iſta, cæteraque omnia ſapientiffimè, & ad ſuos fines conſonantiſſimè diſpoſuerit? Dicis, *temeritatem eſſe inueſtigare fines Dei*. Sed cùm id poſſit eſſe verum, ſi intelligantur fines quos ipſe Deus occultos voluit, aut inueſtigari prohibuit; non profe&ò tamen, ſi illi, quos quaſi in propatulo poſuit, quique non multo labore innotescunt, ac ſunt aliunde hujusmodi, ut laus magna ad ipſum Deum, tanquam authorem referatur. Dices fortè, Ideam Dei quæ eſt in unoquoque, ſufficere ad habendum veram germanamque, de Deo ejuſque providentia notitiam; abſque eo quòd aut ad fines rerum, aut ad aliud quid omninò reſpiciat. Verùm non ſunt omnes ea felicitàte quâ

tu, ut Ideam illam tam perfectam à nativitate obtineant, vel tantâ claritate objectam contueantur. Quamobrem quibus Deus non dedit tantam hanc perspicaciam, invidendum non est, quòd ex inspectione operum, cognoscere glorificatæque opificem possint. Ne memorem id non obstare, quòd minus Idea illa uti liceat, quæ etiam videtur omninò ex cognitione rerum ita perfici, ut tu, si verum dicere velis, huic cognitioni non prorsus parum, ne omnia penè dicam, debeas. Quælo te enim, quousque tandem progressuram te fuisse putas, si ex quo es infusa in corpus, mansisses huc usque in eo clausis oculis, obturatis auribus, & nullo denique sensu externo hanc rerum universitatem, & quicquid extra est percepisses; totâque interea meditando apud te,volvendoque & revolvendo cogitationes, ævum trivisses? Dic bona fide, & describe, quam Ideam tui Deique, te existimas fuisse habituram?

R E S P O N S I O.

Quamnam nihili Ideam habeamus, & quomodo de non ente participemus, satis explicui, vocando illam negativam, & dicendo nihil hoc aliud significare quam nos non esse summumens, & nobis deesse quamplurima. Sed tu nodos ubique in serpo quæris. Et cum ais, me videre aliqua Dei opera non omnino absoluta, planè affingis id quod nullibi scripsi, nec censui, sed tantum si quedam spectarentur, non prout habent in mundo rationem partis, sed ut totum quid, tunc videri posse imperfecta. Quæcunque deinde affers pro causa finali, ad efficientem sunt referenda; ita ex usu partium in plantis, in animalibus, &c. effectorem Deum mirari, & ex inspectione operum cognoscere, ac glorificare opificem par est, non autem quo sine quidque fecerit divinare. Ac quamvis in Esbiciis, ubi sæpe conjecturis uti licet, aliquando sit pium considerare quem finem conjicere possimus Deum sibi in regendo universo proposuisse, certè in Physicis, ubi omnia firmissimis rationibus niti debent, est ineptum. Nec fingi potest aliquos Dei fines, magis quam alios, in propatulo esse, omnes enim in imperscrutabili ejus sapientiæ abyssu sunt eodem modo reconditi. Nec etiam fingere debes neminem mortaliū causas alias posse intelligere; nulla enim non est cognitio multò facilior quam Dei finis: & eas ipsas quas in exemplum difficultatis proponis, non nemo existimas se novisse. Denique quia hîc tam ingenuè interrogas, quas putem mentem meam habituram fuisse Dei, & fui Ideas, si ex quo infusa est in corpus mansisset huc usque in eo clausis oculis, & absque ullo aliorum

rum sensuum usu : ingennè , & candidè respondeo me non dubitare (mò ipsam in cogitando non impeditam à corpore , ut neque etiam adjutam supponamus , quin easdem , quas nunc habet , Dei & sui Ideas fuisset habitura , nisi tantum quòd multò puriores , & clariores habuisset. Sensus enim ipsam in multis impediunt , ac in nullis ad illas percipiendas juvant : & nihil obstat quò minùs omnes homines easdem se habere æquè animadvertant , quàm quia in rerum corporearum imaginibus percipiendis nimium occupantur.

I N S T A N T I A.

AN tu , cùm facis te scirpeum , ac enodem putas , non sis ea saltem flexilitate , ut constringi in nodos possis , haberi que etiam ex iis , quos Latinorum aliqui Scirpeos , Græci appellaverunt Gryphos ; aliorum esto judicium. Ego certè nihil aliud , quàm planitiem , hoc est perspicuitatem quæro , nec me quicquam movent magnifica verba , quæ neque qui audiunt , neque qui proferunt , ut plurimùm capiunt. Dicis tu *Nihili ideam* : dicis *ideam negativam* ; testor me ego id præterire , quasi non possit intelligi , esse ideam , & non esse objectum : esse imaginem , & nullius rei imaginem esse. Habere naturam ideæ , cujus est aliquid repræsentare ; & esse tamen quid negativum , sive repræsentare nihil : tu id iniquo fers animo. Dicis tu , *Participamus ex non ente* ; id ego quoque prætereo , quasi non possit intelligi , quomodo Non-ens ita dividatur , ut nos ex eo partem capiamus ; quomodo inter nostri parteis alia quidpiam sit , alia nihil. Id tu etiam non fers. Dicis nos *participare ex non ente* , nihil esse aliud , quàm non esse nos summum Ens , seu deesse nobis quam-plurima ; ego verò ajo non capi , cur non dicamur potius esse duntaxat id , quod sumus , quàm participare ex eo , quod non sumus , quod nobis deest , &c. & declaro tamè nolle me his insistere. Tu hoc vocas nodos quærere in scirpo ; Esto igitur tuo sensu enodis , ac ut poteris firmato te ipsum. Interim tui ple , requiris - ne nodum , an non , cùm ais me tibi planè affinxisse id , quod nullibi scripseris , nec censueris ; nempe te videre aliqua Dei opera non omninò absoluta ? Quippe nihil planè minùs dixi , quàm te id vel scripsisse , vel censuisse ; sed historicè solùm dixi , *videre te aliqua Dei opera non omninò absoluta* : quod vel tu quoque statim probas , cùm ais , *saltem ut sunt partes , videri posse imperfecta*. An autem adhærens huic fictitio nodo , ac interrim verum intactum relinquens , videri possis fecisse satis , qui attendant ,

I.
Difficultatem promovere de-
clinatam , circa creationem facultatis erroris obnoxia. Id statui tamquam principium , quod inferius probandum sit , ac supponi demon-stratum , quod demonstratum tamen non fuit.

derint, ipsi dicent. Cùm opposuisssem enim tuam de Nihilo ideam, tuamque participationis ex non-ente distinctionē non obstare, quin dici valeat, potuisse Deum dare homini facultatem judicandi, si non infinitam, saltem erroris immunem; & te respondente *non esse mirandum, si aliqua à Deo fierent, quorum rationem non intelligeres*, instituissem, mirandum tamen, quomodo assereres esse in te ideam vocatam, quæ repræsentaret Deum omniscium, omnipotentem, omninò bonum; & videres nihilominus aliqua ejus opera non omninò absoluta (ut facultatem judicandi, de qua agebatur, errori obnoxiam) argumento, quòd aut nesciisset, aut non potuisset, aut præ livore quodam noluisse perfectiora condere; tu id totum prætermisisti, verbulòq; solum hærendum censuisti. Cautior paullo fuisti circa id, quod monui de tua illa recensione, quā cùm præmisisses *te jam absque ulla difficultate cogitationem à rebus imaginabilibus ad intelligibiles tantum, atque ab omni materia secretas convertere*, subjeceras, Et sanè multò magis distinctam habeo ideam Mentis, quatenus est res cogitans, non extensa in longum, latum, & profundum, nec aliud quid à corpore habens, quàm ideam ullius rei corporeæ: Cùmque attendo me dubitare, sive esse rem incompletam, & dependentem; adeo clara, & distincta idea Entis independentis, & completi, hoc est Dei mihi occurrir; & ex hoc uno, quòd talis idea in me sit, sive quòd ego ideam illam habens existam, adeo manifestè concludo Deum existere, atque ab illo singulis momentis totam existentiam meam dependere, ut nihil evidentius, nihil certius ab humano ingenio cognosci posse confidam. Etenim præsumente te complanatam exinde viam ad progrediendum ulterius, testatus sum velle me quidem remoram injicere, neque insistere continenter debuisse te omnia firmitus demonstrare; at memoriā tamen tenendum quid tibi concessum, quid non, ne præjudicium factum putares: Tu id nihil es præclare moratus, neque cogitandum censuisti de rebus firmis constabiliendis. Enimverò, cùm ea, quæ deinceps à te respondentur supponant hæc fuisse à te perfectè ostensa; ideò ex verbis recitatis, seligo hanc tuam rationationem:

Si est in me clara, & distincta idea Entis independentis, & completi, hoc est Dei, egoque proinde illam habens existo, manifestè concludo me existere, meamque totam existentiam singulis momentis ab illo pendere; & nihil ab humano ingenio posse evidentius, certiusque agnoscere:

Atqui est in me clara, & distincta idea Entis independentis, &c. Igitur manifestè concludo Deum existere, totamque meam existentiam

stentiam singulis momentis ab illo pendere, & nihil ab humano ingenio posse evidentius, certiusque agnosci.

Nempe cum nondum probaveris, sed probaturus inferius sis, claram distinctamque notitiam idcirco non esse fallacem, quoniam Deus est, ejusque notitiæ in te existentis author non fallax; Tu tamen hoc loco veracem supponis, ut probes Deum esse, & totius tuæ existentiae, ipsiusque adeo notitiæ in te existentis authorem esse. Quod cætera spectat, nihil adjiciendum ad ea quæ objecta sunt in superiorem Meditationem. Adjungo solummodo ob verba, quæ statim subjungis, *Imprimis agnosco fieri non posse, ut ille me unquam fallat*; in omni enim fallacia, vel deceptione aliquid imperfectionis reperitur: Et quamvis posse fallere nonnullum esse videatur acuminis, aut potentiae argumentum, procul dubio velle fallere, vel malitiam, vel imbecillitatem testatur, nec proinde in Deum cadit: Adjungo, inquam, te heic solum repetere, & tanquam principium sequentium ratiocinationum habere, quod circa extrema verba superioris Meditationis te non demonstrasse observatum est, dum ita ratiocinaberis:

Si Deus est nulli defectui obnoxius, fallax esse non potest:

Atqui Deus nulli est defectui obnoxius:

Igitur Deus fallax esse non potest.

Vt aliquid porro adjiciam de iis, quæ in Responsione uberius deducis, Excipis, *Quæcumque deinde assero pro causa finali, ad Efficientem esse referenda. Quomodo verò accipis hanc vocem, 'Esse referenda'?* Nam si sensus sit admirationem, laudem, gloriam, quæ ex facta circa rerum fineis ratiocinatione, & ex perspectis usibus cujusque adeo appositis elicitur, referendam esse ad Effectorem, qui adeo sapienter, providèque omnia disposuit; nihil sanè dicis, quod non fuerit tota dubitatione dictum. Et videri sanè hunc esse tuum sensum, videtur posse colligi ex verbis, quæ statim sequuntur. Nam, *Ita, inquis, ex usu partium in plantis, in Animalibus, &c. Effectorem Deum mirari, & ex inspectione operum cognoscere; ac glorificare Opificem par est.* At si sensus sit, vacandum solum explorationi, contemplationique causarum efficientium; dimittendam verò investigationem, considerationemque causarum finalium; hoc ipsum sanè est, quod non dixi: & de DEO quidem cum agitur; Nam & quod alia occasione id fieri possit, perspicuè dixi. Porro hunc esse tuum sensum, tum quæstionis status declarat, tum quod apud te sequitur. Nam ubi dixisti, *par esse ex usu partium Deum mirari, &c. pergis, Non autem quo sine quidque feceris, divinare. Quo loco, lu-*

II. Necessariam maximè Finem considerationem in Physica; ut Deus tum Rector, tum Author Universi agnoscat.

bet adnotare, quî putes posse homines ex usu partium Deum mirari; & non divinare tamen quo fine parteis fecerit. heic siquidem *Vsus*, & *Finis* idem sunt; & non potest *Vsus* authorem mirari, qui non miretur authorem *Finis*. Et vide proinde utrum rectè facias, dum causam finalem ita abdicas. Nam ex nuda quidem inspectione Solis, Lunæ, cæterarumque partium Mundi, atque aded Mundi totius, non propterea fuisse intelligitur Effectus, sive causa Mundi. Potest nimirum quis suspicari aut Mundum semper talem fuisse, & neque Patres alium vidisse, neque Nepotes visuros alium; aut certè casu sic coaluisse ex iis principiis, ex quibus constat, ut ista, non alia dispositione constiterit. Quare & hoc modo, non tantum causa finalis ablegabitur; sed efficiens quoque de Mundo tollitur. At ex investigatione finium, non ipsa modò causa finalis existere intelligitur; sed is ipse quoque est gradus ad agnoscendum efficientem, quæ in efficiendo talem sibi ipsi proposuerit finem. Eo planè modo, quo si quis in silvis nutritus, indèque digressus conspiceret pontem, & nihil aliud prima fronte, quàm foramen attenderet, per quod fluvii aqua transiret; suspicari posset tale quidpiam esse, quale observasset in quodam torrente, ubi duas rupes vidisset se verticibus contingenteis, & disparatis basibus intercipienteis alveolum; nihil ratiocinatus aliud, quàm quòd aut semper sic constitissent, aut ex montibus heinc inde corruentes sibi sic mutuo occurrissent: At cum videret præterea viatores magno compendio, & commodo supra ipsum transvadenteis; ac idcirco propius accedens ad opus spectandum, consideraret fornitem per-amplum, affabrè factum, constantemque ex multiplici serie lapidum cælorum, dolatorum, compactorum, positorum ex ordine, ac ea omninò ratione, ut spectato usu non potuissent accommodari solertiùs; Tum sanè agnosceret non potuisse Pontem aut casu fieri, aut esse infectum; sed debuisse omninò fieri ab Opifice, qui & attendisset ad finem, & sapienter excogitasset dispositionem operis; & tantum habuisset potentia, ut institutum exsequeretur. Ex quo proinde sequitur, nò in *Ethicis* modò esse *pium*, ut ais, *considerare quem finem conficere possimus Deum sibi in regendo Vniuerso proposuisse*; sed in *Physicis* quoque esse non *ineptum*, (quicquid ipse dicas) imò prorsus aptum, ac laudabile, id considerare, quatenus prorsus necesse est, si velimus quidem agnoscere regi à Deo Vniuersum, & quod præterea requiritur, esse Deum causam Vniuersi. Quippe, spectato Vniuerso, non statim cogitatio, aut persuasio subit, effectum id esse alicujus

jus causæ conditricis, aut directricis; & cum subire possit cogitatio, Vniversum esse aut infectum, & seipso regi: aut casu factum esse, & eodem casu administrari; quonam tandem modo subibit persuasio, aut factum esse reipsâ mundum ab aliqua causa; aut regi, administrari; ab aliquo Moderatore; nisi observemus Sapientiam, quâ omnia in ipso disposita sunt? & cum Sapientia in eo consistat, ut nihil fiat temerè, seu absque proposito fine; intelligamus esse causam, quæ operata fuerit, ob eum, quem adhuc tuetur, finem?

Quod autem dicis *fingi non posse aliquos Dei fines magis in propatulo esse, quam alios; quod omnes in imperscrutabili ejus sapientiæ abyssis sint eodem modo reconditi*: Id videtur omninò falsum; nisi, cum fines aliqui rerum sint aded perspicui, non admittamus Deum esse causam conformationis hujusmodi rerum; sed referamus omnia ad casum; dicamúsque res non ob usus, finesque sic dispositas; sed rebus sic fortè fortuna dispositis, usus quoque, seu fines fuisse fortè fortuna adinventos. Nam verum est quidem esse aliquos fines Dei nobis penitus incomptos, inque imperscrutabili sapientiæ ejus abyssis reconditos (taleis nimirum sum professus, quos ipse aut occultos voluit, aut investigari prohibuit.) At verum perinde non est, non fecisse Deum aliquos in propatulo, ut innumeri illi sunt, quos vel in uno hominis corpore attendere licet. Quid enim? Dicere ego non possumus DEVM, cum formavit in homine os, non ed respexisse, ut homò per id duceret, educerétque aërem, ac in nutrimentum assumeret cibum? Et cum in nativitate id apertum voluit, paravitque interea lac, mammam, papillam, quæ ore exciperetur, lugereturque, non id fecisse ad alendum infantem? Et cum œsophagum cavum fecit, ampliavitque stomachum; non fecisse ut alimentum tum per illud transmitteretur, tum in hoc elaboraretur? Et cum sic formavit vasa cætera, non ob trajectionem partim recrementi, partim alimenti fecisse? Et cum ossa dura formavit, articulationesque distinxit, non attendisse ad firmitudinem corporis, & ad varios flexus, motusque obeundos? Et cum creavit musculos, tendinesque implantavit solidioribus partibus; noluisse esse organa, quibus cieri partes possent? Et cum cordi motum attribuit, communicavitque arteriis, non attribuisse ad calorem fovendum, distribuendumque, & ad excipiendum, præparandum, transmittendum per totum corpus arterialem sanguinem? Et cum nervos ex cerebro per universum corpus produxit, non produxisse ut organa euaderent sensus, ac motus? Et cum

III.
Non esse
incomper-
tos homi-
nibus om-
nibus fines
Dei: idque
vel ex va-
riarum
partium
corporis
humani
finibus
constare.

oculos fabricatus est, palpebrâsque, & cilia adjecit, non fabricatum ut videremus, servarenturque oculi? Sed quid persequor singula, cum singula sint infinita? Ex quibus absque temeritate asseverare posse videmur respexisse DEVM ad hosce, illôsve hujusmodi fincis. Nihil sanè me hæc speculantem non in admirationem rapuit: Sed dico, vel tria præsertim sunt, quæ ingentem semper stuporem fecerunt. Vnum, Vasa umbilicalia appositè adeò formata, collecta, producta, implantata, humorémque nutritium, serosum, spirituosum distribuentia; cum succedente illorum in natiuitate obstructione, & commodiore aliarum partium reperatione, assumptione, dispensatione, &c. Alterum cordis Valvulæ, appositè adeò & substantiâ, & formâ, & numero, & situ, excipiendo, emittendoque ad utrumque finem, & per vasa quidem adeò appositè comparatæ; ipsaque proinde vasorum orificia alternis claudentes, atque referantes. Tertium tendines attrahentes in volam interiores digitorum articulos, adeò appositè ad aliorum trajectionem perforatos. Quæ sanè, & cætera quoque reipsâ non minùs miranda, manifestant nobis, velimus, nolimus, quem finem in ipsis ita conformandis Naturæ Author habuerit. Quare & causas comparando videris abs recarpere, quod de difficultate efficientium intelligendarum subjunxi; quasi nulla non sit cognitu multò quàm DEI finis, faciliior.

IV.

Inexplicabileis esse difficultates propositiones de causa efficiente Valvularum cordis; cum tamen finis, siue usus videatur perspicuissimus.

Cum verò pergis, eas ipsas, quas in exemplum difficultates propono, non neminem existimare se novisse; O quantum non modò de te; sed de cæteris quoque spondes! Ego certè, quod ad me spectat, tuam sponsonem abnuo; ut qui ingenuè fateor me prorsùs non existimare. Possem quoque præstare sponforem aliorum non sanè paucorum, quos esse novi eo candore, ut tametsi totam ætatem in causis ejuscemodi investigandis consumpserint; fateantur nihilominus esse illas sibi planè incompertas. Verùm, ut de cæteris taceam, Tu igitur existimas nosse te hujuscemodi causas? Tu putas te posse illas dicere? Scilicet, ut iterum dicam, Tu intelligis, ac explicare potes, *Quod agens format, collocetque eo, quo observamus modo, Valvulas illas, quæ ad vasorum orificia in sinibus cordis constitutæ sunt? cujus conditionis, aut unde mutuetur materiam, ex qua illas elaborat? quomodo sese ad agendum applicet? quibus utatur organis, aut quomodo illa usurpet? Quid opus illi, ut ea temperis, consistentia, coherentia, flexilitate, magnitudine, figura, situ illas perficiat?* O te non hominem, non herodem, non semideum, sed omninò aliquem Deum! Sed vide, amabò, ne de te plus æquo tibi ipse persuaseris. Nam si dicas quidem te

nosse

nolle hujuscemodi agens esse Deum; Nihil imprimis dices, quod vir quisque pius non dicat; Neque est, cur in Physicis operosissimè labores; cum quilibet è media plebe dicere idem noverit. Deinde, tametsi nôris esse Deum, qui sit omnium tam visibilium, quam invisibilium rerum factor; non nosti tamen ejus naturam; neque quomodo intra uterum sit; quomodo ibi agat; quomodo, aut quam deligat materiâ: quomodo illam usurpet, formet, temperet, &c. Tertio, cum manifestum videatur non agere se solo Deum omnia; sed causas secundas, & particulareis admittere; Esto, noveris Deum esse agens, quod valvas formet, collocet, &c. At nosti solùm causam primam, & universalem, de qua quæstio non est, cum de ea nemo dubitet, & uno perinde verbo, seu nullo cum discrimine ad omnia quæ sita responderi possit. Quæstio est, an nôris causam secundam, & particularem, quæ valvas formet, collocet, &c. hanc scilicet nosse est operæ-pretium. Porro, si nosse te illam dicas, si proinde ad difficultates, quas proposui, respondeas, ô quàm magnus Apollo eris! Sed iterum vide, amabò, ne cum inter causas secundas aliæ generales sint, ac remotæ; aliæ singulares, & propinquæ; illas pro istis accipias; cum non illæ tamen, sed istæ quærantur. Etenim, cum nulla sit philosophantium Secta, quæ excogitatis rerum principiis, non adnitatur omnia naturæ effecta ex ipsis deducere; nulla est, quæ non generaleis, remotasque causas edisserat; sed cum singulares, & propinquæ poscuntur, quales nosse operæ-pretium est; nulla est, quæ non obmutescat, aut ineptissimè garriat. Et aliæ quidem præ aliis verisimilia proferunt, longiusque non-nihil progredi videntur; veruntamen neque illæ quidem verisimilitudinem prætergredi possunt; neque non consistere citra intervalla, à causa speciali, proximæque, insuperabilia. Sic verò, non diffiteor quidem, quin tu pro tua solertia verisimiliora, specialiora, propinquiora quædam possis dicere; At ea dicere, ex quibus difficultates propositas in aperto statuas, & non ipsas potius intra caliginem insuperabilem relinquant; hoc est, quod imbecillitatis humanæ conscientia persuaderi non sinit. Et dicito in *Physicis debere mihi omnia firmissimis rationibus*; addendum tamen quatenus, & quousque homini licet. Nam circa generalia quidem nemo non geometrico progreditur more, *Nihil nisi ex materia sit; nihil sine motu, & agente sit, &c.* At cum speciatim dicendum est quæ materia; quis motus; quod agens; quæ cætera; nemo non prolabitur, balbutitque infantium ritu. Vnde & quod ais, *nullam causam non esse cognitam* mul-

to fa-

to faciliorem, quam Dei finem : Id dijudicaretur quæso ex comparatione cujusvis istarum specialium, proximarumque caussarum, cum quolibet fine ex iis, quos paulò ante deduxi, circa parteis corporis : & quid sit sentiendum nemo non agnosceret.

V.

Falsum, si quis ab utero absque omni sensuum usu maneret, habiturum easdem (ac etiam puriores) rerum Ideas, quam habeat usus sensibilis.

Quod postremò dicis de Idea Dei, ac Mentis tuæ, quam haberes jam, si ex quo momento ipsa Mens fuit infusa in corpus, & à nativitate usque mansisses clausis oculis, obturatis auribus, & nullo denique sensu externo hanc rerum universitatem, & quicquid extra est, percepisses, totusque interea meditando apud te, volvendòque, & revolvendo ævum trivisses; quod, inquam, dicis *te non dubitare, quin easdem Ideas haberes, quas nunc; imò multò puriores, & clariores*; consequenter Tanè tibi ipsi dicis; spectatis iis, quæ de mente in utero, & per Lethargum commemorata superius sunt; At quàm verisimiliter, aut quam alia, præter principii petitionem, ratione dicas, alii, ut volent, sententiam serent. Sanè quod assumis *debuisse eo casu Mentem ut non adjuvari, ita non impediri in cogitando à corpore*; supponis posse ipsam ex se (seclulo nempe impedimento) perinde cogitare & purius, clariùsque Deum, & seipsam cognoscere, quàm nunc cogitet, aut cognoscat; quod in quæstione tamen est. Ut concedatur autem fuisse corpus temperatissimum (neque enim aliud supponere licuit) Quæso fuisset-ne aliquod, an nullum planè impedimentum? Si nullum; igitur Mens tua in tuo corpore perinde se planè habuisset, ac in statu separationis, & nihil potuisses tibi expetere pejus, quàm ut aperirentur tibi oculi; paterent aures, & deinceps olfacere, gustare, tangere quidpiam concederetur. Hoc autem quidnam aliud est, quàm fuisse de te malè meritum, quisquis tibi visum, auditum, cæteròsque sensus concessit? Si aliquod; aut illud fuisset majus, quàm nunc sit, postquam cælum, & alia, quæ sunt in Vniverso, novisti, aut minus: Si majus, ergo non habuisses puriores, clariòresque Ideas. Si minus; tum redit instantia; quòd ille status fuisset tibi expetibilior, quàm iste; quòdque fuisset de te malè meritus, quisquis te in hoc constitnisset; tum illa additur, quòd non possit Deus nos arguere, nisi ex ejus operibus, ipsum, ut par est, cognoscamus; Posset enim quisque Deo respondere; Cur me igitur eduxisti ex mææ matris utero, aut me statim non excæcasti, & omneis planè sensus ademisti; cum cæ ratione potuisses meliùs te cognoscere, ut par est? Profectò cum non modò ais *sensus in multis impedire mentem*; sed etiam in nullis ad percipiendas Dei, mentisque Ideas juvare; arguere videris omnem

omnem & divinam, & humanam sapientiam, quæ uti nos visu hortatur, quo ex visis rerum-perfectionibus ad intelligendum Dei perfectiones assurgamus; velut dum spectata Univerſi magnitudine, Solis pulcritudine, Architecti sapientia, conamur intelligere, quàm major, quàm pulcrior, quàm ſapientior eſſe, qui Mundum, qui Solem, qui Architectum condidit, debeat? Ex quo fit, ut cum ſubjicis, nihil obſtare, quò minus omnes homines eaſdem ſe habere Ideas æquè animadvertant; quàm quia in rerum corporearum imaginibus percipiendis nimium occupantur; Culpari quidem in iſſis poſſit, ſi ita occupentur, ut exiſtiment Deum talem eſſe, qualis per corporeas repræſentatur imagines; At negari tamen non poſſit, quin corporeæ imagines aliquatenus ipſos juvent, dum ſunt occaſioni, ac fiunt quaſi gradus, quibus ad Deum intelligendum, quantum quidem licet per vireis, aſſurgant. Et quæſo ſi corporeæ imagines obſtaculo ſunt in eo, qui rerum univerſitatem contemplatus eſt; ut putà viſu prædito: Rogitemus cæcum, ut exprimat nobis qualem de Deo Ideam habeat? An deſcribere melius Deum poterit, quia nullas habebit imagines Solis, Iridis, aliarum rerum corporearum? Verùm immorandum in iſtis non eſt.

D V B I T A T I O I I.

*De judicandi facultate errori obnoxia homini tributa à
Deo, qui tamen immunem tribuere illi
potuerat.*

Solutionem deinde affers, quòd creatura viſa imperfecta, conſiderari debeat non ut totum quid, ſed tanquam univerſi pars, quæ ratione perfecta erit. Et laudanda ſanè diſtinctio: ſed hîc non agimus de imperfectione partis, ut pars eſt & cum integritate totius conferatur; ſed ut in ſe totum quid eſt, munuſque ſpeciale exercet: quod cum ad univerſum retuleris, difficultas ſemper reſtabit, annon revera univerſum futurum fuiſſet perfectius, ſi omnes ejus partes perfectæ exſtituiſſent, quàm nunc ſint, partibus plerique imperfectis exſiſtentibus. Sic enim illa Reſpublica eſt futura perfectior, in qua cives omnes boni fuerint, quàm alia, in qua plerique, aut aliqui mali. Quare & cum poſtmodum dicis, majorem quodammodo eſſe univerſitatis rerum perfectionem, quòd partes aliquæ illius ſint errori obnoxia,

D d

xia,

xia, quàm si omnes similes essent; perinde est, ac si dicas majorem quodammodo esse Reipublicæ perfectionem, quòd aliqui cives mali sint, quàm quòd omnes boni. Ex quo fit, ut quemadmodum videtur planè esse debere pro optimi principis voto, habere omnes cives bonos; ita videatur esse debuisse pro instituto Authoris Vniuersi, partes ejus omnes creari, esseque erroris immunes. Et quamvis possis dicere perfectionem earum quæ sunt immunes apparere majorem, ex oppositione earum quæ sunt obnoxia; illud tamen est per accidens solùm: quemadmodum virtus bonorum, quamvis eluceat quodammodo ex oppositione eorum qui vitiosi sunt, elucet solùm ex accidenti. adèd ut quemadmodum desiderandum non est, ut aliqui cives mali sint, quòd boni fiant illustriores; ita neque videatur fuisse committendum, ut aliquæ Vniuersi partes forent errori obnoxia, quòd clarescent magis quæ forent immunes. Dicis, non habere te jus conquerendi, quòd Deus te eam in mundo sustinere personam voluerit, quæ non esset omnium præcipua, & maxime perfecta: sed hoc non tollit dubium, cur satis illi non fuerit sustinendam dare personam, quæ ex perfectis minima esset, & non etiam tibi dare imperfectam. Nam & quamvis principi vitio non vertatur, quòd non omnes cives ad sublimia munera vocet, sed aliquos habeat in mediis, aliquos in infimis, verteretur tamen, si non aliquos modò destinarer operibus vilissimis, sed aliquos etiam destinarer pravis. Dicis, te non posse rationem asserere, quâ probes Deum tibi majorem cognoscendi facultatem, quàm dederit, dare debuisse: atque quantumvis peritum artificem esse intelligas, non ideò tamen putare te illum in singulis operibus omnes perfectiones ponere debuisse, quas in aliquibus potest ponere. Verùm viget semper quod modò dicebam; vidèsq; non tam difficultatem esse, cur Deus tibi facultatem cognoscendi majorem non dederit, quàm cur dederit errantem: neque controversi, cur artifex summus perfectiones omnes dare nolit omnibus operibus, sed cur etiam aliquibus tribuere velit imperfectiones. Dicis, tamen si non valeas ab erroribus abstinere ex evidenti perceptione rerum; posse tamen ex instituto, quo firmiter tibi proponas nulli rei assentiri, quam evidenter non perceperis. Sed utcumque possis eà semper attentione esse; nonne semper est imperfectio, ea, quæ judicare est opus, non percipere evidenter, ac errandi periculo esse perpetuò obnoxium? Dicis, errorem inesse in ipsa operatione, quatenus a te procedit, & privatio quædam est; non in facultate, quam a Deo accepisti, neque etiam in operatione, quatenus ab illo dependet. Sed, non sit er-

fit error in facultate à Deo accepta proximè ; est tamen remotè , quatenus cum ea imperfectione creata est , ut errare possit. Quare non est quidem , ut ais , quod conquerare de Deo , qui reverà tibi nihil debuit , & tamen illa bona tribuit , ob quæ debes illi gratias agere ; sed est semper quod admiremur , cur perfectiora non dederit , si scivit quidem , si potuit , si livore ductus non fuit. Addis , neque esse cur conquerare , quòd tecum concurrat ad errandi actum : cum actus omnes sint veri , & boni , quatenus à Deo dependent , majorque quodammodo perfectio in te sit , elicere illos posse , quàm non posse : & privatio , in qua sola falsitatis , & culpæ est ratio formalis , concursu Dei nullo indigeat , quia neque sit res , neque ad eum relata. Verùm cum sit illa subtilis distinctio , non tamen planè satisfacit. Siquidem non concurrat Deus ad privationem quæ est in actu , falsitasque & error est ; concurrat tamen ad actum , ad quem si non concurreret , privatio non esset ; & aliunde ipse est Author potentie , quæ fallitur aut errat , atque adedò , ut ita dicam , impotentis potentie : sicque defectus , qui est in actu , non tam ad illam , quæ impotens est , quàm ad Authorem , qui impotentem fecit , nec potentem potentiorémve , cum posset , voluit facere , videtur esse referendus. Certè ut fabro non vertitur vitio , quòd aperiendo scriniolo prægrandem clavim non elaboret , sed quòd pusillam fabricatus , formam aperiendo aut inhabilem , aut difficilem tribuat : ita non est quidem culpa in Deo , quòd facultatem judicatricem tribuens homuncioni , non tantam illi dederit , quantam rebus vel omnibus , vel plurimis , vel maximis suffecturam arbitraretur : sed permirum est , cur ad pauca illa , quæ dijudicari ab homine voluit , imparem , implicitam , incertamque tribuerit.

R E S P O N S I O.

Hic ubique male assumis pro positiva imperfectione , quòd sumus erroribus obnoxii , cum tamen sit tantum (præsertim respectu Dei) majoris perfectionis in creaturis negatio. Nec rectè quadrat comparatio civium Reipublicæ cum partibus Universi : civium enim malitia , cum refertur ad Rempublicam , est aliquid positivum ; non autem quòd homo sit errori obnoxius , sive quòd non habeat omnes perfectiones , cum refertur ad bonum universi. Sed melius institui potest comparatio inter eum , qui vellet totum humanum corpus oculis regi , ut elegantior appareret , quia nulla ejus pars oculo pulchrior videtur , & eum , qui putat nullas creaturas in mundo errori obnoxias , hoc est , non planè perfectas esse debuisse.

Planèque falsum est quod supponis, Deum nos destinare operibus pravis, nobisque tribuere imperfectiones, & talia. Vt etiam planè falsum est, DEUM ad illa pauca quæ dijudicari ab homine voluit, imparè, implicitam, incertamque facultatem judicatricem ei tribuisse.

INSTANTIA.

I.
Difficultatem de-
clinatam
fuisse.
Comparationem
Mundi
cum Re-
pub. in qua
præstet ne-
minem esse
civem
malum
fuisse ap-
positam;
non item
illam cum
homine,
cujus nul-
la pars
oculus non
sit.

Quæso tuam fidem; potest-ne esse positiva ulla imperfectio, si præcisè, ut imperfectio, seu quatenus est privatio sumatur? Potest-ne ulla esse negativa, si præcisè, ut est subiectum, & quatenus habet realem naturam? Quæso rursus, Ego-ne usquam imperfectionem priore modo sumptam, quasi posteriore assumpsi, hoc est, privationem pro subiecto habui? Ego usquam dixi potentiam errantem, ut potentia est, esse imperfectam; & non potius, ut errans est, seu errori obnoxia? Ecquid ergo est, quod tu heic redarguis? An-non ipse potiùs præposterè sumis? Nam cum ego dicam imperfectionem esse, quoddam errori obnoxii simus; Tu hoc esse potiùs majoris perfectionis negationem dicis; ac proinde supponis defectum, qui in nobis est, esse aliquam perfectionem, tamet si non tantam, quanta esse potest. Neque dicere potes questionem esse de facultate judicatrice, ut talis est; agimus enim de ea præcisè, ut errori obnoxia est. Ego porro institi semper, cur talis potentia esset imperfecta, non verò cur parva: ut si de claudio questus fuisssem, quoddam haberet facultatem incedendi titubantem, non verò quoddam exiguam, comparisonem cervi; aut de puero algescente, quoddam vestem laceram, non verò quoddam parvam, respectu hominis grandioris. Tu verò ita accepisti, ut si defectum qui in claudio, facultatè ejus est, explicare oporteret non per negationem recti incessus, sed per negationem velocitatis cervi; aut eum, qui in puero, vestè ejus illius, non per negationem integritatis, sed per negationem magnitudinis, qualem vir deposcit. Heinc difficultatem cautè declinasti, involastique in comparisonem, quàm non potuit esse apposita magis. Ecquid enim ex ea non quadrat? Comparantur Princeps cum Deo, Respublica cum Mundo, Civis cum homine, Voluntas cum Intellectu, bonitas cum veritate, malitia cum errore; An aliquid deest? At, inquis, Civium malitia, cum refertur ad Rempub. est aliquid positivum; non autem quod homo sit errori obnoxius, sive quod non habeat omnes perfectiones, cum refertur ad bonum Universi, Deum immortalem, quàm omnia turbas?

Nam

Nam postquam dixisti malitiā esse aliquid positivum; dicere debuisti errorem non esse aliquid positivum; aut dicturus de homine errori obnoxio, quatenus non habet omneis perfectiones, dicere debuisti pari modo de civis malitiæ obnoxio, quatenus non habet: ut etiam dicturus hominem erroneum referri ad bonum Vniversi, dicere civem malum referri ad bonum Reipublicæ; aut notaturus disparitatem, monstrare quod bonum Vniverso sit ex hominibus errori obnoxiois. Sed placuit ea phrasi elabi, tum ne innotesceret quid velles, tum ne appareret nihil dici posse de malitia civium in Republica, quod non possit dici de errore hominum in Mundo; cum utrumque reverā sit quid privativum; & nulla ratione possis dicere malitiā esse positivum quid, quā errorem quoque positivum quid dicere non liceat. Pergis, *Melius institui posse comparationem inter eum, qui vellet totum humanum corpus oculis tegi, ut elegantior appareret, quia nulla ejus pars oculo pulchrior videtur; Et eum, qui putat nullas creaturas in Mundo errori obnoxias, hoc est, non planè perfectas esse debuisse.* Sed nemo habet oculos, qui non videat, debuisse à te comparationem institui cum duobus hominibus, altero Luscioso, altero perspicuè vidente: cum liceat queri de homine, non quod duos tantum oculos habeat, sed quod duos habens, imperfectè videat. Quippe repetitum est sæpius difficultatem esse, non cur homo limitatam judicandi facultatem habeat; sed cur talem habens imperfectè judiceret. Ac si homo quidem tam censeretur deformis, quatenus toto corpore oculatus non est; quā censetur imperfectus, quatenus est errori obnoxius, sic fortassis institui tua illa comparatio posset: At secus esse vel illud arguit, quod ne venit quidem alicui in mentem, ut desideret totum corpus, quale fingitur Argi caput: cum sit tamen nemo, qui non expetat fieri ab errore immunis.

Dicis me supponere, destinare nos Deum operibus pravis, nobisque tribuere imperfectiones. Verum ego neque suppono, neque assero; sed tibi solum obijcio difficultates, quæ occurrunt, fierique possunt à quolibet; Scilicet instando in eas distinctiones, quas ex Scholasticis mutuatus, debuisti profectò illorum more propugnare, non arbitrari satis esse, si ea, quæ obijcerentur, falsa esse diceres. Quin etiam, quod Deus nos destinet operibus pravis, ne memini quidem; memor quæstionem heic solum esse de errore veritati opposito; non de pravitate opposita virtuti. Sed nempe quod ipse inter comparandum proposui de Principe, accepisti ipse de Deo cum Principe

II.

Difficultatem iterum dissimulatam adversus imbecillitatem Ratio-cinii, quo facultas judicandi, qua est in homine, concluditur esse perfectam.

comparato : & conatus es detorquere difficultates , quæ fiunt de tuo ratiocinio, ad subjectam materiam, de qua controversia non est; Scilicet ut videri possem non tam tecum , quàm cum veritate pugnare, quod absit. Pergis *falsum quoque esse illud, Deum ad illa pauca, quæ dijudicari ab homine voluit, imparem, implicitam, incertamque facultatem judicatricem ei tribuisse.* At Cordatos quæso, an suffecerit falsum dicere, & rationem interea nullam reddere, quâ falsum probetur id, quod experimur de facultatis imperfectione. Nihil porro mirum; quia & heic tandem dissimulanda fuit difficultas, tuum impetens ratiocinium. Nam verum quidem profectò est Opera Dei perfecta esse; At quia considerando Mentem seu facultatem judicandi, illa videbatur esse imperfecta, utpote errori obnoxia, atque idcirco non opus Dei; idcirco disquisitum fuit, quomodo, ut esset opus Dei, censeretur esse perfecta. Tu es igitur sic ratiocinatus:

Illâ facultas perfecta est, quæ licet defectum habeat, quatenus participat ex non ente, sicque infinita non est, desuntque illi quamplurima; nihilominus nihil habet in se, per quod imperfecta sit, quatenus creata est à summo Ente :

Atqui facultas judicandi, quæ est in homine, licet defectum habeat, hoc est, fallatur, seu in errorem inducatur, quatenus participat ex non ente, sicque infinita non est, desuntque illi quamplurima; nihilominus nihil habet in se per quod imperfecta sit, hoc est fallatur, aut in errorem inducatur, quatenus creata est à summo Ente :

Igitur Facultas judicandi, quæ est in homine, est perfecta.

Ac pervidisti ipse quidem imbecillitatem ratiocinii; quando nulum non movisti consequenter lapidem, ut posses illud constabilire: Sed operosa nimium res fuit. Ipse institi continenter quæstionem esse, non quare Deus facultatem infinitam, hoc est, in omni genere perfectam, absolutamque non fecerit: Sed cur finitam faciens, non fecerit saltem in suo genere perfectam; idque præsertim te admitte-
*n-
 te non esse dubium, quin Deus talem potuerit, ut nunquam falleretur, creare.* Siquidem tamen non fuerit adstrictus, ut aliam crearet, neque tu possis reddere rationem, quare talem creaverit; nihilominus hoc non obstat, quin videatur creasse non perfectam, ut potuit, sed imperfectam, ut voluit; eo modo, quo faber, de quo sum loquutus, conficit clavim, non perfectam qualem posset, sed imperfectam, qualem vult; Sicque ut voluntas fabri non obstat quo
 minus

minùs clavis imperfecta sit; ita neque Dei voluntas obſtare videatur, quò minùs facultas iudicandi ſit imperfecta. Quare & quòd tu nihilominùs ratiocinaberis perfectum, idèd comparationem illam de fabro inſtitui, quam nihil neceſſe heic proſequi; ut neque cætera in dubitationis contextu perſpicua.

D V B I T A T I O I I I .

*De Cauſſa Erroris, vel Falfitatis: ſit-ne ex eo, quòd Voluntas,
aut iudicandi facultas latiùs pateat, quàm
Intellectus.*

R Equiris proinde, *quanam ſit in te falſitatis vel erroris cauſa.* Ac primùm quidem hìc non diſputo, cur intellectum voces ſolam facultatem noſcendi Ideas, ſeu res ipſas ſimpliciter, & abſque ulla affirmatione, aut negatione apprehendendi: voluntatem verò ac liberum arbitrium voces facultatem iudicandi, cuius ſit affirmare aut negare, aſſentiri aut diſſentire. Propono ſolùm, quare voluntas libertatìve arbitrii, limitibus nullis circumſcribatur per te, circumſcribatur intellectus? Sanè enim videntur hæ duæ facultates æquè latè patere, & non intellectus ſaltem minùs, quàm voluntas; cùm in nullam rem voluntas feratur, quam intellectus non præviderit. Dixi, *non ſaltem minùs*: Quippe videtur intellectus, etiam latiùs quàm voluntas patere; ſiquidem non modò voluntas, ſive arbitrium, iudicium, & conſequenter electio, proſequutio, fuga, de nulla re eſt, quam non apprehenderimus, ſeu cujus Idea percepta, & propoſita ab intellectu non fuerit: ſed etiam multa obſcurè intelligimus, de quibus nullum iudicium, proſequutio, aut fuga eſt: & facultas iudicandi ita ſæpe eſt anceps, ut paribus rationum momentis, nulliſve exiſtentibus, nullum ſequatur iudicium, cùm intellectus interim apprehendat ea quæ remanent in iudicata. Quod porrò dicis, *te poſſe ſemper maiora, maioraque intelligere, ac nominatim facultatem ipſam intellectus, cuius Ideam etiam infinitam formare valeas*: hoc ipſum arguit intellectum non eſſe magis limitatum, quàm voluntatem; quando ſeſe extendere ad uſque objectum infinitum poteſt. Quod verò agnoſcis, *voluntatem tuam exæquari voluntati divinæ, non extenſivè quidem, ſed formaliter*: vide quorſum idem non poſſit de intellectu quoque dici, ubi formalem intellectus, non ſecus atque voluntatis, notionem definiveris.

ris.

ris. Sed paucis, dic nobis, ad quid se voluntas extendere possit, quod intellectum effugiat? Non videtur proinde *error ex eo nasci*, ut asseris, *quod voluntas latius, quam intellectus pateat, & sese ad illa judicanda extendat, quæ intellectus non percipit*; sed ex eo, quod cum æquè latè pateant, intellectus aliquid percipit non bene, & voluntas judicat non bene. Quare neque est *cur voluntatem ultra fines intellectus promoveas*; cum neque judicet de rebus, quas intellectus non percipit, & pravè solùm judicet, quod intellectus pravè percipiat. Quod exemplum *de re ipsa* adfers, circa ratiocinium à te factum de rerum existentia; procedit quidem rectè; quantum ad iudicium de tui existentia spectat; sed quantum spectat ad alia, videtur non rectè assumptum: cum quicquid dicas, vel potius ludas, reverà non dubites; sed omninò judices esse aliquid præter te, & à te distinctum; quippe aliquid præter te, & à te distinctum præ-intelligens. Quod supponis, *nullam rationem occurrere, quæ unum persuadeas, magis quàm aliud, supponere potes*; at simul debes supponere, nullum sequuturum iudicium, sed voluntatem semper fore indifferentem, neque se ad iudicandum determinaturam, quousque intellectui major aliqua verisimilitudo ex una parte, quàm ex alia occurrerit. Quod proinde dicis, *hanc indifferentiam ita extendi ad ea, quæ non satis perspicuè cognoscuntur, ut quantumvis probabiles conjecturæ te in unam partem trahant, sola cognitio, quod sint conjecturæ, te impellere ad contrariam assensionem possit*: id nullo modo videtur verum. Quippe cognitio illa, quod sint solùm conjecturæ, faciet quidem ut iudicium de ea parte, in quam te trahunt, cum aliqua formidine, & hæsitatione feras: sed nunquam faciet, ut iudicium feras de parte contraria: nisi postquam occurrerint conjecturæ non modò æquè probabiles, verùm etiam probabiliore. Quod subdis, *te id fuisse expertam his diebus, cum falsa esse supposuisti, quæ maximè vera esse credideras*: memento id tibi non fuisse concessum: neque enim revera sensitisse, aut persuasisse tibi potes, non videri te Solem, terram, homines, alia: non audivisse sonos, non ambulasse, non comedisse, non scripsisse, non loquutam fuisse (usam scilicet corpore, organisve ejus) non alia. Denique ergo, *forma erroris*, non tam videtur consistere, in non recto usu liberi arbitrii, sicut asseris, quàm in dissonantia iudicii à re iudicata: & ex eo quidem orta, quod intellectus illam rem secus, quàm sese habeat, apprehendat. Quare & non tam videtur esse culpa arbitrii, quod non rectè judicet, quàm intellectus, quod non rectè demon-

strat.

stret. Quippe ea videtur arbitrii ab intellectu dependentia, ut si intellectus quidem aliquid clarè percipiat, videaturve percipere, arbitrium ferat judicium ratum, atque determinatum, seu id ipsa verum sit, seu verum esse existimetur. Sin autem obscurè, tum arbitrium ferat judicium dubium, ac formidolosum, & pro tempore tamen habitum verius, quàm oppositum; seu in re ipsa veritas, seu falsitas subsit. Ex quo fit, ut non tam cavere possimus ne erremus, quàm ne in errore perseveremus; expendamúsque propria judicia, non tam vim facientes arbitrio, quàm applicantes intellectum ad clariorem notitiam, quam judicium semper secuturum sit.

R E S P O N S I O.

Vis ut híc paucis dicam, ad quid se voluntas possit extendere quod intellectum effugiat? Nempe ad id omne in quo contingit nos errare. Ita cum judicas mentem esse tenue quoddam corpus, intelligere quidem potes ipsam esse mentem, hoc est, rem cogitantem; scísque tenue corpus esse rem extensam, unam autem & eandem esse rem quæ cogitet, & quæ sit extensa, profectò non intelligis, sed tantummodo vis credere, quia jam ante credidisti, nec libenter de sententia decedis. Ita cum pomum, quod fortè venenatum est, judicas tibi in alimentum convenire, intelligis quidem ejus odorem, colorem, & talia grata esse, non autem ideò ipsum pomum tibi esse utile in alimentum, sed quia ita vis, ita judicas. Atque sic fateor quidem nihil nos velle de quo non aliquid aliquo modo intelligamus; sed nego nos æquè intelligere ac velle; possumus enim de eadem re velle permulta, & per pauca tantum cognoscere. Cum autem pravè judicamus, non ideò pravè volumus, sed fortè pravum quid; nec quidquam pravè intelligimus, sed tantum dicimur pravè intelligere, quando judicamus nos aliquid ampliùs intelligere, quàm revera intelligamus. Quæ postea de indifferentia voluntatis negas, etsi per se manifesta sint, nolo tamen coram te probanda suscipere, talia enim sunt ut ipsa quilibet apud se debeas experiri, potiùs quam rationibus persuaderi; tuque, ó Caro, ad ea quæ menti intra se agit, non videris attendere. Ne sis igitur libera si non lubet, ego certe mea libertate gaudebo; cum & illam apud me experiar, & à te nulla ratione, sed nudis tantum negationibus impugnetur: majorémq; fortè apud alios merebor fidem, quia id affirmo quod expertus sum, & quilibet apud se poteris experiri, quam tu quæ idem negas, ob id tantum quod fortè non experta sis. Quanquam etiam evinci possit ex tu is ver-

bis te id ipsum esse expertam, negando enim nos cavere posse ne erremus, quia non vis voluntatem in quicquam ferri, ad quod non determinetur ab intellectu, simul concedis cavere nos posse ne in errore perseveremus, quod omnino fieri nequit absque illa voluntatis libertate, seipsam sine determinatione intellectus, in unam aut alteram partem movendi, quam negabas. Nam si semel intellectus determinavit voluntatem ad falsum aliquid quod iudicium proferendum, quæro à te, cum primum ipsa incipit cavere ne in errore perseveret, à quonam ad id determinatur? si à seipsa; erga potest ad aliquid ferri ad quod ab intellectu non impellitur; quod tamen negabas, & de quo solo controversia est: si verò ab intellectu: ergo ipsa non caret, sed tantummodo sicut prius ferebatur in falsum, quod ipsi ab intellectu proponebatur, ita jam casu contingit, ut feratur in verum, quia intellectus ei verum proponit. Sed præterea vellem scire quam naturam falsi concipias, & quo pacto putes illud esse posse objectum intellectus? Ego enim, qui per falsum nihil aliud intelligo, quam veri privationem, plane repugnare mihi persuadeo, ut intellectus falsum sub ratione veri apprehendat; quod tamen esset necesse, si determinares unquam voluntatem ad falsum amplectendum.

I N S T A N T I A.

1.
Visanda
confusionis
gratia de-
bere intel-
lectum, &
volunta-
tem ita
distingui,
ut quic-
quid co-
gnitionis,
& iudicii
est, ad in-
tellectum
pertineat;
quicquid
appetiti-
onis, ele-
ctionis,
que ad vo-
luntatem.

HAud malè fueram subodoratus largiri me nimium, cum initio Dubitationis, ne hærerem in vocibus, disputare me nolle dixi, cur secus ac omnes authores, præterque vocum communem usum, non modò acciperes Intellectum pro sola facultate simpliciter apprehendente; sed voluntatem etiam confunderes cum facultate iudicante. Quippe superfuit inde occasio, quare ex æquivocatione (sed tua nempe) luderet; & qui viderunt, caussari sunt fuisse me nimis facilem, ac placere nimis voluisse, cum tecum loquens, & tua usus phrasi, ipsam Voluntatem iudicare dixi. Itaque, ut de errore agentes, saltem ab errore verborum caveamus, notissimam illam distinctionem sector, quæ vulgò in Mente, seu humana Anima, præter facultatem quidem moventem, duas illas celebres discernunt, cognoscentem, & appetentem, quas vocant propriis nominibus Intellectum, & Voluntatem. Constat proinde, appositè ad Intellectum revocari quicquid cognitionis in Mente est, ad Voluntatem quicquid appetitionis: Adèò ut ad Intellectum pertineat non modò simplex apprehensio, quæ, sine affirmatione, aut negatione aliquid concipimus; sed etiam iudicium,

cium, five Enuntiatio, qua affirmamus, aut negamus, ac ipsa quoque Ratiocinatio, seu iudicium, quo ex uno posito, inferimus aliud; Ad Voluntatem autem pertineat, Electio, seu Volitio, nolitio, prosequutio, fuga; itémque amor, odium, & passiones cæteræ, quæ generis moralis sunt; ut cætera illa sunt intellectualis. Iam non disputatur heic quidem, sit-ne inter, Intellectum, & Voluntatem realis, ut vocant, modalis, aut alia distinctio; satis est, si cum homines, ad devitandum confusionem, excogitârint nomina, quibus conceptus de eadem re varii, pro observatis variis illius operationibus exprimantur, id tantò magis heic imitemur, quantò, nisi fecerimus, magna suboriatur confusio. Cum igitur tu Intellectui solum illam primam operationem, hoc est simplicem apprehensionem tribuas, reliquas autem duas, hoc est iudicium, tam enunciativum, quàm illativum, ut appellant, voluntati attribuas; præstabilius omninò erit non modò primam, sed etiam secundam, ac tertiam Intellectui relinquere; Voluntati autem suas concedere, ac reservare; Quod tu quoque ipse videris appositè magis fecisse, dum in Meditatione tertia apertè dixisti, *nullam esse in voluntate, vel affectibus falsitatem timendam; ac proinde sola superesse iudicia, in quibus cavendum tibi sit, ne fallare.*

Verùm quomodocumque tu acceperis, accipere deinceps velis; En quem germanum vulgò statuunt inter operationes progressum. Videt quispiam, exempli gratiâ, corpus aliquod ab uno milliaris: Id Intellectu quidem apprehendit; sed nihil de ipso pronunciat, utrum nempe sit inanime, an animatum. Spectat attentius, observâtque id locum mutare, five progredi, apprehenditque consequenter motum, seu progressum; sicque peraguntur duæ apprehensiones simplices, una corporis, & alia progressus; Sequitur autem statim iudicium, five secunda operatio, qua intellectus duas illas primas, simplicesque connectens, ita iudicat, seu pronunciat, *Corpus illud progreditur.* Cæterum in ea non consistit; sed quia ex præhabitis notionibus, formavit alias apud se, illud iudicium, seu illam aliam operationem secundam, *Id, quod progreditur, est animal;* eamobrem istam repetens, apponit recentem, & ita connectit, ut ex utraque tertiam, in hunc modum eliciat, *Id quod progreditur, est animal; Corpus illud progreditur; igitur Corpus illud est animal.* Hæc verò est Ratiocinatio, five operatio intellectus tertia, quæ ipsa quoque iudicium est, sed ab alio dependens, & compositum magis. Quod si spectanti attentius, & diebus quidem bene multis id corpus

I I.
Progressus
Intellectus
à 1 operatione in
2. Et ab
hac in 3,
eamque
multiplicem; absque
ulla
affirmatione
voluntatis
intermissione.

pus videatur immotum; tunc apprehenso corpore, apprehendet etiam *immobilitatem*, consistentiamve in eodẽ loco; & ex his duabus operationibus primis, istam secundam conficiet, *Id corpus immobile est*: ac deinceps aliam præhabitam repetens, ita ratiocinabitur, *Quod est immobile* (seu quod tandiũ manet immotum) *non est animal*: *Id corpus immobile est*; *Igitur animal non est*: quæ jam est operatio tertia. Discrimen est solum, quod priore modo iudicium affirmando fit; posteriore verò negando. Atque hæcenus quidem nihil est cum voluntate commercii. Accipio exemplum aliud. Apprehendit Intellectus *pomum*, apprehendit *dulcorem*; tumque utrumque connectens pronunciat, *Pomum est dulce*. Et quia aliunde præjudicavit id quod est Dulce, esse expetendum, idè ratiocinatur, *Dulce est expetendum*, *Pomum est dulce*; *Igitur expetendum*. Vel, si cum attentè spectarit, venenum observaverit; apprehendit *Pomum*, apprehendit *venenum*, & utrumque conjungens, pronunciat, *Pomum est venenatum*: ac tum præjudicatam propositionem assumens, sic ratiocinabitur, *Quod est venenatum, fugiendum est*; *Pomum hoc venenatum est*; *Igitur fugiendum*. Et huc usque rursus nihil est voluntati cum utroque iudicio alterutrius modi commune. Quin etiam, nihil commune erit, si tertio modo rem accipiamus; nempe si apprehenso *pomo*, apprehendatur in illo heinc *dulcedo*, inde *venenum*; ac tum intellectus sic pronunciet, *hoc pomum est simul dulce, & venenatum*; seu *Dulce quidem, sed venenatum*: deincepsque præjudicatam propositionem assumens, ratiocinetur, *Quod est dulce quidem, sed venenatum tamen, id respuendum est*; *hoc pomum est dulce quidem, sed venenatum tamen*; *Igitur respuendum*. Quid, quod posset etiam quarto modo, conferente nihil voluntate, sic accipi, ut apprehenso *pomi veneno*, apprehendatur *liberatio ab ærumnis intolerabilibus*, in-

III.

Omniem actionem voluntatis supponere intellectus de re expetenda, aut non expetenda iudicium; etiam cum ipsi intellectui imperat, ut iudicet ali- quid.

tellectusque ita pronunciet; *Pomum hoc venenatum liberare potest ab ærumnis intolerabilibus*; ac tum ex præiudicio sic ratiocinetur; *Quod liberare potest ab ærumnis intolerabilibus, tametsi venenatum sit, expetendum est*; *Hoc pomum id potest*; *Igitur expetendum*.

Posterior ergo his omnibus est ipsa voluntas, seu voluntatis actio, hoc est expetitio, aversio, seu volitio, nolitio; atque adè electio, neglectio; imperium, prohibitio; prosequutio, abstinentia; & quæ sequuntur omnia, prout intellectus iudicaverit, sive iudicium tulerit; non purè solum enunciationis, sed etiam ratiocinationis. Neque enim pomum expetet reipsa, nisi intellectus iudicaverit dulce; neque nolet, aut respuet, nisi intellectus iudicaverit *venenatum*;

natum ; atque respuendum . Neque præferet abstinere à veneno , factà dulcoris illecebrà , nisi intellectus judicaverit pomum esse simul dulce , ac venenatum ; & satius esse abstinere à dulci propter venenum , quàm venenum prosequi propter dulce . Neque eliget potiùs venenum , quàm negliget , nisi intellectus priùs judicaverit cum hoc veneno junctam esse liberationem ab ærumnis ; & minus malum esse expetendum , seu habere rationem boni , quod à majore malo liberat . Vno verbo , egregia prorsùs communis illa sententia , quæ adstruit voluntatem esse potentiam cæcam , seu quæ ad nihil tendat , vel nihil refugiat , nisi intellectus faciem præferat . Neque obstat , quòd aliquando operationes intellectus velimus ; seu quòd intellectus judicet , quia judicare eum volumus : Quippe ista volitio ex alio judicio præcedente pendet ; & judicium quod sequitur , non tale est , quia volumus , sed quia simplices apprehensiones sunt tales . Etenim , ut exemplum priùs resumamus , Postquam vidit quis illud corpus mille passibus dissitum , Intellectus quidem nihil aliud prima fronte apprehendit , quàm corpus ; At cum præcognoscens omne corpus esse animatum , vel inanime ; & destitutus nota sive charactere , quo istud , utrum sit , discernat , judicium ea de re suspendat ; interim tamen quia aliunde apprehendit cognitionem , quæ attentione paratur , idè ita pronunciat , sive judicat , *Corpus hoc in cognitionem cadere , sive fieri cognitum attendenti potest* ; ac tum sequitur ratiocinatio seu judicium ex præjudicata alia propositione in hunc modum , *Attentio illa expetenda , seu utilis , ac bona est , quâ res ignoratæ cognoscuntur ; Atqui ex attentione ad motum , quietemve hujus corporis cognosci de eo potest quod ignoratur , scilicet utrum animatum , an inanimatum sit : Igitur talis attentio expetenda est , seu major , utilis , ac bona* . Hoc autem judicio posito , adest voluntas , quæ reipsâ expetit , seu vult rem utilem , ac bonam monstratam , imperatque attentionem , ac judicium , prout attendendo res observata fuerit , faciendum . Quod idcirco addo ; quoniam cujusmodi speciatim , distinctèque futurum hoc judicium sit , ipsa voluntas non præscribit ; id scilicet ignotum est ; neque , nisi sub ratione generali , consuleque expetitur ; sed potiùs tale futurum est , quale attendenti character seu motus , seu immobilitatis , monstrabit . Non addo verò quàm sit attendendum , ut is character & proprius sit , & spoliatur fallaciis , quòd judicium feratur verum ; cum satis ad præsens institutum sit , tale futurum esse judicium , qualis character simplici apprehensione fuerit perceptus . Nam exempli

gratiâ, licet ad ferendum hoc judicium, *Corpus movetur*; character sit, *Mutatio loci*: Nihilominus quia mutatio loci apparere perinde potest, seu corpus ipsum reverâ moveatur, seu videntis oculus; ideo, ut judicium quidem sit verum, debet oculus quiescere; at si moveatur, corpore quiescente, cum debeat Intellectus id prospicere, & nisi faciat, falsum sit futurum judicium; interim tamen tale erit judicium, quale ex eo solo, quod apparet, apprehenditurque, necessarium est consequi, atque ita de cæteris.

IV.

Non patere
latius vo-
luntatem,
quàm in-
tellectum
(imò nec
eam latè)
& obje-
ctum-ne
merito pro-
pria sen-
tentia a-
mor fuer-
rit.

De tua Responsione ut jam dicam, tua verba sunt, *Vis, ut hic paucis dicam, ad quid se voluntas possit extendere, quod intellectum efficiat? nempe ad id omne, in quo contingit nos errare.* At quàm rectè dicas, vel ex eo constat, quòd cum errare nos contingat seu in secunda, seu in tertia Mentis operatione, Si accipias quidem Voluntatem pro eo; quòd nos dicimus Intellectum secunda, vel tertia operatione agentem, manifestum sit ipsam ad nihil extendi, quod idem Intellectus per operationem primam non perceperit, cum tale prorsus judicium sit, qualis est rei apprehensio. Sin autem pro eo, quod nos Voluntatem dicimus; manifestum sit ipsam non ferri in errorem, quem neque velle, neque amare, neq; jubere, neque prosequi ullo modo potest; utpote qui sit incompetus, & respectu Voluntatis perinde sit, ac si non esset. Quid quòd compertum, neque velle, neque amare omninò potest; utpote quod malum quid sit; & dum vult, amatque judicium, quod contingit esse erroneum; non vult, amatque tanquam erroneum, sed tanquam verum existimatum, & ab intellectu tale demonstratum; Nam sanè si existimaretur, demonstrareturque erroneum, tunc non adamaret, sed averfaretur. Pergis, Voluntatem non jam pro judicante, sed pro appetente facultate usurpans, *Ita, cum judicas Mentem esse tenue quoddam corpus; intelligere quidem potes ipsam esse Mentem, sive esse rem cogitantem; isemque tenue corpus esse rem extensam; Vnam autem, & eandem esse rem, quæ cogitet, & quæ sit extensa; profectò non intelligis, sed tantummodò vis credere, quia jam antè credidisti, nec liberè de sententia decedis.* Verùm cum tam bellè declames, quidnam exinde colligis? Scilicet voluntatem meam ferri ad aliquid, quod intellectus meus non percipiat. Ecquidnam verò illud est? Scilicet esse eandem rem, quæ cogitet, & quæ sit extensa. At, si id volo, nonne eadem ratione volo, quàm intelligo? Quo enim alio modo id conjunctum volo, quàm prout ab intellectu copulatur, & voluntati ostenditur? Et, si volo credere, quia jam antè credidi; Igitur jam antè id judicavi

dicavi quod nunc volo ? Credidi autem , seu judicavi intellectu : Ergo non propterea voluntas ad aliquid fertur , quod intellectum effugerit . *At non libenter de sententia decedo ?* Sed , ô bone , Vtinam tu tam decedere libenter , ac ego , si quid præoccupatus es ! Ego certè de tota hac quæstione nihil pronuncio ; & cum id solum ratum teneam , quod Fides sacra mihi præscribit ; quod ex lumine naturali superest , & de quo solum heic agitur , adeò mihi obscurum est , ut à sententia vel ferenda , vel defendenda longissimè absum . Nam & cum dicis *me judicare Mentem esse tenue quoddam corpus* ; Ego hoc non judico , qui & fide teneo esse incorpoream , & quod ad lumen naturæ spectat , illud habeo obscurius , quàm ut profitear me per ipsum cognoscere naturam Mentis : interim verò tibi objicio , qui te profiteris naturam hanc nosse ex naturali lumine ; adeò ut cum dicas te nosse clarè , & distinctè esse incorpoream , & non appareat , quomodo , dum Mens in corpore versatur , possit ullam substantiam , nisi sub quadam corporea specie , repræsentatione intelligere , requiram ex te , sub qua alia specie seipsam Mens intelligat , quàm corporis cuiuspiam tenuis ? Pari ratione non judico , neque me scire profiteor , an , & quomodo res extensa intelligat ; Quippe qui planè non cognoscam , quomodo visionem eliciam ; fateor me longè adhuc minùs cognoscere quomodo ipsam intellectiōnem . Et tibi tamen consequenter propono , cur non intellectio possit esse à re extensa ; cum Mentis substantia non possit nisi extensa , aut extensæ instar intelligi : Neque si inextensum quid sit , intelligi valeat , quomodo hanc actionem eliciat , & tanta quidem varietate , quantam attendere est in promptu . Objicio hæc , inquam , & propono , ut inferam , si tu non ista meliùs , quàm cæteri intelligas , quamobrem tantà fiducià , ipsa tanquam meliùs , imò optimè intellecta jactes , ac divendas ? Et dicis *me non libenter de sententia decedere* ? Non sanè , nisi quis exoriat ; qui aliquid magis consentaneum proferat ; sed da qui veritatem commonstret ; & nemo non modò lubentiùs , sed etiam ardentius illam complectetur . Sequitur , *Ita , cum pomum , quod fortè venenatum est judicas tibi in alimentum convenire ; intelligis quidem odorem , colorem , & talia grata esse ; non autem ideo ipsum pomum tibi esse utile in alimentum ; sed quia ita vis , ita judicas .* Quidnam verò etiam ex hoc colligis ? Nam vel judicavi in pomo esse venenum , uti cætera , vel non judicavi (quod tu non satis exprimis) Et , si judicavi quidem inesse venenum ; ergo venenum volui non in judicatum , seu non rectè perceptum ; si

non

non judicavi ; ergo volui quidem pomum , ut odoratum , coloratum , lapidum , alimentitium , quatenus tale judicavi ; at non volui ut venenatum , quia non judicavi hujuscemodi. Et dicis *me ita judicare , quia ita volo* ; Quàm diceres rectius me ita velle , quia ita judico ! Siquidem non judico pomum utile esse in alimentum , quia volo ; Quippe id non pendet à mea voluntate : sed idèò volo , quia judico utile esse in alimentum.

V.

*Non nasci
errores ex
eo , quòd
voluntas ,
aut etiam
judicium
latus pa-
tent , quàm
intellectus ,
aut sim-
plex appro-
batio.*

Quid quòd ipsemet , vel invitus , fateri statim cogeris , *nihil nos velle , de quo non aliquid aliquo modo intelligamus* ? Istud sanè , ut nihil aliud , saltem imbecillitatem insinuat tui illius ratiocinii :

Si in aliquo errores nascuntur , ex eo est , quòd ejus voluntas latus pateat , quàm intellectus , neque ipsam intra eosdem limites contineat , sed etiam ad illa , quæ non intelligit , extendat :

Atqui in me errores nascuntur :

Igitur ex eo nascuntur , quòd voluntatem habeam latus patentem , quàm intellectum , neque ipsam intra eosdem limites contineam , sed etiam ad illa , quæ non intelligo , extendam .

Videlicet cùm jam admittis nihil velle nos , de quo non aliquid aliquo modo intelligamus , subodoratus omninò es non patere latus voluntatem , quàm intellectum , neque excurrere , aut extendi ultra limites , ad quos Intellectus non pertingat. Nam quod negas statim nos *æquè intelligere , ac velle* , videris non satis advertisse esse hæc inseparabilia , hoc est , volitionem totius , & intellectionem totius ; volitionem partis , & intellectionem partis. Etenim si totum quidpiam volumus , necessariò totum intelligimus ; Neque obstat quòd omneis ejus parteis non intelligamus distinctè ; siquidem neque volumus omneis ejus parteis distinctè ; sed planè ut intelligimus , ita volumus ; adèò ut , si intelligamus unam , plureisve parteis distinctè , cæteras confusè ; velimus etiam unam , plureisve parteis distinctè , cæteras confusè ; Et , si intelligamus confusè omneis , velimus etiam confusè omneis. Quare & , cùm subdis , *posse nos de eadem re velle permulta , & perpanca tamen cognoscere* , id videtur omninò falsum ; Neque in te est , ut declares , quid tandem velis de aliqua re , quod non cognoscas esse in re ; & , si distinctè quidem , distinctè ; si confusè verò , confusè. Pergis , *Cùm autem pravè judicamus , non idèò pravè volumus , sed forè pravum quid*. Quo loco videris rem prorsus turbare. Nam , cùm tu accepisses Voluntatis vocem pro facultate judicante , seu pro intellectu secunda , aut tertia operatione agente , dixeram ego te imitatus , idèò voluntatem pravè

pravè judicare, quoniam Intellectus (seu eadem facultas prima operatione agens) pravè percipit : Tu verò jam hypothelin mutas ; Nam & volitionem à judicio distinguis , & à pravitate Physica ad pravitatem moralem transis . Nempe ut Scholastici Aristotelem imitati aliud esse docent agere injustè , & agere injustum ; quatenus potest aliquis non injusto affectu , operari aliquid , quod injustum esse præter illius voluntatem contingat : ita tu aliud esse statuis judicare pravè , & velle pravum ; sed cum eo discrimine , ut cum illi vocem agendi non mutant , & sic loquantur perspicuè ; tu vocem judicandi commutes in vocem volendi , & ita loquaris obscurè . Quod autem sequitur , *Nec quidquam pravè intelligimus ; sed tantum dicimur pravè intelligere , quando judicamus nos aliquid amplius intelligere , quam reverà intelligamus ;* Declarare quidem videris quomodo tuum illud ratiocinium accipias ; nempe ut Intellectus extendatur solum ad ea , quæ qualia intelliguntur , talia sunt ; Voluntas verò , seu judicium etiam ad ea , quæ talia non sunt , qualia intelliguntur : Verùm tota tua molitio , ex eo apparet inutilis , quòd Intellectus , & Voluntaris seu ejusdem Intellectus simpliciter apprehendendis , & judicantis , eadem sit restrictio , aut ampliatio facienda . Nam ut aliqua sunt , quæ idèd bene intelligimus , quoniam qualia sunt intelligimus ; ita ipsa eadem sunt , de quibus idèd bene judicamus , quoniam qualia sunt , esse judicamus ; & ut vice versa aliqua sunt , de quibus idèd pravè judicamus , quoniam judicamus , qualia non sunt ; ita ipsa eadem sunt , quæ idèd pravè intelligimus , quoniam qualia non sunt , intelligimus . Ex quo fit , ut pro modo intelligendi sit etiam modus judicandi ; & de nulla re feramus judicium , de qua intellectio non fuerit , rectum , si recta , pravum , si prava . Et ut præteream te non respondisse ad illud quod objectum est ; Non latius patere judicium , quàm intellectionem ; sed Intellectionem potius latius patere , quàm judicium ; seu ut tuis vocibus utar , Intellectum , quàm voluntatem : Adnoto solum videri heic contradictionis speciem , cum ais , *judicare nos aliquid amplius à nobis intelligi , quam reverà intelligatur .* Quomodo enim potest intelligi , quod non intelligitur , ut non intellectum intelligi judicetur . An vis dicere judicare nos aliquid intelligi esse in re , quod in re non sit ? Sed aliud est esse in re , aliud intelligi esse in re . Et quòd quidem aliquid sit , vel non sit in re , hoc ad veritatem , vel falsitatem judicii facit ; quòd verò intelligatur esse in re , hoc facit absolutè ad ferendum judicium de re . Quare & seu id ,

quod judicatur, sit in re, seu non sit, intelligitur tamen esse; aded ut, quamvis reverà non sit; reverà tamen, hoc est reipsa intelligatur esse; & judicium nostrum falsum sit, non quod intelligamus id, quod non intelligimus, sed quod intelligamus id, quod in re non est.

VI.

Indifferentiam intellectus videri radicem indifferentia voluntatis, in qua est libertas, & hanc ab illo determinari; ac non tam libertatem, quam libertatem esse, cum voluntas hanc Summo Bono clare perspecto.

Quæ de Indifferentia dixi, aded manifesta videntur, ut potiore jure quàm tu provocare posse ad experientiam videar. Quinetiam penè nullus dubito, te ipsum quoque ea experiri; sed tuæ fortè famæ magis interest, quàm ut agnoscere, aut fateri velis. Gaudeto proinde, tuâ sorte, ut voles; Nam id quidem ego tibi non invidéo, ut neque quamcumque potueris apud quoscumque fidem mereri. Satis mihi est, ut quod ad me spectat, neque is sim, qui inficiatus fuerim omnem indifferentiam; neque qui nullam esse in me libertatem fuerim professus: & quod ad te spectat, ut pro tuo Genio eventilaris calamum; dum interim non libertatis minus, quàm voluntatis vocem ad intellectum judicantem transferres. Quare & circa id, quod argumentaris me libertatem fuisse experitum, quando admisi non tam nos cavere posse ne erremus, quàm ne in errore perseveremus: nō tam responsione est opus, quàm instantia, ex ipsa libertatis, ac indifferentiæ ad judicandum, quæ in nobis est, explicatione desumpta. Itaque licet res ferè maneat ex præmissis exposita; adjicere tamen heic lubet, Indifferentiam videri latius, quàm libertatem patere. Quippe non modò in anima, sed in cæteris quoque rebus est indifferentia; Vt cùm Tabula dicitur ad hunc, illumve colorem indifferens; aqua ad hunc, vel illum saporem; Sol ad producendum hanc, vel illam plantam, atque ita de reliquis; Vt minùs sit mirum, si, cùm voluntas sit propriè sedes libertatis, ob eam, quam habet Indifferentiam, Intellectus tamen suam quoque Indifferentiam habeat, quantumvis ob illam liber non dicatur. Scilicet ipse Intellectus eà est indifferentia, ut respectu quidem primæ operationis apprehendat aliquid, vel non apprehendat; vel sic apprehendat, ut possit, aut potuerit apprehendere oppositum: Respectu verò secundæ, aut tertiæ; judicium de aliqua re ferat, vel non ferat; vel sic unum ferat, ut possit, potueritve oppositum ferre. Cùm verò quicquid Intellectus apprehendit, sit Ens, vel certè Ens esse appareat; & non possit consequenter judicare id non esse quod est, vel apparet (quatenus quidem Ens apparet) sive id esse, quod non est, vel non apparet (quatenus quidem Ens non apparet) heinc

heinc fit, ut cùm intellectus exposito modo indifferens fit, non fit tamen indifferens, ut iudicium ferat verum, vel falsum, nisi quatenus id, quod falsum est, ipsi apparet verum. Vnde & tametsi fallatur; non existimat tamen falli se, neque existimaturus est, quandiu apprehensio ejus, quod apparet, eadem fuerit; aded ut, si velis mutari iudicium, necesse sit apprehensionem mutari. Res similis est, ac in oculo, cui baculus alioquin rectus, partim in aëre, partim in aqua objicitur. Quippe baculum curvum videt, quamvis curvus in se non sit, quia tali ipsius specie informatur; & nunquam non videbit curvum, nisi mutetur species, baculo ex aqua educto. Addo rursus Indifferentiam, quæ in Voluntate est, induere nomen libertatis, quatenus Voluntas potest quidpiam velle, aut nolle; vel sic velle unum, ut etiam oppositum; sed radicem tamen hujus indifferentiæ sitam esse in ea, quæ in intellectu est, quatenus pro flexibilitate intellectus, est flexibilitas voluntatis. Inde enim est, quare etiam, ut intellectus indifferens non est ad verum, & falsum, nisi quatenus falsum induit speciem veri; ita neque voluntas sit indifferens ad bonum, & malum, nisi quatenus malum habet speciem boni. Et ut Intellectus non potest mutare iudicium, tametsi de re non vera, nisi mutetur apprehensio veri, quo ea obvelatur; ita neque mutari possit appetitio, tametsi de re non bona; nisi mutetur apprehensio boni, quo ea tegitur. Nempe eadem res vera est, ac bona: Vera quidem respectu sui, bona respectu alterius; & utrumque aut reipsâ, aut apparenter duntaxat. Quare intellectus apprehendit non modò Veritatem, qua res est in se, vel esse putatur; sed etiam bonitatem, qua se habet, vel habere putatur ad aliud; atque idcirco prout bona apprehenditur, ita ab intellectu judicatur; & prout ab intellectu judicatur, ita à voluntate appetitur. Ex quo fit, ut quemadmodum, cùm ab eo, quod est reipsâ verum, aberravimus, supersunt gradus innumeri ejus, quod est simile vero, alii majores, alii minores, juxta quos potest quidpiam dici simile, similius, simillimum vero; ita cùm ab eo, quod reverà bonum defleximus, supersunt gradus innumeri ejus quod est simile bono, eâ varietate, ut quidpiam dici simile, similius, & simillimum bono possit. Et quemadmodum nunquam Intellectus deserit unum verisimile, nisi propter verisimilius; ita voluntas nunquam deserat quidpiam visum bonum, nisi ob visum melius. Et quemadmodum Indifferentia Intellectus in eo est, ut non ita determinetur ad arripiendum aliquid,

tanquam verisimile, quin arripere verisimilius possit; ita Indifferentia Voluntatis, in eo sit, ut non ita determinetur ad aliquid visum bonum, quin possit ad aliud melius visum ferri. Et quemadmodum intellectus, ubi clarâ notitiâ summum bonum est assequutus, Deum nempe ter-Max. velut in cælo beatæ Mentis, non est ampliùs indifferens, ut ab eo discedat, quodd aliquid verius intelligere deinceps non valeat: Ita Voluntas ubi eadem notitiâ assequuta est summum bonum, nempe ipsum quoque ter-Max. Deum, indifferens ampliùs, sive quod est idem, non est ampliùs libera, ut ab ipso deflectatur; quod non possit deinceps velle, aut amare aliquid melius. Sed notandum, necessitatem, quæ voluntas hæret summo bono, non eam esse, quæ coactionem, violentiam, rigorem, atque idcirco renitentiam, molestiam, desperationem, aut aliquid simile sonat; sed eam, quæ intelligitur cum plenissima consensione, collubentia, complacentia; estque aded maximè spontanea, suavissima, desideratissima; quæque proinde licet à plerisque & libertas, & summa libertas dicatur; videatur tamen potiùs libentia, aut summa libentia (dum sic loqui liceat) posse appellari. Vnde & quando tu pronuncias *opus non esse in utramque partem ferri posse, ut sis liber, sed contra quò magis in unam propendes, sive quia rationem veri, & boni in ea evidenter intelligis; sive quia Deus intima cogitationis tuæ ita disponit, tantò liberius te illam eligere; neque enim divinam gratiam nec naturalem cognitionem unquam imminuere libertatem, sed potiùs augere, & corroborare;* Videtur id totum eatenus verum esse, quatenus liber diceris, quasi libens; & eligere liberius quasi libentius; & non habere imminutam libertatem, quasi libentiam. Scilicet notio libertatis nulla videtur, si indifferentiam sustuleris; at ipsa interim libentia tantò intelligitur major, quantò bonum & majus est, & perfectius cognoscitur: Et cum seu Dei gratia, suavisque dispositio, seu naturalis cognitio in voluntatem nostram agit; quoniam id sit respectu veri, aut majoris cuiuspiam boni, ided augetur, ac roboratur ejus collubescencia; ac libertas interim ipsa non tam dici debet imminui, quam perfici, quatenus propensio sit ad verum, potiusquam ad apparens, ad majus, quàm ad minus bonum. Atque hæc quidem propter id, quod ex Theologia attigisti.

VII.
Et Voluntas corrigatur, corrigendum prius intellectus iudicium ex correctâ apprehensione rerum; Et voluntatem non imperare intellectui, nisi ipse prælucens.

Ad id quod cœperam, ut redeam, & ne ad supernaturalia excurram, ac intra metas luminis naturalis remaneam, addendum præterea videtur, ut tam intellectus rectè judicet, quàm Voluntas rectè velit, curandum aliud videri nihil, quàm ut apprehensiones, seu

seu notiones , quas habemus de rebus , sint ipsis conformes tam secundum id , quod in se sunt , quàm secundum id , quod ad aliud. Siquidem nisi ita fiat , frustrà imperabitur , aut vis inferetur sive Intellectui , ut id persuadeatur , quo videt quidpiam verosimilius ; aut voluntati , ut id præferat , quo ostenditur quidpiam melius. Et sanè cùm de Intellectu res videatur clara , videtur quoque de Voluntate non esse minùs perspicua. Nimirùm videtur præclare id vulgo admitti , *Omnis peccans ignorans est* ; Nam quamvis illud quoque tritum sit , *Video meliora , probòque , Deteriora sequor* : Nihilominùs nemo peccat , quin aliqua passio apprehensiones , seu notiones obscurer , perturbetque judicium ; adèd ut virtus quidem , & honestas probetur ; sed interim tamen voluptas , lucrum , honor , injuria , quidvis aliud , præsentius sit , clariùs appareat , vehementiùs moveat , atque idcirco magis probetur , magisque abripiat , quàm virtus , honestas , præmium , alia , quæ vigente passione obfuscantur , & vel non attenduntur , vel non certò creduntur , vel procul apparent ; neque ad illa desperatur regressus ; Cùm id interim , quod præ manibus est , non videatur omittendum , & poena , si quæ proposita sit , aut non cogitetur , aut evadi posse speretur. Ex quo fit proinde , ut dum peccamus , ea , quæ pro tempore apparent meliora , sequamur , & ignorantes idèò simus , quòd species veri , aut majoris boni quasi eminus , ac per nebulam duntaxat videatur ; species fucati , aut minoris , quasi cominùs , ac in ipso Sole se prodant. Quare & danda est opera , non tantùm ut germanas de vero bono notiones habeamus ; sed etiam , ne passiones subrepant , quæ tenebras faciant , ob quas intellectu judicante id melius , quod deterius est , voluntas ad illud feratur. Addo postremò primas notiones , seu apprehensiones , quas habemus de rebus , sic intellectum occupare , ut quandiu illæ perseverant , tandiu perseveret judicium , quod consequenter ad illas fit ; & , si tota vita perseverarent , idem tota vita teneretur judicium ; ac prout initio contigisset judicium esse verum , aut falsum , ita deinceps perseveraret. Enimverò , quia evenit , ut vel casu , vel novo studio , vel admonitione , vel alio quovis modo notiones primò habitæ ita mutantur , ut subsequentes potiores sint ; idèd judicamus , non sic inhærescendum esse primis , quin sit expendendum , an-non aliæ haberi possint , quibus fortassis deteriores sint ; atque idcirco , ut sanioribus locum præstent , sunt deponendæ. Hoc porrò factò judicio , aut quasi præjudicio , expectit voluntas fieri id examen , ac intellectui imperat , ut sese ad id

faciendum accingat : Estque demùm hæc ipsa cautio , quam in nostra esse potestate dixi , ne si fortè in errorem inciderimus , in errore perseveremus . Neque verò se propterea voluntas ad id expendendum , aut jubendum determinat sine opere intellectus ; Quippe nisi intellectus id demonstrasset expetendum , & exsequutione dignum , Voluntas nunquam eò contendisset . Vnde quod quæris , *si semel Intellectus determinavit voluntatem ad falsum iudicium proferendum* (vel comprobandum) *cum primum ipsa incipit cavere , ne in errore perseveret , à quonam ad id determinetur ?* clarum est determinari ab eodem intellectu ; non eodem quidem directo iudicio , quod expendendum proponitur ; sed reflexo alio , quo intellectus ex præcedentibus observationibus edoctus , congruum iudicat , ut id expendatur .

VIII.

Quatenus falsitas in rebus sit ; cum non sit propriè , nisi in intellectu .

Quod denique postulas , *ecquam naturam falsi concipiam ?* Non est profectò cur existimes , velle me falsum , ut tale est , sive Falsitatem , esse aliquid plusquam privativum . Quippe nullibi extra intellectum Falsitatem constituo , nisi instar denominationis , quam appellant extrinsecam : cum extra intellectum nihil falsum sit , sed omnia sint vera , eà veritate , quæ dicitur transcendentalis , seu quæ unumquodque est id , quod est , non verò aliud . Neque enim Aurichalcum verbi gratià falsum aurum est , sed verum Aurichalcum ; & denominatur solum falsum aurum , quatenus intellectus putat ipsum aurum , cum tamen non sit ; eo modo quo paries denominatur dexter , non quòd dexter sit , aut partem dextram habeat , sed quòd animal cuius dextra est , ipsi dextram obvertat . Est igitur Falsitas propriè , in ipso solum intellectu ; ac inter ejus operationes , in ipso propriè iudicio ; tametsi posset in simplicibus quoque apprehensionibus agnosci , quatenus rebus conformes non sunt , iudiciisque ansam falsitatis præbent . Quare cum iudicium , quod fertur de re , est ipsi conforme , utpote rem talem enuncians qualis est , vel talem non esse , qualis non est , appellatur verum : Et cum huiusmodi conformitate caret , seu rem talem enunciat , qualis non est , vel non talem , qualis est , tunc appellatur falsum . Et hæc est carentia , seu privatio conformitatis , in qua falsi naturam consistere sentio . Quia contingit verò , ut hæc falsitas affingatur rei ; ita ut defectus conformitatis non tam videatur esse in iudicio comparato ad rem , quàm in re comparata ad iudicium ; idè ob hanc comparisonem res quoque ipsa dicitur falsa . Et quia tamen non putatur falsa , sed esse id , quod iudicatur ; eam ob causam sub specie veri apprehendi dicitur , quatenus aliquid verum est , sine quo non appre-

apprehenderetur. Sic color flavus Aurichalci, verus Aurichalci est color; & interim tamen est species aded illi similis, sub qua latere aurum solet, ut pro tali specie accipiatur; sicque fiat ansa intellectui apprehendendi judicandique esse sub ea aurum, quod tamen non est; atque id proinde, quod verum in se aurichalcum est, comparatè ad intellectum, dicatur esse falsum aurum. Vnde nihil mirum si voluntas tam determinetur ab intellectu ad prosequendum hoc falsum aurum, quàm ad prosequendum verum; quoniam quantum ad ipsum spectat, ita habet utriusque speciem pro eadem auri specie, ut discrimen nullum agnoscens, aurum esse æquè sub una, ac sub altera arbitretur.

D V B I T A T I O IV.

*De desiderata adhuc Methodo, quâ agnoscamus nos ita clarè,
distinctèque aliquid percipere, ut periculum,
ne erremus, non subfis.*

Concludis fructum exaggerando, quem ex hac meditatione potes consequi, ac præscribis quid sit agendum, ut assequaris veritatem. Nempe assequuturum te dicis, si tantum ad omnia, quæ perfectè intelligis, satis attendas: atque illa à reliquis, quæ confusius & obscurius apprehendis, secernas. Hoc porro non modò est verum: sed etiam hujusmodi, ut tota præcedens meditatio, sine qua potuit intelligi, videatur fuisse supervacanea. Attende tamen, eximie vir, difficultatem non videri, an, ut non fallamur, debeamus clarè, atque distinctè intelligere aliquid; sed, quâ arte, aut methodo discernere liceat, ita nos habere claram, distinctamque intelligentiam, ut ea vera sit, nec fieri possit, ut fallamur. Quippe initio objecimus, nos non rarò falli, tametsi nobis videamur aliquid aded clarè, distinctèque cognoscere, ut nihil possit clariùs & distinctiùs. Tu quoque id tibi ipse objecisti, & expectamus tamen adhuc istam artem seu methodum, cui præcipuè sit incumbendum.

RESPONSIO.

Quantum ad fructum harum Meditationum, satis praeconui in praefatiuncula quam te legisse existimo, non magnum illum futurum pro iis, qui rationum mearum seriem, & nexum comprehendere non curantes, in singulas tantum earum partes disputare studebunt. Et quantum ad methodum qua possimus ea dignoscere, quae reuera clarè percipiuntur, ab iis quae clarè percipi tantum putantur, etsi credam ipsam à me satis accuratè traditam esse, ut jam dictum est; nequaquam tamen confido illos, qui de praëjudiciis exuendis tam parum laborant, ut querantur quòd non simpliciter ac paucis verbis de ipsis sim loquutus, eam facile esse percepturos.

INSTANTIA.

I.
Ut agnosci posset, an promissa Methodus foret tradita, fuisse precipuas Meditationum particulas figillatim expendendas.

Memini sanè me legisse tuam illam Praefatiunculam; sed memini quoq; me lactatù spe, plusquam dici potest, inani, cum nihil tale deinceps agnovi totis Meditationibus; quale feceras in ea sperandum. Memini etiam, te aversatum illos, qui Meditationes minutatim expendere: sed non propterea abstinendum ab iis minutatim expendendis censui; ne, si aliqua capita praetermitterentur, suspicari possem ea esse, ob quae non perspecta, non colligerem expectatum fructum. Nam quòd pro tuis votis capita duntaxat quaedam seligantur, ac eo more disputentur, quo solent in Scholis ex magno Theaeon numero paucae; id visum mihi satis non est ad ferendum iudicium, quale Mersennus habere voluit, & futurum tibi pergratum spondit. Ac egit ille quidem bona fide, qui jam, ut video, legerat in datis à te ad ipsum Responsionibus, verba ista, *Sed quia novi quàm difficile sit futurum etiam iis, qui attendent, & veritatem seriò quaerent, totum corpus mearum Meditationum intrinseci, & simul ipsarum singula membra dignoscere, quae duo simul existimo esse faciendum, ut integer fructus ex iis capiatur, &c.* Verùm de te ecquid vis dicam, cum illos non probas, qui singula membra dignoscere student, & cum in singulis difficultates occurrant, ipsas tibi ingenuè, privatim, & rem tibi gratam facere putantes, proponunt? Quòd enim dicis eos non curare suarum rationum seriem, nexumque comprehendere, quod me attinet, scio falsum esse; qui nisi aliunde satis comprehendi, tenuitas quidem ingenii mei

caussa

caussa esse potest; sed tua quoque culpa videtur, quando rem fecisti non modò *valde difficilem*, ut ais, sed etiam difficillimam, &c, ut sic dicam, penè crucem, attentissimè attendentibus, ac veritatem studiosissimè requirentibus; ut nemo lectorum, in quos incidi, restatus non est; cùm res potuisset haud-dubiè, facillima (quantum novisti, & contendisti dicere) facilitate explicari. Heinc quod subdis *te nequaquam considerare illos, qui de præjudiciis exuendis tam parum laborant, ut querantur, quòd non simpliciter, ac paucis verbis loquutus sis, Methodum à te traditam esse facile percepturos*; quoniam te querela adhuc tangit, & angit; idcirco remitto ad ea, quæ dicta de ipsa suo loco sunt circa Meditationem primam. Heic solùm addo, fuisse institutam querelam, non quòd res multas utileis in pauca verba non contraxeris; sed quòd paucas inutileis diduxeris in multa verba. Scilicet nunc quoque trade Methodum copiosissimam quantum voles, dummodò tamen utilem & pollicitationi tuæ consentaneam; ipsamque exsolcabitur non nemo. Id te offendit, quòd dixi nos illam adhuc exspectare; sed cur non feras, si verum sit te illam nondum tradidisse? Nam quod dicis *fuisse à te satis accurate traditum*; dicere sanè non sufficit; nisi quo loco, aut quandonam id fuerit præstitum declares. An locum insinuas, cùm ais *illos non percepturos, qui de exuendis præjudiciis non laborant, &c.* Certè & circa tertiā Meditationē respondisti id fuisse à te *accuratè præstitum, ubi primum abstulisti omnia præjudicia, &c.* Verùm quàm non fuerit à te ille locorum præstitum, fuit instando manifestatum. An propter illa verba, *ut jam dictum est*, insinuas id, quod in hac quarta Meditatione conclusum fuit? Certè scopum præcipuum, & Methodi quasi Epitomem complecti voluisse videris his verbis, *Quoties voluntatem in judiciis ferendis ita contineo, ut ad ea tantum se extendat, quæ illi clarè, & distinctè ab intellectu exhibentur, fieri planè non potest, ut errem; quia omnis clara, & distincta perceptio est aliquid, ac proinde à nihilo esse non potest, sed necessariò Deum Authorem habet; Deum, inquam, illum summe perfectum, quem fallacem esse repugnat: ideoque procul dubio est vera.*

* Porro subnotatum jam est Instantiis primis tam in hanc, quàm in superiorem Meditationem, quo uteris circulo, ut isthuc deum pervenires. Nunc ut res saltem indigitetur, observo te ex iis, quæ ab usque initio Meditationis tertiæ proposueras, sic rationari,

Tum demum fui certus futurus, claram, distinctamque notitiam

G g

* II.
Circulorum
commis-
sum, pro-
bando esse
Deum, ep-
simumque
veracem,
quia clara,
distinctaq;
est ejus no-
titia; &
notitiam
Dei esse
claram
distin-
ctamque,
quia Deus
est, ipseque
verax.
Desidera-
tam deni-
que Me-
thodum
adhuc de-
esse siderari.

esse procul dubio veram, cum probatum foret à me Deum esse, & esse Authorem rerum omnium, atque adeò claræ, distinctæque notitiæ, & deceptorem non esse:

Atqui jam probavi Deum esse, & esse authorem rerum omnium, atque adeò claræ, distinctæque notitiæ, & deceptorem non esse:

Igitur sum jam demum certus claram, distinctamque notitiam esse procul dubio veram.

Ac de propositione quidem, & de conclusionem, tum verba mox antè ex fine istius Meditationis recitata; tum ea, quæ suo loco ex initio superioris relata sunt, fidem abunde faciunt, probare te *claram distinctamque notitiam esse veram, seu non fallacem, Quia Deus est; Quia ejus Author est; Quia non est deceptor.* De assumptione verò, fidem quoque faciunt, quæ in residuam superiorem, ac initium hujus memorata sunt; Probare te *Deum esse; authorem esse; Deceptorem non esse; Quia clara, distinctaque illius notitia est vera, non fallax.* Huc præ ceteris illa spectant, *Atque hæc omnia quò diutius, & curiosius examino, tantò clarius, & distinctius vera esse cognosco.* Et postea, *Sufficit me hoc ipsum intelligere, ac judicare, illa omnia, quæ clarè percipio, & perfectionem aliquam importare scio, atque etiam forte alia innúmera, quæ ignoro, vel formaliter, vel eminenter in Deo esse, ut Idea, quam de illo habeo, sit omnium, quæ in me sunt, maximè vera, & maximè clara, & distincta.* Quæso proinde, an-non circulum, ut ajunt, committas, in diallelum incidas, ac principium, seu quæsitum petas, cum unum probas per aliud, quod ipsum non possit, nisi ex suppositione prioris probari? Verum tamen dubitet nemo, quin Deus sit Author claræ, distinctæque notitiæ; An-non videmus esse multos, qui putent se habere claram, distinctamque notitiam, & tamen fallantur? Dicis non habere reipsâ talem; alioquin enim non fallerentur; neque enim nisi aliquid nōrint, cujusmodi est; id clarè, & distinctè nōrint; quandoquidem ne nōrunt quidem. At quia nihilominus tam illi putant se habere, cum non habeant, quàm alii putant se habere, cum habeant; & utrique pro certo habeant Deum esse, authorem esse, deceptorem non esse: An-non superest Methodus tradenda, qua illi agnoscant se ita habere claram distinctamque notitiam, ut non fallantur; isti ita non habere, ut fallantur? Cedò verò tu-ne hucusque hanc-ce Methodum tradidisti? Dicis te monuisse circumspicienda omnia; & cum nihil repertum fuerit, quod dubitationem faciat, tum notitiam fore ita claram, atque distinctam, ut procul dubio vera sit; cum si non esset, sequeretur

Deum

Deum deceptorem esse. Sed de Deo quidem ter-Max. parcius quæso, ac verecundiùs. Cùm patiatur esse in Mundo malitiam, pati potest esse errorem; idque ob fineis, quos ipsemet esse impericrutabileis negare non potes. Ad tuam Monitionem quod spectat; illa, ut suprà jam dictum est, neque nova est, neque tibi propria; & quæstio semper superest, cùm tam qui falluntur, quàm qui non falluntur, omnia quantum possunt, circumspiciant; & circumspecta omnia putent, quàmnam adjuvari possint methodo; ut certi reddantur nihil prætermissum; & nihil unquam occursurum quod prætermissum aliquid arguat; ut experientia docet temporis progressu occurrisse plurima, nihil obstante circumspeditione, qua nihil prætermissum existimabatur. Dices, si aliquid occurrat, aut possit occurrere, signum esse notitiam non esse claram, & distinctam. Id esto: sed interim tamen clara, & distincta putatur; & post circumspeditionem quam-diligentissimã nihil putatur prætermissum, nihil posse occurrere, quod prætermissum fuisse convincat. Quare & tradenda superest methodus, qua agnoscatur nihil prætermissum; nihil occursurum, quod prætermissum convincat. Dices fortè eam contineri Regulis illis quatuor, quas in tua de Methodo dissertatione tradidisti. Sed prima quidem quæ præscribit, *Nihil admittendum, quod non percipiamur clarâ, distinctaque notitiâ*; tum nova non est, tum id non præscribit, quod requiritur, quomodo nempe agnoscamus notitiam sic esse claram, & distinctam, ut non fallat nos, sitque admittenda. Secunda, quæ præscribit, *Quamlibet difficultatem in tot particulas dividendam, quæ sunt necessariae, ut melius solvantur*; tum nova non est, tum neque præscribit; quod requiritur, nempe quomodo agnoscamus particulas factas sufficere; & quomodo sit unaquæque particula speciatim, ac tota univèrsè solvenda. Tertia, quæ præscribit *incipiendum esse a simplicioribus, ac notioribus, & quasi gradatim ad compositionum ascendendum notitiam*; tum nova non est, tum neque præscribit quod requiritur, quomodo nempe agnoscamus simpliciora, atque notiora, & compositionum, obscuriorumque ordinem, atque dependentiam. Quarta, quæ præscribit *faciendam ubique Inductionem, seu enumerationem partium, adeò generalem, ac sedulam, ut certi simus nihil omitti*; tum nova non est, tum neque præscribit, quod requiritur, nempe quomodo agnoscamus, ita nos sedulò percurrisse, & enumerasse omnia, ut certi reddamur nihil fuisse omissum. De his tamen satis.

IN MEDITATIONEM V,

Quæ est

De Essentia Rerum Materialium, & iterum de Deo, quòd existat.

D V B I T A T I O I.

De cognita ex sola quantitate, figura, &c. rerum materialium essentia; deque attributa ideis, ac universalibus æterna, immutabilique natura.

CIrca quintam, Dicis primùm te distinctè imaginari quantitatem, hoc est extensionem in longum, latum, & profundum; itémque numerum, figuram, situm, motum, durationem. Ex his omnibus, quorum te Ideas habere dicis, seligis figuram, & ex figuris Triangulum, de quo hæc habes; *Et si fortassis talis figura nullibi gentium extra cogitationem meam existat, nec unquam existerit: est tamen profectò determinata quadam ejus natura, quæ à me non efficta est, nec à mente mea dependet; ut patet ex eo, quòd demonstrari possint varix proprietates de isto Triangulo; nempe, quòd ejus tres anguli sint æquales duobus rectis, quòd maximo ejus angulo maximum latius subtendatur, & similes, quas velim, nolim, clarè nunc agnosco; etiam si de iis nullo modo antè cogitaverim, cum Triangulum imaginatus sum, nec proinde à me fuerint effictæ. Et tantum habes de essentia rerum materialium: nam quæ paucula subiicis, eodem pertinent. Ac hæere quidem hîc nolo: Infinuo solum durum videri statuere aliquam naturam immutabilem & æternam præter Deum, ut maximum. Dices te proferre nihil aliud quàm quod in scholis efferunt, naturas seu essentias rerum esse æternas, fierique de ipsis propositiones sempiternæ veritatis. Sed hoc durum perinde est, & capi aliunde non potest esse naturam humanam, cum nullus est homo; aut dici rosam esse florem, cum ne rosa quidem est. Dicunt aliud esse loqui de essentia, aliud de existentia rerum, & non esse quidem ab æterno existentiam rerum, sed esse tamen essentiam. Verùm, cum præcipuum, quòd est in rebus, sit essentia, ecquidnam magni Deus facit, quando producit existentiam? Vide-*

licet.

licet non ampliùs facit, quàm dùm sartor veste induit hominem. Quanquam quì defendent essentiam hominis, quæ est in Platone, esse æternam & independentem à Deo? Vt universalis est, inquit? At in Platone nihil est nisi singulare? & solet quidem intellectus ex visis Platonis, Socratis, ac cæterorum hominum consimilibus naturis, abstrahere quendam conceptum communem, in quo omnes conveniant, & qui proinde censerì possit universalis naturæ, essentiæve hominis, quatenus omni homini intelligitur convenire. At universalem fuisse, antequàm Plato & cæteri essent, & intellectus abstraheret, explicari sanè non potest. Dices, numquid homine etiam non existente, atque idcirco ab æterno, vera propositio hæc est, homo est animal? Sed videtur planè non esse, nisi eo sensù, quod quodcumque fuerit homo, futurus sit animal. Certè enim licèt discrimen videatur inter duas illas propositiones, homo est, & homo est animal, quodd priore existentia disertè magis significetur, & posteriore essentia: attamen neque ab illa essentia excluditur, neque ab ista existentia: sed cùm dicitur, homo est, intelligitur homo animal; & cùm dicitur, homo est animal, intelligitur homo dum existit. Præterea autem cùm hæc propositio, homo est animal, non sit majoris necessitatis quàm ista, Plato est homo, fore igitur etiam istam sempiternæ veritatis, & singularem essentiam Platonis non fore minùs independentem à Deo, quàm universalem hominis; & alia similia, quæ prosequi piget. Et addo tamen, cùm dicitur hominem esse talis naturæ, ut esse non possit quin sit animal; non esse propterea imaginandum talem naturam esse aliquid, aut alicubi præter intellectum: sed sensum solummodo esse, ad hoc ut aliquid sit homo, debere ipsum simile esse cæteris iis rebus, quibus propter similitudinem mutuam eadem hominis denominatio tributa est: similitudinem, inquam, naturarum singularium, ex qua intellectus accepit ansam efformandi conceptum seu ideam, formæve naturæ communis, à qua diffidere non debeat quicquid homo futurum est. Hinc eadem de tuo Triangulo; illiusve natura dico. Nam Triangulus quidem mentalis, est veluti regula qua explores an aliquid mereatur dici Triangulum: at non est propterea dicendum talem Triangulum esse reale quid, veramque naturam præter intellectum; qui solus, visis Triangulis materialibus, illam perinde ac dictum est de natura humana, formavit & communem fecit. Vnde neque est existimandum proprietates demonstratas de Triangulis materialibus, idcirco ipsis convenire,

quòd illas mutuentur ab ideali Triangulo : cùm ipsi potiùs in se habeant, & idealis non habeat, nisi quatenus intellectus ex ipsis inspicitur, easdem illi tribuit, redditurus postea inter demonstrandum. Eodem modo, quo proprietates naturæ humanæ non sunt in Platone & Socrate, quasi ipsi illas à natura universalì acceperint ; cùm potiùs natura universalis ideò habeat, quòd intellectus ipsi eas tribuit, postquam in Platone, Socrate, & cæteris animadvertit, redditurus illis deinceps, cùm ratiocinatione opus fuerit. Notum est enim intellectum ex visis Platone, Socrate, & aliis omnibus rationalibus, collegisse hanc universalem propositionem, omnis homo est rationalis : ac deinde cùm vult probare Platonem rationalem esse, illam pro principio in Syllogismum inducere. Et dicis tu quidem, ô Mens, habere te Trianguli Ideam, habituramque illam fuisse, tamen si nullam unquam in corporibus triangularem figuram vidisses : quemadmodum habes aliarum figurarum complurium, quæ tibi in sensum nunquam incurrerunt. Verùm, si, ut supra dicebam, sic fuisses hæcenus orbata omnibus sensuum functionibus, ut punquam neque vidisses, neque tetigisses varias superficies, sive extrema corporum, putas Ideam Trianguli, alteriùsve figuræ habere, aut efformare in te potuisses ? Habes jam complures in te, quæ in te illapsæ per sensus non sint ? Sed nimirum faciliè habes, quia ex iis, quæ illapsæ sunt, ipsas effingis, formasque varias, modis superiùs expositis. Dicendum hîc præterea foret de falsa illa Trianguli natura, quâ supponitur constare ex lineis, quæ latitudine careant, continere aream, quæ profunditate ; terminari ad tria puncta, quæ omnibus partibus : attamen nimium evagaremur.

R E S P O N S I O.

Quia hîc, relatis pauculis meis verbis, addis, me ea tantùm habere de quæstione proposita, cogor monere te non satis ad coherentiam eorum quæ scripsi attendisse ; talem enim illam puto, ut ad cujusque rei probationem conferant omnia quæ ipsam præcedunt, & maxima pars eorum quæ sequuntur ; adeò ut bona fide non possis referre quantum de aliqua quæstione habeam, nisi etiam totum id quod de reliquis scripsi recenseas. Quod verò ais, tibi durum videri statuere aliquid immutabile & æternum, præter Deum, merito sic videretur, si de re exsistente quæstio esset, vel tantùm si quid ita immutabile statuerem, ut ejus immutabilitas à Deo non penderet. Sed quemadmodum Poætæ fingunt

fingunt à Iove quidē sua fuisse condita, sed postquam condita fuere,
 ipsum se eis servandis obstrinxisse; ita ego non puto essentias rerum, ma-
 thematicasque illas veritates quæ de ipsis cognosci possunt, esse indepen-
 dentes à Deo; sed puto nihilominus, quia Deus sic voluit, quia sic dispo-
 suit, ipsas esse immutabiles & æternas; quod seu durum, seu molle esse
 velis, sufficit mihi quod sit verum. Quæ deinde contra Dialecticorum uni-
 versalia habes, me non tangunt, utpote qui ipsa, non ut illi intelligam.
 Sed quantum ad essentias, quæ clarè, & distinctè cognoscuntur, qualis est
 ea trianguli, alteriusve cuiusvis figuræ Geometricæ, facile cogam te ut fa-
 cearis illarum Ideas quæ in nobis sunt; à singularibus non esse desumptas.
 hic enim illas falsas dicis, quia scilicet cum præconcepta tuâ de natura re-
 rum opinione non conveniunt. Et paulò post ais, obiectum puræ Ma-
 theseos, ut punctum, lineam, superficiem, constantiæque ex iis in-
 divisibilia, indivisibilitèrque se habentia existere re ipsa non posse;
 unde sequitur nullum triangulum, nihilque omninò ex iis quæ ad ipsum,
 aliarumve figurarum Geometricarum essentias pertinere intelliguntur, un-
 quam existisse, ac proinde istas essentias non esse ab ullis rebus existenti-
 bus desumptas. At, inquis, sunt falsæ, opinione tua scilicet, quia na-
 turam rerum talem esse supponis, ut eæ non sint ipsi conformes. Sed nisi
 omnem Geometriam falsam quoque esse contendas, negare non potes quin de
 ipsis multæ veritates demonstrantur, quæ cum eadem semper sint, meritò
 dicuntur immutabiles & æternæ. Quod autem forè non sint conformes
 ei rerum naturæ quam tu supponis, ut nec etiam illi quam Democritus &
 Epicurus ex atomis effinxerunt, est tantum ipsis denominatio extrinseca
 quæ nihil mutat; & nihilominus haud dubiè sunt conformes veræ illi re-
 rum naturæ quæ à vero Deo condita est. Non quòd sint in mundo substan-
 tiæ longitudinem habentes sine latitudine, aut latitudinem sine profundi-
 tate; sed quia figuræ Geometricæ non considerantur ut substantiæ, sed ut
 termini sub quibus substantia continetur. Interim autem non concedo Ide-
 as istarum figurarum nobis unquam per sensus fuisse illapsas, ut vulgò om-
 nes sibi persuadent. Etsi enim haud dubiè dari possint in mundo, quales à
 Geometris considerantur, nego tamen ullas dari circa nos, nisi forè tum
 minutas, ut nullo modo sensus nostros attingant: nam componuntur ut
 plurimum ex lineis rectis, at nequidem unquam ulla pars lineæ, quæ reve-
 ra recta esset, sensus nostros movit; quippe cum illas quæ maximò rectæ
 nobis visæ sunt, pulicario perispicillo examinamus, planè irregulares, &
 undulatim ubique incurvas esse deprehendimus: Ac proinde cum primum
 olim in infantia figuram triangularem in chartâ depictam aspeximus, non
 potuit illa figura nos docere quo pacto verus triangulus, ut à Geometris
 conside-

consideratur, esset concipiendum, quia non aliter in ea continebatur quam velut in radi ligno Mercurius. Sed quia jam ante in nobis erat *Idea veri trianguli*, & facilius a mente nostra, quam magis composita figura picti trianguli concipi poterat, idcirco visâ istâ figurâ compositâ non illam ipsam, sed potius verum triangulum apprehendimus. Eodem planè modo quo dum respicimus in chartam, in qua lineolæ atramento ita ductæ sunt ut faciem hominis repræsentent, non tam excitatur in nobis *Idea istarum lineolarum*, quam hominis: quod omninò non contingeret, nisi facies humana nobis aliunde nota fuisset, atque essemus magis assueti de illa, quam de lineolis istis cogitare; quippe quas sæpe etiam cum aliquantulum à nobis remotæ sunt, ab invicem distinguere nequimus. Ita sanè triangulum Geometricum ex eo qui in charta pictus est agnoscere non possemus, nisi aliunde mens nostra ejus ideam habuisset.

I N S T A N T I A.

I.
Visum
hæc id im-
merito fu-
isse tracta-
tionem de
essentia re-
rum mate-
rialium
admodum
jejunam.

H E I c jam agnosco, cur ægrè feras in singulas particulas Meditationum tuarum inquiri. Non sanè quodd ego censuerim inquirendum in singulas, qui quam-plurimas reliqui instantas; sed quodd hoc loco visus fuerim quasi Vestæ sacra movere. Quanquam neque quicquam reprehendi, sed dixi solum, *Et tantum habes de essentia rerum materialium*. Verùm tu putans subnotari nihil scriptum fuisse titulo dignum, inarstisti, & cogor, dixisti, mone-re te, &c. Ac ego quidem, ut verum fatear, cum Meditationis titulus speim faceret amplam de enucleanda, explicandâque rerum Materialium essentia; cognoscere avidè volui, æquid de illa scriberes; sperans fore, ut rerum principia, causæ, vires & cætera apud Physicos disputata, & nihilominus ignorata declararentur: cum animadverti autem nihil aliud te, quam quodd retuli, tradidisse; substiti sanè, neque potui non id tantisper demirari. Tu id ex ea voce, *Et tantum habes de essentia rerum materialium*, conjiciens, ac nihil scribere jejunè, frigidèque videri volens, admones, *me non satis ad coherentiam eorum, quæ scripsisti, attendisse*; ac pergis te talem illum putare, ut ad cujusque rei probationem conferant omnia, quæ ipsam præcedunt, & maxima pars eorum, quæ sequuntur; adeò ut bona fide non possim referre quantum de aliqua quæstione habeas, nisi etiam totum id, de quo scripsisti recenseam. Cum ego porro admonitionem eâ, quâ decet mente accipiam, patere vicissim & tu, ut ego te admoneam Primò, videri te non satis attendisse ad germanam significationem vocis

tantum

tantum, quæ neque illeic loci, neque in ea phrasi, neque in meo sensu, exclusionis fuit, sed quantitatis; adeo, ut, si quid fuit à te prius, posterius, alibi dictum, ea non insinuet fuisse non dictum; sed quod illeic loci de eo argumento dicendum coepisti, fuisse ed usq; continuatum, & argumentum deinceps mutatum. Secundò, facere te lepidè nimis, cum proposito titulo speciali, in quo specialem materiam tractas, putas absoluto tractatu, & mutato jam titulo, non posse me dicere terminari illeic prioris tituli argumentum, nisi conquiram, congeram, recenseam, quicquid alia occasione, & sub aliis titulis de eadem materia scribere potuisti. Tertiò, non optare te satis justè, ut faciam tibi locum conquerendi de tautologia, & confusione perpetua, si cum ad cujusque rei specialis, de qua agis, probationem pertinere velis omnia præcedentia, & sequentium partem maximam, non possim me ab ulla re, seu speciali materia, expedire, & expeditum declarare, nisi recensendo in singulis omnia, & repetendo ubique tum præcedentia omnia, tum sequentium maximam partem. Quartò, tuum fuisse recensere nisi omnia, saltem præcipua capita eorum; quæ prætermissa à me caussaris; ut manifestum faceres me immeritò insinuasse, sterilissimam esse segetem, quæ circa essentiam rerum materialium demeti ex hoc agro potest, ex quo tamen, tanquam huic sementi specialiter destinato, præcipuus proventus expectandus fuit; immeritò, inquam, tanquam te aliunde colligi posse uberrimam manipulorum copiam monstrante. Sed heic nimis hæreo; cum Lectorem quemque monere sufficiat, ut postquam non modò quæ heic sub titulo proprio; sed quæcumque etiam in antecedentibus, & subsequenibus habes, expenderit; attendat quantum circa essentiam rerum materialium evaserit quàm prius instructior. Quippe res omneis materialeis præditas esse Quantitate, & partibus; figura, atque situ partium; motu, vel quiete totius, aut partium, cæteraque hujusmodi; ne lippi quidem, ac tonsores nesciunt: Túque aliunde non ostendis eos, qui ista sciunt, nihil ignorare rerum pulcrarum, & admirabilem, quæ in rerum natura sunt; penetrasse illos profundissimè in intimos usq; naturæ recessus; hoc ipsum, quod nòrunt, ipsissimam esse cujusque rei essentiam: frustra fatigari Philosophos alios, dum quidpiam ampliùs desiderant; non quòd difficultas inveniendi sit; sed quòd nihil sit præterea in rerum natura: denique palmam iis deferendam, qui materialium rerum naturam, vim, seu proprietatem, & actionem omnem declarare adnixi sunt ex magnitudine, figura,

H h

motu,

motu, situ, pauculisque aliis sive conjunctis, sive adjunctis corporum, principiorumve, ex quibus unaquæque res materialis componitur; spectantibus huc carminibus illis,

Concursus, motus, ordo, positura, figura

Efficiunt igneis, mutatioque ordine mutant

Naturam, &c.

I I.

*Naturæ
verum æ-
ternas, ac
sen durum
esse velim,
sen molle,
tibi sufficere,
quod sit verum,
nempe
vanleis nul-
las esse; &
quas, ut
Ideas, ha-
mus in
Mente, ab
ipsa Men-
te ex in-
spectis re-
bus singu-
laribus si-
ari.*

Quod ego dixi durum videri statuere aliquam naturam immutabilem, & æternam, præter DEVM ter-maximum; Excipis tu, *ac sen durum esse velim, sen molle, tibi sufficere, quod sit verum,* nempe *quia non existentem, neque à Deo independentem facis.* Gratulor igitur, tibi esse palatum, cui nihil similium durum sit, cui omnia sint ut molliissima, sic facillima etiam deglutitu. Gratulor quoque eam perspicaciam, quâ naturas, hoc est res veras, agnoscere te profiteris, quæ quidem existentes non sint, quæ nullibi neq; intra Mundum, neq; extra Mundum sint; quæ Deus non sint; quæ dependentes tamen à Deo sint. Porro cum nullâ lex prohibeat te interrogare quomodo id capias, Age, cum dicis *Deum voluisse, & disposuisse, ut naturæ essent immutabiles, & æternæ;* Vel ipsæ naturæ fuerunt à se, ac improductæ; & Deus solum ipsas voluit, ac disposuit, veluti faber vult, ac disponit in ædificium quos lapides reperit jam factos, non facit; Vel productæ fuerunt à Deo, Deusque fuit illarum Author, qui ipsas faciendo voluit, ac disposuit. Et, si prius quidem; fuere igitur naturæ per se, ac independentes à Deo; & frustra Deus voluit, ac disposuit, ut immutabiles, ac æternæ essent, quæ ex se ejusmodi erant. Nam & finge Deum noluisse, ac non disposuisse; an aded minus tales fuissent? Si posterius: Non fuere imprimis immutabiles, quæ ex non esse, ut loquuntur, transiere ad esse; seu ex possibilitate ad actum. Non fuere secundò æternæ, quia ut fierent debuerunt non esse, sicque aliquando cæperunt esse, quod rei æternæ repugnat. Tertiò, effectus igitur fuere, quoniam omnis productio, alicujus effectus est productio. Igitur etiam exstiter; quoniam omnis productio terminatur ad existentiam; Igitur fuere non modò immutabiles, & æternæ, quod tu asseris; verum etiam existentes, quod tu negas; dum rem mihi duram sic tibi emollis, ut dicas de re non existente esse quæstionem. Heinc vides profectò, quam appositè illud ex poetis (imò & ex Stoicis) exemplum de fati defumas. Nam cum Iupiter fata condidit, supponitur fuisse ante fata; & decreta fecit de rebus, quæ poterant aliter esse, aut non esse: At non fuit Deus ante naturas, si illæ quidem immutabiles, ac

les, ac æternæ fuerunt; si aliter, quàm sint, esse non potuerunt; alioquin enim talium rerum, quarum sunt, non essent naturæ. Et dic, amabò; cùm deliberaret D E V S de natura Trianguli, & discerneret qualem-nam vellet esse Triangulum, potuit-ne fieri, ut statueret aliter de Triangulo? vel potuit-ne esse Triangulus, qui non ex tribus lateribus, tribúsque angulis constaret? Cùm verò non, ut Iupiter Poëtarum fatis; ita Deus ter-maximus rebus à se conditis alligetur; sed absolutà suà potentià destruere quicquid condidit, possit; Quæso te, qua ratione capias posse Deum ita disposuisse de Triangulo, ut nunc, si absolutè velit, ejus naturam destruens faciat, quod ab initio potuit, scilicet ut Triangulus ex tribus lateribus, tribúsque angulis non constet? Neque dicas, si Deus destruat, aut aliter statuatur, non Triangulum fore, sed aliam figuram. Nam & cùm postea figura fiet ex tribus lateribus, totidémque angulis constans, Triangulus esse non desinet; & manifestum evadet Naturam Trianguli talem esse, non quòd Deus talem voluerit, potiúsquam aliam facere, sed quod talis sit ex sui necessitate. Quàm satius itaque videtur nullam rem veram, præter Deum ter-Max. agnoscere, nisi ab eo reipsa creatam, reipsa existentem, reipsa singularem: Existimare verò res nondum creatas, neque existentes, sed duntaxat possibileis, nullam neque realitatem, neque veritatem habere; aut si quam habere censeantur, intelligere futuram oporteat; adeò proinde, ut revera realitatem non tam habeant (utpote quæ ipsæ non sint, neque proinde aliquid habeant) quàm habituræ aliquando sint (utpote quando fuerint.) Denique res, seu potius Ideas non alia ratione admittere, quàm ex operatione intellectus, quatenus ex pluribus rebus singularibus observatis, aut quasi possibilibus habitis intellectus quasi educit, ac format generaleis quasdam notiones, quæ ut ex singularibus educuntur, ita singularibus tribui, ut ipsis convenientes, possunt. Hoc certè modo dici poterunt ipsæ res, seu naturæ universales esse dependentes à Deo, quatenus à Deo dependent, singularia, ex quibus formantur, & à quibus reipsa non differunt; cùm aliunde etiam intellectus, & ipsius consideratio, quæ universales fiunt, Deum authorem habeat. Quin etiam dici eatenus poterunt immutabiles, quatenus Deus voluerit ut singularia essent constanter ejuscemodi; eatenus æternæ, quatenus si Deus voluisset ab æterno usque singularia producere, intellectus potuisset ex ipsis taleis educere notiones. Ac tu ita quidē es ratiocinatus;

Si sint in me Idæ figurarum, quæ aut non sint, aut nulla suspicio

esse possit, quòd per sensus illapsæ sint; possumque varias de ipsis figuris proprietates demonstrare; sunt profectò tales naturæ immutabiles, ac æternæ, & non ex singularibus desumptæ:

Atqui sunt in me Ideæ talium figurarum, quas imaginari possem, etsi nullibi gentium extra cogitationem meam existerent, aut unquam existissent, velut Trianguli, & aliarum, quas suspicio esse non possit, quòd per sensus illapsæ sint; possumq; tam de Triangulo, quàm de istis proprietates varias demonstrare:

Igitur sunt illarum naturæ immutabiles, ac æternæ, & non ex singularibus desumptæ.

Veruntamen non respondisti ad ea, quæ ipse regessi, quæque sequuntur ex disputatis circa facultatem, quæ est in Intellectu componendi, dividendi, detrahendi, deducendi, variè (uno verbo) versandi Ideas, quas semel desumpit ex rebus singularibus.

III.

Falsum, ideas figurarum Geometricarum non esse has: ac dari in Mundo tales posse, quales a Geometricis considerantur, h. e. indivisibiles.

Assumpxisti solùm fore, ut me cogeres ad fatendum Trianguli, cæterarumque figurarum Geometricarum ideas, quæ in nobis sunt, a singularibus non esse desumptas; Assumpxisti, inquam, sed non præstitisti: cùm mihi quidem nihil fuisset futurum jucundius, quàm aut demonstratione cogi, aut alicujus saltem verisimilitudinis vi impelli. Profectò enim dicere solùm falsa esse, quæ propono, aut vera esse, quæ falsa dico, tanquam non convenientia opinioni, quam habeo de rerum natura, neque illi quam habent Democritus, & Epicurus, (quibuscum mihi nihil heic commune, tibi verò circa opinionem; quā habes de corporea rerum natura, materialiumve rerum essentia, quantum convector, plurimùm) profectò, inquam, hoc non cogit: ut neque evertit expositionem, qua declaravi quemadmodum fieri, aut admitteri propositiones valeant, quæ æternæ esse veritatis dicantur. Non cogit verò etiam, quòd admittens non esse in Mundo substantias longitudinem habentes sine latitudine; aut latitudinem sine profunditate; subdis figuras Geometricas non considerari ut substantias, sed ut terminos, sub quibus substantia continetur. Nam termini ipsi, sub quibus substantia quælibet continetur, singulares sunt; & cùm re ipsa nihil aliud sint, quàm terminata ipsa singularis substantia, qua ratione quid physicum sunt; ipsemet ostendis à consideratione intellectus pendere, quod separatim spectantur; eaque ratione quid Geometricum, sive Mathematicum sint. Non cogit rursus, quòd ais te non concedere ideas istarum figurarum per sensum illapsas: Hæc nempe controversia est; & res neque ex tua, neque ex mea, neque ex alterius sive

con-

concessione, siue non concessione pendet. Interim autem cum admittis *Omnes vulgò sibi persuadere esse per sensum illapsas* : admittis omnibus vulgò agnoscere non esse sibi ideas illarum innatas, ut tu contendis aduersus omnium agnitionem, persuasionemque me cogere. Quid nam est porro illud, quod ais, *Dari haud dubie posse in Mundo taleis figuras, quales à Geometris considerantur* ? Etenim dari posse lineam, quæ sit Longitudo sine latitudine, quomodo tandem concipis ? Non dices, ut opinor, illam esse sine substantia ; si autem cum substantia sit, non-ne talis substantia res physica est ? nonne corporea est ? nonne corpus longum est ? nonne gracillimum quidem, sed crassitudinis tamen alicujus ? nonne cum partibus non solum in longum, sed etiam in latum dispositis ? nonne proinde cum aliqua latitudine ? nonne alia, siue non talis, qualis à Geometris consideratur ? Dicis nullas circa nos dari, nisi forte tam minutas, ut nullo modo sensus nostros attingant. At non attingant ; satis esset, si probares dari ; si quomodo possunt cohærere : an sine corpore : an cum corpore latitudinis, profunditatisque experte ? Dicis illas componi ut plurimum ex lineis rectis. Quis indicavit ? Quomodo scis ? quomodo capis ? quomodo esse, ut componantur, probas ? Dicis id sensum fugere ; & affers exemplum de recta linea materiali, quæ quamvis subtilissima, microscopio tamen inæquabilissima observatur. At cum observatum verissimum sit de lineis sensibilibus, quænam spes est, ut tuarum illarum lineolarum mathematicarum multitudo appareat unquam oculo ? quæ spes, ut esse rectas probes ? Hæc igitur etiam non cogunt.

Pergis, Cum olim in infantia figuram triangularem in charta depictam aspeximus, non potuisse illam figuram nos docere, quo pacto verus triangulus, ut à Geometris consideratur, sit concipiendus. Verum, quia in infantia Geometræ non fuimus, ac tales solum evasimus vel institutione à Magistris, aut libris : vel inventionem, aut studio, ac labore proprio : ideo Triangulum ut constantem ex lineis latitudinis expertibus, accepimus solum à Magistris, librisve Euclideanis, vel aliis ; aut variè ratiocinantes tam de Triangulo, quàm de figuris cæteris, quæ vel in sensum incurrerunt, vel ex iis, quæ incurrerant, compositione, deductione, immutatione, &c. fuerunt à nobis conformatæ, ratiocinando collegimus. Nempe advertere potuimus tunc solum nostra ratiocinia exquisitè procedere, & ad ipsam praxin quadrare, cum lineas longitudinis, & superficies crassitudinis experteis supposuerimus ; hoc est, consideraverimus quidem lon-

I V.
Falsum.
experiri
puerum
habere se
Trianguli
ideam,
priusquam
triangulum, ali-
amve fi-
guram, ex
cujus ana-
logia ra-
tiocinetur,
viderit.

gitudinem, sed non attenderimus ad latitudinem, quæcumque aut quantacumque possit esse adjuncta, &c. Heinc ergo non simplicis quidem Trianguli in infantia visi aspectus; sed partim visus primum, partim alii, (adhibita simul aut institutione, aut meditatione) causam præbuere illi Triangulo, cujus latera, seu extremas lineas adnixa sumus concipere, ut latitudinis experteis. Heic verò, aliter profectò, in chartaceo Triangulo, quam in rudi ligno Mercurius, intelligitur contineri. Nam Mercurius sanè reipsa delineari ex ligno potest; at Triangulus ille indivisibilis non potest, nisi consideratione, & suppositione exstare. Pergis; *Quia jam in nobis erat idea veri Trianguli, & facilius à mente nostra, quam magis composita figura picti Trianguli concipi poterat: idcirco visâ istâ figurâ compositâ, non illam ipsam, sed potius verum Triangulum apprehendimus.* Sed cum hæc, & alia speciosè, atque Platonicè dicantur, ideòne speciosè ac verè probantur? Ostende porrò puero figuram, quam vocas compositam, Trianguli, non antè visam; is ideam quidem, seu imaginem illius in animo imprimet: & si alium quidem vel viderit, vel possibilem intellexerit, ideam etiam generalem Trianguli formabit, ut ex uno, pluribúsve visis, intellectívse hominibus, generalem hominis ideam. At si quæras ex illo, quam aliam Ideam excitari in animo sentiat, omnia potiùs dicet, quam ideam illius tui, scilicet constantis ex lineis latitudinis planè omnis expertibus, qualem se præhabuisse veluti reminiscatur. Dicet, inquam, nisi deinceps vel tu, vel alius, vel Euclidis lectio, vel exposita ratiocinatio cogitationem suggesserit, quæ tuo quæsito respondeat. Exemplum depictæ in charta hominis faciei ex lineolis nihil juvat. Nam illa delineatio est tantùm facta ad repræsentandum rem, quæ extra intellectum existit, & ex qua aliunde imago in intellectum transiit: At Triangulus est tantùm repræsentativus sui ipsius, planèque oportet, ut priùs imaginem sui in intellectum transmittat, quam sese repræsentans imaginem sui in intellectu excitet; quemadmodum, ut excitet ideam Trianguli Geometrici, oportet, ut priùs vel docente alio, vel suggerente ratiocinio, talis Idea fuerit impressa.

V.
Animalis,
aut alterius
rei,
qua sensu
percepta
non fuerit,
nullam esse
in mente
ideam, ex-
periensia
ipsa con-
vinci.

Vno verbo, ista omnia, quæ vel à te, vel ab aliis de Ideis rerum innatis dicuntur, nihil aliud ostendunt, quàm esse in nobis facultatem cognoscendarum rerum innatam. Nam, si Ideæ quidem, quas vos fingitis, hujusmodi essent, ut conati ad illas attendere, possemus vel minimæ rei cognitionem assequi, id probabile fieret, quod de illis asseritis. Nunc verò nihil planè juvant; sed attendendæ omni-
nind

nind sunt res ipsæ extra intellectum; aded ut siue ponantur Ideæ, siue tollantur, perinde sit, modò sit in nobis vis cognitrix rerum. Novi profectò (vel nosse possum) quoddam animal tibi nunquam visum. Quid prodest tibi quam dicis te habere innatam illius ideam? Intuere in illam, quantum voles; Certus sum te nunquam illius assequuturum notitiam, quousque tibi fuerit ostensum, descriptumve ab aliquo. Vbi autem oculis tuis exhibitum fuerit, imaginem quidem illius hauries oculis; aut si describi audieris, ipsis auribus: ac tum demum esse in te illius Ideam agnosces: At præter illam excitari in tua mente quandam aliam præhabitam, quomodo senties? quomodo probabis, si factum verborum seposueris? Non excitari porrò ullam, quæ præfuerit, veraque sit, ex eo constat, quòd viso uno solo unius generis animalium individuo, non aliam in nobis haberi, excitariue illius ideam experimur, quàm qualis ab huiusmodi individuo deducta est: Et cum aliud deinde, ac plura ejusdem generis individua vidimus, tunc ideam specialem variamus, & pro una duas, plureisve habemus: ac si post ipsas habitas generalem quoque habeamus, illa erit planè, quam ex singularibus eliciemus, abjicientes discrimina, & retinentes id, quod erit omnibus commune. Argumento autem quòd talis idea non sit innata, sed à nobis facta ex singularibus perspectis, illud etiam est, quòd in dies perficitur, & evadit semper tantò generalior, quantò plura cognoscimus, & discrimina plura animadversa rescindimus; cum si innata foret, vel saltem excitata, post perspectum unum singulare individuum, perfecta prorsus existeret, neque novis, novisque semper excitationibus indigeret; quod tu quidem dicis de excitatione veri Trianguli ex unius chartacei, compositique perfectione.

D V B I T A T I O II.

De probata Dei existentia, ex eo, quòd Ens summè perfectum existentiam sic exigit, ut Triangulus aequalitatem trium angulorum cum duobus rectis.

Aggrederis consequenter demonstrare Dei existentiam; visque argumenti est in illis verbis; *Attendenti sit manifestum, non magis posse existentiam ab essentia Dei separari, quàm ab essentia Trianguli magnitudinem trium ejus angulorum aequalium*

lum duobus reëctis : sive ab Idea montis Ideam vallis : adeò ut non magis repugnet Deum cogitari . (hoc est ens summè perfectum) cui desit existentia (hoc est , cui desit aliqua perfectio) quàm cogitare montem , cui desit vallis . Enimvero attendendum est , videri tuam hujusmodi comparationem non satis justam . Nam ritè quidem comparas essentiam cum essentia ; verùm non comparas deinde aut existentiam cum existentia , aut proprietatem cum proprietate , sed existentiam cum proprietate . Hinc vel dicendum fuisse videtur , non posse magis separari omnipotentiam , v. c. à Dei essentia , quàm ab essentia Trianguli illam magnitudinis angulorum æqualitatem : vel certè , non posse magis separari Dei existentiam ab ejus essentia , quàm ab essentia Trianguli ejus existentiam . Sic enim bene processisset utraque comparatio , & non modò prior fuisset concessa , verùm etiam posterior : quanquam non propterea evicisses Deum necessariò existere , quia neque Triangulus necessariò existit , tamen illius essentia , existentiaque separari re ipsa non valeant , quantumcumque mente separentur , sive seorsim cogitentur : ut cogitari etiam essentia , existentiaque divina possunt . Deinde attendendum est , te collocare existentiam inter divinas perfectiones , & non collocare tamen inter perfectiones Trianguli , aut montis ; cum perinde tamen , & suo cujusque modo perfectio dici valeat . Sed nimirum , neque in Deo , neque in ulla alia re existentia perfectio est ; sed id , sine quo non sunt perfectiones . Siquidem id , quod non existit , neque perfectionem , neque imperfectionem habet : & quod existit , pluresque perfectiones habet , non habet existentiam ut perfectionem singularem , unamque ex eo numero ; sed ut illud , quo tam ipsum quàm perfectiones existentes sunt , & sine quo nec ipsum habere , nec perfectiones haberi dicuntur . Hinc neque existentia , perfectionum instar , existere in re dicitur , neque , si res careat existentia , tam imperfecta (sive privata perfectione) dicitur quàm nulla , Quamobrem , ut enumerando perfectiones Trianguli non recenseres existentiam , neque proinde concludis existere Triangulum : ita enumerando perfectiones Dei non debuisti in illis ponere existentiam , ut concluderes Deum existere , nisi principium petere velles . Dicis in aliis omnibus rebus distinguere existentiam ab essentia , non verò in Deo . Sed quomodo quæso existentia Platonis , & essentia Platonis distinguuntur inter se , nisi cogitatione duntaxat ? Fac enim Platonem non amplius existere , ubinam erit ejus essentia ? Nonne porrò in Deo pari modo essen-

tia ,

tia, & existentia cogitatione distinguuntur? Objicis tibi ipse, *Fortè, ut cogitando montem cum valle, aut equum alatum, non sequitur propterea aut montem, aut talem equum existere: ita ex eo, quod cogites Deum ut existentem, non sequi illum existere: ac tum latere sophisma arguis.* Verùm non fuit difficile solvere sophisma quod ipse finxisti; assumendo præsertim id quod tam manifestè repugnat, Deum existentem non existere, neque perinde assumendo hominem, aut equum. At si accepisses ut montem cum valle, & equum cum alis, ita Deum cum scientia, potentia, attributisve aliis, tum difficultas processisset, explicandumque tibi incubuisset, quì fieri possit, ut mons declivis, aut equus alatus cogitari valeat, absque eo quod existat: Deus sciens, & potens cogitari absque eo, quod existat non valeat. Dicis *liberum non esse cogitare Deum absque existentia, hoc est, ens summè perfectum absque summa perfectione; ut liberum est equum cum alis, vel sine alis imaginari.* Sed nihil addendum, nisi quòd ut liberum est cogitare equum non habentem alas, non cogitata existentia, quæ si advenit, perfectio per te in eo fuerit; ita liberum est cogitare Deum habentem scientiam, potentiam, & perfectiones cæteras, non cogitata existentia, quam si habuerit, tum consummata sit perfectionis. Quare ut ex eo quòd equus cogitatus perfectionem alarum habens, non propterea colligitur habere existentiam perfectionum, per te, præcipuam; ita neque ex eo, quòd Deus cogitatur habens scientiam, perfectionesque cæteras, colligitur propterea ejus existentia, sed ea demum probanda est. Et quamvis dicas, *tam existentiam, quam perfectiones cæteras in Idea entis summè perfecti comprehendì, id dicis, quod probandum est, & conclusionem pro principio assumis.* Nam etiam alioquin dicerem in Idea Pegali perfecti contineri, non tantùm perfectionem illam, quòd habeat alas; sed etiam illam, quòd existat. Vt enim Deus cogitatur perfectus in omni genere perfectionis; ita Pegasus cogitatur perfectus in suo genere; nihilque hic posse instari videtur, quod, proportionem servata, usurpari utrimque non valeat. Dicis, *ut cogitando Triangulum non est necesse cogitare, quod tres angulos habeat pareis duobus rectis, licet id minus verum non sit, ut attendenti postea patet; ita posse quidem cogitari alias Dei perfectiones, non cogitata existentia, sed illam non esse propterea minus veram, cum attenditur perfectionem esse.* Attamen vides quid dici possit: nempe ut illa proprietas attenditur postea esse in Triangulo, quia demonstratione probatur; ita, ut existentia attendatur esse in Deo, demonstratione

probendam esse: Secus profectò quidlibet in quolibet esse facile evincam. Dicis, *te attribuentem Deo omnes perfectiones, non perinde facere ac si putes omnes quadrilateras figuras circulo inscribi; quoniam ut heic falleris, quia deprehendis postea Rhombum non inscribi; non ita illic falleris, quia postea existentiam Deo convenire deprehendis. Sed perinde prorsus facere videris, aut si non facis, necesse est, ut ostendas Deo non repugnare existentiam, quemadmodum ostenditur repugnare Rhombo circulo inscribi. Cætera prætereo, quæ vel non explicas, vel non probas, vel ex jam allatis solvuntur, ut; Nihil posse excogitari, ad cuius essentiam existentia pertineat, præter solum Deum: non posse duos, aut plures ejusmodi Deos intelligi: talem Deum ab æterno existitisse, & in æternum esse mansurum: percipere et multa alia in Deo, quibus nihil possit detrahi, nec mutari: oportere ista propius inspicere, ac diligentius investigari, ut detegantur certa que habeantur, &c.*

R E S P O N S I O.

Hic non video cuius generis rerum velis esse existentiam, nec quare non æquè proprietatis, atque omnipotentia dici possit, sumendo scilicet nomen proprietatis pro quolibet attributo, sive pro omni eo quod de re potest prædicari, ut hic omnino sumi debet. Quin etiam existentia, necessaria est revera in Deo proprietatis strictissimo modo sumpta, quia illi soli competit, & in eo solo essentiae partem facit. Nec proinde existentia trianguli cum existentia Dei debet conferri, quia manifestè aliam habet relationem ad essentiam in Deo quàm in triangulo. Nec magis est petitio principii, quod existentia inter ea quæ ad essentiam Dei pertinent numeretur, quàm quod æqualitas trium angulorum cum duobus rectis inter trianguli proprietates recensetur. Nec verum est essentiam, & existentiam in Deo, quemadmodum in triangulo, unam absque alia posse cogitari, quia Deus est summus esse, non autem triangulus. Nec tamen inficior quin existentia possibilis sit perfectio in idea trianguli, ut existentia necessaria est perfectio in Idea Dei; efficit enim illam præstantiorem quàm sint Idea illarum Chimerarum quarum existentia nulla esse posse supponitur. Nec proinde vel minimum ulla in re argumenti mei vires infregisti, hæcæque semper delusus illo sophismate, quod ais tam facile à me solvi potuisse. Ad ea autem quæ subjungis, jam alibi satis respondi. Et planè falleris, cum ais non demonstrari existentiam de Deo, ut demonstratur de triangulo, quod ejus tres anguli sint æquales duobus rectis: utriusque enim est par ratio, nisi quod demonstratio probans in Deo existentiam sit altera multò

multò simplicior, & clarior. Cætera denique præterco, quia dum ais me nihil explicare, nihil ipse explicas, & nihil probas nisi tantum te probare nihil posse.

I N S T A N T I A

Non vides cujus generis rerum velim esse existentiam; id non miror; siquidem nolo certi ullius generis esse: Sed pervides-ne quid interim facias, cum vis alicujus specialis esse generis? Scilicet videris imprimis concipere Rem (scu, ut vulgo dicunt, Ens, aut Aliquid) tanquam generalissimum genus, quod in duas species, sive genera subalterna distribuas, Substantiam nempe, & Proprietatem. Deinde Proprietatum genus in suas species dividens, habes existentiam pro una illarum, confundisque interea Proprietatis, & attributi voces. Ut primum autem de hac ipsa confusione aliquid dicam, quæ videtur fuisse æquivocationis causa, Notum est *Proprietatis* vocem sonare quidpiam physicum, & ab intellectus operatione independens; vocem verò *attributi* sonare quidpiam logicum, & ab intellectu attribuyente, sive prædicante dependens. Heinc autem fit, ut omnis quidem proprietas attributum fieri, sive esse possit; at non vicissim omne attributum Proprietas, ut vel ex eo patet, quod Substantia quoque attributum sit, quæ tamen Proprietas non est, sed genus ab illa distinctum; imò & Res ipsa attributum sit, quæ est genus, substantiâ, & proprietate generalius. Constat proinde attributum esse aliquid non modò transcendens, cujusmodi est Res, aut Ens; verum etiam supertranscendens; quatenus de Re, aut Ente prædicatur; sed nempe transcendens, aut supertranscendens est, quatenus quidpiam logicum est, & ad intellectum pertinet, qui cogitatione sua prætergreditur vniuersitatem Rerum. Quamobrem, ne æquivocatio sit, aut abstinendum tibi est à voce *Attributi*, aut limitando illam ad notionem proprietatis, intelligendum est attributum esse aliquid distinctum à Substantia, & minùs quàm Res, latè patens. Iam ergo cum vis Existentiam esse specialem Proprietatem, sive speciale attributum, potest quidem vox proprietatis prædicari de Existentia, potest & ipsa Rei vox, quatenus omni generi competit, ut prædicari de specie possit: At ipsa Existentiæ vox neque abstractè, neque concretè prædicari poterit; neque de Proprietate universè, quoniam nulla species prædicatur de genere; Neque de Re uni-

*I:
Existentiam non esse proprietatem, neque esse nullius determinati generis ream.*

versè, quoniam quod non prædicatur de inferiori, sive minùs generali, non prædicatur etiam de superiore, seu generaliore. Rursus neque de Substantia; quoniam nulla species prædicatur de genere contrapósito, & de quo id genus, cujus est, non prædicatur; Denique neque de ulla alia proprietate, quoniam nulla species prædicatur de alia, quæ sub eodem genere est. Itaque ut non dicimus *Animal est homo, Corpus vivens est homo, Planta est homo, Equus est homo*; ita neque dicere poterimus, *Proprietas est existens, vel existit, Res existit, Substantia existit, Sapientia, aut alia proprietas existit*. Vides-ne igitur quàm multa non existere consequatur, ex eo quòd vis Existentiam esse specialis generis rerum? Vides-ne proinde cur ego nò ad speciale aliquod rerum genus retulerim, sed habuerim potiùs ut generalissimum, sive transcendentele genus, quod omibus generibus, speciebusq; rerum ita competat, ut nisi de ipsis prædicari valeat, ipsæ nec res sint, nec censi possint? Ex hoc sanè est, cur antea objecerim sub perfectionis nomine, quod jam sub nomine proprietatis objiciendum occurrit. Cognoscere vis utrum Existentia haberi debeat tanquam proprietas illius rei, quæ existit; expende, an res ita possit aut illà privari, aut privata intelligi, ut res adhuc quæpiam remaneat, remanereve intelligatur. Nempe ita fieri comperies in proprietatibus omnibus, quibus aut reipsa, aut mente sublatis, adhuc tamen substantia, cujus proprietates sunt, intelligitur, ut res quæpiam perseverare. Porro ubi existentia aut adempta reipsa fuerit, aut adempta intelligetur, quæso an ea res, cujus fuit, sit perseveratura aliquid, an nihil? Vides sanè futuram nihil, quia quod non existit, nihil est; Nam & dum suppones perseverare per parteis, suppones quoque non esse ademptam existentiam per parteis: cum ubi supposueris nullam remanere existentiam, tum res sit planè nulla futura, Ex hoc proinde subnotavi discrimen, quod est inter aliquam perfectionem, sive proprietatem, v. c. visum, & ipsam Existentiam. Nam homo quidem cui competit visus, si illo destituatur, non propterea nullus evadit, sed tantum cæcus, hoc est imperfectus, & privatus visu; At quicquid sit illud, cui existentia competit, si existentia destituatur, tunc verè nullum, aut nihil esse dicitur, non imperfectum, aut existentia privatum; quando id quod imperfectum, aut privatum dicitur, supponitur adhuc esse aliquid, tametsi absque habita perfectione, seu proprietate.

An-non proinde jure subjunxi, te, ut enumerando perfectiones, seu pro-

II.
Paralogi-
smum sus-
se, ac per-
severare,
ob muta-
tionem sup-
positionem
ex statu
ideali in
statum re-
alem

seu proprietates Trianguli, non recensueras existentiam, neque proinde concluderas existere Triangulum; ita enumerando perfectiones, sive proprietates DEI, non debuisti in illis ponere existentiam, ut concluderes Deum existere, nisi principium petere velles? Nempe ista fuit paralogismi radix ab ipsa usque transitione ex prioris Meditationis parte, de essentia rerum materialium; ad posteriorem de Dei existentia. Etenim transitio hæc fuit, *Iam vero si ex eo solo, quod alicujus rei Ideam possim ex cogitatione mea depromere, sequitur ea omnia, quæ ad illam rem pertinere clarè, & distinctè percipio, reverà ad illam pertinere, Nunquid inde haberi etiam potest argumentum, quo Dei existentia probetur?* Tum ratiocinatio tua fuit, quam alicubi expressisti hac forma,

Quod clarè, & distinctè intelligimus pertinere ad alicujus rei veram, & immutabilem naturam, sive essentiam, sive formam, id potest de eare, cum veritate affirmari:

Sed postquam satis accuratè investigavimus quid sit Deus, clarè, & distinctè intelligimus ad ejus veram, & immutabilem naturam pertinere, ut existat:

Ergo tunc cum veritate possumus de Deo affirmare, quòd existat.

Cæterum, cum verba illa transitionis, *Ex eo solo, quod alicujus rei Ideam possum ex me depromere, sequitur, &c.* ostendant tam in transitione, quàm in Propositione usurpari à te rem, ac veram, immutabilemque naturam, non quam extra intellectum, conceptumve tuum, seu in se ipsa cognoveris, sed quam duntaxat intra intellectum, sive in Idea, cogitationis vi habueris: perspicuum est sensum tuæ Propositionis esse non posse alium, quàm si hoc modo essetatur,

Quod clarè, & distinctè intelligimus pertinere ad alicujus rei veram, & immutabilem naturam, quatenus in Idea est, id potest de eare cum veritate affirmari, quatenus in Idea est.

Quippe, si ex eo, quòd in Idea ex cogitatione tua deprompta, & intra tuum intellectum aut nata, aut facta, & consistente, observas; ad id quod res sit, aut esse debeat in seipsa; vel in ipsamet rerum natura, extrâque tuum intellectum, facere gradum volueris; paralogismus perspicuus est, ob commutatam suppositionem, seu rem in vario statu acceptam. Quo ex genere audiuntur Sophismata illa in Dialecticorum Scholis, Animal est genus hominis; homo est animal; igitur homo est genus hominis; Et, Equus prædicatur de multis, Bucephalus est Equus, Igitur Bucephalus prædicatur de multis, &c. Scilicet animal, & Equus nunc accipiuntur prout in

intellectu sunt, & ab ejus operatione id, quod dicuntur esse, mutantur; nunc prout in seipsis sunt, & ab operatione intellectus non pendent. Neque dicas tuas Ideas repræsentare res, non solum quales in Ideis, seu intra intellectum sunt; verum etiam quales in se, extraque ipsum intellectum. Siquidem hoc ipsum in questione est; & cum nemo non possit pari jure idem dicere, vides quid ex tanta idearum discrepantia esse admittendum sequatur. Dices te rem limitare ad claram, distinctamque notitiam; sed & quaestio est, qualis-nam sit ista clara, distinctaque notitia, cui nulla planè falsitas subfit, ut agitarum superius est; & nemo ex iis, qui opposita sentiunt, non putat se habere tam claram, distinctamque notitiam, quam tu; aded ut, quo jure tu præfers tuam, illorum quivis præferat suam. Addo, dum quis in intellectu habet Ideam montis aurei, intelligi ab illo clarè, & distinctè pertinere ad montis aurei veram, immutabilemque naturam, essentiam, formam, ut ex auro constet. Neque enim minus verum, immutabileque est, debere montem aureum ex auro constare, quam rationale animal esse ratione præditum. An igitur ex natura; quæ repræsentatur per Ideam, & intra intellectum est, licebit gradum facere ad naturam, quæ re ipsa, & extra intellectum sit? Profectò dici hoc solum potest, *Quod clarè, & distinctè intelligimus pertinere ad montis aurei veram, immutabilemque naturam, quatenus in Idea est, id potest de monte aureo, cum veritate affirmari, quatenus in Idea est.* Neque dicas esse inter montem aureum, & animal rationale discrimen. Etenim discrimen est quidem, quodd postquam es egressus ex statu ideali, in statum realem; seu ex ergastulo intellectus, in theatrum naturæ; animal rationale passim videas; montem aureum nullibi videas. At quandiu manes in statu ideali, discrimen nullum idearum est; neque habes Criterium, quo dijudicare possis, an talis Idea sit conformis rei extra intellectum existenti, an non; expectandumque est, quousque in statu reali experientia criterium fiat. Dices Ideam montis aurei non continere veram, immutabilemque naturam; sed tantum fictitiam, & ab intellectu compositam, quoniam non solum abstractione, sed etiam clara, & distincta operatione ita potes illam

III.

*Non alia
ratione fu-
isse proba-
tum Deum
existere,
quam quid
Deus exis-
sit.*

dividere, ut intelligas montem sine auro. Verum poteris pari modo dividere, & intelligere animal sine ratione; cum ut montes sunt, qui aurei non sunt; ita animalia sint, quæ rationalia non sint.

Patet exinde quidnam sit de tua Assumptione dicendum. Nam pri-

primùm quod ais, *Postquam satis accurate investigavimus quid sit Deus, clarè, & distinctè intelligimus, &c.* arguunt tuæ meditationes non investigasse te inspiciendo in ipsum Deum, quem ut in se est, non vidisti, sed in solam Ideam, quam te de illo intra intellectum habere censuisti. Quare & quicquid intelligis pertinere ad ejus naturam, non intelligis pertinere quatenus natura in seipsa est, sed quatenus est in tua Idea; ex quo sequitur ut non alio modo offerri poterit assumptio, quàm isto;

Sed postquam satis accurate investigavimus quid sit Deus, intendendo in ejus Ideam, clarè, & distinctè intelligimus ad ejus veram, & immutabilem naturam pertinere ut existat, quatenus in Idea est.

Et assumere sanè te naturam divinam non quatenus in seipsa, sed quatenus in Idea est, vel id arguit, quòd probaturus ejus existentiam, per investigationem Ideæ, seu Ideam exploratam pro argumento habes; & cum Idea contineat descriptionem naturæ divinæ, idcirco talem Deum describis, qualem ejus Ideam habes, ut constet quid nomine DEI velis esse intelligendum. Quippe frustra requiritur, an res aliqua existat, an non, nisi qualis res concipiatur, perspicuum fiat. Cum igitur illi; quem fingis negare DEI existentiam, probare contendis Deum existere, & qualis-nam Deus à te concipiatur ipsi describis; profectò talem ipsi describis, qualem ille concipit in tua Idea existere, non qualis reverà, & in se existit; quippe expectat ut ipse probes talem in se existere, qualem in Idea existentem describis. Heinc si assumptionem ita urgeas, ut existentiam naturæ divinæ in Idea tua conceptam, accipiendam contendas pro existentia naturæ divinæ in se, tum ille poterit arguere manifestam esse sophisma, & te perinde continebit in assumptione exposita; ac contineret, si circa montem aureum aliud asumeres, quàm istud; *Sed postquam satis accurate investigavimus, quid sit mons aureus, intruendo in ejus Ideam, clarè & distinctè intelligimus, ad ejus veram, & immutabilem naturam pertinere, ut ex auto constet, quatenus in Idea est.* Quare & ita exciperet, Ecquænam est, precor, hæc probandi forma? Controvertitur inter nos, An Deus existat; tu verò assumis pertinere ad ejus naturam, ut existat? Et nonne hæc ipsa est quæstio? Nonne hoc ipsum probandum est, pertinere ad ejus naturam, ut existat? Dices-ne fortè id remanere ex facta à te descriptione probatum? At describere qualem rem concipias, est-ne demonstrare existere ipsam? An id probas enumerando

rando omneis Dei perfectiones , æternitatem , immensitatem , summam potentiam , sapientiam , existentiam , &c. At quid agis aliud , quàm ponis inter perfectiones existentiam , ut esse existentiam , videlicet idem per se ipsum , probes ? An idèò probas , quia non potest Ens summè perfectum sine existentia intelligi ? At nonne hæc ipsa controversia est , an detur Ens summè perfectum , quale Dei nomine intelligitur ? Nonne alia ratione probandum est , existere Ens summè perfectum , quàm supponendo dari Ens summè perfectum , quod omninò est petere principium ? An probas , quia cæteris rebus non alia existentia , quàm possibilis , atque contingens convenit ; ipsi autem Deo actualis , atque necessaria ? At nonne hæc ipsa est quæstio , an existentia Deo conveniat , quæcumque tandem illa sit ; cùm si quis universè neget , etiam actualement , & necessariam neget ? Et sic ille quidem urgeret nihil aliud te , quàm principium petere ; mihi satis est subnotasse paralogismum ex eo natum , quòd Existentiam inter perfectiones habueris ; quòd Existentiam in Idea cum Existentia in re ipsa confunderis ; quòd Existentiam ad Existentiam comprobendam assumpseris. Quod superest , ea quæ deduxi in Dubitatione , ita constare (mihi quidem) videntur , ut spectata tua responsione quidpiam addere supervacuum putem ; Lectorèsque solùm admonendi sint , ut dubitationem cum responsione comparantes , judicent quid sentiendum sit de tuis illis verbis. *Nec proinde vel minimum ulla in re argumenti mei vireis infregisti , hæcque semper delusus illo sophismate , quod ais tam facile à me solvi potuisse , Et , Cætera denique prætereo ; quia dum ais me nihil explicare , nihil ipse explicas , & nihil probas , nisi tantum te probare nihil posse.*

D. V B I T A T I O III.

De certitudine , ac veritate omnis cognitionis , quatenus asseritur pendere à clara , evidentique notitia , quòd Deus sit , & quòd sit verax.

DEclaras postremò , omnis scientiæ certitudinem & veritatem , ab una veri Dei cognitione ita pendere , ut hac non habitâ , nulla certitudo aut scientia vera haberi possit. Exemplum adfers : Cum enim , inquis , naturam Trianguli considero , evidentissimè quidem mihi , utpote

utpote Geometriæ principiis imbuto, apparet ejus tres angulos æquales esse duobus rectis; nec possum non credere id verum esse, quandiu ad ejus demonstrationem attendo. Sed statim atque mentis aciem ab illa deflexi, quantumvis adhuc recorder me illam clarissimè perspexisse, facile tamen potest accidere, ut dubitem an sit vera: siquidem Deum ignorem. Possem enim mihi persuadere, me talem à natura factum esse, ut interdum in iis fallar, quæ me puto quamevidentissimè percipere: cum præsertim meminirim, me multa pro veris & certis habuisse, quæ postmodum aliis rationibus adductus, falsa esse judicavi. Postquam verò percepi Deum esse: quia simul intellexi cætera omnia ab eo pendere, illumque non esse fallacem, atque inde collegi illa omnia, quæ clare, & distinctè percipio, necessariò esse vera: etiam si non attendam ampliùs ad rationes, propter quas istud verum esse judicavi: modò tamen recorder me clare, & distinctè percepisse, nulla ratio contraria afferri potest, quæ me ad dubitandum impellat; sed veram, & certam de hoc habeo scientiam. Neque de hoc tantùm, sed & de reliquis omnibus, quæ memini me aliquando demonstrasse, ut de Geometricis & similibus. Ad ista porrò; vir eximie, cum admittam te serió loqui, nihil aliud licet dicere, nisi quòd videris ægrè à quoquam fidem impetraturus; Te, ante id tempus quo superiora de Deo es ratiocinatus, minùs fuisse certum illarum Geometricarum demonstrationum, quàm postmodum fueris. Profectò enim eæ demonstrationes ejus evidentia ac certitudinis videntur, ut per se assensum extorqueant, & semel perceptæ intellectum ampliùs hærrere non sinant: adeò ut etiam pravo illi Genio tam facilè sis laqueum mandaturus, ac dum (tamen Deo nondum cognito) tam animosè asseverasti non posse tibi imponi circa illam propositionem, illationemve, ego cogito; itaque existo. Quin etiam quantumvis sit verum, uti nihil verius, Deum existere, esse illum omnium Authorem, non esse fallacem: quia tamen hæc esse videntur minus evidentia, quàm demonstrationes illæ Geometricæ, vel eo argumento, quòd Dei existentiam, rerum creationem, & alia de Deo multi controvertant, has demonstrationes nemo inficietur; ecquis est, quem persuadeas, istas ab illis evidentiam certitudinemque mutuari? Et quis capiat Diagoram, Theodorum, aut si qui similes sunt athei, certos omnino reddi non posse hujusmodi demonstrationum? Et quotusquisque credentium est, quem si rogaris, cur certus sit in Triangulo rectangulo quadratum baseos æquale esse quadratis crurum, responsurus sit, quia scio Deum esse, & Deum non posse fallere, & ipsum esse tam hujus rei, quàm aliorum om-

nium Authorem : & non respondeat potius , quoniam illud scio , ac persuadèor indubitata demonstratione ? Quàto magis id responderent Pythagoras, Plato, Archimedes, Euclides, cæteri Mathematici , quorum nemo esse videtur , qui de Deo cogitet , ut demonstrationum certissimus fiat. Quanquam, quia fortè non de aliis, sed de te ipso solo spondebis , idque aliunde pium est ; non est profectò quare contendam.

R E S P O N S I O .

Contra ea quæ hic habes de Diagora, Theodoro, Pythagora, aliisque , oppono Scepticos , qui de ipsis Geometricis demonstrationibus dubitabant , & affirmo ipsos id facturos non fuisse , si Deum, ut par est , cognovissent. Nec rectè probatur unam rem alià esse notioerem , ex eo quòd pluribus vera videatur , sed tantùm ex eo quòd illis qui utramque, ut par est , cognoscunt , appareat esse cognitiu prior , evidentior & certior.

I N S T A N T I A .

I. **N**ihil heic addendum ad ea , quæ inter dubitandum proposita sunt , nisi propter illud , quod opponis de Scepticis. Nam ut præteream Scepticorum incertitudinem non obtinuisse , quò minus dogmatici certi , imò potius certissimi forent suorum dogmatum , & , quos speciatim nominavi , Geometricarum demonstrationum , quibus nihil prodest opposuisse Scepticos : Ut istud , inquam , præteream, dico imprimis , Scepticos neque dubitasse , neque argumentatos fuisse adversus ea , quæ apparent, aut ad vitam utilia sunt ; sed solùm adversus occulta, incerta, vana, & ad ostentationem comparata. Et , si aliquando visi sunt adversus apparentia , aut vitæ utilia quidpiam dicere , testatos eos fuisse se id facere , non quòd evertere ea vellent , sed quòd operæpretium foret retundere Philosophorum dogmaticorum arrogantiam , qui cùm caligarent in rebus omnium manifestissimis , se oculatissimos tamen in abstrusissimis jactitarent. Dico præterea sic eos habuisse in censu rerum apparentium, quæcumque per Geometricas demonstrationes probarentur, ut de ipsis quidem nulli dubitarent , sed solùm demonstrandi rationem, quâ Geometræ gloriarentur , impetierint. Ut enim circa Astronomiam habuere in rebus apparentibus Eclypseis , configurationesque Planetarum varias, & dixere tamen adversus hypotheseis ; non quatenus ad prænosendum Eclypseis, cæterâq;

I. Scepticos non disputasse adversus apparentia (in quibus habuere propositiones Geometricas) sed adversus hypothesen, & arrogantiam dogmaticorum.

ráq; conferebant, sed quatenus ita ratæ habebantur, ut quas quisq; tuebatur, pro germanis, naturalibúque haberet; cum tamen per oppositas, & quæ non possent esse simul veræ, eadem servarentur, prænoscerenturque apparentia: Ita in Geometria habuere omnino in rebus apparentibus & Triangulum habere treis angulos pareis duobus rectis; & Quadratum hypotenusæ esse æquale quadratis crurum, & hujusmodi cætera; quippe quæ in natura sint, ac sola vocatione intelligentia, & attentione indigeant (neque enim demonstrare est aliud, quàm quid sit attendendum jubere; ut dum quis vultum conspiciens, neque nævum detegens, jubetur propius inspicere, attingereque ad eam partem, in qua nævus est) at dubitationes moverunt circa modum demonstrandi per hypothesi; non quatenus ad attentionem, detectionemque propositam conducebant, sed quatenus ita habebantur ratæ, atque naturales, ut res suppositæ tales planè forent, quales esse supponerentur; cujusmodi est indivisibilitas puncti, lineæ, superficiæ, quam paullo antè attigimus. Hinc non videas illos insistentibus adversus Demonstrationes, aut principia plana, naturalia, non hypothetica, vel supposititia; sed solum adversus ipsas hypothesi, de quibus id primum quærebant, *ei ἐξ ὑποθέσεως ἡ ἀληθεία*, Sit-ne aliquid ex hypothesi accipiendum? ac tum, tametsi viderentur adversus apparentia, & res demonstratas, demonstrationibus ipsas disputare, nihilominus verba eorum fucere, se id agere, *καὶ ἀναιρεῖν βολομένους*, non evertere ea volentes: *αἰσχρὰ Ἰνδιεὺς κύνες τῶν τῶν δογματικῶν οἰήσιν, καὶ περὶ τῆς αἰσχρίας*, sed dogmaticorum arrogantiam, jactationemque convergentes: adeò proinde, ut ne opponi quidem Pythagoræ, Platoni, aut aliis debeant, quasi dubitarent serio de rebus, quas Dogmaticis opponebant.

Quod subdis non rectè probari unam rem alià esse notiorē, ex eo quod pluribus vera videatur; sed tantum ex eo, quod illis, qui utramque, ut par est, cognoscunt, appareat esse cognitum prior, evidentior, & certior, Quid quæso ad quæstionem facit? Nam, ut præteream difficultatem superesse de iis, qui utramque cognoscunt, & ut par est, dico iterum, ut par est, cognoscunt (neque enim cuius dicenti se, ut par est, cognoscere, illico fides adhibenda) Quoniam modo exinde probas demonstrationes Geometricas mutuari evidentiam certitudinemque ex iis, quæ de Dei existentia, Rerum creatione, & consimilibus dicuntur, cum ista multis inevidentia, & incerta sint, illæ sint evidentes, ac certæ, non modò pluribus, sed etiam omnibus, hoc est, tam cæteris, quàm illis, quibus res divinæ inevidentes sunt; ac incertæ?

I I.
Res divi-
nas esse
magis ne-
cessarias,
at non
magis no-
tas, quàm
Geometri-
cas; neque
proinde
hanc
eviden-
tiam ab
illarum
evidentia
pendere.

certæ? Et quomodo non proinde est notius, quod nemo ignorat, quàm quod plæriq; ignorant? Nam & tamen id, quod plæriq; ignorant, possit, ut sit vulgo, dici notius secundum se, hoc tamē nihil aliud significat, quàm maiorem esse in illo existendi necessitatem; cæterum enim cum res nota, habito respectu ad noscentem dicatur; patet sanè id, quod innotescit pluribus, quamvis sit minùs necessarium, dicaturque solùm notius secundum nos, esse nihilominùs id, quod propriè appelletur *notius*. Heinc natura ipsa divina habet quidem omnimodam existendi necessitatem, neque res ulla Geometrica debet cum illa circa hanc necessitatem comparari: sed quod tamen spectat ad claram, evidentemque notitiam, videntur res Geometricæ existimari posse notiores; & cum naturalis certitudo ex evidentia pendeat, non videtur certitudo rerum Geometricarum à certitudine divinarum pendere. Finge certè virum, qui & Deum existere persuasus sit, & res Geometricas demonstrativè teneat; ac ipsi nihilominus ea infelicitas contingat, quæ memorata Diagonæ, dum ex pio evasit impius; an putas illum cum abjecta de existentia Dei persuasionem, abjecturum quoque persuasionem demonstrationum Mathematicarum? Nisi putes, vides profectò persuasionem hanc esse ab illa independentem; Ne id memorem, quod Mirandulano placuit, non hanc ab illa ferre præsidium, sed inferre potiùs ipsi detrimentum; quippe una celebrium ejus propositionum fuit, *nihil esse magis nocivum Theologo, quàm nosse Elementa Euclidis*. Possem proinde multa urgere adversus tuum illud ratiocinium,

Tum denique potui alicujus rei certus effici, cum potui advertere eam esse perceptam clarà, distinctaque notitià, quæ Deum, qui esset, & verax esset, haberet authorem:

Atqui nunc possum advertere rem aliquam esse perceptam à me clarà, distinctaque notitià, quæ Deum, qui sit, & verax sit, habeas authorem:

Igitur nunc denique possum certus effici alicujus rei.

Verum infirmitas illius patet tum ex iis, quæ in superiorem Meditationem disputata sunt circa claram, evidentemque notitiam; tum ex iis quæ attigimus circa Meditationem tertiam, de certitudine hujus tuæ propositionis *Ego cogito*; urgerique etiam potuit de tua conclusione, *Igitur sum*; quam totius tui quasi ædificii *fundamentum* alicubi vocas. Repeto hoc solùm; Cum certitudo hujus tui effati, *Ego cogito, igitur existo*, fuerit in te parta ex clara, distinctaque notitià ante notitiam ipsius Dei, & fuerit tibi fundamentum,

cui.

cui superextruxeris quicquid de Deo, clarâque & distincta notitia es ratiocinatus; idcirco præter inculcata de petitione principii, circa claram, distinctamque notitiam, duo exinde sequi. Vnum est, Non effici saltem te certum hujus tui effati, *Ego cogito, igitur sum*, ex vi deducti mox ratiocinii; Quippe certitudinem hanc habuisti antequàm Deum noveris, & argumentatus fueris, existentem, veracem, autorem; neque dicere potes te fuisse deinceps in ea confirmatum; quoniam fundamentum est, quod præbet rei fundatæ firmitudinem; non res fundata ipsi fundamento. Alterum est, cùm propter quod unumquodque est tale, & illud magis tale sit; referre te acceptam debere cæterarum rerum certitudinem non ad Deum, ut quidpiam medium, sed ad tuum illud Effatum, ut quid primum, & tanquam fundamentum, ex cuius certitudine ipsius quoque medii certitudo dependeat.

IN MEDITATIONEM VI;

Quæ est

De Rerum Materialium existentia, & reali
Mentis à corpore distinctione.

D V B I T A T I O I.

De distinctione Intellectionis, & Imaginationis.

Circa sextam, id non moror quod initio dicis, *Res materiales ut sunt objectum puræ Matheseos posse existere*: cùm tamen res materiales sint objectum mixtæ, non puræ matheseos; & objectum puræ matheseos, ut punctum, linea, superficies, constantiaque ex iis indivisibilia, indivisibilitèrque se habentia, existere reipsa non possint. In eo solum hæreo, quòd heic iterum *imaginationem ab intellectione* distinguis. Quippe, ò Mens, hæ duæ videntur unius, ejusdemque facultatis actiones, ut supra insinuavimus; & si quid sit discriminis, id non videtur amplius esse, quàm secundum magis, & minus; & vide ut illa inde jam probentur. Dixisti suprà, *imaginari nihil esse aliud, quàm contemplari figuram, imaginemve rei corporeæ*: heic verò non abnuis, *intelligere esse contemplari*.

Trigonum, *Pentagonum*, *Chiliagonum*, *Myriagonum*, & hujusmodi cætera, quæ figuræ sunt rerum corporearum. Et discrimen quidem jam statuis, quod *imaginatio* sit cum quadam applicatione facultatis cognoscitivæ ad corpus: *intellectio* verò talem applicationem, seu contentionem non exigit. Aded ut, cum simpliciter, & sine labore percipis *Trigonum*, ut figuram constantem tribus angulis, id intelligere te dicas. Et cum non sine aliqua tui contentione figuram quasi præsentem habes, inspicis, exploras, distinctèque & sigillatim agnoscis, discernisque tres angulos, id te dicas imaginari. Ac proinde, cum percipias quidem absque labore *Chiliagonum* esse figuram mille angulorum: neque tamen applicando & contendendo teipsam discernere possis, & quasi præsentem habere, sigillatimque discernere omnes illius angulos, sed te perinde confusè habeas, ac circa *Myriagonum*, aut quancumque aliam hujusmodi figurarum; idcirco censeas respectu *Chiliagoni*, aut *Myriagoni* *Intellectionem* esse, non *Imaginationem*. Verumtamen nihil sanè obstat, quin ut ad *Trigonum*, sic ad *Chiliagonum*, quemadmodum *intellectionem*, ita *imaginationem* extendas. Nam & nonnihil contendis, ut figuram istam tam multorum angulorum aliquo modo imagineris: licet multitudo illa angulorum tanta sit, ut ipsam distinctè capere non possis: & aliunde percipis quidem voce *Chiliagoni* significari figuram mille angulorum, sed hæc est tantum vis nominis; nam non propterea in ea figura intelligis magis mille angulos, quàm *imaginariis*. Attendendum verò ut amittatur distinctio, & acquiratur confusio per gradus. *Tetragonum* enim confusius quàm *Trigonum* percipies, *imagineris*ve aut intelliges; sed distinctius, quàm *Pentagonum*. Tum hoc confusius *Tetragono*, *Hexagono* distinctius, atque ita consequenter; donec non habeas quid disertè tibi proponas, & quia jam disertè capere non possis, contendere teipsam ut plurimum negligas. Quamobrem, si velis quidem *imaginationem* simul & *intellectionem* vocare, quandiu figuram distinctè, & cum sensibili quadam contentione cognoscis; *intellectionem* verò solum dum confusè solum, & cum nullà, aut perexiguâ contentione specularis, licebit profectò: at non erit propterea, cur plusquàm unum genus internæ cognitionis adstruas, cui *accidentarium* solummodo sit, ut secundum magis, & minus distinctè vel confusè, intentè vel remissè figuram quampiam intuearis. Et certè cum *Heptagonum*, *Octagonum*, cæterasque porro figuras ad *Chiliagonum*, aut *Myriagonum* usque percurrere voluerimus & ad majorem, minoremque distinctionem, vel remissionem, semper continuòque attenderimus, di-

cerc-

cere-ne poterimus, ubinam, seu in qua figura imaginatio desinat, intellectio sola remaneat? Nisi potius non apparebit series tenorque uniusmodi cognitionis, cujus continuū, insensibilitérque crescat distinctio & contentio; crescat confusio & remissio. Aliàs certè considera, ut intellectiōnem deprimas, imaginatiōnem extollas. Quid enim aliud, quàm illi ludibrium, isti commendationem quæris; dum illi negligentiam & confusionem tribuis, huic verò diligentiam & perspicuitatem adscribis. Asseris postea, *vim imaginandi, prout à vi intelligendi distinguitur, ad tui essentiam non requiri*: quomodo id verò, si una eadēque vis sit, cujus functiones differant secundum magis & minus duntaxat? Subjicis, *mentem imaginando sese convertere ad corpus, intelligendo, ad seipsam, Ideamve quam habet in se*. Quid ita verò, si non potest mens sese ad seipsam, Ideamve ullam convertere, quin simul sese convertat ad aliquid corporeum, Ideæ corporeæ repræsentatum? Nam Trigonum quidem, Pentagonum, Chiliagonum, Myriagonum, cæteræque figuræ, earumve Ideæ corporeæ omnino sunt; neque potest mens ad illas, nisi ut corporeas, corporearumve instar intelligendo attendere. Quod spectat ad Ideas rerum immaterialium creditarum, ut Dei, Angeli, animæ humanæ seu mentis; constat etiam quascumque habemus de ipsis Ideas, esse vel corporeas, vel quasi corporeas, ex forma scilicet humana, & ex rebus aliàs tenuissimis, simplicissimis, insensibilissimis, cujusmodi sunt aër, æthérve, desumptas, ut suprà quoque attigimus. Quod autem dicis conijcere te probabiliter solum aliquod corpus existere; quia non potes dicere ferid, idcirco morandum non est.

R E S P O N S I O .

DE eo quod neges res materiales, ut sunt objectum puræ Mathematicæ, existere, jam antè egi: Falsum autem est intellectiōnem Chiliagoni esse confusam; distinctissimè enim & clarissimè multa de eo possunt demonstrari, quod certè non fieret, si non nisi confuse, vel, ut ais, nominatenus perciperetur. Sed revera illud totum simul clarè intelligimus, et si non possumus totum simul imaginari. Ex quo patet vires intelligendi & imaginandi, non differre tantum secundum magis & minus, sed ut duos modos operandi planè diversos. Quippe in intellectu mens se solà utitur, in imaginatione verò formam corpoream contemplatur. Ac quamvis figuræ Geometricæ sint omnino corporeæ, non tamen idcirco Ideæ illæ, per quas intelliguntur, quando sub imaginationem non cadunt, corporeæ sunt putandæ. Ac denique

denique te sola dignum est, ô caro, existimare Ideas Dei, Angeli, & mentis humanæ esse corporcas, vel quasi corporeas, ex forma scilicet humana, & ex rebus aliis tenuissimis, simplicissimis, insensibilibissimis, cõjsumodi sunt ær, æthérve, desumptas. *Quisquis enim Deum, aut mentem ita sibi repræsentat, rem non imaginabilem conatur imaginari, & nihil nisi corpoream Ideam effingit, cui nomen Dei, vel mentis falso tribuit. Nam in vera mentis Idea sola cogitatio cum ejus attributis, quorum nulla corporea sunt, continetur.*

I N S T A N T I A.

I.
Difficulta-
tes disti-
nguitas.
Falsum
esse Chilia-
gonum
clarè, di-
stinctèque
sine imagi-
natione
intelligi:
& Trigo-
num non
clarè, di-
stinctèque
intelligi
cum ima-
ginatione.

DE eo, quod circa res materialeis, quatenus illas puræ Matheos dixeris objectum, obiter attigeram, & mixtæ, non puræ matheos esse objectum dixeram, an aliquid responderis, & non potius, ut canis in Ægypto, aliquid solum attigeris, ut remissione hoc loco utens, videri posses alibi difficultatem plenè solvisse; attendentium esto judicium. Quod ad distinctionem Imaginationis, & Intellectionis spectat; nihil addendum est ad ea, quæ in Dubitatione proposita sunt, quæque solenter es prætergressus. Nam quod ais nos Chiliagonum distinctissimè intelligere, cum non possimus imaginari; & ideam illam, per quam intelligitur, cum in imaginationem non cadat, non esse corpoream; aliis expendendum relinquo. Adnoto solum heic quoque locum esse factum illi instantiæ, quâ occasione aliâ requirebam superiùs, *Qui fieri possit, ut dicatur cujuspiam rei esse idea, & idea tamen illius imago non sit?* Nam Ideam quidem imaginem esse, non cæteri modò hominum, sed tu quoque jam admisisti: Quomodo verò Idea Chiliagoni, quæ in intellectum, non in imaginationem cadit, imago Chiliagoni est? Quippe, si distinctè quidem repræsentat figuræ angulos, ut repræsentat idea Trigoni; tum ad imaginationem etiam pertinet, quod nihilominus non concedis. Si non repræsentat; igitur imago non est; cum de ratione imaginis sit, ut rem, qualis est, repræsentet. Ac ipse quidem non diffiteor, quin imago sit, & Chiliagonum repræsentet; sed videtur mihi & imago, & repræsentatio confusa; atque idcirco ejus perceptionem non intellectionem modò, sed imaginationem etiam dico. Et cum non negem intellectum ex figuris aliis distinctè perceptis consequitione necessaria inferre, demonstrarèque de Chiliagono aliqua; non agnosco tamen illum magis intelligere, quàm imaginari ipsam Chiliagoni figuram. Tu autem

tem vis omnia distinctissimè , & citra imaginationem percipi ; cùm dicere tamen profectò non possis in quonam consistat distinctissima hæc distinctio. Nam distinctè percipere , nonne est parteis singulas sigillatim nosse , sive cognitione completi ? Nisi ergo partes Chiliagoni singulas , sive angulos omnes sigillatim noveris , cognitione complexus fueris ; quàm ratione te Chiliagonum percipere distinctè , dicis ? Insultabis , me requirere perceptionem , quæ per imaginationem habetur : Ego verò non requiro an per imaginationem , an per aliam facultatem habeatur , dummodo habeatur : Requiro solum , ut definias quid perceptionem distinctam voces , & Chiliagono applies ; paratus statim manus dare , si definitio apposita , appositæque applicita fuerit. Nisi autem facies , & ex tua definitione perceptio appareat universè solum , & ut ita loquar , conglobatè facta , non autem sigillatim , & per parteis singulas ; quomodo evinces perceptionem esse distinctam ; & non potius confusam ? Heinc videtur sanè prætereundum tibi non fuisse , quod de progressu perceptionis ex Trigono usque , per Tetragonum , Pentagonum , Hexagonum , & cætera , ad Chiliagonum , aut Myriagonum usque fuerat objectum ; ut explicares quandònam imaginatio cessaret , intellectio sola restaret : neque progressus esset ejusdem facultatis secundum magis & minus , sed *essent duo modi operandi plane* , ut asseris , *diversi* ; Vt explicares quomodo non foret distinctior intellectio , cum imaginatione conjuncta , quàm cùm evaderet , essetque separata. Certè cùm ad perceptionem Trigoni & Imaginatio , & Intellectio concurrant ; ad perceptionem Chiliagoni sola intellectio ; eccujus tandem pretii est distinctio , qua Chiliagonus percipitur , ejus respectu , qua Trigonum ? Et cùm sit tanta claritas in perceptione Trigoni , tanta obscuritas in perceptione Chiliagoni ; & aliunde claritas illa ab imaginatione tota sit ; ista verò obscuritas intellectum solum attingat ; eccujus-nam pretii non erit perceptio , quæ aut imaginatione , aut cum imaginatione fit , respectu illius , quæ solo intellectu ? Dicis te , *si de Chiliagono velis cogitare , æquè bene intelligere illud esse figuram constantem mille lateribus , ac intelligis Triangulum esse figuram constantem tribus*. Sed nempe hoc nihil est aliud , quàm quid nomine Chiliagoni significetur intelligere ; Nam rem quidem ipsam non alia ratione animo complecteris , quàm repræsentatione illa adeò confusa , ut secluso angulorum numero ipsa voce designato , tam Myriagoni esse , quàm Chiliagoni possit. Quare & quod ais *multa posse de ipso distinctissimè* ,

Et clarissime demonstrari; carenus solum verum est, quatenus sensus est demonstrari illa posse de figura, cujus nomine intelligis distinctissime, & clarissime significari mille angulos; tametsi ipsammet figuram in te non intelligas, nisi confuse & obscure. Et quod ais te revera totum simul clarè intelligere, etsi non possis simul totum imaginari, nihil aliud esse potest, quàm te vocem significantem figuram mille angulorum clarè intelligere; etsi ipsam figuram non intelligas clarè. Quæro te certè, quidnam hoc est, intelligere clarè totum? An-non totum est, quod partibus constat? Et potest-ne clarescere totum, cujus partes obscuræ sint? Et possunt-ne partes non esse obscuræ, quæ sigillatim non discernuntur? Clarè totum intelligis, etsi non totum imagineris? Ecquid superest, nisi ut dicas te clarè intelligere totam terram, totam naturam, totum mundum, nihil non denique, quod nominari valeat; tametsi id totum non imagineris? Ac fortè quidem non negabis te intelligere clarè omnia; sed si vis credamus, fac ut prius intelligamus, quid sit intelligere clarè.

II.

*Nullam
intellectio-
nem sine
imagine
corporea
esse. Diffi-
cultatem
dissimula-
tam. In-
telligi
etiam
Deum,
Angelum,
Mentem
sub aliqua
specie cor-
porea.*

Dicis Mentem in intellectu uti se sola; in imaginatione verò formam corpoream contemplari. Et quia ex objectis à me sequebatur non posse igitur mentem sola intellectu, (quod est se sola) uti in cognoscendis rebus corporeis, quales sunt Trigonum, Pentagonum, & figuræ cæteræ, quandoquidem istarum rerum non possunt esse ideæ nisi corporeæ, & mens ad ipsas attendere, nisi ut ad formas corporeas non potest; Idcirco jungis; Ac quamvis figuræ Geometricæ sint omnino corporeæ; non tamen idcirco ideæ illæ, per quas intelliguntur, quando sub imaginationem non cadunt, corporeæ sunt putandæ. Verùm cum id dicas, quoniam modo probas? Nullo certè: cum nihilominus heic Rhodus, ut ajunt, heic saltus. Sufficit te fuisse sic ratiocinatum;

Si dum Mens intelligit, sese ad seipsam, aliquamve ex ideis, quæ illi ipsi insunt, convertat, & dum imaginatur, convertat se ad corpus, ideamve corpoream; possitque adeò aliquid sine imaginatione intelligere; sequitur vim imaginandi non requiri ad essentiam mentis:

Atqui dum mens intelligit, sese ad seipsam aliquamve ex ideis, quæ illi ipsi insunt, convertit; & dum imaginatur, convertit se ad corpus, ideamve corpoream, potestque adeò aliquid sine imaginatione intelligere:

Igitur vis imaginandi non requiritur ad essentiam mentis.

Quali verò probaveris posse mentem, aut se eo modo in seipsam
con-

convertere : aut ad ideam quandam non corpoream, vel quasi corpoream attendere, ut imaginatio nulla interveniat? Ut non proinde Intellectio, & imaginatio una actio sint, cui duplex hoc nomen tribuatur? ut non clara, & distincta sit intellectio, cum clara, & distincta est imaginatio; confusa, & obscura, cum secus? Ut non etiam in iis, quæ universè, abstractè, & ex consequutione quodammodò percipimus, seu (per te) intelligimus, aliqua imago, seu forma corporea, atque aded (per te) imaginatio interveniat? Verùm res est abundè satis inculcata superiùs tam circa res corporeas, ut cum de duplici imagine Solis; quàm circa incorporeas, ut cum de Mentis substantia, Deique natura. Quoniam verò speciatim heic hisce verbis te gratiosum ostendis, *Ac denique te sola dignum est, ô Caro, existimare Ideas Dei, Angeli, & Mentis humanæ, esse corporeas, vel quasi corporeas, &c.* Facis sanè rem tua mente dignam, quam volatus aded sublimis, & obtutus aded acuti, atque constantis reputas, ut aquilæ instar non conniveat, sed pleno aspectu sustineat splendorem rerum divinarum : ut Deum contempletur, non ipsum percipiens sub forma quadam corporea, & quasi in ænigmatice; sed per speciem planè incorpoream, & cujuscmodi secundum te est; parique modo Angelum, pari modo humanam Mentem. Quod ad me spectat, ingenuè fateor me nihil aliud, quàm repere, & longè abesse ut meam mentem comparem vel cum ipsis oculis noctuæ meridiano Soli obversis. Videlicet conantem me intelligere res divinas, altissima quædam, & insuperabilis occupat caligo; & neque Deum, neque Angelum, neque Mentem, nisi sub forma quadam corporea, & infirmitati meæ accommodata intelligere potissum. Non sanè, quòd propterea sentiam Deum esse hæc forma, Angelum illa, & Mentem alia; sed cum mihi defixerim hujusmodi res, quas vel auditu, & fide accepi, vel ratiocinio esse collegi; habere naturam, cujus percipiendæ sum penitus incapax; censo hanc naturam nihil esse omninò, quale intellectui meo obversatur, quoties vel nominari audio, vel apud me cogito, vel enunciare cæteris volo. Sed cum non dicam talem esse qualem cogito, vel qualem obversata meo intellectui idea ipsam repræsentat; quippe cum sit ineffabiliter, & inexcogitabiliter purior, pulcrior, perfectior; sum tamen ea semper imbecillitate, ut cogitare non possim formâ aliâ, quàm qualis mihi per ideam hujuscemodi exhibetur. Ac fortè quidem neque tu quoque aliud experiris, quàm ego; cum fortè & ego non minùs, quàm tu intelligam naturam divinam esse

æternam, infinitam, omnipotentem, omnisciam, &c. eadēque proportionē cæteras naturas; sed non vis ipse perinde profiteri, non obversari aliud tuæ menti, quàm nescio quid corporeum, aut quasi corporeum, cùm Deum cogitas, seu naturam, cui conveniat esse æternam, infinitam, omnipotentem, omnisciam, & alia, quæ ipsi tribuuntur. Nempe de fama actum putares, si te quispiam eum crederet, qui *imaginari rem non imaginabilem conareris*, & *nullam nisi corpoream ideam effingeres*, cui *Nomen Dei*, vel *mentis tribuere falso videreris*. Vt cumque te habeas, tua gaude fortuna.

D V B I T A T I O II.

De Sensu non semper fallente.

Disputas deinceps de Sensu, ac præclare primum enumerationem instituis eorū, quæ per sensus innotuerant, & credita vera à te fuerant, solā iudice ac duce naturā. Refers subinde experimenta, quæ habitam sensibus fidem ita labefactaverint, ut eò te adegerint, quò te receptam vidimus circa Meditationem primam. Hoc porrò loco mens mihi non est de veritate sensuum intendere litem, tamen si enim fallacia, falsitasve sit non in sensu, qui merè passivè se habet, refertque solū ea quæ apparent, quæque talia ex suis causis apparere necessum est; sed in iudicio sive in mente, quæ circumspicere satis non agit, neque advertit ea quæ procul sunt, ex hisce aliisve causis apparere confusiora, minoraque seipsis, dum prope sunt, & ita de cæteris: attamen ubicumque fallacia sit, negandum non est quin aliqua sit; solūque difficultas est, sicne semper sit, ut nunquam de rei cuiuspiam sensibus perceptæ veritate constare possit. Sanè verò nihil est necesse exempla obvia conquirere: dico solū ad ea quæ profers, sive potius objicis, constare omnino videri, cùm tursim & prope spectamus & contingimus, certos nos esse quòd sit quadrata; qui remotiores habueramus ansam iudicandi rotundam, vel certè dubitandi, quadratane, an rotunda, an alterius figuræ esset. Sic sensus ille doloris, qui apparet adhuc esse in pede aut manu, postquam ea membra rescissa sunt, fallere aliquando potest, in iis scilicet, quibus sunt rescissa; idque ob spiritus sensorios assuetos in ipsa deferre, inque ipsis sensum exprimere: attamen qui integri sunt, tam certi sunt se in pede
aut ma-

aut manu , quam compungi vident , dolorem sentire , ut dubitare non valeant. Sic cum vigilemus somniemusque per vices , donec vivimus , fallacia quidem per somnium est , quòd ea videri coram appareant, quæ coram non sunt ; attamen nec semper somniamus, nec dum reverà vigilamus , dubitare possumus, vigilemus-ne an somniemus potiùs. Sic cùm cogitare possimus nos esse naturæ fallaciis obnoxie , etiam in rebus verissimis visis ; nihilominus cogitamus etiam nos esse à natura veritatis capaces : & ut aliquando fallimur , ut non detecto sophismate , vel baculo media ex parte in aquam immerso ; ita aliquando intelligimus verum, ut in Geometrica demonstratione , aut in baculo ex aqua educto , adeò ut de neutrius veritate dubitare planè possumus. Et ut dubitare de cæteris liceat ; saltem de eo dubitare non licet , quòd res tales appareant ; nec potest non esse verissimum taleis apparere. Quòd autem ratio multa dissuadeat , ad quæ nos natura impellit , non tollit hoc saltem veritatem ejus , quod apparet , & φανερὸν. Tametsi nihil est necesse heic disquirere , Ratio-ne sensus impulsui repugnet , eo duntaxat modo , quo dextera manus prolabentem lævam præ lassitudine sustentat , an verò quodam alio.

R E S P O N S I O.

Hic manifestè ostendis te præjudiciis tantum nisi , nunquàmque illa exuere , cum velis nos in iis , in quibus falsitatem nunquam deteximus , nullam falsitatem suspicari ; atque ideò cùm turrim & prope spectamus & contingimus , certos nos esse quòd sit quadrata, si quadrata appareat ; & cùm revera vigilamus , dubitare nos non posse vigilemùsne , an somniemus , & talia. Nullam enim habes rationem existimandi omnia , in quibus error esse potest , jam olim à te fuisse animadversa ; & facile probari posset , te in iis interdum falli quæ certa esse sic admittis. Cum autem eò redis , ut saltem dubitare non liceat, quin res tales appareant quales apparent , ad viam redis , hocque ipsum in secunda Meditatione asserui. Sed hic de veritate rerum extra nos positarum quæstio erat , de qua nihil veri attulisti.

INSTANTIA.

I.
*Quis à
 præjudiciis
 cavere
 præferim
 dicendus.*

Quam faciliè concipis bilem ! Quam faciliè mihi imponis ! Ego id nusquam minùs speràram , miratùsque sum , postquam dixi te præclarè instituisse enumerationem eorum , quæ per sensus innotuerant , &c. subjunxique solùm difficultatem superesse , quam solito more exposui ; miratus sum , inquam , habuisse te aniam , quamobrem ex inopinato sic insurgeres. Sed nimirum non sufficit commendare quidpiam in te , nisi simul omnia evehantur usque in cælum ; & piaculum est , si quis improbet , quod sit abs te probatum semel. Dicis ostendi heic à me præjudiciis me tantum nisi , nunquàmque illa exuere : Et ego tamen neque heic , neque Dubitationibus totis ostendi me niti , neque non niti præjudiciis ; & neque exuere illa , neque non exuere. siquidem in eo non fui , ut si quid sentirem , aut non sentirem , rationem tibi redderem. In eo solùm fui , ut quia , amico intercedente , cognoscere volueras , posset-ne quidpiam objici adversus tuas Meditationes , proponerem amicè illa , quæ objici posse visa mihi sunt. Tu verò non attendens quam personam gesserim , putas me voluisse nihil aliud , quàm placita mea placitis tuis opponere ; Quasi inter argumentandum nemo unquam objiciat , nisi quod reverà , ac persuasus sentit ? Si me nosses , eum esse nosses , qui circa res naturales non modò conatur præjudicia exuere , sed etiam sollicitè cavet , ne emergat ex uno , ut se , tuo more , in aliud conjiciat. Quippe , quantum vires ingenii patiuntur , ita expendo omnia , ut nitar deprehendere quid in tanta caligine simile esse vero videatur , aut ex multis similibus quid similius vero appareat : quando & vitæ consuetudo , & mens ad assentiendum prona , nō videtur pati , quin saltem verisimilitudinem conficemur. At cum de ipsa veritate nunquam pronunciem , qui ipsi eruendæ me imparem sentio ; is profectò sum , qui ne ullam quidem verisimilitudinem ita ratam habeam , ut non paratissimus sim eam deferere , si occurrerit alia , quæ esse videatur majoris momenti. Ex quo fit , ut si quando roger de re quapiam sententiam ferre , aut recusem , aut tester me verisimilitudinem non egredi ; aut , nisi faciam , saltem insinuem , unde , qui me nōrunt , id testatum putent. Sed hæc obiter , ut intelligas qualem apud me personam sustineam. Nunc ut eam resumam , quam voluisti me objiciendo assumere , agnosco imprimis perstare te semper in illo tuo ratiocinio ;

Ille

Ille solus, qui Mentem, ut par est, abducit à sensibus; hoc est, qui omnia sensibus à se percepta reputat falsa; qui se somnare existimat, qui se à Deo decipi, & à maligno Genio deludi credit, ut subinde animadvertat se esse; & rem præciè cogitantem esse; & se Ideam Dei habere; & Deum proinde existere; & ipsum, cum author sit clara, distinctæque notitiæ, non esse fallacem; ille inquam solus exuit præjudicia; certus fit de aliqua re; novit an sit corpus aliquod in mundo; cognoscit utrum, & quomodo aliquid sensu percipiatur. Atqui ego solus illa præstiti (Quamvis enim jam antè dictum sit à multis ad res Metaphysicas intelligendas mentem à sensibus esse abducendam; nemo tamen abhuc, quod sciam, qua ratione id fieri possit, ostenderat; vera autem via, & meo iudicio unica ad id præstandum in secunda mea Meditatione continetur, &c.)

Igitur ego solus exui præjudicia; certus de aliqua re fio; novi an sit corpus aliquod in Mundo; cognosco utrum, & quomodo aliquid sensu percipiatur.

Deinde requiro, quo argumento ductus, dicas ostendi hic à me, præjudiciis me tantum niti, nunquamque illa exmere. Dicis me manifeste id ostendere, cum velim nos in iis, in quibus falsitatem nunquam deteximus, nullam falsitatem suspicari. Et ubi-nam tamen hoc volo? Nonne quæstio est de notitia, quæ comparatur sensibus? Ego verò asserui-ne aut ullo modo supposui nunquam detexisse nos falsitatem in hac notitia? Et nonne verba hæc mea fuerunt? *Attamen ubicumque fallacia sit, negandum non est, quin aliqua sit; solùmque difficultas est, sic-ne semper aliqua sit, ut nunquam de rei cuiuspiam sensibus perceptæ veritate constare possit? Ecquid ergo mihi affingis? At dixi, constare omnino videri, cum Turrim & propè spectamus, & contingimus, certos nos esse, quòd sit quadrata, qui remotiores habueramus anjam judicandi rotundam, vel certè dubitandi, quadratæ-ne, an rotunda, an alterius figuræ esset. Dixi sanè: at proptereâne dixi nunquam detexisse nos errorem in sensu? At dixi certos nos esse quòd quadrata sit, cum propè spectamus, & contingimus: Dixi profectò: Et quid prohibuit? An cum admiserim nos interdum falli, non licuit admittere nos interdum non falli? An potius asserendum fuit nos semper falli? an-non id æquè vitiosum est ac asserere nunquam falli? Vrges me nullam habere rationem existimandi omnia, in quibus error esse potest, jam olim à me fuisse animadversa, & facile probari posse*

II.

Esi fallamur aliquando, dum Turrim evanescimus spectatam judicamus teretem, possetamen non falli nos, dum eam comminus exploramus.

me in

me in iis interdum falli, quæ certa esse sic admitto. Ego verò neque existimavi, neque dixi live omnia, live omni casu, fuisse à me animadversa; sed hoc supposui, casus esse, in quibus evidentia tanta sit, ut nihil planè animadvertam, quod judicium incertum faciat. Nam cum v. c. Turrim propè spectro, ejusque quatuor facies partim nudo oculo, partim amussi applicita, discerno circumquaque, & angulos numero, satis animadversum puto, ut quadratam esse potiusquàm rotundam persuadear. At quæ-nam, inquires, est certitudo, animadversa esse omnia, propter quæ error esse potest? Imò verò, inquam, quænam certitudo esse potest non fuisse omnia animadversa? siquidem quòd interdum fallar, quando procul sum, id sublatum est per propinquitatem? At probari facile potest me interdum falli, cum ut certum admitto turrim sic spectatam, contrariamque esse quadratam? Age igitur, Tu id proba. Fieri potest, ut somniem: hoc nempe est unum ex tuis argumentis. Sed si somniarem, neque tu, neque mortalium ullus probare mihi posset, me falli. Aliunde verò tantà evidentiâ compertum habeo me non dormire, ut meritò ineptus habear, si probationem aliam faciliorem requiram, & non tibi uni somniandam relinquam, si fortassis existimas te, cum ista obtendis, dormire. Fieri potest, ut Deus me decipiat: hoc enim est tuum aliud argumentum. Sed præterquàm quòd Mens horret audire, Quàm ego sum certus Deum esse, tam certus sum deceptorem non esse; Quare ut non debet venire, ita ne venit quidem in mentem decipi me posse à Deo, ut de forma Turris incertus efficiar. Fieri potest, ut deludat à maligno Genio: hoc enim est argumentum tertium. Sed cum mera sit hariolatio, adversus quam pugnat tanta evidentia; cum si Dæmon deludat nos, id sit solummodò in iis, quæ ad supernaturalem animæ statum attinent; longè absum, ut ob carentem fundamento conjecturam, abjiciam notitiâ adedò manifestam. Ut paucis dicam, hæc argumenta, quibus probari facilè putas falli interdum me in iis, quæ certa esse sic admitto, ejusmodi mihi videntur, ut ipsa proponere nihil aliud sit, juxta tuum illud adagium, quàm nodum quærere in scirpo. Certè, si tu ipse iis adhuc moveris, adedò ut prope turrim cum fueris, de ejus forma incertus sis; Esto, quocumque modo volueris. Si dicas te certum quidem esse, sed nempe quia argumenta solvisti, postquam animadvertisti te esse, te rem cogitantem esse, habere te Ideam DEI, &c, Ego, qui ante illa tua argumenta proposita non dubitavi me esse, me cogitare, me habere Ideam Dei, &c. tantò mihi

mibi videor esse foelicior, quantò, cùm uterque habeamus eandem certitudinem, ipse illam sponte, & ab initio habeo; tu verò non-nisi post labores immensos. Addideram, *saltem dubitare non licere, quin res tales appareant, quales apparent*; Et tu excepisti, *me in viam redire, quòd hoc ipsum in secunda Meditatione asserneris*. Sed mihi quidem, ut videtur, nihil opus fuit redire in viam, qui è via non exieram. Intelligo autem viam, non quam tu ex tua secunda Meditatione subindicas, sed quam jam antè triveram Dubitatione prima in Meditationem tertiam, quàmque ipse veritus es subingredi, tum ob allatam illeic causam, tum fortè etiam ne videreris imitari Scepticos, qui exuendi tamen præjudicii perfectiorem Methodum tradunt, & sequuntur. Quod subjicis *quæstionem fuisse de veritate rerum extra nos positarum, & me de illa attulisse nihil veri*: Dic tu, amabò, ecquid-nam verius de illa eadem attuleris?

D V B I T A T I O I I I.

De Capitali Demonstratione pro Mentis existèntia separatim à corpore, Ex eo, quòd ipsa sit res cogitans, & corpus res extensa.

Accedis consequenter ad institutum, sed levi quasi velitatione. Pergis enim; *Nunc autem postquam incipio meipsum, me aequè Authorem originis melius nosse, non quidem omnia quæ habere videor à sensibus, puto esse temerè admittenda, sed neque etiam omnia in dubium revocanda*. Bene hoc habet, quanquam & antea idem haud dubiè putaveras. Sequitur, *Et primò quoniam scio, omnia quæ clarè & distinctè intelligo, talia à Deo fieri posse, qualia illa intelligo; satis est quòd possim unam rem absque altera clarè & distinctè intelligere, ut certus sim unam ab altera esse diversam: quia potest saltem à Deo seorsim poni, & non refert à qua potentia id fiat, ut diversa existimetur*. Ad hoc nihil aliud dicendum est, quàm probare te clarum ex obscuro: ne causser esse obscuritatem in illatione aliquam. Ac non hæreo quidem in eo, quòd probare prius oporteat existere Deum, & ad quæ potentia ejus se extendat, ad ostendendum facere eum posse quicquid tu potes intelligere: quæsierim solùm, nonne tu clarè, distinctèque intelligis in Triangulo proprietatem illam, quòd majora latera majoribus angulis subtendantur, separatim ab alia, quâ tres simul anguli habeantur pares duobus rectis? Et admittis-ne propte-

M m

reà

reà Deum ita posse illam proprietatem ab hac separare, & seorsim ponere, ut Triangulus istam & non illam habeat, vel ista quoque præterea sit seorsim à Triangulo? Sed ne te heic remorer, quòd hæc separatio parum ad rem faciat, subjicis, *Ac proinde ex hoc ipso quòd sciam me existere, quòdque interim nihil planè aliud ad naturam, sive essentiam meam pertinere animadvertam, præter hoc solum, quòd sim res cogitans; rectè concludo meam essentiam in hoc uno consistere, quòd sim res cogitans.* Heic remorarer, sed vel repetere sufficit quæ circa meditationem secundam dicta sunt, vel expectandum quid inferre velis. Postremò enim, *Et quamvis, inquis, fortasse (vel potius, ut postmodum dicam, pro certo) habeam corpus, quòd mihi valde arctè conjunctum est: quia tamen ex una parte claram, & distinctam habeo Ideam mei ipsius, quatenus sum tantum res cogitans, non extensa: & ex alia parte distinctam Ideam corporis, quatenus est tantum res extensa, non cogitans: certum est me à corpore meo reverà esse distinctam, & absque illo posse existere.* Videlicet huc properabas? Ergo quia cardo difficultatis heic potissimum vertitur, consistendum nonnihil est, ut pateat quòd illum stabilias. Agitur heic primum de distinctione inter te & corpus. Quod porrò corpus intelligis? Nempe hoc crassum ex membris constans, de quo sunt haud-dubiè hæc verba, *habeo mihi conjunctum: & certum est me à corpore meo esse distinctam, &c.* Atqui, ò Mens, de hoc corpore non est difficultas. Esset quidem, si objicerem cum plerisque Philosophis te esse ἐντελέχειαν perfectionem, actum, formam, speciem, & ut vulgari modo loquar, modum corporis: quippe illi non magis te ab isto corpore distinctam, separabilemque agnoscunt, quàm figuram, modumve alium: idque seu sis anima tota, seu sis præterea etiam νῦς διωάμει, νῦς παθητικός, intellectus possibilis, seu passibilis, ut loquuntur. Sed agere placet tecum liberaliùs, te nimirum considerando ut νῦν ποιητικὸν intellectum agentem, imò & χωρὶς separabilem: tametsi alia, qua illi, ratione. Cùm illi enim istum statuerent omnibus hominibus (nisi potius rebus) communem, præstantemque intellectui possibili, ut intelligat, eadem prorsus ratione ac necessitate, qua lux præstat oculo ut videat; (unde solari lumini comparare soliti erant, spectareque proinde ipsum, ut advenientem extrinsecus) ipse te potius considero (nam & tu quoque id bene vis) ut intellectum quandam specialem, qui dominaris in corpore. Reperto autem difficultatem non esse, sis-ne separabilis an non, ab hoc corpore; (unde & paulò antè innuebam non fuisse necessarium recur-

recurrere ad Dei potentiam, quâ illa sint separabilia, quæ separatim intelligis) sed de corpore, quod ipsamet sis: quali possis ipsa esse tenue corpus, intra crassum istud diffusum, aut in ejus parte sedem obtinens. Cæterum nondum fecisti fidem esse te aliquid purè incorporeum. Et cum in secunda Meditatione enunciasse te esse non ventum, non ignem, non vaporem, non halitum, admonita profectò es, id sine probatione fuisse enunciatum. Dicebas te de istis rebus illeic loci non disputare: at deinceps non disputasti, neque ulla ratione probasti non esse te corpus hujusmodi. Spes erat, ut heic id præstares: & si quid tamen disputas, si quid probas; disputas & probas te non esse crassum corpus hoc, de quo, ut jam dixi, non est difficultas.

R E S P O N S I O.

Non hic hæreo in iis quæ tediousè sæpe repetisti; me quædam non probasse, quæ tamen demonstravi: me egisse de crasso tantum corpore, cum tamen egi de quolibet etiam quàm maximè subtili, & talia. Quid enim istiusmodi affirmationibus nulla ratione fulciris opponi debet aliud quàm negatio? Sed obiter tamen vellem scire quo argumento probes, me potius de crasso corpore, quàm de subtili egisse? Nempe quia dixi, habeo mihi conjunctum, & certum est me à corpore meo esse distinctam; quæ verba non video cur non aequè subtili ac crasso corpori conveniant, nec puto præter te quemquam videre. Cæterum in 2 Meditatione fidem feci mentem intelligi posse ut substantiam existentem, etsi nihil intelligamus existere quod sit ventus, vel ignis, vel vapor, vel halitus, vel quodvis aliud corpus, quantumvis subtile & tenue; an verò in rei veritate ab omni corpore esset diversa, dixi me ibi non disputare: hic autem de eo ipso disputavi, & demonstravi. Tu verò quæstionem de eo quod potest intelligi, cum quæstione de eo quod revera est confundendo, nihil horum te intellexisse testaris.

I N S T A N T I A.

Incipiendum heic ab extremis verbis, quibus ais testari me, nihil me horum intellexisse, confundendo quæstionem de eo, quod potest intelligi, cum quæstione de eo, quod revera est. Profectò enim admiratione digna est securitas tua, cum paralogismus propalas, quem dissimulatum exoptas; ac dicis me confundere, quæ te confundisse

I.
Spontere-
velari dis-
simula-
sum para-
logismum,
de separa-
tione re-
rum ex se-
paratione
conceptu-
um: Falsè
assumi ut
demon-
stratum.
pōsse De-
um quic-
quid à
quoquam
clare, di-
stinctèque
intelligi-
tur.

M m 2

perpe-

perpetuū sum questus. Nam paralogismum quidem esse, *Ea quæ intelliguntur separatis conceptibus, esse propterea separata reipsā, plusquam constanter objectum est*; Et confudisse te, seu pro eodem habuisse ea, quæ separatim possunt intelligi, cum iis, quæ reverā separata sunt, nihil est frequentius repetitum. Quid enim? Nonne quæstio est, *Utrum Mens sit simul Cogitans, & Extensa*? Ipse fingo me dubitare, & animi gratiā affirmativam partem defendo: Tu probaturus negativam, argumentaris *Rem Cogitantem posse intelligi, non cogitata extensione, veluti etiam rem Extensam non intellecta Cogitatione*: Igitur & rem Cogitantem esse reverā sine Extensione, seu Mentem, quæ est res cogitans, esse reipsā simul extensam. Repono ego Paralogismum esse, quod quæcumque possumus intelligere distinctis, seu separatis conceptibus, non sint propterea distincta, seu separata, (aut, si mavis, separabilia) reipsā; & exemplum afferro de duabus Trianguli proprietatibus, quæ separatim intellectæ, non sunt tamen seu à se mutuo, seu à Triangulo reipsa separabiles. Tu instas, ac vis esse idem posse intelligi, & reverā esse; Ego perfito esse diversa: Tu confundis, ego distinguo: Et ecce tamen tua verba sunt, *me nihil intelligere, quia quæstionem de eo, quod potest intelligi, cum quæstione de eo, quod reverā est, confundam*. Quæso uter nostrum id faciat? Sed nimirum existimasti hoc supercilio prætergrediendum, ut factō quasi fūco difficultas lateret, quam non es ausus attingere. Sic elabendum esse putasti, cum, ut priora verba resumam, dixisti solum te non habere in iis quæ tædiose sæpe repetiis, Te quadam non probasse, quæ tamen demonstraveris. Nempe quasi te istud præloquuto, nemo fuerit requisiturus, ubi-nam, aut quo argumento demonstraveris non modò existere Deum; sed etiam, (quod planè ante istum locum neque petieram, neque repetieram) *ad quæ potentia Deise extendas, ut ostenderes facere Deum posse quicquid tu posses intelligere*. Et agnosco quidem id esse tædiolum; sed tibi nempe, cui aliquid semel dixisse est demonstrasse; qui contradictionis impatiens, non debere neminem putas tibi aliquid asserenti illicò acquiescere; & quidlibet, quomodocumque probaveris, pro demonstrato habere. Nihil heic opus repetere imbecillitatem rationum, quibus tam securè existimas te, Deum existere, demonstrasse; Observo solum te initio hujus sextæ Meditationis occasionem capasse commiscendi illa verba, *Non enim dubium est, quin Deus sit capax ea omnia efficiendi, quæ ego percipiendi sum capax*: nihilque unquam ab illo fieri non posse judicavi, nisi propter hoc, quod illud à me distinctè

distinctè percipi repugnaret. Quorsum id verò? Nempe ut postea subaudiretur, quasi demonstratum & non amplius demonstrandum Principium, cum hoc articulo diceret, *Scio omnia, quæ clarè, & distinctè intelligo, talia à Deo fieri posse, qualia illa intelligo.* Et quæso tamen quomodo demonstraisti: Neque enim aut ea de re aliquid antea dixerat, aut ille loci quid amplius habet? An non id Effatum usurpas ut principium, quo rerum materialium existentiam possibilem probes; ad hoc enim facit causalis particula *enim*; non verò deducis tanquam conclusionem factæ à te demonstrationis? Ecquid ergo tædiosum est, quod obijcitur probari debuisset ad quæ potentia Dei se extendat; & demonstrari facere eum posse quicquid distinctè percipitur à te? An fortè dices ipsum Effatum posteriore sui parte demonstrare priorem? Si dicas; tamen si utraque pars mera sit enunciatio, conficiatur ergo ratiocinium-hac forma;

Si ego judicem aliquid fieri à Deo non posse, propterea quòd illud à me distinctè percipi repugnet; Deus est capax efficiendi ea omnia, quæ ego sic percipiendi sum capax:

Atqui ego judico aliquid fieri à Deo non posse, propterea quòd illud à me distinctè percipi repugnat:

Igitur Deus est capax efficiendi ea omnia, quæ ego sic percipiendi sum capax.

Quæso, an tuum iudicium, tuæque perceptio sit regula eorum, quæ Deus potest, aut non potest; atque idcirco haberi debeat pro inconcusso principio, quod usurpandum illi sit, qui volet demonstrare Deum aliquid posse, vel non posse? An dices debere unumquemque, tui instar, suam perceptionem consulere, propriumque iudicium audire? Si facias, Ergo ad regulam remittes plusquam Lesbiam, & declarabis rationes tuas tibi ipsi quidem; at non cæteris demonstrationes esse. Et certè quæ heic differuntur de divina potentia, cum naturæ excedunt lumen, longè aberis, ut admittas, illam perceptionem, illudque iudicium, quod se habere testabuntur Philosophi Ethnici, naturæ ducti lumine, & demonstrationis percipiendæ capaces. Verùm hac de re posterius nonnulla.

Ecce enim tu heic præsertim hæres circa id quod dixi te hoc loco de distinctione Mentis, & corporis agentem intelligere crassum hoc, sive ex membris constans corpus. Quæris quippe, *Quo argumento problem egisse te potius de crasso, quàm de subtili corpore?* Quanquam quærere nihil est necesse, cum argumentum perspicuum sint ipsi-

I I.
Verè ob-
jectum
fuisse De-
monstra-
tionis ver-
ba intelli-
gi de corpore
crasso, &
ex mem-
bris con-
stante; non
de tenui,
aut qualis-
vis bet.

ma illa tua verba, quibus sub nomine tuæ Mentis, siue animæ ita loqueris: *Et quamvis fortasse (vel potius, ut postmodum dicam pro certo) habeam corpus, quod mihi valde arcte conjunctum est; quia tamen ex una parte, &c. ac statim, certum est me à corpore meo reverâ esse distinctam, & absque illo posse existere. At, inquis, hæc verba non video, cur non æque subtili, ac crasso corpori conveniant, nec puto præter te quemquam videre.* Mirum dictum est, quàm te cautè geras, cum neque ais, neque negas te de crasso heic agere; dicisque solum neque te, neque alium quenquam præter me videre, cur de crasso potius, quàm subtili loquaris. Ac de te quidem non contendo, qui licet millies agnosceres, ne semel tamen fatereris. Verùm, quod spectat ad cæteros, neminem jubeo attendere, qui idem, quod ego, non videat. Et certè, cum sit difficultas, utrum Mens, siue anima existere possit sine corpore, atque adedò moriente corpore perseveret immortalis; equis pervideat aliud corpus heic intelligi, quàm crassum hoc, & ex membris constans? Nempe cum etiam multi Patrum existimârint animam seu mentem esse tenue corpus; adhuc tamen requisierunt, an superesset immortalis cum separaretur à corpore, crasso nempe hoc, seu membris constante; idq; quoniam siue corporea, siue incorporea secundum se sit, quæstio est, num sic distinguatur à crasso hoc corpore, ut ipso soluto, inextoluta permaneat. Quin etiam agnosco doctum illum virum, qui locum ante me expendit, idem pervidisse, cum sic est effatus; *Hactenus de reali Mentis nostræ à corpore distinctione. Cum verò V. C. demonstrandam suscepit animarum immortalitatem, merito quæri possit, an ex ea separatione evidenter sequatur. In vulgaris enim Philosophiæ principiis id minimè sequitur; cum vulgò velint Brutorum animas ab illorum corporibus esse distinctas, quæ tamen cum illis in-
tereant. Sanè heic & hominis corpus & Brutorum corpora cum eo comparata, intelliguntur potius crassa hæc, & ex membris constantia, quàm ulla subtilia. Tu etiam cum sic respondisti; Veruntamen non inficior arctam illam Mentis cum corpore conjunctionem, quam sensibus assidue experimur, in causa esse, cur realem ejus ab ipso distinctionem non sine attenta meditatione advertamus. Tu, inquam, nonne corpus hoc crassum; in quo nimirum sensus sunt, potiusquam subtile, es interpretatus? Sed ad locum ipsum ut redeam, Prætereo primùm te in illo intelligere idem corpus, de quo paullò ante dixeras, Non etiam sine ratione corpus illud, quod speciali quodam jure meum appellabam, magis ad me pertinere arbitrabar, &c. Id porro fuit, non subtile, de quo nulla mentio, sed crassum, & ex membris constans,*

in quo nempe sensus, dolor, fames, &c. *Adnoto solum illa verba, Fortasse (vel potius, ut postmodum dicam, pro certo) habeam corpus, quod mihi valde arte conjunctum est, &c. clarum facere de quonam loquaris. Nam si es loquutus de subtili, potius quàm de crasso, vel saltem æquè de utroque, Ostende vel unicum locum, in quo deinceps dixeris te pro certo habere corpus tibi valde arte conjunctum, quod de subtili vel potius, vel æquè intelligatur; ut ego varia proferam in quibus vel solum vel potius de crasso? Scilicet dicis postmodum, Nihil autem est, quod me ista natura magis expresse doceat, quàm quòd habeam corpus, cui male est, cum dolorem sentio; quod cibo, vel potu indiget, cum famem, aut sitim patior, ac statim, me non tantum adesse meo corpori, ut nau- ra adest navigio, sed illi artèssimè esse conjunctum, & quasi permixtum, adeò ut unum quid cum illo componam; alioquin enim cum corpus leditur, ego qui nihil aliud sum, quàm res cogitans, non sentirem idcirco dolo- rem, &c. Et paulò post, Certum est meum corpus, siue potius me totum, quatenus ex corpore, & mente sum compositus, variis commodis, & in- commodis à circumjacentibus corporibus affici posse. Et rursus, In hac enim complexione multa continentur, quæ ad mentem solam pertinent, ut quòd percipiam id, quod factum est, infectum esse non posse; & reliqua omnia, quæ lumine naturalis sunt nota; multa etiam, quæ ad solum corpus spe- ctant, ut quod deorsum cadat, & similia. Cum illo igitur loco rece- peris dicturum te postmodum habere te pro certo corpus tibi valde arte conjunctum; & corpus, quod te postmodum pro certo habere dixisti, non aliud sit, quàm crassum hoc, & ex membris constans, ut ex verbis re- citatis manifestè intelligitur; An-non meritò dixi te, si quicquam probares, aut concluderes, probare, & concludere de crasso hoc, & ex membris constante?*

Sed esto; non intellexeris solum, aut præcipuè crassum hoc, & ex membris constans; qualenam ergo intellexisti aut solum, aut præ- cipuè, aut nisi præcipuè, saltem ex æquo, cum dixisti te, siue Men- tem tuam habere pro certo, corpus valde arte conjunctum, & à quo pro- bes, atque concludas mentem ita esse distinctam, ut absque illo possit existere? Necesse est sanè id dicas aut aërem, aut ventum, aut spi- ritum, aut halitum, aut vaporem, aut ignem, aut aliud hujuscemo- di. Sunt igitur Mens, & tenue hoc corpus quidpiam valde arte connexum, & à crasso hoc, membrisque constante corpore di- stinctum. Ergo id connexum hujusmodi est, quale objeci posse Mentem, siue animam concipi, adeò proinde ut possit corpus, substantia, Res cogitans dici. Quare & quæstio superest, an Mens sit ip-

III.

*Esse ex se-
cunda Me-
ditatione
colligatur
mentem
concipi
ut substan-
tiam, seu
rem exis-
tentem
per se; non
colligi sa-
men esse
ipsam
propterea
substan-
tiam, siue
rem per se
existentem.*

fit ipsum tenue corpus ; quod cogitandi capax sit ; an verò quidpiam distinctum sit , separabilèque ab illo. Defendente te hoc posterius ; objeci non fecisse te quam fueras pollicitus fidem. Respondes jam te in secunda Meditatione fidem fecisse, *Mentem intelligi posse ut substantiam existentem , etsi nihil intelligamus exsistere , quod sit ventus, vel ignis, vel vapor, vel halitus, vel quodvis aliud corpus, quantumvis subtile, & tenue.* Sed imprimis falsum est te hujus rei fidem fecisse ; Nam ne propositum quidem fuit, *esse te substantiam existentem* ; sed solum esse rem cogitantem præcisè ; quod etiam suo loco admonui, & hoc ipso repeti fuisse à te simpliciter, & sine probatione enunciatum. Et concessi quidem posse Mentem intelligi, seu considerari, ut rem cogitantem præcisè ; sed ab initio usque concessum non fuit, non esse te propterea tenuem aliquem aërem istis membris infusum ; non ventum, non ignem, non vaporem, &c. Quippe cum aliud sit spectari præcisè ut tale, & esse duntaxat id, quod per præcisionem intelligitur. Potest enim homo, ex. gr. spectari præcisè *ut rationalis* ; at quia in illo statu præcisionis per intellectum factæ intelligitur solum *ut rationalis*, vitiosa erit consequutio ; si inferatur *non esse illum animal* ; quemadmodum si eodem spectato præcisè *ut est animal*, inferatur *non esse rationalem*. Deinde esse poterunt, qui tibi concedant Mentem esse rem cogitantem & non propterea tamen concedant esse substantiam seu cogitantem, seu existentem ; Quippe tueri poterunt talem rem esse Facultatem, quæ spectari possit præcisè ut facultas ; & ut cogitans est ; non cogitata substantiâ, neque conditione substantiæ, cui inest. Sed ut concedatur & esse substantiam, & intelligi ut substantiam, eamque existentem, & ut hoc adjiciam, per se existentem : hæc est tamen præcisio, sive hic præcisionis status, in quo alius animæ gradus non intelligitur, quàm substantiæ. Quare, *ut homine spectato, tanquam animali*, seu sentiente corpore, præcisio, sive status est, in quo non attenditur neque rationalis, neque irrationalis gradus ; ita Mente spectata *ut substantiâ, seu existente per se*, præcisio, sive status est, in quo neque corporeus, neque incorporeus attenditur gradus. Ac proinde, cum ais *Mentem intelligi posse ut substantiam, etsi intelligamus nihil exsistere, quod sit corpus*, concedi profectò id potest ; sed debes tu quoque concedere, *posse Mentem intelligi, ut substantiam. etsi nihil intelligamus exsistere, quod sit incorporeum.* Par enim est ratio ; Nam alioquin (ut constat) non esset præcisio, sed consideratio generis cum alterutra differentia, scilicet con-

contra suppositionem. Et tu sanè agnoscis præcidisse te ab utroque gradu, hoc est non modò corporeo, sed etiam incorporeo, his verbis, *An verò in rei veritate ab omni corpore esset diversa, dixi me ibi non disputare.* Itaque ex tota secunda Meditatione nihil aliud habetur, quàm Mentem, sive animam intelligi posse præcisè ut substantiam, seu rem existentem per se: Hòcque fuit, quasi principium, quod deinceps quasi dormire permillum, dum ad alia excurreres, in sexta demum Meditatione excitaveris, Pergis scilicet, *Hic autem de eo ipso disputavi, & demonstravi.*

Cæterùm quænam tua fuerit disputatio, ac demonstratio, ex tuo contextu intelligi licet. Cùm enim ab initio usque sextæ hujus Meditationis visus fueris disputationem hac de re instituere, ob positum illud, quod paulò antè recitatum est, de potentia Dei principium, ac deinceps ea, quæ de Imaginatione, ac sensu sunt commemorata interposueris; tum denique demonstrationem texere hoc loco voluisti. Quomodo verò? Certè eà formà, quæ perturbatissima videatur. Ita enim exorsus es, *Quoniam scio omnia, quæ clarè, & distinctè intelligo, talia à Deo fieri posse, qualia illa intelligo; Quæ* causalis fuit propositio, & quasi antecedens, ex quo deduxisti istud consequens, *Satis est, quòd possim unam rem absque altera clarè, & distinctè intelligere, ut certus sim unam ab altera esse diversam; cùm* videretur potius inferendum, *Satis esse quòd posses intelligere duas quasdam res esse diversas, (quod quidem fieret intelligendo clarè & distinctè unam, absque altera) ut certus esses posse Deum illas diversas facere.* Sequitur, *Quia potest saltem à Deo seorsim poni, & non refert à qua potentia id fiat, ut diversa existimetur.* Quæ propositio rursus est causalis, & vel cum priore præmittenda fuit, vel prior illa fuit postponenda simul cum hac, ne consequens inter duas causales veluti strangularetur; aut saltem duplex antecedens, duplex consequens distinguendum fuit, ut intelligi posset illa dici à te diversa, quæ seorsim poni seu divinà, seu quavis alià potentià possunt. Infers consequenter hoc modo, *Ac proinde ex hoc ipso, quòd sciam me existere, quòdque interim nihil planè aliud ad naturam, sive essentiam meam pertinere animadvertam, præter hoc solum, quòd sim res cogitans, rectè concludo meam essentiam in hoc uno consistere, quòd sim res cogitans.* At cùm Enthymema integrum heic statuas, quonam modo ipsum ex iis, quæ præcedunt, deducis? Sed nempe voluisti id intendere ex secunda Meditatione, ut efficeretur quasi membrum generalis Propositionis in demonstrativo tuo Syllogismo; cùm tamen trans-

I V.
Demon-
stratio per-
surbatè
proposita
reducitur
in syllogi-
sticam for-
mam.

ferri in Assumptionem debuerit, ut ipsa duas parteis habente, alterā de Mente, alteram de corpore, efficeretur probatio prioris. Pergis, *Et quamvis fortasse (vel potius, ut post-modum dicam, pro certo) habeam corpus, quod mihi valde arte conjunctum est; Hic autē est veluti apparatus ad Assumptionem, quæ hīcē verbis continetur, Quia tamen ex una parte clarā, & distinctā habeo Ideā meī ipsius, quatenus sum tantum res cogitans, non extensa; & ex alia parte distinctā Ideā corporis, quatenus est tantum res extensa, non cogitans; Tam verò demū sequitur Conclusio his verbis comprehensa, Certum est me à corpore meo reverā esse distinctā & absque illo posse existere. Atque ista quidem est tua demonstratio, cujus quod sit robur, ut melius innotescat, videtur posse Syllogismus in hunc modum constitui;*

Ut certum sim ex duabus rebus unam esse ab altera diversam, scis est, ut possim unam absque altera clarē & distinctē intelligere; Quoniam scio omnia, quæ clarē & distinctē intelligo talia à Deo fieri posse, qualia illa intelligo; & potest una illarum rerum saltem à Deo seorsim poni, neque refert à qua potentia id fiat, ut diversa existimetur;

Atqui quamvis fortasse (vel potius, ut postmodum dicam, pro certo) habeam corpus, quod mihi valde arte conjunctum est, nihilominus ex una parte, clarā, & distinctā habeo Ideā meī ipsius, quatenus sum tantum res cogitans, non extensa (quia, ex hoc ipso, quod sciam me existere, quodq; interim nihil planē aliud ad naturam, siue essentiam meam pertinere animadvertam, præter hoc solum, quod sim res cogitans, recte concludo meā essentiam in hoc uno consistere, quod sim res cogitans) & ex alia parte habeo distinctā Ideā corporis, quatenus est tantum res extensa, nō cogitans: Igitur certum est me à corpore meo reverā esse distinctum, & absque illo posse existere.

Si aliquid ad formam desit, si eadem verba in propositione, in assumptione, in conclusione non reperiuntur, non alium, quàm teipsum accusa. Ad Materiam ipsam quod spectat, Repetendum imprimis est, cum hanc, quam vocas Demonstrationem penes te ipsum peragas; cum de te duntaxat loquaris; cum ipse de te tibi ipsi spondeas, invidendum quidem non esse, si cum testeris omnia tibi adeo clarē, & distinctē intelligi, testeris etiam omnia tibi adeo clarē, atque distinctē demonstrari. Enimverò cum ita sit; non est tamen cur stomacheris, nisi cæteri hominum eadem sibi ipsis demonstrata putent, cum tu eos nempe non alloquaris, ut ipsos erudias,

V.
Vitiis
demon-
strandi
modus, ex
eo, quod
quis dicit se
in seipso ex-
periri. Pa-
ralogis-
mum hec
repeti, qui
fuit in-
culcatus
in Medi-
tatione II,
de separa-
bilitate ra-
tionis ex se
parabili-
tate con-
ceptuum.

dias, sed recites solum quid tibi contingat, dum tacitus ratiocinaris. Certè cum res aliis demonstrandæ sunt, alia methodo videtur agendum. Nam, quòd te in exemplum proponas, ut alii imitentur te, hoc est illis ostendere quæ principia te ad persuasionem coegerint; non quæ cogere alios possint; ac exigere, ut si aliqua non videantur satis roboris habere ex se, ex tua persuasionis exemplo accipiant, fiatque ex tua auctoritate præjudicium. Legitima Methodus est, quæ ad hominem instituitur, quæque principia, cujusmodi sunt proponere simpliciter, & ut se habent, non erubescit. Quippe ut veritas seipsa amabilis est, neque fucum quærit; ita Demonstratio, qua agnoscitur, quòd simplicior est, denudatiórque ambagibus, eò magis est præferenda. Deinde, quia non contentus fecisse te tibi tua methodo fidem, contendis eandem fidem debere cæteris mortalibus fieri, qui eodem tecum ratiocinio usi fuerint; ideirò repetendum quidem foret debuisse te ergo ratiocinari solidius, & usurpare principia, qualia ad germanam Demonstrationem exiguntur; verum repetenda non sunt, quæ huc usque allata sunt, ut qua principiorum imbecillitate tua ratiocinia niterentur, pateret. Heinc est cur non videatur jam immorandum circa ea omnia, quæ proposita abs te Demonstratio complectitur; sufficiatque attingere, quòd ex Meditatione secunda remissum in hunc locum fuit. Nempè & illeic notavimus abduci te hoc ratiocinio;

Ille sunt reipsa distincta, quæ ego distinctis conceptibus considero:

Atqui substantiam cogitantem, & substantiam corpoream distinctis conceptibus considero:

Igitur substantia cogitans, & substantia corporea sunt inter se reipsa distincta.

Quæ ratiocinatio ab ea, quæ est hujus loci nõ differt. Nam licet in hujus Propositione *Diversitatis* voce utaris, in Conclusionem *distinctio- nis*, excipies tamen velle te idem utraque voce significare; Et tamen si propositioni hanc probationem adhibeas, *Quoniam scio omnia, quæ clarè, & distinctè intelligo, talia à Deo fieri posse, qualia illa intelligo, &c.* id videtur nihilominus pro instituto supervacaneum. Etenim, aut potentia Dei, ad quam confugis, est absoluta, seu qua Deus operatur aliquid supra naturæ ordinem, cujusmodi sunt, quæ solemus appellare miracula; aut ordinaria, seu qua Deus juxta naturæ ordinem agit, cooperando, & concurrando, tanquam causa universalis cum quibuscumque singularibus. Et si ad absolutam quidem; præter institutum id facis, qui demonstrationem, hoc est rationem natu-

turalem pollicitus, ad supernaturale argumentum recurris, & non Philosophum, sed Theologum agis. Neque est cur præoccupes, *Nihil referre, à qua potentia res una seorsim ab alia ponatur, ut diversa existimetur*: Nam non refert quidem à qua potentia id fiat, ut diversa existimetur; sed refert sanè à qua fiat, ut demonstretur. Quippe si fiat à supernaturali, cadet quidem in existimationem, seu fidem supernaturalem; at non cadet tamen in demonstrationem, seu persuasionem naturalem. Sin confugis ad ordinariam, rem instituto inutilem facis: quoniam potentia Dei ordinaria nihil insolitum molitur, & res omneis, quales in se sunt, si separatæ, separatas; si separabiles, separabileis; si inseparabiles, inseparabileis sunt: neque potest magis in argumentum separabilitatis, aut inseparabilitatis assumi, quàm potest assumi ipsamet naturalis potentia, secundum quam una res ab alia separabilis, aut inseparabilis est. Ex quo fit, ut cum ad effectum naturalis separationis duæ causæ concurrant, nempe ordinaria, ac generalis Dei, & naturalis, ac particularis rei; & aliunde illa huic commensuretur, determineturque, & innotescat per ipsam; fit inquam, ut si naturalis cognoscatur; frustra recurratur ad ordinariam, quæ nihil amplius contineat, & si quid manifestetur, per illam solam manifestetur. Si ignoretur; frustra adhuc ad ordinariam recurratur, quæ ignoretur ipsa quoque, & dici qualis sit, aut ad quid se extendat, non possit.

VI.

Ex responsis ad alios colligi, quid ad objectum de duabus Trianguli proprietatibus, quæ concipi quidem, sed existere tamen separarim non possint, respondendi potuerit.

Veruntamen, ut concedatur licuisse tibi demonstraturo, utramlibet Dei potentiam pro argumento usurpare; Age, cum Theologi admittant esse aliqua inter se distincta, quæ separari tamen, ac seorsim poni neutrà potentiâ valeant, quod-nam tu adhibes Criterium, ut quæ separabilia sunt, ab inseparabilibus discernas? *Ve certus sim*, inquis, *unam rem esse ab altera diversam, satis est, quod possim unam absque altera, clarè, & distinctè intelligere*. Hac de causâ ego opposueram *duas Trianguli proprietates*, quarum una possit sine alia clarè, & distinctè intelligi, cum sic diversa tamen non sit, ut juxta tuam interpretationem poni seorsim ab illa possit. Tu ad hoc nihil respondisti. Et venerat quidem in Mentem exemplum illud de *Injustitia, & Misericordia in Deo*, quod observavi deinceps fuisse à Theologo docto objectum; sed consultò tamen abstinendum duxeram ab exemplo Theologico; ne, quia, tametsi Theologicè agens videri volebas Philosophicè agere, conqueri posses te extra fineis Philosophicos traduci; ac idem egi, quod deinceps quoque egisse alium deprehendi, dum usurpavit *duas proprietates Trianguli inscripti semicirculo*,

culo, nempe esse Rectangulum, & habere basin, cujus quadratum sit eorum quadratis æquale. Cum tu verò ad utrumque aliquid responderis, & videatur posse responsio ad meum exemplum accommodari, Age, quid dixisti ad Primum? Nempe agnovisti imprimis *Distinctionem duplicem; unam formalem, seu modalem, quam censuisti esse inter entia incompleta, in quibus sufficit, ut unum ab alio distinctè & seorsim concipiatur per abstractionem intellectus rem inadæquatè concipientis: alteram realem, quam censuisti esse inter entia completa, quæ ita distinctè, & seorsim concipiuntur, ut unumquodque tanquam Ens per se, & ab omni alio diversum intelligatur.* Deinde afferendo exemplum subjunxisti; Ita inter figuram, & motum ejusdem corporis distinctio est formalis, possumque optimè motum intelligere absque figura, & figuram absque motu, & utrumque abstrahendo a corpore: sed non possum tamen completè intelligere motum absque re, in qua sit motus, nec figuram etiam absque re, in qua sit figura; nec denique fingere motum esse in re, in qua figura esse non possit, vel figuram in re motus incapace. Tertio exemplum objectionis ita proinde es interpretatus, Nec eodem modo Insistiam absque justo, vel misericordiam absque misericorde intelligo; nec fingere licet illum eundem, qui est justus, non esse misericordem. Denique dixisti idem non esse de Mente, & corpore, verum de hoc postea. Quid ad Secundum? Nempe verba tua sunt, Primò, *Quamvis forte Triangulus sumi possit in concreto pro substantia figuram habente triangularem: Certe Proprietas habendi quadratum basis æquale quadratis laterum, non est substantia, nec proinde unumquodque ex his duobus potest intelligi, ut res completa, & nec potest quidem res vocari, eo sensu, quo dixi satis esse, quòd possim unam rem (nempe rem completam) absque altera intelligere, &c.* Secundò, *Quamvis clarè & distinctè possimus intelligere Triangulum in semicirculo esse rectangulum, absque eo, quòd advertamus ejus basis quadratum æquale esse quadratis laterum; non tamen ita possumus clarè intelligere Triangulum, in quo basis quadratum sit æquale quadratis laterum; quin simul advertamus esse rectangulum.* Tertio, *Quamvis conceptus Trianguli semicirculo inscripti talis haberi possit, ut in eo æqualitas inter quadratum basis, & quadrata laterum non contineatur; non potest tamen haberi talis, ut nulla proportio inter basis quadratum, & quadrata laterum ad hunc Triangulum pertinere intelligatur; ac proinde quandiu ignoratur qualis sit ista proportio, nulla de eo potest negari, nisi quam clarè intelligamus ad ipsum non pertinere; quòd de proportionem æqualitatis nunquam potest intelligi.* Agnosco ex his quid potueris ad meum Exemplum respondere; Nempe, illas duas proprietates non esse

duas res, sive substantias, sive duo entia completa, cujusmodi tu in Propositione intellexisti; quare & posse quidem unam sine altera optime, seu clarè distinctèque intelligi; sed non tamen complete absque corpore, in quo Triangulum sit; Et cum sit proinde inter illas formalis solum distinctio, mirum non esse, si neutra sine altera, Trianguloque ipso, aut triangulari corpore existere possit.

VII.

*Quæstio-
nem male
instituta
tam. Non
quæri an
duæ com-
pletæ sub-
stantiæ
sine sepa-
rabiles;
sed an duo
quædam
separatim
intellecta
sint duæ
completæ
substan-
tiæ?*

Sed Imprimis, videtur res esse consideratu digna, prodi à teipso aded manifestè tuæ propositionis, atque aded totius tuæ demonstrationis fallaciam. Etenim cum quæstio non sit de duabus rebus separatis, quas & duas esse, & diversas esse manifestum est; Nonne difficultas est de Re, quam tu non unam, sed duas dicas, nempe quæ licet aded arctè jungantur, ut una appareant, distinctionem tamen inter se tuentur, ob quam separabiles sunt; alii verò dicant non duas, sed unam, quæ tametsi concipiatur duobus diversis conceptibus, unitatem tamen tuetur, ob quam illa, quæ obijciuntur hujusmodi conceptibus, remanent inseparabilia? Quæstio certè est de natura Mentis, an nimirum corporea sit; Et cum difficultas non sit, an sit crassum hoc, sive ex membris constans corpus; ambigitur tamen, sit-ne corpus tenue, quod tu etiam non diffiteris, ut ex jam dictis colligitur, esse illi valde arctè conjunctum. Cum tu autem velis rem cogitantem, quam Mentem vocas, & rem extensam, quam corpus dicis, tametsi ita connectantur, ut una res esse appareant, esse nihilominus duas res, quæ distinctionem retineant, & separari valeant: alii volunt (aut potius, ut rationum tuarum vim probent, animi solum gratiâ defendunt) Mentem esse unam rem, quæ extensa sit, & cogitans sit; & quamvis nunc ut cogitans, nunc ut extensa concipiatur, atque idcirco videatur duæ res, nihilominus una sit, & illud quod cogitat, separabile non sit ab eo, quod est extensum. Atque hæc quidem est hypothesis: Iam tu de Thesi ita profaris, *Satis est, quod possum unam rem absque altera clarè, & distinctè intelligere, ut certus sim unam ab altera esse diversam.* Quid-nam verò interim agis? scilicet pro principio assumis id-ipsam, quod tibi controvertitur, nempe duas res esse, quas non duas, sed unam esse à cæteris controvertitur. Ac si intelligeres quidem duas res eo modo, quo Theologi accipiunt, cum de distinctionibus agunt; dici sanè posses contineri intra quæstionem, seu, ut vulgò ajunt, manere in terminis; at tu nomine unius, & alterius, sive duarum rerum, intelligis duas substantias, nullo autem modo duas proprietates, duas facultates, &c. ut ad Doctores respon-

respondisti ; Quare & omnino præterlaberis quod probandum est , proponens duas res , seu substantias , illis , qui duas negant , & esse unicam defendunt. Quid quodd , cum difficultas sit , an inter illa , quæ tu duo , illi unum dicunt , sit formalis , an realis distinctio , & tu contendas esse realem , ipsammet realem pro medio , sive argumento usurpas ; dum non distinctionis voce uteris , sed diversitatis , quam illicò interpretaris esse idem non cum distinctione in genere , sed cum distinctione reali speciatim , secundum quam una res potest separatim ab alia poni ? Taceo nemini unquam dubium fuisse de duabus substantiis , seu rebus tuo sensu completis , distinguenter ne realiter , & separari , existeréque seorsim ab invicem possent ; sed vel de duabus substantiis incompletis , una ut actu , alia ut potentia , quales materiam , & formam dicunt ; vel de substantia , & accidente , ut substantia corporea , & Quantitas sunt ; vel de duobus accidentibus , ut sunt quantitas , & repletio loci. Quare & nihil est , quod agis , cum ex tua intellectione probas duas substantias sive res completas , esse duas substantias , sive res diversas , realitérve distinctas , & capaces , quarum una ponatur seorsim ab alia. Videlicet hoc apud omnes in confesso est , & à nemine tibi controvertitur , neque opus est ut molimine tanto ad potentiam Dei confugias. Quæstio est , an cum duo sunt (non dicito res ; dicito entia incompleta ; dicito , ut volueris) an , inquam , cum duo quædam sunt , quorum unum clarè , & distinctè sine altero intelligitur , ut tu non negas posse unam proprietatem Trianguli sine alia intelligi ; distinguatur propterea reipsa unum ab altero , & seorsim poni ab illo possit. Et tu nihilominus vis esse solimmodo quæstionem de clara , & distincta notitia in duabus completis substantiis ; Quasi res eò non tendat , ut explicetur , an extensum esse , & cogitare sint duæ proprietates ejusdem substantiæ , an constituent duas distinctas substantias ; & non probandum tibi incumbat , non utrum completæ substantiæ sint diversæ , distinctæve realiter ; sed utrum illa , quorum unum sine altero clarè , distinctèque intelligitur , sint duæ completæ substantiæ ?

Deinde , obiter ne dicam videri frustra torqueri te , tum ut discrimen statuas inter ea quæ realiter , & formaliter distinguuntur ; tum ut tuearis notionem , quam pro distinctione utraque proponis. Etenim , cum uno hoc verbo negotium tibi confectum sit , *Solæ res , seu substantiæ completæ , quarum unam , sine altera clarè , & distinctè intelligo , distinguuntur realiter ;* non est , cur abs te amplius expectetur. Et ecce

VIII.

Frustra recurri ad distinctionem adequatam , & inadaquatam cognitionis : cum nulla adequata sit , aut cognosci adæquata possit.

Et ecce tamen ad non parvas videris redactus angustias, dum inter cætera coactus explicare adæquatam, inadæquatamque cognitionem, variè te verſas, & sic concludis; *Itaque ubi dixi non ſufficere, quòd una res abſque alia intelligatur per abſtractionem intellectus rem inadæquatè concipientis; non putavi inde poſſe inferri ad diſtinctionem realem requiri cognitionem adæquatam; ſed tantum cognitionem, quam per abſtractionem intellectus non redderemus inadæquatam. Longè enim aliud eſt cognitionem aliquam eſſe planè adæquatam, ut à nobis per abſtractionem intellectus inadæquatam non reddi percipiamus. Si putàras porrò ad diſtinctionem realem non ſufficere, ut una res intelligatur abſque alia per abſtractionem intellectus rem inadæquatè concipientis, ecquid fuerat rei, cur non putares poſſe inferri, Exigi igitur, ut una res abſque alia intelligatur per abſtractionem intellectus rem adæquatè concipientis? An-non legitima conſequutio? Et cùm concipere adæquatè ſit habere cognitionem adæquatam; cur non putaſti exigere cognitionem adæquatam? Putavi, inquis, ſufficere cognitionem, quam per abſtractionem intellectus non reddamus inadæquatam. Sed quid eſt hoc, reddere nos cognitionem inadæquatam per abſtractionem intellectus? Quid inadæquatam cognitionem vocas? An-non illam, quæ non adæquatur rei cognitæ, ſeu qua non totum, quicquid eſt in re, ſed partem ſolùm cognoviſimus? Cognitionem certè adæquatam definiſ, in qua continentur omnes omnino proprietates, quæ ſunt in re cognita, qualem Deus ſolus novit ſe habere. Igitur, cùm verum ſit nullam eſſe rem, cujus pluſquam partem eorum quæ in ipſa ſunt, cognoviſſamus; nulla noſtra cognitio non inadæquata eſt. Igitur nulla adæquata eſt; aut (quia tu non viſ hoc diſcerte fateri) quam ſcire poſſimus eſſe adæquatam, niſi à Deo reveletur, qui poteſt plura poſuiſſe in re, quàm à nobis cognoviſcatur? Igitur nullam cognitionem quæ ſit adæquata; aut quam dicere poſſimus eſſe adæquatam, inadæquatam reddimus per abſtractionem intellectus. Quid ergo nos per abſtractionem reddere inadæquatam vocas? Certè omnis noſtra cognitio eſt abſtractio quædam, quatenus ex iis omnibus quæ Deus in re poſuit, quæque cognoviſcibilia ſunt, aliqua ſolùm cognoviſimus, ſicque quaſi abſtrahimus, ut cætera incognita maneat: vel quatenus ex iis, quæ habitu cognoviſimus, unum quid actu conſideramus, ſicque velut abſtrahimus, ut cætera excluſa à conſideratione cenſeantur. Itaque, ſi nulla noſtra cognitio ſine abſtractione eſt; ſi nulla abſque excluſione plurium, quæ in re cognita, cognoviſcibilia ſunt; ſi nulla proinde non inadæquata per abſtractionem ſit; quid ut ſpecialeſ casum*

sum proponis, reddere nos cognitionem inadæquatam per abstractionem intellectus? Longè aliud est, inquis, cognitionem esse plane adæquatam, & aliud esse aliquousque adæquatam. Verùm nulla cognitio adæquata est, si adæquata planè non est; & si aliquousque solum adæquata dicitur, inadæquata reipsa est. Nam & si quæratur utrum Pygmæus sit adæquatus Giganti, Dices tu non esse quidem planè adæquatum, sed aliquousque tamen esse adæquatum, quoniam altitudine sua ad dimidium cruris Gigantis assurgit. Veruntamen eo ipso, quo non nisi partis altitudini adæquatur, inadæquatus reipsa est. Quare & nihil prodest sic distinguere, ut cognitionem ex adæquata fieri inadæquatam dicas. Sic neque prodest adjicere, debere eò usque esse adæquatam, ut à nobis per abstractionem intellectus inadæquatam non reddi percipiamus. Siquidem nulla prorsus est, quam non percipiamus inadæquatam reddi; cum sive complectatur omnia, quæ de re cognoscimus, inadæquata reddatur; quatenus ab ea excluduntur cætera omnia, quæ ignoramus, neque nisi Deo revelante percipere possumus, quæ sint, aut non sint: sive complectatur solum partem eorum, quæ habitu cognoscimus, inadæquata reddatur, quatenus ab ea excluduntur alia, quæ minimè consideramus. Dico ergo jam; Si sint duo aliqua Entia, (non ausim per te dicere duas res) quæ in separata videamus, & quæstio sit an illa sint à se mutuo separabilia, distinguanturve realiter, & tu affirmes, ego negem; quomodo mihi fidem facies? An dicere poteris nihil Deum posuisse in utroque Ente, quod non clarè & distinctè percipias? non poteris certè, nisi simul dicas Deum tibi id revelasse. An te habere cognitionem utriusque ita adæquatam, ut non reddi inadæquatam percipias per abstractionem intellectus? Non sanè, ob ea, quæ dicta jam sunt. Quomodo ergo dicere poteris non esse aliquid in utroque, quod sit veluti nexus individuus, ob quem sint à se invicem inseparabilia, neque realiter distinguantur? Quousque certè novæ omnia, quæ in utroque sunt, ita ut nihil prorsus te lateat; poterit semper esse suspicio nihil repugnare quin sit aliquid, unde separabilitas, realisque distinctio tollatur.

Nunc, cum dicendum pluribus de Assumptione videretur, videtur res planè confecta ex iis, quæ disputata sunt in Meditationem præsertim secundam: restat jam pauca applicemus. Itaque cum quæstio sit de Re cogitante, & de Re extensa, an sint nempe duæ completæ diversæque substantiæ; an potius una substantia cum duabus diversis proprietatibus; suppono difficultatem non esse de re

O o

cogi-

IX.
Quæstio-
nem esse de
speciali co-
gitatione.
& extensi-
one; ac
probatum
adhuc non
esse, re-
pugnare
rei exten-
sæ, corpo-
reæve, ut
cogitet.

cogitante, neque de re extensa universè; siquidem Deus, & Angelus sunt res cogitantes, ferrum, & lapis, res extensæ; & non controversatur tamen heic an Deus quoque, & Angelus dici possint res extensæ; neque an ferrum, & lapis res cogitantes. Est itaque speciatim difficultas de Mente humana, & consequenter de speciali cogitatione, & de speciali extensione, quæ vel illius propria sit, vel propria esse existimetur. Ipsemet certè rem definiisti, cum exemplum afferens distinctionis formalis, censuisti motum, & figuram accipi debere non universè, & quasi posset intelligi motus globi ex una parte, & figura cubi ex alia; sed specialiter, & respectu ejusdem corporis, v. c. globi, in quo sit specialis motus, ut puta volutatio, & specialis figura, ut puta rotunditas. Quare & bene intelligitur non debere heic accipi cogitationem, extensionemque universè, & quasi posset intelligi cogitatio Mentis ex una parte, & extensio corporis crassioris, seu ex membris constantis ex alia; sed specialiter, & respectu ejusdem substantiæ, v. c. Mentis, in qua, ut dictum est, sit specialis cogitatio, ut puta humana; & sit (vel esse defendatur) specialis extensio, ut puta corporis tenuioris. Heinc quia, cum in propositione dixeris, *certum te esse omnia, quæ clarè, & distinctè intelligis, talia à Deo fieri posse, qualia illa intelligis* (& quamvis res non sit concedenda, ut demonstrationis principium, ut ex antedictis intelligitur, suo tamen modo admitti valeat) assumis deinde *re clarè, & distinctè intelligere Mentem, ut rem cogitantem, non extensam; & corpus, ut rem extensam, non cogitantem*; hoc ipsum est, quod tibi negatur, & quod demonstrare est operæpretium; quatenus est quæstio de cogitatione, & extensione speciali, seu quæ accipitur respectu ejusdem tenuis corporis. Ac dices quidem cogitationem, extensionemque specialem sub generali contineri; & te, cum intelligis universè Nullam rem cogitantem esse extensam, nullam extensam cogitantem, excludere specialem extensionem à mente cogitante, & specialem cogitationem à tenui corpore extenso: Verum cum id tibi negetur de specie, vides profectò quanto jure negetur tibi de genere. Quomodo enim tibi concedatur nullam rem cogitantem esse extensam, ab eo, qui defendit Mentem cogitantem esse extensam? aut nullum corpus extensum esse cogitans, ab eo, qui defendet tenue corpus extensum esse cogitans? Nō est profectò in te, ut probes nullam rem extensam esse cogitantem, nisi inductione omnium corporum; at cum ille tibi inducenti de cæteris concefferit, ubi connumerare voles illud tenue quoque, quod defendet,

fendet Mentem ; nonne pernegabit , & dicet te probare idem per idem ? Quomodo ergo fidem facies nullam rem extensam cogitantem esse ? An dicendo repugnare ut corpus, sive res extensa cogitationem eliciat ? sed perinde est , & hoc ipsum est , quod ab iplo usque initio probandum esse objicitur (repugnare nempe naturæ corporeæ ; sive extensæ, ut cogitet) neque in te, ut probares, fuit. An dices probatum manere ex eo , quòd clarè & distinctè intelligis cogitationem , non cogitata extensione ; & vice versa extensionem non cogitata cogitatione ? At pari modo dicis te optimè, sive clarè, & distinctè motum absque figura, & figuram absque motu intelligere ; cùm tamen accipiendo motum , & figuram respectu ejusdem corporis , non possis completè , hoc est clarè & distinctè intelligere mobile sine figura , aut figuratum sine motu.

X.

Hoc ipsum est, inquires, quod dicere volui ; Nam exemplo allato, & justitiæ, ac misericordiæ Dei applicito, subjunxi hæc verba, *Atqui completè intelligo quid sit corpus, putando tantum illud esse extensum, figuratum, mobile, &c. & vice versa intelligo Mentem esse rem completam, quæ dubitat, quæ intelligit, quæ vult, &c. quamvis negem in ea quicquam ex iis, quæ in corporis Idea continentur ; quod omnino fieri non posset, nisi inter mentem, & corpus esset distinctio realis.* Veruntamen quæso ex te, quo de corpore loqueris, cùm te id completè intelligere dicis ? Si intelligas aliud, quàm hoc tenue, de quo controversitur, sit-ne simul extensum, & cogitans ; præter questionem versaris. Siquidem quamvis concedatur notionem corporis generalem esse, ut sit extensum, figuratum, mobile, non autem cogitans ; nihilominus illa notio est solùm abstractio continens id, quod est commune omnibus corporibus ; sed non obstat tamen, quin ut specialium corporum completæ notiones habeantur, tam debeant illud, quàm specialia discrimina includere. Sic nimirum corpus universè quidem intelligitur solùm extensum, figuratum, mobile, &c. non item verò animatum, aut sentiens : At hoc non obstat, quin, ut intelligamus speciale id corpus, quod dicitur animal, debeamus præterea intelligere animatum, & sentiens. Quo eodem modo dicam, posse te quidem intelligere corpus universè ut solùm extensum, figuratum, &c. non item ut cogitans ; at hoc non obstat, quin, ubi agetur de corpore tenui, ac mentis proprio, id cogitans quoque intelligi debeat. Heinc, si de hoc ipso met loquaris, ut de ipso solo controversia est ; vides quemadmodum negetur id completè

Licet esse extensio sine cogitatione, & cogitatio sine extensione possit, nondum tamen esse probatum, non posse simul utrumque esse in eodem tenui corpore, quale esse possit anima, idque etiam ex retorice exemplis.

pletè intelligi, dum intelligis solum, ut extensum, figuratum, mobile, &c. Quia cum completè, seu adæquatè aliquid intelligere sit, quicquid est in re intellecta, intelligere; dicèris eo ipso incompletè, seu inadæquatè intelligere tale corpus, quatenus non intelliges eam, quæ est in ipso, cogitationem. Idem proportionè dicendum de Mente, quam dicis te, ut rem completam intelligere; quoniam inadæquatam, & incompletam intellectionem tuam id arguit, quòd omnia, quæ in ipsa sunt, non intelligas; cum præter id, quod dubitat, intelligit, vult, &c. censerì possit esse extensa. Ut simul proinde tuum exemplum urgeam, Tametsi non possit esse motus, (corporeus nempe) sine figura, & possit nihilominus figura esse sine motu; Quatenus tamen accipiuntur motus, & figura in corpore eodem, dum reipsa movetur, ut in globo, dum volvitur, inseparabiles planè sunt, seu nō potest esse talis volutio sine tali rotunditate; neq; talis rotunditas sine tali volitione; quia dum seorsim intelliguntur, incompletè intelliguntur; & dum intelliguntur completè, hoc est cum ipso globo, tunc non intelligitur rotunditas sine corpore, in quo sit volutio; neque volutio sine eodem corpore, in quo sit rotunditas. Quo eodem modo neque iustitia, neque misericordia divina esse poterunt altera sine altera; quia si seorsim conciperentur, incompletè conciperentur; & dum completè concipiuntur, cum uno eodèmq; Deo concipiuntur; neque similiter duæ illæ proprietates Trianguli; quòd dum seorsim intelliguntur, incompletè intelligantur; & dum completè intelliguntur, non intelligantur nisi cum eodem Triangulo, corpore triangulari. Pari jam modo, Tametsi non possit esse cogitatio (intellige humana) sine extensione, & possit nihilominus extensio esse sine cogitatione: Quatenus tamen accipiuntur in eadem Mente reipsa existente, inseparabiles planè sunt, hoc est, non potest esse talis cogitatio sine tali extensione; neque talis extensio sine tali cogitatione; quia dum seorsim intelliguntur, incompletè intelliguntur; & dum intelliguntur completè, hoc est cum ipsa Mente, tunc non intelligitur cogitatio sine substantia, in qua sit extensio, neque extensio sine eadem substantia, in qua sit cogitatio. Applicationem appositam, atque legitimam heic vides, tu secus applicas? Sed videlicet ab abstractis argumentaris ad concreta; perindèque facis, ac si motum, & figuram non respectu ejusdem globi acciperes, sed respectu globi, & spiculi simul; in quorum uno intelligeres rotunditatem, & volutionem; in alio longitudinem, & directam trajectionem; sicque infer-

inferres globum , & spiculum realiter distingui ; Quod profectò est exire à suppositione motus , & figuræ in eodem corpore assumptorum.

Ex his jam licet intelligi , quàm exquisitè disputaveris , demonstraverisque in Meditatione sexta , an *Mens in rei veritate diversa sit ab omni corpore* : Nam id sequi ex eo quod fidem feceris in secunda intelligi posse ut *substantiam existentem* , etsi nihil intelligeres *existere* , quod esset tenue , vel subtile corpus ; patet ex jam dictis quàm verum non sit. Heinc non repeto ; ubi tibi concessum fuerit posse mentem præcisè intelligi ut substantiam existentem ; ac etiam ut substantiam vel rem cogitantem præcisè ; non propterea tamen concedi Mentem nihil esse aliud , quàm id , quod præcisè intelligitur : repeto solum universè vitiosam esse consequutionem , si quis à statu ideali argumentetur ad realem ; & ab eo , quod mente præscinditur , ad id , quod est reipsà connexum. Nimirum inde colligitur , Te ex illo tuo principio non magis disputare , ac demonstrare posse Mentem esse incorpoream , sive inextensam , atq ; adeò posse existere sine corpore , quàm alius sit disputaturus , demonstraturusq ; corpoream esse , sive extensam , atq ; adeò non posse sine corpore existere. Id breviter sic experiamur. Dices tu , *Intelligo Mentem , ut substantiam , non intelligendo , quod corporea sit* ; præcisè enim intelligo : dicet ille ; *Intelligo Mentem ut substantiam , non intelligendo , quod incorporea sit* ; præcisè enim intelligo. Pergis tu , *Ergo Mens corporea non est* ; pergit ille , *Ergo Mens Incorporea non est*. Ac tum , quoniam alter alterius consequentiam negabitis , Probabis tu : *Illà , quorum unum sine alio clarè , & distinctè intelligo , sunt reipsà diversa*. Probabit ille iisdem verbis ; *Illà , quorum unum sine alio , &c.* Assumes tu ; *Atqui clarè & distinctè intelligo Mentem (nempe ut substantiam) sine gradu corporeo* : Assumet ille ; *Atqui clarè , & distinctè intelligo Mentem (nempe ut substantiam) sine gradu incorporeo*. Inferes tu ; *Ergo Mens , & gradus corporeus sunt reipsà diversi , sive , quod idem est , Mens corporea non est* , Inferet ille ; *Ergo Mens , & gradus incorporeus sunt reipsà diversi , sive , quod est idem , Mens incorporea non est*. Ridebis tu ejus demonstrationem ; ridebit ille quoque tuam ; & propter parem paralogismum , pares omninò eritis. Quid quod , si tu dicas , *Intelligo Mentem præcisè ut rem cogitantem* ; & ille dicat , *Intelligo Mentem præcisè ut rem extensam* ; ac tu subjungas ; *Ergo nihil aliud ad naturam mentis pertinet , præter hoc solum , quòd sit res cogitans* ; Nonne ille melius subjunget ; *At non propterea nihil aliud ad naturam mentis pertinet ,*

X 1.

Ex præcisione conceptionis præcisè posita , tam inferri mentem esse corpoream , quàm esse incorpoream ; imò confici potius inseparabilem , quàm separabilem esse.

præter hoc, quòd sit res extensa? Et, cùm tu inferes; Igitur hoc non pertinet, quòd sit præterea res extensa: Nonne ille melius; Igitur pertinere hoc potest, quòd sit præterea res cogitans? Et, cùm tu subinferes: Igitur habeo claram, & distinctam Ideam meipsum, quatenus sum tantum res cogitans, non extensa: Nonne ille melius; Igitur habeo claram, & distinctam Ideam meipsum, quòd sim res extensa, & cogitans simul? Et cùm tu subsumes; Atqui habeo aliunde claram & distinctam Ideam corporis mihi arte conjunctis, quatenus est tantum res extensa, non cogitans: Nonne ille melius; Atqui habeo aliunde claram, & distinctam Ideam corporis, quòd ego ipse sum, quatenus est res extensa, & prætereà cogitans? Et cùm tu concludes; Igitur certum est me à corpore meo esse reverà distinctum, & absque illo posse existere: Nonne ille melius; Igitur certum est me à corpore, quòd ipse sum, non esse reverà distinctum, neque sine illo posse existere? Nonne, inquam melius; quatenus, cùm uterque supposueritis vos intelligere præcisè, non ille perinde, ac tu, abduci se sinet à fallaci illo principio; dum ex separatione intellectuâli, inducis separationem realem. Sed hæc aimis.

D V B I T A T I O IV.

De specie rei corporeæ, quæ non videatur recipi posse in Mente incorporeæ: Et de Mente, quæ si coexistat corpori, seu rei extensa, non videatur esse posse inextensa.

AT, inquis, habeo ex una parte claram, & distinctam ideam meipsum, quatenus sum tantum res cogitans, non extensa: & ex alia parte distinctam ideam corporis, quatenus est tantum res extensa, non cogitans. Enimvero, quod spectat primum ad ideam corporis, non videtur multum de ea laborandum. Nam si id quidem pronunciaris de idea corporis universè, repetendum esset quod objicimus, probandum esse tibi repugnare naturæ corporeæ, ut sit cogitationis capax: sicque principium peteretur, cùm quæstio de te instituta sit, an tenue nempe corpus non sis, quasi cogitare corpori repugnet. Verùm, quia id pronuncias, & agis certè solum de crasso isto corpore, à quo te esse distinctam & separabilem contendis; ideo non tam inficior, quin habeas ipsius ideam, quàm te habere posse inficior, si inextensa quidem res sis. Quæso te enim, quomodo

modo existimes in te subjecto inextenso recipi posse speciem, ideamve corporis quod extensum est? Seu enim talis species procedit ex corpore, illa haud dubiè corporea est, habetque partes extra partes, atque adèd extensa est: seu aliunde impressa est, quia necessarium semper est, ut repræsentet corpus extensum, oportet adhuc, ut habeat partes, & perinde extensa sit. Alioquin certè si partibus careat, quomodo partes repræsentabit? si extensione, quomodo rem extensam? si figurà, quomodo rem figuratam? si positione, quomodo rem habentem superiores, inferiores, dextras, sinistras, obliquas partes? si varietate, quomodo colores varios, &c. Non ergo videtur idea extensione prorsus carere: nisi verò careat, quonam modo tu, si inextensa fueris, illi subjecieris? quomodo illam tibi aptabis? quomodo usurpabis, quomodo sensim obliterari, evanescerèque tandem experieris? Deinde, quod spectat ad ideam tui, nihil est addendum ad ea, quæ jam dicta sunt, ac in Meditationem præsertim secundam. Exinde enim evincitur, tantum abesse ut ideam tui claram distinctamque habeas, quin penitus nullam habere videaris. Quippe quia tametsi agnoscas cogitare te, nescias tamen qualis res sis, quæ cogitas: adèd ut cum sola hæc operatio nota sit, lateat te tamen quod est præcipuum, substantia nempe, quæ operatur. Vnde succurrit comparatio, quæ dici potes similis cæco, qui calorem sentiens, admonitùsque eum esse à Sole, putet se habere claram & distinctam ideam Solis, quatenus, si ex eo quæ-ratur quid sit Sol, respondere potest, res est calefaciens. Sed, inquires, heic addo, non tantum quòd sim res cogitans, sed etiam, quòd *Res non extensa*. Verumtamen, ut taceam sine probatione id dici, cum in quæstione tamen sit, quæso primum, idcirco-ne ideam tui claram, & distinctam habes? Dicis te non extensam; dicis quid non sis, non verò quid sis. An ad habendum claram distinctamque, seu, quod idem est, veram germanamque alicujus rei ideam, non est necesse ipsammet rem positivè, &c, ut ita dicam, affirmatè nosse, sufficitque nosse, quòd illa non sit alia quæpiam res? Ergone clara distinctaque erit Bucephali idea, si quis saltem norit de Bucephalo, quòd mulca non sit? Sed ne hoc urgeam, requiro potiùs, Tu igitur res non extensa es? Annon es diffusa per corpus? Nescio quid responditura sis; nam licèt ego ab initio te agnoverim in cerebro solum, id tamen conjiciendo potiùs, quàm planè assequendo opinionem tuam. Conjecturam duxi ex iis verbis, quæ postea sequuntur, dum ais te non ab omnibus corporis partibus affici, sed tantummodo à cerebro.

bro, veletiam ab una tantum exigua ejus parte. Verum certus planè non fui, an esses propterea tantum in cerebro, parte-ve illius, cum possis esse in corpore toto, & in una solum parte affici: ut vulgò fatemur animam diffusam toto corpore, & in oculo tamen duntaxat videre. Dubium similiter moverunt verba illa sequentia, *Et quamvis toti corpori tota mens unita esse videatur, &c.* Quippe illeic loci non asseris quidem te esse unitam toti corpori: sed te esse tamen unitam non negas. Vt cumque sit, Esto primum, si placet, diffusa toto corpore, sive idem cum anima sis, sive quid diversum; quæso te, inextensa es, quæ es à capite ad calcem protensa? quæ cœquaris corpori? quæ tot illius partibus correspondenteis parteis habes? An dices te ided esse inextensam, quodd tota in toto sis, & tota in qualibet parte? Quæso te, si dicas, quomodo id capis? Ita-ne potest unum quid esse simul totum in pluribus locis? Fides nos id doceat de sacro mysterio; de te, ut de re naturali disputatur heic; & ex lumine quidem naturali. Licet-ne intelligere plura esse loca, & non esse plura locata? Et nunquid centum sunt plura uno? Et nunquid, si res aliqua tota est in uno loco, poterit esse in aliis, nisi ipsa sit extra se, uti locus est extra loca? Dicito quod voles: saltem & obscurum & incertum erit, sis-ne in qualibet parte tota, & non potius in singulis partibus, per singulas tui parteis. Et cum sit longè evidentius nihil posse totum simul esse in pluribus locis, etiam evidentius evadet, non esse te totam in singulis partibus; sed totam duntaxat in toto, atque aded per tui parteis diffusam per totum, sicque habere extensionem. Esto deinde in cerebro solum, aut in exigua solum ejus parte: cernis idem planè incommodi esse: quoniam quantulacumque sit illa pars, extensa tamen est, & tu illi coextenderis, atque idcirco extenderis, particulâsque particulis illius respondenteis habes. An dices te cerebri partem pro puncto accipere? Incredibile sanè: sed esto punctum. Si illud quidem Phycum sit, eadem remanet difficultas, quia tale punctum extensum est, neque partibus prorsus caret. Si Mathematicum, nostri primum id nisi imaginatione non dari. Sed detur, vel fingatur potius dari in cerebro Mathematicum punctum, cui tu adjungaris, & in quo exstas, vide quàm futura sit inutilis fictio. Nam ut fingatur, sic fingi debet, ut sis in concursu nervorum, per quos omnes partes informatæ animâ transmittunt in cerebrum ideas, seu species rerum sensibus perceptarum. At primum, nervi omnes in punctum non cœunt, seu quia cerebro continuato in spinalem medullam multi
nervi

nervi toto dorso in eam abeunt : seu quia qui tendunt in medium caput , non in eundem cerebri locum desinere deprehenduntur. Sed demus concurrere omnes ; nihilominus concursus illorum in mathematico puncto esse nequit ; quia videlicet corpora , non mathematicæ lineæ sunt , ut coire possint in mathematicum punctum. Et ut demus coire , spiritus per illos traducti exire è nervis , aut subire nervos non poterunt , utpote cum corpora sint , & corpus esse in non loco , seu transire per non locum , cuiusmodi est punctum mathematicum , non possit. Et quamvis demus esse & transire posse ; attamē tu in puncto existens , in quo non sunt plagæ dextra , sinistra , superior , inferior , aut alia , dijudicare non potes unde adveniant , aut quid renuncient. Idem autem dico de iis , quos tu debeas ad sentiendum , renunciandumve , & ad movendum transmittere. Vt præteream capi non posse , quomodo tu motum illis imprimas , si ipsa in puncto sis , nisi ipsa corpus sis , seu nisi corpus habeas , quo illos contingas , simulque propellas. Nam si dicas illos per se moveri , ac te solummodo dirigere ipsorum motum ; memento te alibi negasse moveri corpus per se , ut proinde inferri possit te esse motus illius causam : ac deinde explica nobis , quomodo talis directio sine aliqua tui contentione , atque aded motione esse valeat ? Quomodo contentio in rem aliquam , & motio illius sine contactu mutuo moventis & mobilis ? Quomodo contactus sine corpore ; quando (ut lumine naturali est aded perspicuum) tangere nec tangi sine corpore nulla potest res ? Quanquam quid in his immoror ; cum tibi ipsi incumbat probare esse te rem inextensam , at que idcirco incorpoream ? Neque verò , quantum opinor , argumentum ex eo duces , quòd homo constare vulgò dicitur ex corpore & animo ; quasi cum una pars corpus dicatur , alia non corpus dici debeat. Si enim faceres , ita distinguendi occasionem dares : constare hominem ex duplici corpore , crasso scilicet & subtili ; aded ut cum illud retineat commune nomen corporis , isti nomen animæ detur. Vt prætereā idem de aliis animalibus dictum iri ; quibus tu mentem tibi ipsi parem non concesseris : beatis illis sanè , si vel animam , te auctore , habeant. Hinc igitur quando concludis , *certain esse te à corpore tuo reverà esse distinctam* ; vides concessum id quidem iri , sed non concessum iri propterea esse te incorporeā , & non potius speciem tenuissimi corporis à crassiore isto distincti. Addis , & *te proinde posse absque illo existere*. Verum ubi concessum fuerit te perinde posse absq ; crasso isto corpore existere , ac existit vapor odoratus , dum è pomo ex-

liens in auras dispergitur, quid-nam exinde lucrata eris? Certè ali-
quid ampliùs, quàm quod Philosophi memorati volunt, qui pe-
rire te penitus in ipsa morte opinantur: instar figuræ scilicet, quæ
ex superficie immutatione ita evanescit, ut deinceps nulla seu nihil
planè sit. Siquidem cùm fueris præterea corporea quædam seu
tenuis substantia, non diceris ipsa in morte penitus evanescere, abi-
rève planè in nihilum; sed per tui parteis dissipatas subsistere:
quantumcumque ob distractionem cogitatura ampliùs non sis, &
neque res cogitans, neque mens, neque anima sis dicenda. Quæ
tamen omnia semper objicio, non ut de conclusione à te intenta
dubitans; sed ut de vi demonstrationis à te expositæ diffidens.

R E S P O N S I O.

Hic quaeris, quomodo existimem in me subiecto inextenso;
recipi posse speciem ideamve corporis quod extensum est.

Respondeo nullam speciem corpoream in mente recipi, sed puram
intellectionem tam rei corporeæ quàm incorporeæ fieri absque ulla specie cor-
poreæ; ad imaginationem verò, quæ non nisi de rebus corporis esse potest,
opus quidem esse specie quæ sit verum corpus, & ad quam mens se applicet,
sed non quæ in mente recipiatur. Quod ais de idea Solis, quam ex solo
ejus calore cæcus elicit, facile refutatur. Potest enim cæcus ille cla-
ram, & distinctam habere ideam Solis, ut rei calefacientis, etsi non
habeat ejusdem, ut rei illuminantis. Nec rectè me illi cæco comparas, primò
quia cognitio rei cogitantis multò latius patet quàm rei calefacientis, imò
etiam latius quàm quicquid de ulla alia re cognoscimus, ut suo loco osten-
sum est; ac deinde quia nulli possunt arguere ideam illam Solis, quam for-
mat cæcus, non omnia quæ de Sole percipi possunt continere, nisi qui visu
præditi ejus lumen, & figuram insuper agnoscunt; tu verò non modò nihil
ampliùs, sed nequidem id ipsum quod ego, de mente cognoscis: adeò ut
hac in parte tu potius cæcus, ego ad summum lusciosus cum tota humana
gente dici possim. Neque verò addidi mentem non esse extensam, ut quid
ipsa esset explicarem, sed tantum ut monerem illos errare qui putant esse
extensam. Eodem modo quo, si qui affirmarent Bucephalum esse Musicam,
id non frustra de ipso ab aliis negaretur. Et sunt in iis quæ hic subjungis
ut probes mentem esse extensam, quia scilicet corpore utitur quod est exten-
sum, non melius ratiocinari mihi videris, quàm si ex eo quòd Bucephalus
hinniat, vel mugiat, & ita edat sonos qui referri possunt ad Musicam,
concluderet de Bucephalo quòd sit Musica. Etsi enim mens sit unita toti
corpori,

corpori, non inde sequitur ipsam esse extensam per corpus, quia non est de ratione ipsius ut sit extensa, sed tantum ut cogitet. Nec intelligit extensionem per speciem extensam in se existentem, quamvis eandem imaginetur, convertendo se ad speciem corpoream quæ est extensa, ut jam dictum est. Nec denique necesse est ut ipsa sit corpus, etsi habeat vim movendi corporis.

I N S T A N T I A.

Mirum est profectò, quàm cautè respondeas. Quærebam ego, *Quò fieri posset, ut in Mente, subiecto inextenso, recipi possit species, seu idea Corporis, quod extensum est?* Respondes tu, *nullam speciem corpoream recipi in mente.* At ego quærebam universè de specie corporis, quod cum possit & à facultate corporea, ut visu, & à facultate incorporea, ut Intellectu cognosci; videatur debere cognosci per speciem, à visu quidem corpoream, ab intellectu verò incorpoream. Tu pro tua sagacitate difficultatem præcavens, dixisti nullam speciem recipi, non corporis, sed corpoream. Et quia statim poterat quæri, An saltem, quia corpus ab intellectu cognoscitur, per incorpoream speciem cognoscatur; non ad id respondisti, sed dixisti solum, *puram intellectiōnem tam rei corporeæ, quàm incorporeæ fieri absque ulla specie corporeæ.* Scilicet adhuc dubium fecisti, existimare sine intellectiōnem rei corporeæ fieri per speciem incorpoream; an potius sine ulla seu corporea, seu incorporea specie. Cur id verò? Nempe quia non videbaris defendere posse intellectiōnem fieri sine intelligibili, ac incorporea specie; Et quia tamen admittendo speciem intelligibilem corporis, non videbaris defendere posse esse illam incorpoream, propter objectas difficultates: idèd prætulisti neque negare, neque asserere, ut si ex una parte urgereris, effugium in aliam pateret. Interea verò divertisti, *Imaginationem obtrudens, admittensque ad illam, quæ non nisi de rebus corporeis esse potest, opus esse specie, quæ sit verum corpus, & ad quam se applicet; non quæ in mente recipiatur.* Eòdem spectat etiam, quod sub finem ais, *Mentem non intelligere extensionem per speciem extensam in se existentem; quamvis eandem imaginetur, convertendo se ad speciem corpoream, quæ extensa est.* Quo loco redit imprimis quæstio, An non corpora non solum imaginatione, sed intellectiōne etiam cognoscantur; & cum videatur indubium, corpora esse non imaginatricis modò, sed intellectricis quoq; facultatis objectum; quæstio

I.
Artificiosa
evasio. Ad
intellecti-
onem quo-
que requiri
speciem,
seu imagi-
nem: Es
imaginem
rei extensa
sine exten-
sione non
esse.

superest, An-non, cùm hanc chartam, v. c. contemplor, explorò-
 que illius longitudinem, latitudinem, figuram, colorem, &c. ip-
 samque aded chartam non tantùm imaginor, sed etiam intelligo;
 an-non, inquam, illam æquè intelligam per speciem, ac per spe-
 ciem imaginor: Et, an-non eadẽ specie, qua unius pedis longitu-
 dinem imaginor, intelligam etiam longitudinem unius pedis; simi-
 litérque latitudinem, formam quadratam, candorem, & alia? Et
 non requiro quidem ampliùs Criterium, quo hac, aut pari occa-
 sione, intellectiõnem ab imaginatione discernam; quando id jam
 frustrà requisitum est. Requiro solùm, cùm positam coràm me
 chartam, non tantùm imaginer, sed etiam intelligam; An-non qua-
 tenus intelligo, obversetur reverà intellectui huiusce magnitudinis,
 figuræ, & coloris species? Si obversatur autem, quænam illa est
 alia, quæ obversatur imaginatrici? Ea sanè, nisi eadem, simillima
 profectò est. Quare & quamvis *imaginatio sit solùm de rebus corporeis*;
 quia tamen Intellectio, cùm sit de rebus incorporeis, est etiam de
 corporeis, videtur ad intellectiõnem, quatenus est de rebus corpo-
 reis, non minùs quàm ad imaginationem; *opus esse specie, quæ sit ve-
 rum corpus*. Neque ob stare potest, quòd intellectio sit actio mentis,
 quæ est incorporea; quoniam imaginatio quoque per te, ejusdem
 mentis actio est; & quod subdis speciem corpoream, quã ad ima-
 ginationem est opus, in mente non recipi, id videtur posse ad in-
 tellectiõnem pari jure accommodari. Cæterùm, quia tu vis hanc
 speciem, cùm in mente non recipiatur, recipi in cerebro, & imagi-
 nationem, seu imaginatricem ad eam applicari; sequitur planè,
 ut cùm Mens fuerit separata à corpore, & destituta cerebro, Ima-
 ginatio planè serietur, Mènsque jam ampliùs nullum corpus imagi-
 nari valeat; quoniam non habet ampliùs speciem, ad quam appli-
 cet imaginationem. Quæso igitur, saltem-ne intelligat tunc cor-
 pus? Et dicere quidem, quod non intelligat, Tum tibi ipsi non
 congruit, qui vis *in ideis rerum corporalium nihil occurrere, quod sit
 tantum, ut videatur non posse ab ea proficisci*: Tum repugnat natura
 Mentis, quæ per se est res intelligens; neque in tam perfectò statu
 potest, aut esse obtusior, quàm intra caliginem demersa; aut etiam
 omninò cæca, privatave prorsus eo lumine, quo in corpore tantam
 sui objecti partem intuebatur: Tum repugnat quoque similis ani-
 mæ Angelorum natura; quos alioquin sequeretur non intelligere
 corpora; quippe cùm Angeli sint quoque separatæ substantiæ; & ce-
 rebro tamen, ac speciebus, quibus se applicent, destituantur. Si igitur
 Mens

Mens separata intelligit, aut (quod saltem non videtur negandum) intelligere potest corpora; intelligat hanc eandem chartam. Cum intelligit autem eandem longitudinem, latitudinem, figuram, colorem; An-ne ipsi alia species obversabitur, quàm quæ est antè memorata? Si dicas aliam, dic quænam sit? Si dicas eandem; dic ubi-nam: cum jam in cerebro non sit? Oportet sanè dicas illam in ipsa Mente recipi. Quodd si in statu separationis potest in Mente recipi: cur non in statu conjunctionis? Quomodocumque verò aut sit, aut adveniat, certum est saltem speciem, seu ideam hujus chartæ esse posse in Mente; alioquin enim Mens non posset dici chartam intelligere. Cum sit porro, tum jam recurrit objecta à me difficultas. Nam aut talis species inextensa est, aut extensa. Et, si extensa quidem, tum corporea est, convincitque suum subiectum extensum. Si inextensa; tum non habet rationem speciei, seu imaginis; quoniam inextensa cum sit, repræsentare non potest objectum extensum, uti neque consequenter figuratum, coloratum, &c. Et quæso te, quomodo capis obversari menti ideam rei quadratæ, & ipsam ideam, quæ res apprehenditur, non apprehendi quadratam? Et, cum Mens separata intelligat per speciem illi similem, qua imaginabatur conjuncta, quomodo unam esse extensam, & aliam inextensam capis?

Circa Ideam ipsius Mentis, & quod spectat quidem ad comparisonem institutam cum cæco, *Potest, inquis, cæcus ille claram, & distinctam habere Ideam Solis, ut rei calefacientis; etsi non habeat ejusdem, ut rei illuminantis.* Heic jam videor agnoscere, quid esse censeas, habere claram, distinctamque; alicujus rei notitiam. Sufficit nempe, ut quocumque sui adjuncto, & quomodocumque; nobis innotescat, sive sensum nobis faciat, conceptumque excitet; ut claram, & distinctam illius Ideam habere dicamur; dummodo subintelligatur, quodd habeamus Ideam illius, ut talis, sive quatenus nobis innotescit. Hoc ergo modo, si quis tibi in densis tenebris occurrat, taciteque percutiat; dices te habere claram, distinctamque illius notitiam; tamen ipsum nec cernere, nec discernere potis fueris: Et cum ex te quæretur, Quis igitur vir ille est? Respondebis, *est res percussiens.* Et cum instabitur, Nihil ne aliud dicere potes? Excipies, Non dixi me habere aliam illius notitiam, quàm, *ut rei percussientis:* Idemque præstabitur in cæteris rebus. Sed ne ad alia excurramus; Dixeras habere te claram, distinctamque Ideam mentis; Et quoniam quæri ex te potuerat, quid-nam igitur esset Mens? dixeras, *Est res*

II.

Non infirmari compariationem eius, qui dicit se clarè nosse naturam Mentis, quia dicere potest, est res cogitans, cum cæco, qui dicit se clarè nosse naturam Solis, quia dicere potest, est res calefaciens.

cogitans: Tum ego excepi, Nihilne aliud nosti, potesse nobis dicere? Tu excanduisti, & me ulterius requirente naturam mentis, cujus te habere Ideam, trahereque notitiam claram, & distinctam gloriaris, insultasti, id dignum esse carne, cujusmodi ego essem, nosse velle, ac vestigare labore quasi chymico intimam naturam, seu substantiam mentis; cum sufficiat nosse de illa, quod sit res, & *cogitans quidem*. Subjeci, Id simile esse, ac si cæcus, qui calorem fenderit Solis, dicat se habere claram, distinctamque Ideam Solis, profiteaturque proinde tradere se claram distinctamque naturæ Solis notitiam; quia si rogaretur, quid ergo esset Sol, respondere posset, *est res calefaciens*: Et cum urgeretur, id non esse promissa præstare; excandesceret, diceretque, ad habendam claram, distinctamque Solis, Naturæque ejus notitiam, sufficere, quod dicitur res, & *calefaciens quidem*. Cum igitur quæstio esset de Idea, non mentis, ut *cogitans est*; nec Solis, ut *calefaciens est*; Nam cogitare mentem nemo nescit; & calefacere Solem, ne cæcus quidem ignorat; sed utriusque, prout naturam habet, quæ obscurè confusæque continetur sub nomine *Res*: Tu nihil respondisti de Re, sed attigisti solum id, de quo controversia non erat. Id nihilominus admitto; & ex eo, quod concedis esse duntaxat in cæco Ideam Solis, *ut est res calefaciens*, non item, *ut est res illuminans* (addo, & ut est res habens talem colorem, figuram, magnitudinem, situm, motum, distantiam, substantiam, & quæ oculatissimos etiam latent, ex natura intima) infero te ergo debere pari modo concedere esse in te duntaxat Ideam Mentis, *ut est res cogitans*, non item, *ut est res habens talem substantiam, naturam, cæteraque sæpius objecta*; Nam dicere quidem ista intelligenda esse contineri sub nomine *Res*, est nihil notum dicere; cum, ut cæco dicente, *Sol est res calefaciens*, idem est, ac si diceret, *Sol est nescio quid, quod calefacit*; nam nihil de eo aliud, quàm quod habeat calorem, novi: ita te dicente, *Mens est res cogitans*, idem sit, ac si diceres, *Est nescio quid, quod cogitat*; neque enim aliud de ea, nisi cogitationem perpexi. Dicis te non velle comparari cum cæco, Primo, quia, inquis, *cognitio rei cogitantis multò latius patet, quàm rei calefacientis*; imò etiam *latius, quàm quicquid de ulla aliare cognoscimus, ut suo loco ostensum est*. Verum tamen quæstio non est de latè-potentia, sed de claritate, & distinctione cognitionis, prout utraque terminatur ad objectum, cuius est cognitio. Certum est enim objecta non esse æqualia, neque aut idem, aut tantundem de uno cognosci, ac de alio; sed potest tamen

tamen esse eadem , aut æquè clara paucorum de uno cognitio , ac multorum de alio : idémque est , ac si de duobus vasis quæreretnr , non capacitas , sed plenitudo ; quando licèt majus contineat amplius liquoris , quàm minus ; potest tamen minus esse æquè plenum , ac majus : Et licèt majus sit plenum vino , minus verò aqua ; tam aqua nihilominus exæquatur capàcitati minoris , quàm vinum capàcitati majoris . Vnde & licèt cogitatio ad plura se extendat , quàm calefactio ; est tamen semper cogitatio , & nihil aliud , quàm cogitatio exæquata facultati cognoscendi cogitationem . Quo pacto calefactio , licet ad non tam multa , sed adhuc tamèn innumera se extendat (nempe ad quotquot sunt guttæ aquæ , quotcunque stipulæ , cæteræque res calefactionis capaces) est tamen calefactio exæquata facultati cognoscendi calefactionem . Quare & perinde te habes , dum mentem non nosti , nisi ut rem cogitantem ; ac cæcus , dum non novit Solem , nisi ut rem calefacientem .

III.

Deinde , inquis , nemo potest arguere Ideam illum Solis , quam formiat *Ex eo,* cæcus , non omnia , quæ de Sole percipi possunt , continere , nisi qui visu quod qui præditi ejus lumen , & figuram insuper agnoscunt . Tu verò nihil amplius dicere non possis , quid us , sed ne quidem id ipsum , quod ego , de mente cognoscis ; adeo ut hac in aliud sit parte tu potius cæcus , ego ad summum lusciosus cum tota humana gente *Mens ,* dici possim . Bene id habet , eximie vir ; quippe non invitus agnosco quam res discrimen , admittoque me , quod ad mentis naturam spectat , omnino cæcum . Exploremus tamen quid totum id sit . Nempe eò spectas , ut cum ego dicere non possim quid præter cogitationem *colligi non posse ipsam* mens habeat , statuas tu cognoscere te quicquid in Mente est ; atque *igitur nihil esse præterea .* que adeò habere claram , distinctamque Mentis notitiam . Ergo facis idem quod cæcus , qui cum alio cæco loquens , diceret se cognoscere quicquid est in Sole , quia ejus calorem sentiret , neque alius dicere posset , quidnam esset præterea . At præter illum alium cæcum sunt videntes homines , qui amplius , quàm ille agnoscant ; præter me verò non sunt homines , qui amplius in mente agnoscant , quàm Tu , cum quo stat tota gens humana ? Ego de cæteris nihil statuo , neque volo tam malè præsumere de sagacitate , & solertia totius gentis , seu omnium prorsus hominum , quotquot fuerint , sunt , aut futuri sunt , ut non advertere potuerint , aut possint aliquid in Mente , quod te impræsentiarum lateat . Vim solum expendo tui ratiocinii , ac meditator primùm , Si quis natus esset apud Andabatas ; aut ti , ut omnes talpæ sunt oculis capti , voluisset Deus omnis homines nasci cæcos , & Solis tamèn calorem sentire , Quo jure pos-

re posset Andabata, aut alius mortalium asserere nihil esse in Sole præter calorem, quoniam eo casu nemo esset videns, qui posset illum arguere? Deinde, cum omnibus retrò seculis, & ante annos vix pluiquam triginta, nemo telescopium habuerit ad manum, quo illum argueret, qui dixisset Stellam Saturni anulis carere, & Stellam Iovis asseclis; an quisquam jure pronunciaisset non in Saturno anulas, non circa Iovem asseclas esse? Rursus, si clauso palatio, dicat quis in ipso nihil esse præter eos, quos videt parietes, quòd nemo occurrat, qui illud aperiat, arguatque quam-multa in eo contineantur, an id jure asseverarit? Porro, si nos Deus ita nasci voluit, ut carcamus oculis, sive perspicacia, qua, excepta cogitatione, nihil pernoscamus de substantia, & cæteris, quæ sunt in Mente: Si abest hæcenus, qui ad id, telescopium conficiat: si non adest janitor, qui nos introducat, & arguat esse aliud, quàm quod tibi cognitum est; jure-ne autumes nihil præterea esse? Et nonne ipsemec admittit sciri non posse Deum nihil amplius posuisse in aliqua re, quàm quod de ea cognoscimus, nisi ipse Deus revelet? Id verò quomodo cohæret cum isto tuo ratiocinio? Profectò si id legitimum sit, non est, quòd mortales querantur esse aliquid sibi incompertum. Quid enim; Terræ viscera? at infra hanc terræ quasi crustam nihil est: Quia nemo est, qui arguat internum spatium esse plenum, dicatve quid in eo sit; aut quid omninò terra præter hæc, quæ videmus, tractamúsque, contineat. Quid item, amplitudinem Mundi? vireis omnium herbarum omnes? imò omninò omnia? at nihil planè ignoratur, quia præter ea, quæ cognoscuntur, nemo arguat cognosci, atque aded esse aliquid. Quòd si ridiculum id sit; jure-ne gloriaris nosse te quicquid in Mente, quòd ego dicere non possim quid in ea sit, præter id, quod nosti? An quia ego ignarus sum, tu ided es doctus? An quia ego privatus sum, & in curta re; tu idcirco Rex, & Cræso opulentior? haud enim est dispar jactantia. Et quòd ego quidem, non amplius, quàm tu de Mente cognoscam, id accipio, uti par est. Quòd autem ne id ipsum quidem quod tu, id dijudicandum ab aliis. Ego quidem cognosco Mentem, ut rem cogitantem, hoc est, ut intelligentem, dubitantem, affirmantem, negantem, imaginantem, volentem, sentientem, &c. quæ tu te dicis cognoscere; & nisi antequàm cognosceres, saltem antequàm diceres, cognovi. Cum tu verò nihil aliud cognoscere te de Mente testeris, non video quid dicas *me ne idipsum quidem de ea cognoscere, quod tu*; neque cur ego potius sim cæcus, quàm

tu, & tu ad summum lusciosus sis, id est clarè quidem videns, sed præ modestia te lusciosum dicens; idque cum tota humana gente, quæ etiam clarè videat, aut sit ad summum quoque lusciosa. Quamquam ego novi ex humana gente plenos candoris homines, qui ingenuè respuant, quod non sunt; qui se circa naturam mentis, cæteraque adedò abstrusâ, cæcos esse non diffiteantur; adedò ut cum fortè omnes cæcutiamus, id statui possit discriminis, ut nonnulli quidem se profiteantur cæcos, ut sunt; alii imitentur Senecæ Harpasten, dum se id quod sunt, agnoscere nolunt.

Eò deinde te recipis, ut dicas te addidisse, mentem esse rem non extensam, non ut quid ipsa esset explicares, sed tantum, ut moneres illos errare, qui putant esse extensam. Quamquam non monueras id magis, quàm errare illos, qui putarent esse non cogitantem; cum aliquin referens quid Mens esset, seu quid per Ideam illius repræsentaretur, dixisses absolutè, & uno tenore, habere se illius Ideam, quatenus est tantum res cogitans, non extensa. Sed illud nimirum te pressit, quod objectum fuerat, expressisse te eo vocabulo non quid mens esset, sed quid non esset. Vt cumque sit, gratè accipio; tamen video te (seu sponte, seu errore lectionis nescio) comparare Bucephalum cum Musica, quem ego & ex sensu communi, & ex lectione Typographi, comparavi cum Musca. Viderint porrò Lectores, quàm appositè dicas me non melius ratiocinari, dum arguo Mentem esse extensam, si cõextenditur corpori, quàm si quis arguat Bucephalum esse Musicam, si hinniat, seu sonos edat, qui refertur ad Musicam possint. Quæ enim quæso est paritas, aut similitudinis applicatio? Nulla sanè: quare & solum pergis, Et si animi Mens sit unita toti corpori, non ideo sequitur ipsam esse extensam per corpus. Quomodo verò non sequi probas? Quia, inquis, non est de ratione ipsius, ut sit extensa, sed tantum, ut cogitet. O solutionem! Quæritur, quid sit Mens? Definis tu esse Rem cogitantem non extensam. Controvertitur tibi posterior particula, ab illis, qui dicunt aut animi gratiâ extensam. Dicis tu errare illos. Probant illi se non errare, eo argumento, quod ipse non negas; nempe Mentem esse unitam toti corpori. Quia enim corpus extensum est, quatenus in puncto non est, sed per varias loci parteis diffusum, quibus proinde correspondenteis parteis habeat necessum est; idèò Mens quoque, cum in puncto non sit, sed per totidem loci parteis, per quod ipsum corpus, cui toti unitur diffusa, atque idcirco per totidem correspondenteis sui parteis; dicenda planè erit extensa. Tu verò id-ne argumentum

IV.

Reminere
difficultatem quòd
dicere
Mentem
rem non
extensam,
fit dicere
non quid
fit, sed quid
non sit, ut
si dicatur
de Bucephalo, quòd
non sit
Musca. Pe-
ti principi-
um. Au-
thoritatem
propriam
asserri pro
Demon-
stratione.
Difficultas
seu præci-
pius diffi-
ciliari.

solvis? Dicis *non esse de ratione Mentis, ut extensa sit*. Nonne hoc est, quod quæritur? Et sic-ne pro ratione, defensionéque conclusionis afferri debet sola conclusio? Non est profectò cur disputes, aut esse tecum disputandum putes, si cùm dogma statueris, nihil ipsi propugnando, quàm ipsum obrudas; & quicquid objiciatur; velis ex eo solum, quòd ipse obrudas, stare inconcussum. Annon verò te id voluisse argumento est, quod relicta regià demonstrandi vià, te unicum affatus es, de te uno loquutus es, tuam solam de te expressisti sententiam, ipsamque deinceps habendam à mortalibus omnibus pro Demonstrationis principio censuisti? Nihil ergo mirum, si visus sis hac ratione ratiocinari,

Id, cujus ego ideam claram, distinctamque habeo, debet esse ratum, & inconcussum principium:

Atqui ego, qui sum Mens, ideam claram, distinctamque habeo, quòd sim tantum res cogitans, non extensa; corpus verò nemin res extensa, non cogitans:

Igitur me, hoc est Mentem, esse tantum rem cogitantem, non extensam, & corpus meum rem extensam, non cogitantem, debet esse ratum, & inconcussum principium.

Et consequenter,

Quod ego deduco ex rato, inconcussóque meo principio illud certum est:

Atqui ego ex meo rato, & inconcussó principio, quòd sim tantum res cogitans, non extensa, & corpus meum res extensa, non cogitans, deduco me à corpore meo reverà esse distinctum, & absque illo posse existere:

Igitur certum est me à corpore meo reverà esse distinctum, & absque illo posse existere.

Quo de ratiocinio quid sentiendum sit, ex ante-dictis est judicandum. Addo heic solum propter extrema Responsonis tuæ verba, ostendisse egregiè te, quàm tibi placeat, quod animò èphs. Difficultatem proposueram, *Quomodo anima, si inextensa, & incorporea sit, possit contingere, impellere, & movere corpus?* Tu verò hæc solum verba reposuisti, *Nec denique necesse est, ut ipsa sit corpus, etsi habeat vim movendi corpus.* Scilicet, quia ipse dixisti, id habendū ratum, certumq; censuisti, existimastique lectores ad eò futuros oscitantes, ut difficultatem non perviderent, aut crederent factum abundè, & satis. Regererem jam aliquid; sed facere ansam noluisti, qui non modò aduortas à te difficultates non solvisti; sed ne alias quidem, easque præ-

præcipuas attigisti. Ne memorem speciatim te callidè adhuc declinasse, quod dissimulandum non fuerat, circa unionem *Mentis cum corpore*; nimirum *an uniatur toti? an cerebro toti? an sensibili cerebri parti? an Physico puncto? an Mathematico puncto?* Verùm quia quicquid declarasses, difficultates in promptu erant; ideò nihil mirum, si declinare, dissimularèque satius duxeris, quàm labyrinthum subingredi, ex quo te deinceps extricare non posses.

D V B I T A T I O V.

De Commisione Mentis cum corpore; deque doloris sensu; Quòd scilicet fieri posse non videatur, si Mens inextensa, seu incorporea sit.

Interspergis consequenter nonnulla eodem pertinentia, quibus omnibus non est insistendum. Id noto quod ais, docere naturam per sensum doloris, famis, sitis, &c. te non adesse corpori, ut nauta adeest navigio; sed esse te illi artissimè conjunctam, & quasi permistam, adeò ut unum quid cum illo componas. Alioquin enim, inquis, cum corpus læditur, ego, qui nihil aliud sum quàm res cogitans, non sentirem idcirco dolorem, sed puro intellectu læsionem istam perciperem, ut nauta visus percipit, si quid in nave frangatur. Et cum corpus cibo vel potu indigeret, hoc ipsum expresse intelligerem, non confusus famis & sitis sensus haberem. Nam certè isti sensus sitis & famis, doloris, &c. nihil aliud sunt, quàm confusi quidam modi, ab unione & quasi permissione mentis cum corpore exorti. Ac bene quidem se ista habent, sed explicandum superest, quonam modo ista conjunctio, & quasi permissio aut confusio, competere tibi, si sis incorporea, inextensa, & indivisibilis, possit? Si puncto enim grandior non es, quomodo jungeris toti corpori, quod est magnitudinis tantæ? Quomodo saltem cerebro, aut exiguæ illius parti, quæ (ut dictum est) quantulacumque sit, magnitudinem tamen, seu extensionem habet? Si partibus omnino cares, quomodo misceris, aut quasi misceris partis hujus particulis; neque enim est mistio sine partibus commiscibilibus utrinque? Et, si discreta planè es, quomodo confunderis, unumque componis cum ipsa materia? Et, cum compositio, conjunctio seu unio, inter partes aliquas sit, nonne debet esse proportio inter partibus hujusmodi? Quænam verò corporeæ cum incorporea intelligi potest?

Capimus-ne quomodo lapis & aër ita compingantur, v. c. in putrice, ut germana inde fiat compositio? Et major tamen est proportio inter lapidem & aërem, qui ipse quodque corpus est, quam inter corpus & animam, mentemve planè incorpoream. Et nonne debet unio per contactum intimum fieri? Quomodo id verò, ut ante dicebam, sine corpore? Quomodo quod corporeum est, apprehendet quod incorporeum, ut sibi junctum teneat: aut quomodo incorporeum apprehendet corporeum, ut sibi devinctum reciprocè habeat; si nihil prorsus in illo sit, neque quo apprehendatur, neque quo apprehendat? Heinc, quia te fateris sentire dolorem, quælo te quomodo te putes, si incorporea, & inextensa sis, sensus doloris esse capacem? Quippe doloris affectio non nisi ex quadam partium distractione intelligitur, cum quidpiam interjicitur, quod continuitatis solutionem faciat. Videlicet status doloris, est quidam status præter naturam; quomodo verò potest præter naturam esse, afflicte, quod per naturam, uniusmodi, simplex, indivisibile, intransmutabileque est? Et, cum dolor, aut alteratio aut non sine alteratione sit; quomodo potest id alterari, quod cum sit puncto impartibilius, non potest fieri alterum, definereve esse cujusmodi est, quin in nihilum redigatur? Addo &, cum dolor ex pede, ex brachio, partibusve aliis simul advenit, nonne oportet in te esse parteis varias, in quibus illum variè excipias, ne confusè, & quasi unius duntaxat partis dolorem sentias? Sed uno verbo, generalis semper difficultas manet, quomodo corporeum cum incorporeo communicare valeat; quam proportionem statuere alterius cum altero liceat.

R E S P O N S I O.

QUæ hic habes de unionis mentis cum corpore, similia sunt præcedentibus. Nihil ullibi in meas rationes objicis, sed tantum dubia proponis, quæ tibi ex meis conclusionibus sequi videntur, etsi revera ex eo tantum oriuntur, quòd ea quæ ex natura sua sub imaginationem non cadunt, ad ejus tamen examen velis revocare. Ita hic ubi mentis, & corporis permissionem, cum permissione duorum corporum vis comparare, sufficit ut respondeam nullum inter talia institui debere comparisonem, quia sunt toto genere diversa; partisque in mente non esse imaginandas, ex eo quòd ipsa partes in corpore intelligat. Unde enim habes id omne quod mens intelligit, in ipsa esse debere? Profectò si hoc esset, cum magnitudinem or-
bis

bis terrarum intelligit, illam etiam in se haberet, atque ita non modò esset extensa, sed etiam extensione major orbe terrarum.

I N S T A N T I A.

BEne dicis ea, quæ heic habeo, de unione *Mentis cum corpore, esse præcedentibus similia.* Reverà enim, ut præcedentia ejusmodi fuere, quibus non satisfeceris, sed solùm vel id, quod fuit in quæstione, vel auctoritatem tuam opposueris; ita omnia, quæ heic habeo, hujusmodi sunt, quibus non satisfacias; quibùtque vel quæstionem solam, vel tuam solam auctoritatem opponas. Dicis *me nihil ullibi in tuas rationes objicere, sed tantùm dubia proponere, quæ mihi ex tuis conclusionibus sequi videntur.* Sed fac me nihil objicere præter dubia: ipsa tamen dubia objectiones sunt: & nisi objectiones dicas, fortè quia scholasticà formà proposita non sunt; ejusmodi tamen sunt, quæ solvere sit operæ-premium. Et quod dicis *esse in conclusionibus, non verò in rationibus tuas:* Scito dubitari de conclusione non posse, quin dubii caussa (nisi etiam vitium) in ratione sit; Nam ubi ratio convincens est, de conclusione dubitari non potest. Quare & nihil dubitare, aut objicere in conclusiones potui, quin fuerit in tuas rationes objectum; & cùm permittendum Lectoribus sit, judicare, nihil-ne fuerit à me in tuas, quas existimasti rationes objectum; sanè si quid objectum fuit, propter conclusiones haud bene probatas, objectum id fuit. Dicis *dubia tantùm oriri ex eo, quòd illa, quæ ex sua natura sub imaginationem non cadunt, ad ejus tamen examen velim revocare.* Enimverò dubia reverà oriuntur, ex eo, quod pondus rationum expendam, neque facillè, temerève cuique se rationes afferre dicenti assentiar. Nam si ex eo quòd tu Imaginationem, & Intellectionem tuo modo distinguis, ac interpretaris, putas licitum esse tibi quidvis superexstruere; nos ii non sumus, qui quandiu Mens hæerere sentit scrupulum, nihil decoquendum, aut præmandendum; sed quicquid demùm id fuerit, esse incunctanter deglutendum putemus. Dicis proinde, *Mentis naturam non imaginatione quidem, sed intellectione tamen clarè, & distinctè cognosci.* Nostrà verò parùm interesset, seu intellectione, seu imaginatione cognoscere-mur, dummodò clarè, & distinctè cognosceremus; At quia experimur nos nihil distinctione ista juvari, & intellectione tuo modo accepta, colligi duntaxat debere esse aliquid, præter id, quod imaginamur; non verò cognosci clarè, & distinctè quale illud sit, ut

*I.
Difficulta-
tes, quæ
videntur
in conclu-
siones ob-
jici, im-
petere ip-
sas ratio-
nes, seu
principia,
quæ debite
firmitatis
non sunt.*

sæpius repetitum est; idcirco non patimur dari nobis verba; & dubitationes, quæ nobis supersunt, quales supersunt, objicimus; si qui objici sibi ipsas volunt, ut te per Mersemm voluisse mihi constitit.

II.
Petitum
fuisse prin-
cipium, &
declinatas
difficulta-
tes, circa
objecta ad-
versus
commis-
sionem Men-
tis, & sen-
sum dolo-
ris, si Mens
quidem sit
inextensa.

Pergis, Ita hic, ubi Mentis, & corporis permissionem cum permissione duorum corporum vis comparare, sufficit, ut respondeam nullam inter talia insituri debere comparationem, quia sunt toto genere diversa. Quam bene prædixi nihil aliud te respondere, opponeréve, quam quæstionem ipsam, vel auctoritatem tuam! Quæstio est, utrum Mens, & corpus sint toto genere diversa, an-non? hoc est, An Mens sit corpus tenue; an prorsus incorporea sit? Defendis tu esse toto genere diversa; siue Mentem esse prorsus incorpoream. Et quoniam tamen visus fueras in hunc modum ratiocinari,

Quod est cogitans, & inextensum, potest arctissime conjungi, & quasi permisceri corpori, adeo ut unum quid cum illo componat, & famem, sitim, dolorem sentiat, sensusque famis, sitis; doloris, nihil aliud sint, quam confusi quidam cogitandi modi ab unione, & quasi permissione illius cum corpore exorti.

Atqui Mens est res cogitans, & inextensa:

Igitur Mens potest arctissime conjungi, & quasi permisceri corpori, adeo ut unum quid cum illo componat, & famem, sitim, dolorem sentiat, sensusque famis, sitis, doloris, nihil aliud sint, quam confusi quidam cogitandi modi ab unione, & quasi permissione mentis cum corpore exorti.

Quoniam, inquam, censueras rem inextensam, & extensam, hoc est, res toto genere diversas, posse arctissime conjungi, permisceri, &c. objeci, (seu mavis, dubitavi) Quæ fieri id posset? postulavique, ut probares, quomodo res non grandior puncto uniretur, conjungeretur, confunderetur, & quasi permisceretur cum partibus, ex quibus res extensa constat? Quomodo proinde, si Mens esset inextensa, hoc est, puncto non grandior, & partibus carens, fieri posset illius permissio, aut quasi permissio, cum corpore; quando licet corpus habeat parteis, quæ misceri possint; Mens tamen non habet, neque dici potest, aut intelligi, quid sui permisceat, seu conjungat cum variis partibus, quæ ne habet quidem quod applicare ad unicam possit? Cum deberes verò permissionis, aut quasi permissionis modum explicare, & difficultatis nodum solvere; quænam explicatio, quæ solutio fuit? Nempe nihil aliud dixisti; quam non debere me insituri mere comparationem cum permissione corporum, quia
sunt

*sunt toto genere diversa. At nonne hæc ipsa fuit quæstio, quomodo res toto genere diversæ à corporibus, permisceri possint instar corporum, aut cum corporibus quoque ipsis? Et putas-ne te sic fecisse satis hocce verbulo, ut non remaneret dubitandi locus? An non saltem dicendum erat, qualis-nam permissio, aut quasi permissio ex parte Mentis intelligeretur? Quomodo Mens possit intelligi præsens corpori, id est pluribus partibus; quoniam corpus nullum est, intelligiturve sine partibus; quæ inextensa cum sit, ne potest quidem esse præsens uni, quantumlibet minimæ parti; seu ne minimo quidem puncto Physico, quod extensum est; sed ad summum uni puncto Mathematico, quod neque extensum est, neque corpus? Et venerat quidem in Mentem, propter illam quasi permissionis vocem Ciceronianum illud usurpare, *Quid sit quasi corpus, aut quasi sanguis intelligere non possum. Ne tu quidem, Vellei, sed non vis fieri. Et, Nunc illud quasi corpus, & quasi sanguinem quid intelligis? Ego enim scire te ista melius, quam me, non fateor solum, sed etiam facile patior. Cum quidem semel dicta sunt, Quid est, quod Velleius intelligere possit, Cotta non possit? Itaque corpus quid sit, sanguis quid sit intelligo: quasi corpus, & quasi sanguis quid sit, nullo prorsus modo intelligo. Nec tu me celas, ut Pythagoras alienos; nec consulto dicis occultè, tanquam Heraclitum; sed quod inter nos liqueat, ne tu quidem intelligis, &c.* Venerant, inquam, ista in mentem; sed obijcienda tamen, & inculcanda non censui; confusus te quodam saltem modo aut verborum tuorum rationem redditurum, expliciturumque; aut confessione ingenua ignorare te professurum; at tibi neutrum placuit, ut neque etiam declarare, quid fieri possit, ut Mens, si incorporea, si inextensa, si solutionis continui, si transmutationis, atque aded à iterationis incapax sit, contingi tamen possit à corpore, & dolorem ab ipso illatum sentire; ac universè quomodo corporeum cum incorporeo communicet? Quæ prætermittenda profectò non fuerant, neque explicationis loco captanda effugia, quibus tacitè præterlabereris, regerendo nempe quod dubitationis præsentis non fuerat, sed illius potiùs ex antecedentibus, in qua quærebatur, quomodo species corporea recipi in Mente incorporea, ut corpus intelligat, possit?*

Nimirum subdis, *Parteis in Mente non esse imaginandas ex eo, quod ipsa parteis in corpore intelligat. Sed utcumque sit, quidnam regeris? Pergis, Unde enim habes id omne, quod Mens intelligit, in ipsa esse? Profectò, si hoc esset, cum magnitudinem orbis terrarum intelligit, illam quantum etiam in se haberet; atque ita non modò esset extensa, sed etiam extensione*

I II.
Etsi species
extensa sit;
non sequi
propterea
eam esse
tantam,
objectum,
quod re-
major præsentat.

majore orbe terrarum? Acutè nempe, quia Continens debet esse majus contento. Imprimis porro, propterea-ne solvitur à te difficultas? Allegas, ut ajunt, inconveniens; fac nescire me illud declinare, quia requiris unde id habeam; An mea ignorantia-tibi proderit, ut non propterea ad scrupulum dubitationis eximendum tenearis? Deinde, non opposui quidem præcisè parteis esse in mente imaginandas, quòd parteis in corpore intelligat; sed perinde est (quandò, supposito quòd corpus per speciem, ideamve corporis intelligat, quæsi quomodo talis species, cum repræsentet parteis, neque possit proinde partibus carere, recipi valeat in subjecto carente prorsus partibus.) Quæris consequenter, unde habeam; id omne, quod mens intelligit, in ipsa esse debere? Quam lepidè verò id quæris? Quasi verò ex verbis meis captare ansam debueris fingendi me existimare totum Montem, dum à Mente intelligitur, esse reipsâ, seu per seipsum in intellectu, in cerebro, aut intra caput; adeò ut Cranium id contineat, debeatque proinde esse majus monte? Annon quæstio fuit de modo, quo res cognitæ sunt in cognoscente, & quo vulgò admittunt nihil esse in intellectu, nisi in sensu præfuerit? Et, cum res soleat explicari per ideam, seu speciem, quæ id, quod intelligitur, repræsentatur: an-non fuit solum quæstio de modo, quo talis idea seu species intellectiõis objectum repræsentativè continens, est in Mente intelligente? Ecquid ergo quæris, Unde habeam id omne, quod mens intelligit, in ipsa esse debere? Inde quippe habeo, unde cæteri, unde etiam tu, qui admittis nos intelligere per ideas, seu species, quibus res repræsentativè, sive objectivè sunt in intellectu, atque adeò in mente? Quare, & cum ais, Profectò, si hoc esset, cum magnitudinem orbis terrarum intelligit, illam etiam in se haberet; id ipsum respondebo, & admittam, quod respondendum quoque, & admittendum tibi sit; scilicet Mentem habere in se objectivè, seu per ideam, æc speciem, magnitudinem orbis terræ. Cum autem pergis, atque ita, non modò esset extensa, sed etiam extensione major orbe terrarum: Aut dicam te pravè colligere, qui ex modo inexistendi ideali, seu, ut vocant intentionali, argumentaris ad modum inexistendi realem, seu quo res in seipsis, extrâque cognoscentem sunt; aut saltem concedam eo modo, quo dices Mentem continere non ideam Terræ duntaxat, verùm etiam Mundi totius; seu virtutem intelligendi ejus non terminari ad ideam magnitudinis terræ, sed extendi præterea ad ideam usque Magnitudinis Mundi; còque sensu mentem non modò esse extensam, sed extensione etiam

etiam majorem orbe terrarum ; utpote quæ non solum ideam orbis terrarum contineat ; verum ipsius quoque Mundi , qui orbe terrarum est major. Atque ita quidem , cum respondero , tibi satisfactum putabo ; sed non erit , cur putes propterea mihi satisfactum ; quasi tametsi idea , seu species tenuissima sit , ac minutissima res ; debeat idcirco inextensa , partiumque prorsus expers admitti. Quippe difficultas eadem semper manet , *quomodo idea parteis representet , si caret ipsa partibus ?*

Et , ut hoc verbum adjiciam , constat primum de specie visus , I V.
eam partibus præditam esse. Est enim Retina in oculi fundo speculum quoddam concavum , in quo turris , exempli causa , imago *Quæ ratio-
na imago
rei visibilis
magna in
parva oculo
li capaci-
tate im-
primatur:
eadem vi-
deri im-
primi in
longe mi-
nori, cere-
bri, aut
mentis.*
sic depingitur , ut ipsa intercedente , facultas visus turrim percipiat. Porro hæc imago in retinæ puncto non depingitur , sed in aliqua portione ipsius ; id quippe experientiâ constat , ex qua etiam habemus coire radios lucidos , à quibus species rei non differt , non in ipsa sanè retina , sed aliquantò citrà , hoc est , intra humorem vitreum ; aded ut facta decussatione , propter trajectionem per crystallinam , dilatati non-nihil radii incident distinctè in distinctas retinæ parteis. Et certè vel ipsa conspiciilla , quæ prout convexa , vel concava fuerint , decussationem , coitionemve aut abducunt , aut promovent , satis arguunt dilatationem hujuscemodi necessariam esse ; potestque res peroptimè ex comparatione telescopii intelligi , per quod trajecti imaginis radii , ut picturam creent , non in ipso coitionis puncto , sed ultra ipsum sunt excipiendi. Occupat itaque imago certam portionem retinæ ; quantam nempe radii ex objecto , v. c. turri prodeantes attingunt. Quare & cum apparentia maximi , seu totalis visionis objecti sit hemisphærium circiter , quod cavitatem retinæ apertione pupillæ limitatam sui specie compleat ; ided tanta turris apparebit , quantam partem occupabit illius quali hemisphærii ; atque aded quantam portionem in cavitate retinæ per sui speciem obtinebit. Vnde si oculus tantopere recedat , ut turris semper minor , minorque hemisphærii portio evadens , non sit denique , nisi velut illius punctum , sicque ex ejus specie non-nisi punctum in cavitate retinæ sit , imagoque ipsa non pingatur , ut parteis habens , & alicujus extensionis ; tum ne imago quidem erit , & turris fiet planè invisa. Deinde , ut res transferatur in cerebrum , in quo vis esse speciem imaginationi inservientem ; non potest sanè ea species , si in puncto sit , imago turris esse , aut dici ; quandoquidem , ut imago sit , parteis habeat necesse est , quæ sint partium turris repræ-

sentativæ. Et fac minorem, quantum voveris eâ, quæ fuit in retina, ut reipsâ partes nervi optici, in quem retina colligitur, quæque in cerebrum implantatur, contractiones sunt; quantulumcumque tamen sit, necesse est semper ut parteis, extensionemque aliquam habeat. Denique, ut ad ipsam mentem; cum saltem separata Mens intelligere turrim possit, atque adeo specie ejus informari, fac speciem, quantum voles tenuem, minutam, exiguam; oportet tamen, ut quia parteis, atque extensionem repræsentatura est, parteis, extensionemque habeat, sitque saltem extensior Mathematico puncto. Neque verò necesse est, ut sive imaginatricis, sive intellectus sit species, tot propterea parteis, quot ipsa res habeat; Nam ne ipsa quidem visus species tot habet, non dico ex internis, sed ex superficialibus; quoniam ob superficiei inæquabilitatem, paucae illius partes sunt, quæ pupillæ, ac retinæ fundo obvertuntur, suisque picturam in ea exprimunt: Cui sanè rei consequens est, ut ex corporibus tam propioribus, quàm ad extremas usque stellas remotioribus, quæcumque videntur sub eodem angulo, seu eadem portione memorati jam quasi hemisphærii, æquè magna appareant; quod ex remotioribus, tametsi maximis, non plures partes oculo obvertantur, suisque speciem imprimant, quàm ex propinquioribus, minimisque. Quod quidem dico propter ideam magnitudinis orbis terræ. Nam veluti cavitās illa, seu capacitas retinæ est veluti Physicum centrū, in quod terminantur omnes anguli complectentes magnitudinem Solis, Lunæ, cæterorumque corporum, toto circiter hemisphærio supra oculum expansorum; & retina propterea non habet tantam magnitudinem, quantam Sol, Luna, & cætera corpora in seipsis habent; Ita nihil videtur ob stare, quò minus Mens quoque extensionem habeat, quæ tametsi illa cavitāte retinæ, aut complexu quoque nervi optici longè minor intelligatur; sit tamen adhuc veluti centrum, in quod terminentur anguli rerum omnium ipsi objectarum, interque ipsas res magnitudinis orbis terræ; absque eo, quòd propterea tantam magnitudinem habeat, quantam objecta simul omnia, ac specialiter orbis terræ: Quippe cum latera anguli cujusque tantam circuli, ac sphæræ portionem analogicè complectantur, seu longius producta, seu propius terminata fuerint; & res proinde maxima repræsentari per minimam valeat. Quamquam hæc non possunt paucis explicari; & se utcumque res habeat, difficultas semper insoluta restat, *quomodo imago parteis repræsentet, si cæceat ipsa partibus.*

PRÆ-

PRÆTERITIO.

*De quibusdam capitibus superstitiis ex postrema
Meditatione.*

Cætera prætereo, quæ fusè & eleganter prosequeris; ut ostendas esse aliquid præter te, ac Deum. Deducis enim esse tuum corpus, facultatesque corporeas; itémque alia corpora, quæ in tuos sensus, ac teipsam immittant sui species, efficiantque voluptatis & doloris passiones, unde sunt in te prosequutio & fuga. Ex quibus hunc tandem fructum colligis, ut cum omnes sensus circa ea quæ ad corporis commodum spectant, multò frequentius verum indicent quàm falsum; idcirco inferas te amplius vereri non debere, ne ea falsi sint, quæ tibi quotidie à sensibus exhibentur. Idem consequenter dicis de insomniis, quæ quia non perinde cum reliquis omnibus actionibus vitæ à memoria conjunguntur, ut ea quæ vigilianti occurrunt; idè statuis tibi res veras non in somnis, sed vigilianti occurrere. Et, *ex eo, inquis, quòd Deus non sit fallax, sequitur ominò in talibus te non falli.* Quod, ut admodum piè dicis, ita cum postremò concludis, *Esse humanam vitam erroribus obnoxiam, nostræque naturæ infirmitatem esse agnoscendam, facis profectò quàm optimè.*

RESPONSIO.

Hic nulla in re mihi contradicis, & satis multa nihilominus dicis, ut nempe lector inde cognoscat ex prolixitate verborum, rationum tuarum multitudinem non esse aestimandam.

INSTANTIA.

DEVM immortalem, ecquàmnam capis coronidis hujus constituendæ ansam! Insultas me nulla in re, tibi hic contradicere. Et nonne ipse testatus sum velle me heic contradictionem præterire? Non lanè, quòd multa contradicenda non occurrerent, ac non subnotanda, inter cæteras, ratiocinatio illa videretur, quæ fuit tibi prima, & summa Camæna,

Tum solum potui certus esse vigilare me, non dormire, cum post

R r 2

præce-

Fuisse occasionem insultandi abs re, & præposterè, (sed de industria tamē) capitulam.

præcedentia omnia ratiocinia cogniturus fui Deum esse, & fallacem non esse:

Atqui nunc solum post præcedentia omnia ratiocinia cognosco Deum esse, & fallacem non esse:

Igitur nunc solum sum certus vigilare me, non dormire.

Verum nihil amplius contendendum duxi, partim quòd defessus jam forem, partim quòd hoc præsertim loco occurrerent quædam, quæ commendarentur. Itaque nihil amplius tibi contradicens comprobavi solum ea, quæ dixeras; Tu nihil moratus meam præteritionem, nihili ducens probationem, fingis me voluisse contradicere, & non potuisse tamen; quoniam, *hic*, inquis, *nulla in re mihi contradicis, & satis multa nihilominus dicis.* Heinc enim est, cur cum distingueres dubitationum articulos, istum, qui debuerat seponi, cæteris attexueris, ut esset unde insultares me in eo nihil dubitasse, seu, ut ais, contradixisse: Quanquam demiror te, si volebas articulum istum habere paris naturæ cum cæteris, non agnovisse quàm brevis esset ad præcedentia comparatus. Et quorsum tamen de eo dixisti, quod non dixisti de cæteris *me satis multa in eo dixisse?* An-non ut fieret tibi occasio, cur hæc verba subjungeres, *Vt nempe Lector inde cognoscat ex prolixitate verborum, rationum & naturarum multitudinem non esse æstimandam.* Ego porro, cum is non sim, qui mearum rationum sive multitudinem, sive magnitudinem magni à Lectore æstimandam putem; considero tamen dicere id te, ubi neque usus prolixitate verborum sum, neque ullam volui rationem proponere; sed simpliciter enunciare, *fuisse te fuisse, & eleganter prosequutum*, &c. qua in re, si ratione carui; affectus saltem improbandus non fuit. An fortè verò ita fecisti, quia existimasti Lectorem cætera prætervolaturum, & immoratum solum ad calcem, judicium exinde de tota Dubitationum serie laturum? An quia, cum non pari encomio prosequutus cætera fuisset, ferre non potuisti sola hæc laudari, quasi suspicari Lector posset non esse omnia perinde laudanda? An quia, cum dixissem, *te admodum pie facere*, credidisti posse hæerere Lectorem, an-non potiùs concluderes ex principis fidei, quàm demonstrares ex principis naturæ? An quia cum excepissem *fecisse te quàm optimè*, dum diceres *humanam vitam esse erroribus obnoxiam, nostræque naturæ infirmitatem esse agnoscendam*; Subveritus es, ne vel seriò, vel de te dictum Lector putaret; quasi quicquam diffideres de rebus à te demonstratis? Vt cumque fuerit, ego tuam tibi de te opinionem nunquam invadebo; neque meum in scri-

in, scribendo Genium propterea sequi definam; quantumcumque tu sis in eo prolixitatem improbaturus. Poteris me certè occasione eorum, quæ hæcenus institi, verbosissimum dicere; Poteris salis ne micam quidem per tot ista verba respersam caussari; At non piget tamen, neque pœnitet, tum quòd non defraudàrim genium; tum quòd ipse solus non sis hujusce rei judex futurus.

C O N C L U S I O.

Hæc sunt, Vir eximie, quæ mihi circa Meditationes tuas adnotanda occurrerunt. Repeto non esse cur ipse ea cures, quòd meum judicium tanti non sit, ut haberi debeat apud te tantilli momenti. Ut enim cùm aliquis cibus palato meo suavis est, quem displicere aliis video, non defendo gustatum meum esse alieno perfectiorem; ita cùm menti placet opinio, quæ non arri-det cæteris, longè absom ut tuear me in veriore incidisse. Id potiùs puto verè dictum, suo quemque sensu abundare: ac tam propè iniquum habeo, velle ut omnes eadem sententià, quàm ut omnes eodem sint gustu. Quod dico, ut existimes tibi, per me, liberum esse, hæc, quæ censui, omnia flocci-facere, nulloque planè loco habere. Abundè erit, si pronum meum erga te affectum agnoscas, & non ducas pro nihilo venerationem tuæ virtutis. Potest fortè aliquid esse inconsideratiùs prolatum, ut inter dissentendum proclivius nihil est: id si occurrat, planè devoveo: tu duc lituram, & sic habe, nihil mihi fuisse antiquius, quàm ut demererer, & fartam rectamque tuerer amicitiam tuam. Vale. Scribebam Parisiis, Poëtidie Eidus Majas, an. sal. 1641.

R E S P O N S I O.

Hælenus verò mens cum carne disseruit, atque ut par erat in multis ab ipsa dissensit. Sed jam in conclusione verum Cassendum agnosco, illiùmq; ut præstantissimum Philosophum suspicio, ut virum candore animi, atque integritate vitæ celebrem amplector, & ejus semper amicitiam quibuscunque potero obsequiis demereri conabor. Itaque rogo ne illi grave sit, quod libertate Philosophica usus fuerim in ejus objectionibus refutandis; ut mihi profectò pergratum fuit quicquid in ipsis continetur. Et inter cætera gavisus sum quòd à viro tanti nominis, in Dissertatione tam longa, & tam accuratè conscripta, nulla ratio allata sit

quæ meas rationes oppugnaret , nullâque etiam in meas conclusiones , ad quam mihi non perfacile fuerit respondere.

I N S T A N T I A .

Fuisse objectiones absque duplicitate. Actum non de ipsa rerum veritate, sed de ratiocinationum vi. Benevolentia testatio gratæ excipitur, ac refertur.

E Go , vir eximie , idem sum , qui priùs . Scilicet unus sum , non duplex ; neque video quomodo caro seclusa Mente ratiocinetur , aut ratiocinari se putet . Tibi , qui videre potuisti , licitum fuit distinguere , & providere ne Mens tua ineptè contenderet , ac operam luderet , dum rem Amentem affaretur . Mihi , qui non sum tam acutus , licitum fuit meam ratiocinationem , si aliqua sum adversum te usus , non ad carnem , sed ad Mentem , si aliquam habeo , referre ; ac existimare proinde tuam Mentem mea cum mente , non cum carne differere . Ac si actum quidem fuisset inter nos (quemadmodum præmonitum , & interdum quoque repetitum fuit) de ipsa rerum veritate , ut puta Dei existentia , & Animorum immortali natura ; tum , si ea insania , quod absit , occupasset me , ut adversus ipsam argumenta congestissem ; concludere sanè jam posses , *Mentem cum carne differuisse , atque , ut par erat , ab ea dissensisse .* Verùm quia perpetuò contestatus sum de nulla re amplius agi inter nos , quam de energia ejus Ratiocinii , quod tu demonstrationem esse , ego non esse defendimus : vide quo jure te Mentem dicas , me carnem , hoc est rem Amentem voces . Quod certè dicis *gaudere te nullam rationem allatam esse , quæ tuas rationes oppugnaret , nullâque etiam in tuas conclusiones , ad quam tibi non perfacile fuerit respondere ; non est cur gaudium tibi invidiam , quod ad Rationes attinet ; cum suo quisque sensu abundet , & gaudere perinde valeat .* Sed quod ad Conclusiones spectat , quatenus nempe propositiones de ipsa veritate sunt ; non est profectò cur tu solus de ipsis , tanquam tuis gaudeas ; cum sint mea quoque , & omnium piorum , rectèque sentientium ; neque ullam adversus ipsas rationem adferre aut voluerim , aut venire mihi potuerit in mentem . Prætereo porrò , si conclusiones , quatenus ex tuis principiis deducuntur , accipias ; tum declaratum superius esse nihil adversus ipsas aliud objici , quàm quod ad oppugnandum rationes , hoc est consequutionum vim ad eliciendum ipsas adfertur ; tum heic permittendum lectoribus esse , ut dijudicent , nulla-ne ratio sit à me allata , quæ tuas rationes oppugnet ; & idem-ne , an aliud sit , *facile esse respondere , & facile esse bene respondere .* Quod superest , non modo gratè , sed gratissimè

tissimè etiam, ut par est, accipio, quicquid hoc loco benevolentia, commendationisque respergis. Non sanè, quòd me eum agnoscam, quem te dicis suspicere; sed quòd, dum mihi plus tribuis, quàm merear, id referendum sit ad affectum, quo me devinciendum voluisti. Heinc tametsi mihi huc usque stylus fuit paulò agrestior; non idcirco tamen de mea in te colendo, amandoque propensione quicquam decessit. Perspectum mihi semper est, quantum inter ingenia nostri hujusce ævi excellas: memini semper quanti habuerim posse colere amicitiam tecum. Quare & velim sic accipias, ut si quid austerius dictum sit à me, id attribuas simplicitati, qua reputavi posse me legem abs te præscriptam sequi. Tu visus es id appellare Philosophicam libertatem; ego, cum non satis intelligerem, tuum mihi exemplum proposui. Et quamvis sollicitè cavi, ne paria tuis regererem, quæ tu in me congefferas: si quid tamen fortè irrepsit, quod improbandum existimes; est cur condones, tanquam prius tuo ipsius facto probatum. Is sum, qui naturâ, & studio, ad morum lenitatem feror; sed visus tamen sum videre, voluisse te meam sollicitare patientiam; ratum impunè illudi Tauro, cui scenum in cornu non sit. Exinde sanè effectum est, ut nihil alioquin repositurus, interesse censuerim instando submonere te, non fuisse eo pacto cum viro nihil de te malè merito agendum. Imposterùm fiet, ut ipse præscribes; Quòd me attinet, hoc ingenuè testor, non fore unquam, ut per me stet, quin me, si tanti duxeris, tui observantissimum, & obsequentissimum experiare. Vale. Parisiis, Eidib, Mart. M D C X L I I.

F I N I S.

E R R A-

E R R A T A.

IN Epistola Typographi ad Lectorem, pag. 2. l. 4. ἀγασθὶς ἢ ἰσχυρῶς. Et l. 12. λαλῶν. pag. 5. lin. 25. alterique. ibid. 32. Quamobrem. p. 8. l. 10. putariat. ibid. 32. percipi non intelligi. p. 9. l. 18. perinde. p. 10. l. 16. Dicis. p. 16. l. 35. accipendas. p. 17. l. 19. rectam non facere. p. 18. l. 28. angulos, &c. te. ibid. l. 33. anguli, &c. fiant. p. 19. l. 18. ut ipsis. p. 21. l. 6. πῦρ ἢ ἀγρῶν. p. 24. l. 32. quidpiam. p. 37. l. 32. illa. p. 39. l. 9. Archimedei. p. 44. l. 21. excepti. p. 57. l. 19. Bruti esse. p. 74. l. 3. consilii; ut. p. 85. l. 12. quale. p. 89. l. 14. Liquida, &c. ita etiam in mente totidem sunt; unum, quod habeat vim cognoscendi albedinem cera; aliud, quod habeat vim cognoscendi ejus duritiem; aliud, quod mutationem duritiei, sive liquefactionem, &c. Possit enim quis nosse duritiem, qui non idem novit albedinem, nempe qui cæcus natus est, & ita de cæteris. Vnde clarè colligitur nullius rei tot attributa cognosci, quàm nostra mens; quia quotcumque cognoscuntur in qualibet alia re, tot etiam numerari possunt in mente, ex eo, quòd illa cognoscat; atque idèd ejus natura omnium est notissima. Denique hic obiter reprehendus, quòd cum nihil in me esse admiserim præter mentem, nihilominus loquar de cera, quam videam, quam tangam; quod sine oculis, & manibus fieri non potest: sed notare debuisti me accitèd monuisse non ibi agi de visu, & tactu, quæ suorum ope organorum, sed de sola cogitatione videndi, & tangendi, ad quam organa illa non requiri quotièd in somnis experiuntur. Nec sanèd hoc non notasti; sed tantum monere voluisti, quàm absurda sæpèd, atque injusta cavillationes ab iis, qui non tam aliquid intelligere, quàm impugnatèd satagunt, excogitentur. Omissum pag. 95. Dubitationis l. argumentum, supplebit Lector ex Indice huic operi præfixo. p. 112. l. 12. Et, putas, re- p. 122. l. 10. nullam me habere. p. 126. l. 3. acari. p. 133. l. 27. aliquid. p. 141. l. 1. ferim; ad phantasiam reduxerim; ad mentem, p. 146. l. 20. ob non ad. p. 147. in marg. Capitalis illa. p. 149. l. 6. faceres. p. 153. l. 23. qualesis. p. 156. in marg. Falsum. p. 162. l. 7. cætera. ibid. l. 14. ne non nec. p. 163. l. 32. infinita. p. 164. l. 33. non ab. p. 166. l. 25. qua sit à se. p. 171. l. 37. ob suæ naturæ. p. 179. l. 2. & non. p. 180. l. 28. te cum. p. 186. l. 6. attinet. p. 188. l. 8. loquendo, materiam, & formam, videlicet. p. 190. l. 7. dices. p. 195. l. 18. qui ne. p. 201. l. 12. Scirpos. p. 205. l. 28. per illum. p. 206. l. 6. sed duo. ibid. l. 2. in car. ibid. l. 2. 6. quoque me. p. 209. l. 31. nunc sit. p. 216. l. 9. de te ipsa. p. 220. l. 7. sit. p. 228. l. 33. fit. p. 229. l. 31. vita ferretur. p. 230. l. 19. 20. orichalcum. p. 231. l. 1. orichalci. p. 237. l. 27. similem. p. 245. l. 16. possint. p. 265. l. 27. chiliagonum. p. 266. l. 4. in se. p. 293. l. 23. Perges. ibid. l. 24. perget. p. 300. l. 14. quàm quæ. p. 302. l. 4. gloriatis. p. 305. l. 31. gratià defendunt. p. 316. l. 17. præcedentis.